

SUMMA

THEOLOGIE CHRISTIANÆ.

C. 11-9.

AUTHORE



ROGERO BOYLE

Episcopo Clogherensi.

DUBLINII, Typis Regiis.

M: DC. LXXXI.

S. C. M. A.
THEOLOGICAL CHRISTIAN



2131'82

UNIVERSITY
LIBRARY
CAMBRIDGE

Præfatio

A D

LECTOREM.

NON hæc scribo Theologis, quibus comperta esse debent, sed Theologiæ studium aggredientibus; necessarium reputans, ut integram quisque artem teneat, in cujus ulla parte alios bene instruat. Sed ut necessaria sit Summa Theologiæ, tamen post tot Summas, Institutiones, Syntagma, locos communes, &c. Quid opus est hac Summulâ? Dicam. In primis pigebat non haberi Corpus Theologiæ, quod Ecclesiæ Anglicanæ sit ex omni parte consonum, sed cogebamur Magistros foris accersere; unde Matri Ecclesiæ minus eramus benevoli, alique aliis additiores nobismet invicem infesti devenimus; & erat malorum serax discordia.

Secundo, Non mihi contigit videre Corpus Theologiæ, in quo aut Philosophica à Theologicis, aut Judæica à Christianis, ritè secernerentur; unde contigit Ecclesiæ ut multoties vexaretur litibus de iis, quæ aut nihil attinent aut in Scholâ philosophicè peragi debuerant.

Tertiò, Plerique Theologici Scriptores sua dogmata cum Articulis Fidei Christianæ indiscriminatim, eodemque tenore discentibus obtrudunt, omnia pariter confirman-tes Textibus sacris. Hinc, discentes cum se scientiâ Theologicâ completos putant, serè non nisi instantur opinionibus humanis; & capti alios decipiunt, iis omnia offeren-

A

tes

Præfatio ad Lectorem.

tes ut Doctrinas Christianas quæ pro salibus ipsi acceperant.

Quartò, Ecclesia in multas partes diffracta est; jam moris est, ut quisque suæ partis Doctrinam pro vera edat; Doctrinam Ecclesiæ verè universalis quis exhibet?

Quintò, Alii aliam sibi regulam Fidei Christianæ assument, nullam (quantum mihi scire licuit) satis demonstratam.

His malis mederi volui; nec fuit inutile consilium; in eo verò exequendo quid perfecerim, tu Lector judicabis.
Vale.



Summa Theologiæ Christianæ.



Pheologia est Doctrina de Deo. De Deo autem alii aliter sentiunt & loquuntur. Mihi propositum est ob oculos Lectoris ponere Christianismum, *i. e.* sensa Christianorum de Deo. Hujus originem expendam & partes. Nec quidem ejusquidpiam in obscuro eisore arbitror, qui hæc duo comperta habuerit, scilicet & unde ad nos devenerit hæc Doctrina, & quid præ se ferat.

Pars prima hujus summae de Origine Theologiæ Christianæ.

Christianis omnibus in ore est hanc Religionem esse cœlitus oriundam, veramque Divinæ Voluntatis revelationem exhibere. Id autem nostris & Infidelium cor certum facere, *hic labor, hoc opus est.* Quod tamen cum Deo aggrediamur, variorum Authorum sententias & argumenta examinantes, donec eo pervenerimus, ubi sistendum videbitur.

S E C T. I.

De credibilitate Religionis Christianæ ex Argumentis probabilibus.

I. **N**onnulli videntur fidem ab opinione non secerne-
re, resque Religionis materiam aiunt esse inca-
pacem demonstrationum, inque ingenti probabilitate
qui-

quiescendum esse putant. Articulos quidem Doctrinae Christianae verissimos esse, non tamen demonstrationes afferre, nec cum infallibilitate suscipi, sed cum certitudine quadam inferioris gradus. Nec haec inermes afferunt.

2. Nam primo aiunt, Aristoteles dicit demonstrationes non esse expectandas in moralibus. 2. Miles praelium init incertus victoriae, Arator incertus messis facit fementem, &c. Si ergo religionem non suscipis nisi demonstratam, ei iniquior es quam aliis humanae vitae studiis. 3. Multa quotidie indubitanter admittimus sine demonstratione, ut Virgilium fuisse Authorem Aeneidos, Homerum Iliados, &c. 4. Vulgus non est capax demonstrationum; num nec Religionis?

3. Verum his non esse cedendum puto. Nam 1. Nihil obnixius exigitur à Discipulis Christi, quam firma & ab omni dubitatione abhorrens Fides; qui autem firmam requirit Fidem sine argumento convincente, is effectum requirit sine causa.

4. Ultra hoc, exigitur ubique terrarum à Christianis obsequium, quod nisi firmissima fide fultum, non esset licitum, nempe mori pro Christo. Per naturam enim cuique incumbit vitam suam tueri; at vox naturae est vox Dei. Non licet ergo vitam prodigere ad nutum hominis quem non certo scimus esse à Deo missum.

5. Addo, Nos aut firmam habere fidem aut nullam; nam fides est assensus, dubitare autem est assensum suspendere; ergo aut nullam habemus fidem de hoc vel illo, aut dubitationem omnem superavimus, *i. e.* certum sumus. Certitudo etiam non capit plus vel minus. Nam certitudo est πληροπεία seu plenitudo iudicii; ergo ut pleno non est plenius, sic certo non est certius. Neque hic timenda sunt nomina demonstrationis & infallibilitatis. Quid enim est demonstratio, nisi argumentatio

con-

convincens seu certum faciens? Et qui est jure certus, est eatenus infallibilis. Unde autem homo sit certus & infallibilis disputatum suppono in Philosophia. Ad argumenta autem contra sentientium sic respondeo.

6. Mihi impræsentiarum non vacat Aristotelici Textus explicationi accommodandæ; nec testimonio me premittor in opere, ubi nullius, nisi omnium simul Christianorum authoritate fulto mihi met procedendum est. Tantum consulat, rogo, Lector librum de Cive, in quo Author indubitanter asserit se nihil non demonstratum posuisse, uno dogmate excepto. Non est ergo novum demonstrationes in moralibus expetere. Quin ego existimaverim, inter omnes Philosophiæ partes moralem esse demonstrationum feracissimam, ut pote cujus subjectum, scilicet *esse* naturæ rationalis, sit nobis notissimus. Hic enim vera dicentes appellamus experientiam universalem, & tot habemus testes quot auditores.

7. Secundum argumentum dissimilia, adfert pro similibus, e. g. præliari quid est ultra periclitationem vitæ, quæ quandoque est necessaria etiam sine ulla probabilitate victoriæ? At suscipere Religionem est dare assensum mentis, quod adeo non est necessarium ut nec sit justum nec possibile sine argumento convincenti. Multi levibus argumentis convincuntur, sed convincuntur, antequam credunt.

8. Quod tertio loco adfertur levius est quam ut à me adhiberetur, nisi à viro docto & perquam ingenioso allatum fuisset. Sed ad rem. Multa quidem admittimus quotidie non demonstrata, verum hoc non est credere sed negligere. Nec in horum classe reponenda est Religio. Interea monitum Lectorem velim, multas ad nos venire demonstrationes sine pompa dialectica. Virgilium fuisse, i. e. temporibus Augusti, creditum fuisse

se authorem *Æneidos*, quis nostrum potest ambigere? At nisi tenore traditionis convictus quis posset credere?

9. Postremo, Ignorantiam indoctorum ne nimis aculemus. Sunt homines & licet indocti, rationis naturalis usum habent; ergo quo clarior quæque est ratiocinatio, eo ejus capaces sunt indocti. At demonstratio est ratiocinatio clarissima; vulgus ergo est capax demonstrationum quam aliarum argumentationum. Vulgus quidem nescit formare Syllogismos vocales, mentales efficit. Alterum quippe est opus artis, alterum naturæ rationalis, *i. e.* vulgus exercet facultatem ratiocinandi, at rationem suorum actuum aliis reddendi non est peritus. Sunt quidem illiterati, Aristotelis aut Euclidis perquam stupidi auditores, sed hoc oritur ex ignorantia solummodo terminorum; ut patet ex illo Ciceronis. l. 1. Tus. q. In libro Platonis qui inscribitur Menon, Pusionem quendam interrogat Socrates quædam Mathematica de dimensione quadrati. Ad ea sic ille respondit ut puer, gradatim tamen respondens eo pervenit quasi Mathematica didicisset. Sed quid moror indoctos? capebant Christianismum levibus argumentis; num ideo Christianismus levibus tantum nititur argumentis? Religio fortasse subigat plebem tironibus, at Triariis opus habet ut aggrediatur prudentes, qui nolint decipi.

S E C T. II.

De vi Voluntatis in Fidem Christianorum.

1. **C**hristianismum aut non suscipiendum esse, Caut esse firmissima fide tenendum, mihi videor conclusisse superiore sectione; proxime dispiciendum est, quo fundamento nitatur hec fides. Ac nonnulli quidem Christianam fidem voluntati acceptam referunt, perinde quasi credamus Evangelio quia amemus. Atque fateor ego quidem facile, *i. e.* levibus argumentis nos credere quæ volumus; ut vero justum demus assensum sine firmo (quoad nos) ad rationem argumento, id humani juris non esse puto. Qui enim aliquid esse credit ideo solum quia ipse illud esse velit, is voluntatem suam rerum esse dominam autumat; quod est insanire.

2. Sed, aiunt, non id volumus; quin amamus evangelium quia bonum est, & quod bonum idem & verum est, nam superne venit. Hic concedo falsam esse omnem religionem quæ impuritatis morum aut mater e aut nutrix. Concedo etiam religionem Christianam prohibere omne vitium, omnem imperare virtutem, adeo ut Christianismo universum suscepto, homines etiam in hoc mundo optime, *i. e.* felicissime viverent. Atque hinc sequitur, bonitate sua hominibus valde commendari Religionem Christianam. Si quis etiam non tam argumentis victus quam amore ejus bonitatis captus Christianismum capefit & colit, non dubium est quin hoc ei sufficiet coram Tribunali Christi, qui pollicitus est neminem qui ad ipsum venerit rejicere, & qui cum in terris ageret passim iis ut credentibus benefecit, qui vel minimam erga ipsum

sum benevolentiam ostenderint.

3. Postea vero multa persuadent, ne sic defendi patiar Religionem Christianam. Inprimis, Philosophia non minus proba exhibet præcepta, quam Religio Christiana; ergo hætenus non fuit necessaria revelatio cœlestis.

4. Dices, Præcipit quidem Philosophia omnem virtutem; sed Religio Christiana ulterius ad obsequium cogit animos, proposito præmio cœlesti. Respondeo, Philosophiam videri quidem mancā magistrā virtutis, quia præmium non proponit; præmium quoque à Religione Christiana propositum, ut alliciat, certum esse debet; nam prudentes nolint decipi.

5. Iterum, Satanas potest induere angelum lucis, & nimia constat experientia posse homines bonorum morum ostentationem pessimis consiliis prætexere.

6. Iterum, Nemini non videntur bona Præcepta Religionis suæ. Quid tum? dices. Tum inquam, defendis Religionem Christianam non melius quam Mahometanam Turca.

7. Postremo, Quædam imperantur à Christo, quæ nisi credentibus non sunt bona aut licita, ut mori pro Christo, &c. *Sect. i. n. 4.* Vide autem, qua vi concludas veritatem Evangelii ex bonitate Præceptorum ejus, cum præcipua ejus & peculiaria Præcepta non sint bona, nisi præsupposita fide quod Evangelium sit verum.

S E C T. III.

De Cælesti lumine Scripturarum sacrarum.

1. **N**onnulli cælestem quendam fulgorem verbæ Dei scripto prædicant inesse, quo sibi sine alio medio assensum cogit, sic ut, aiunt, si casu Ethnicus offendat Biblia sacra, eaque attente legat, ea nōrit esse revera Verbum Dei. Et hæc magnifice dici non inficior, sed quo argumento? Imo, respondeant, rogo, num hunc Bibliorum sacrarum fulgorem in stilo et caractere dicendi videant, vel in re dicta. Certe, in Scriptura sacra nihil est nisi verba & sententia. Sententia autem Evangelii seu res dicta abrenunciat huic nativo lumini, dum ubique prædicat se esse revelationem consilii divini liberissimi. Consilium certe liberum poterat non iniri, ergo ex natura ipsius consilii non liquet initum fuisse.

2. Nonnulli quidem contendunt Deum omnia agere necessariò; sed hōs pari facilitate convinco. Deus, ais, misit Filium in mundum, quia erat congruum Deo opus. At unde nosti tu hanc congruitatem? Nemō cum ratione dicat, Incarnationem verbi esse congruum Deo effectum, nisi qui & Deum & Incarnationem perfecte intelligit, i.e. nisi qui duo incomprehensibilia comprehendit.

3. Sed fortasse cælestis origo Bibliorum sacrarum ex eorum stilo seu phrasi apparet. Non mihi quidem; nam video omnes Ecclesiæ sacræ Scripturæ versionibus uti, easque æstimare firmæ fidei creandæ sufficientes. In quibus tamen versionibus dictio & quicquid est extra sensum, ab hominibus est, nec ostendit aut probat Divinitatem.

4. Iterum singula vocabula in Scriptura sacra sunt commenta humana; alioqui enim ab hominibus non intelligerentur. Dictio etiam seu singulorum vocabulorum structura est conformis regulis Grammaticæ & Rhetoricæ quæ sunt artes humanæ. At quod potest præstari viribus humanis, id præsentiam numinis non demonstrat.

S E C T. IV.

De Enthusiasmis.

1. **E**Nthusiastæ reddentes rationem Fidei Christianæ nihil nisi Spiritum Sanctum prædicant: *Huc ipsi, hunc omnibus verè Christianis unicum esse Doctrinæ Christianæ Magistrum.* Ac si se solos sic cœlitus speciali gratia doceri dicerent, nihil morarer ego quidem ut iis crederet qui vellet. Hoc autem esse commune omnibus Christianis, *i. e.* hunc esse modum quo Deus instituit Doctrinam Christianam propagandam & capeßendam esse, id vero pernegandum est, & hoc quidem argumento.

2. Deus non instituit eo nomine introducendam esse Religionem Christianam quo nomine ab hominibus jure recusari possit; sed jure recusarent homines Religionem Christianam, si prædicaret se non posse à quoquam aut accipi aut servari nisi docente Spiritu Sancto; palam enim foret quod suscepto Christianismo solveretur regimen civile; at soluto regimine civili status hominum est miser & exitialis, ergo & ipse vitari debet, & omnia ipsum introducens inque iis Religio Christiana. Singulas partes hujus Prosyllogismi fuscè ob oculos legentis posui

posui in Inquisitione in fidem sec. nec eorum repetitioni immorabor.

SECT. V.

Sententia CALVINI.



1. **F**Ere omnes Christiani fidem suam Scripturis sacris acceptam referunt. Scripturarum tamen sacram veritatem ex ipsis Scripturis non innotescere, ostensum est *Self. 3.* Unde ergo celestem earum originem elucidatam habemus? Alii aliunde petunt. Calvinus asserit *solum Spiritus Sancti testimonium cordibus singulorum affusum præbere sufficientem confirmationem veritatis Scripturarum sacrarum. Inst. l. 1. c. 7.*

2. Hoc mihi non placet hisce de causis. Primo, Minus honorificum videtur Scripturis sacris, ut semper egeant nova de cælo attestatione, quæ tamen non semper præstatur, nec unquam (nisi per externa miracula) ostendi potest. Tu credis Scripturas sacras esse Verbum Dei ob testimonium Spiritus Sancti cordi tuo præstitum, quod tamen nullo potes argumento patefacere. Hoc homini non illuminato nihil sonat nisi: Credis quia credis. Iterum, tu ais Infideli: *Ego credo Evangelio, tu non credis. Causa discrepantiæ est quod tibi non concedatur Spiritus quo ego fruor.* Quod quid est, nisi suum privilegium jactare, Scripturas autem sacras omni vi exinanire? Vide jam an deceat, Scripturas sacras confirmationi subicere quæ sit ob jactantiam odiosa, & ob invisibilitatem ridicula.

3. Secundo, Quibus sufficienter adhibetur hoc testimonium Spiritus, ii Scripturas sacras rejicere non possunt, sed volentes nolentes credunt. Nam argumen-

tum sufficiens tum sufficienter adhibetur, cum convincit; at convinci de aliquo dicto, est ei fidem habere. Quibus vero non sufficienter præstatur hoc testimonium, ii Scripturas sacras amplecti non possunt, utpote quibus, ex Hypothesi, argumentum sufficiens non exhibetur. Hinc autem (cum nemo teneatur ad impossibile) sequitur neminem unquam rejiciendo Scripturas sacras peccasse, quod adversatur sensui totius Christianitatis.

4. Postremo, Nihil reperio discriminis inter Calvinismum in hac parte & Enthusiasmos; quod in presentiarum satis est notasse, cum id latius prosequutus fuerim in Inquisitione mea. *Sect. 6.*

S E C T. VI.

De Pontifice & Ecclesia Romana.

1. **C**ontendunt nonnulli *Ecclesiam Romanam esse fundamentum Fidei Christianorum*, nec ultra ejus sententiam quicquam quærendum esse. Si opponis, *Turcas Romanis plures esse, nec tamen Fidem mereri in tantæ molis causa*; Respondent, *Ecclesiam Romanam fulciri promissis Christi, & ope Spiritus Sancti esse infallibilem*, Ego vero regeo, prius ostendendum fuisse, quod Christus fuit & quod fuit verax, & quod ista promisit. Nunc quid dicitur? *Ecclesia Romana est infallibilis, quia Christus promisit eam gratia sua sustentare, & Christus est verax, quia Ecclesia quæ est infallibilis, ita prædicat.* Est hæc circuli observatio trita quidem, sed quæ alias confutationes reddit non necessarias.

2. Unum offendi Anglice conscriptum libellum (*The Statesmans Catechism*) in quo *Ecclesiæ Romanæ veritas*

veritas nititur miraculis quæ in ea quotidie eduntur. Ego vero concludo facilius mundo probari posse Religionem Christianam, quam quæ isti venditant miracula. Male autem ostenditur quicquam per obscurius. Inquis. Sect.

S E C T. VII.

De Miraculis Christi & Apostolorum.

1. **H**Actenus arenam Fidei Christianæ substratam vidimus, restat dispicienda probatio per Miracula Christi & Apostolorum, quæ petrae firmitatem pollicetur. Certe sic videtur, cum per Miracula Christianismus primitus mundo probatus fuerit, per eadem in omnia secula eum esse probandum; nec unquam deferenda esse illa arma, quæ mundo & inferno invitis, regnum Christi in tantam gloriæ molem evexerint.

2. Ac primum, id ratum habeo, Christianæ Religionis veritatem solis miraculis ostendi posse. Per miraculum designo effectum omnium causarum naturalium vires excedentem. Horum duo genera proponit Evangelium. Nonnulla objicit sensibus, ut curationes morborum, suscitationes mortuorum, Resurrectionem Christi, &c. Aliâ miracula Fidei tantum nostræ proponuntur, ut Incarnatio Verbi; Sessio Filii ad dextram Patris, remissio peccatorum, resurrectio carnis nostræ, &c. Jam, inquam, ratum habeo miracula ista invisibilia non esse capacia Fidei nostræ nisi vi miraculorum sensibilium. Miracula enim invisibilia seu credenda sunt opera supernaturalia, ergo non possunt colligi seu concludi ex ullo opere naturali; nam quod sequitur ex naturali est natu-

naturale ; ergo supernaturalia seu miracula ex solis supernaturalibus ostendi possunt.

Obj. *An non probamus existentiam Dei quæ est supernaturalis ex existentia creaturarum naturalium?* Respondeo, non probamus esse Deum, quia est creatura naturalis, i. e. procedens è causis naturalibus; sed cum omnia non possint procedere ex causis naturalibus concludimus aliquid creatum fuisse, & ex miraculo Creationis concludimus existentiam Dei.

3. Secundo loco affirmo, quodvis dictum per miracula sufficienter probari. Nam miraculum à solo Deo edi potest, ergo est Testimonium divinum, assensumque nostrum vendicat cuicunque dicto assertur probando. Nam ut ait Cartesius, *Licet videatur esse potentia ejusdem alios fallere, tamen bonitatis non est.* Disputatur, quod Deus possit creaturam rationalem aliquo modo in errorem inducere. De quo suo loco, impræsentiarum sufficit dicere, quod nobis non erit fraudi à Deo Optimo Maximo falli.

4. Periculosius objicitur, *Fucos & præstigias à veris miraculis difficulter internosci.* Sed respondeo, ut de aliis rebus, sic de miraculis judicandum est, per sensus scilicet & rationem, quibus, ut alibi ostensum suppono, non potest imponi nisi culpa decepti. Itaque ubi his satisficit, homini satisficit, nisi hominem velis ultra suas facultates sapere.

5. Instant, *Quod uni miraculum videtur, id alteri aut naturæ effectum aut fortasse vanum ac frivolum videri.* Quid tum? Tum, dicunt, *subsistere debemus & à judicando obstinere.* At, inquam, unusquisque tenetur suam rationem sequi non alienam. Sed, dicunt, *cum tot falsa se ostendent miracula, sapientis erit omnibus diffidere ne in hallucinationem incidat.* Certe, inquam, caute agendum est; si quid verò juste, considerantibus liquido

do miraculum est, non opus est nostræ ei non assentiri. *At nobis, inquit, satis est, naturam ducem sequi, cum Deus non exigat ultra id quod in nobis est. Quæ supra nos, nihil ad nos:* Respondeo: Expectare miracula inepti est, & sorte sua non contesti; oblati autem non attendere sine peccato non possumus. Nam ut effectus in genere proclamat causam, sic effectus supernaturales Dei sunt de Cœlo voces. Miraculis ergo oblati non attendere est obturare aures Deo loquente, & hoc non est facere quod in nobis est;

6. Demum obicitur *Non posse nobis liquere, hoc vel illud vere miraculum esse, quia cognitio nostra ad fundum naturæ non penetravit: Qui enim noverimus hoc effectum esse supra facultatem naturæ, dum quid natura possit non calleamus?* Respondeo, Neminem unquam Medicorum minutissimæ herbæ vires omnes percepisse; vulgo tamen effecta novimus totius herbarum generis vim excedentia, ut sensationem, intellectionem, &c. Sic, ignoramus multa quæ à natura fieri possunt & fiunt, aliqua tamen certo scimus ab ea fieri non posse, ut agere immediate in distans, solo imperio effectus reales producere. Quin omnes Philosophi naturam secundum certas leges operari statuunt; ergo per eos si quis operatur aliter quam per has leges, is facit miraculum.

7. Hæc posueram, & allatus mihi est liber, cui Titulus, *Tractatus Theologico politicus*; Nescio c. jus Authoris pus atque venenum. Sed hujus obloquii ipsi relicti, Positiones ejus de miraculis & Argumenta perpendamus. Iscap. 6. ponit. *Miraculum, i. e. factum aut contra naturam, aut præter naturam, aut non sequens ex natura esse merum absurdum.* Quod sic probat: *Natura necessario fuit ex essentia divina: Ergo quod repugnat naturæ, repugnat essentiæ divinæ.* Sic probat antecedens: *Natura fuit ex voluntate divina, ergo necessario.*

Hanc

Hanc consequentiam sic probat: *In Deo intellectus & voluntas, intelligere & velle idem sunt; sed intellectio est necessaria perfectioni divinæ, ergo & volitio est necessaria.*

8. Hoc unico Argumento probat Tractator positionem suam, in quo certe ego nihil video dignum tanto hiatu. Inprimis nego sequi necessitatem volitionis divinæ ex identitate ejus cum intellectu divina; nam unumquodque quo est perfectius eo virtutem habet minore cum mole, ut entis infiniti prærogativa sit, in omnimoda simplicitate perfectionem omnium entium etiam quantum vis oppositorum continere. Continet, ergo, Deus in una simplicissima entitate & necessariam cognitionem & volitionem liberrimam; quod fuscè disputatum suppono in Metaphysica ubi agitur de Natura Dei. Quod si hoc durum videtur, meminerimus non solum debere Deum esse incomprehensibilem, sed etiam multa in creaturis certe nondum comprehensa esse. De multis, inquam, in iis quæ sensibus obversantur, certum quod sint, non possumus tamen intelligere, quomodo aut sint aut possint esse e.g. certum est continuum componi, at impossibile videtur ut componatur aut ex indivisibilibus, aut ex semper divisibilibus, inter quæ tamen non est medium in quantitate. Ut ridicula sit arrogantia omnia essentia divinæ denegare quæ hebetudinem nostram superant.

9. Deinceps, Nego ex necessitate volitionis divinæ sequi absurditatem miraculi. Esto, pendente lite, quod Mundus creatus fuerit ex necessitate essentia divinæ, quod fluxerit ab essentia divina ut radii à Sole, sic ut eum potius natum diceret quam factum, ut inquit Albinus *Dial.* 3. Non hinc sequitur exhaustam fuisse in natura producenda omnipotentiam. Poterat natura sic procedere à Deo, possunt præterea sic procedere miracula

cula. In abyſſo omni potentiaſatis eſt utriſque. Fa-
teor quidem in hac ſuppoſitione neceſſitatis, nihil poſſe
evenire contra ordinem naturaſ, nam idem repugnaret
eſſentiaſdivinaſ.

10. Sed nec eſt miraculum contra naturam, at pror-
fus præter eam. Si cauſaſſecundaſaliquid agerent non
ſecundum leges naturaſ, jam illud monſtrum eſſet &
non admittendum; Deum vero non aſtringi legibus na-
turaſquomodo hoc naturaſrepugnat? Sed, ait Tracta-
tor, *miracula ſunt in natura.* Quid ſi fierent in natura,
cum non fiant à natura? Sed miracula non ſunt in na-
tura, ſed ſunt in mundo cujus natura eſt una pars mira-
culum altera. Omnia hæc putat ſe occupaviſſe Tractator
dicendo, *potentiam naturaſæquè latam eſſe cum potentia
divina, eſſe eandem cum potentia divina; unde ſequitur
nihil poſſe produci præter naturam.* Ecce aſſumptum an-
tecedens contra omnes Chriſtianos ſine umbra probati-
onis, quo quid magis *probat*? At nullam adducit *pro-
bationem*? Certe non invenio. Solum miſereſcit natu-
raſ, ſi ejus leges ſint minores potentia divina. Tum
Deo ipſi videtur timere, ſi neceſſe habeat ad miracu-
lum confugere ut voti compos fiat. Tum concludit ſe
exiſtimare hoc à ratione alieniſſimum eſſe. Quæ omnia
nihil ſignificant, niſi quod hic author deperit hypotheſin
ſuam. Sed non omnibus hic eſt ſenſus. Non illepide
autem monemur in margine, quod hic author *per natu-
ram intelligit non ſolum materiam ejusque affectiones, ſed
inſinita alia.* Inſinita alia? Quid hoc eſt niſi ludere?
Quis hinc ſciat quid ille velit per naturam? Ego per na-
turam hic intelligo omnes cauſas corporeas, & per
naturalia harum effectus. Quid per miraculum? Effe-
ctum omnipotentiaſpræter naturam.

11. Secunda Tractatoris Poſitio eſt: *Nos ex miracu-
lis nec eſſentiam, nec exiſtentiam, adeoque nec providentiam*

Dei posse cognoscere, sed hæc omnia longè melius percipi ex fixo & immutabili naturæ ordine. Quis sic comparat? Non ex miraculis, sed multò melius ex natura. Quæso, " non quotuplex est, " multo melius? Sed ad rem. Si sumis, inquit, miraculum pro effecto contra naturam, adeo non probabit existentiam Dei, ut scientiam omnem labefactaverit; nam si potest esse variatio in natura, tum potest esse in notionibus nostris naturalibus ex quibus judicamus; & si hoc potest esse, suspicabimur quod est, & sic de nulla re certi erimus. Respondeo, Miraculum non est contra naturam, ut dictum est; potest etiam variatio esse in mundo, sed non in natura, cujus leges sunt effata Dei, atque adeo immutabiles. Reddam explanatus. Est natura gravium descendere, at lapides projectos videas aliquandiu ferri sursum. Imo, dices, lex est naturæ quod debilius cedat fortiori. Per eam, dico, legem cedat Deo natura. Non est contra naturam lapidis ascendere vi impulsus externi, ergo non erat contra naturam ignis non consumere tres pueros in candente fornace, omnipotentia scilicet se interponente.

12. Sic iterum probat Tractator Positionem suam. Unumquodque probatur per id quod est evidens; at miraculum captum humanum superat, quia per causam naturalem explicari non potest. *Resp.* Hic Author semper assumit quod erat probandum. Miraculum fateor, nec potest explicari per causam naturalem, at bene per supernaturalem nimirum voluntatem Omnipotentis; itaque etiam miraculum non excedit captum humanum.

13. Tertio sic arguit: *Miraculum est opus limitatum, ergo non potest probare existentiam aut potentiam infinitam. Resp.* Effectum per miraculum existens in mundo est opus limitatum, sed miraculosa ejus effectio est super

super omnes regulas naturæ. Miraculum ergo est concretum ex opere & operatione, & jure operationis est illimitatum, atque adeo potentiam arguens illimitatam.

14. Demum, Hic Author videtur posse redargui ex dictis suis. *Natura*, inquit, *fluit ex essentia divina*; ergo inquam, non sequitur ex natura. Iterum ait ille quiquid non sequitur ex natura est absurdum. At rehero, natura per te non sequitur ex natura; num ergo est absurda & impossibilis? Sed hoc misso.

15. Tertio loco affirmo veritatem Christianæ Religionis evidenter ostendi per miracula quæ in Novo Testamento à Christo & Apostolis ejus memorantur edita, siquidem ea sic edita fuere ut ibi perhibetur. Ecce enim morbi identidem verbo curati, verbo ejecta Dæmonia, verbo suscitati mortui, &c. Fortasse, dices, hæc non sunt effecta autoritate loquentis, sed occulto Angelorum ministerio. *Resp.* Quicquid fit in mundo corporeo, per Spiritus id in probatione habet vim miraculi, quia Spiritus non possunt rebus nostris se interfere nisi Deo volente; alioqui enim Deus nos decipiendos traderet. Restat ergo inquirendum quomodo miracula Christi & Apostolorum ad nos longævi Christianismi sobolem tam certo devenerint, ut de iis sine erroris metu judicium feramus. Atque hoc ministerio Traditionis universalis perfectum fuisse contendendo. Sit ergo

S E C T. VIII.

De natura Traditionis humanæ in genere.

1. **T**raditio (ut hic quidem est usus) est per alios ad nos delatio alicujus facti cui adesse nobismet non contigit. Natura enim hominem oculis munivit ad præsentia capessenda, & ut absentia capesseret, auribus. Est autem scriptio artificialis quædam locutio, & lectio auditio artificialis.

2. Itaque omnis deferens vel narratione tradens præsens erat, i.e. dicit se præsentem fuisse illi facto quod narrat. Nam ideo tantum auditor opus habet narratore quia ipse non aderat. Dices: *Petrus narrat Joanni factum cui ipse non interfuit, sed à Paulo accepit.* Ergo, inquam, Petrus non dicit illud factum fuisse, sed se audivisse ex Paulo quod factum fuerit. Hinc *Hobbeus in Lev.* dicit (puto non sine malitia) quod inter Christianos, posteriores Martyres non erant Martyres Christi sed Martyres Martyrum:

3. Hinc observa objectum omnis Traditionis esse compositum ex facto quod dicitur contigisse, & modo quo pervenerit ad cognitionem narrantis. Ut si Petrus dicat se vidisse Paulum in foro; Paulus visus à Petro in foro est integrum objectum narrationis, cujus materiale est existentia Pauli in foro, formale est visio Petri. Si Petrus dicat se audivisse ex Joanne, quod viderat Paulum in foro; quod Joannes viderit Paulum in foro, est materiale narrationis; quod Petrus audiverit hoc ex Joanne, est formale.

4. Observa iterum, absentiam posse contingere intervallo vel temporis vel loci. Intervallo temporis si pater

pater senex narret filio, quod ipse juvenis viderat. Intervallo loci; ut si Europam nunquam egresso narretur quid factum sit nuper apud Perlas. Verum, eadem est ratio certitudinis & incertitudinis utriusque hujusmodi Traditionibus, atque adeo una erit utriusque Tractatio.

5. Observa iterum, Traditionem esse simplicem vel multiplicem. Traditio simplex est quæ sistit in uno narrante; ut cum quis ait se vidisse vel audivisse. Traditio multiplex seu plurium ordinum est, quæ per multos deinceps Authores pervehitur; ut cum quis dicit se audivisse hoc ex alio qui illud viderit, aut fortasse qui dixerit se ex alio audivisse, & sic fursum ad Authorem facto præsentem.

6. Atque hinc constat in Traditione multiplici veritatem novissimæ Traditionis pendere ex veritate singulorum Traditionum antegressarum, sic ut una quavis fallente tota Traditionum catena disrumpatur. Et

7. Quo diutius durant hæ Traditiones, tanto onusti is est novissime tradentis Testimonium. *e.g.* Narret quid Petrus Paulo, idem narret Paulus Joanni, Joannes idem Thomæ. Hic Petrus dicit se vidisse, Paulus dicit se audivisse ex Petro qui dixit se vidisse, Joanni vero incumbit dicere se audivisse ex Paulo, qui dixit se audivisse ex Petro qui dixit se vidisse.

8. Interea: advertendum est, hanc multiplicationem asseverationum in Testimonio novissime tradentis nihil prorsus derogare veritati ejusdem Testimonii. Nam in Testimonio ferendo non requiritur ut testis omnia meminerit, sed solum ut nihil dicat nisi quod meminerit; & si dicit se trium meminisse, tam est credendus de tribus quam esset de uno tantum.

9. Demum, Constat in multiplici Traditione examinanda incipiendum esse ab immediate seu novissime tradente;

dente; nam per eum solum cæterorum Testimonia nobis innotescunt. Et hæc sufficiat posuisse de Traditione humana in genere.

S E C T. IX.

De natura & vi Traditionis universalis.

1. **T** Raditio universalis est *narratio præ se ferens auctoritatem omnium hominum*. Non quod adhiberi possint omnes omnino homines in unum, sed si tantus hominum numerus præsto sit ut nulla possit subire suspicio mendacii, jure dicitur traditio universalis, quia satis testium est instar omnium hominum. Quam plurimi dicunt, nemo nisi forte insanus contradicit; si omnibus hominibus habenda est fides, tum et his. Nam ubi nemo nisi insanus contradicit ibi nemo nisi insanus ob hanc quidem contradictionem dubitat.

2. In quo autem sita est vis testimonii omnium hominum seu traditionis universalis? Non pauca super hoc themate adhibui in Inquisitione; nunc summam dico: si testes quam plurimi ita se habent ut nec decipi possint nec in mendacio conformando conspirare, eorum, dico, testimonium est infallibiliter verum. Ponatur quippe fallum ei ponetur effectus sine causa. In hac enim traditione, fictio nasci non potest ex consilio testium nec ex casu, ob nimium testium locis et studiis dissitorum multitudinem; nec ex Deo qui bonus est atque adeo non fallax; nec ex diabolo quia nihil ei nobiscum nisi quatenus est ei cælitus concessum; nec ex astris aliave causa cogente, nam hoc affigeret mendacium Deo mundi gubernatori. At si in traditione universali fictio est impossibilis, tum in ea veracitas est necessaria.

3. Posse

3. Posse autem esse testem humanum qui nequeat decipi, sic cogo. Qui clare & distincte audit videtve, non potest eatenus decipi; potest autem homo aliquid clare & distincte videre audireque; nam frustra his facultatibus muniti nasceremur, si uti iis nisi cum formidine erroris non liceret. Hic repugnare est convitiari naturæ nostræ opifici. Posse nos etiam esse securos de aliis quod non sint decepti, clare mihi videor ostendisse in *Inquis. Sec. 3. n. 8.* Ex omnibus apparet, hanc esse vim traditionis universalis, quod de quibusdam factis valde multi nec decipi possunt nec decipere.

4. Iterum, provoco ad universalem experientiam. Tu Dublinii multum et diu versatus at Hibernia nunquam egressus, potesne dubitare an sit Londinum? an Parisii? Hæc tamen habes ex traditione tantum humana. Si vero traditio tollit facultatem dubitandi, tum assentiendi affert necessitatem. Et si vel semel te fateris convictum testimonio hominum, millies convinceris.

5. Ex his autem sequitur, quod ubi ad testimonium universale appellatur, ibi id unum ambigenti super est ut universalitas testimonii trutinetur *i. e.* ut examine- tur an tot sint testes et ita se habeant ut & deceptio & conspiratio sit impossibilis. Sed *qua regula de judicandum est de sufficientia testium humanorum?* Respondeo, hoc unicuique relinquitur judicandum per rationem suam. Ubi debita usus, quis diligentia desinit dubitare, ibi sat est magna testium & virtus & moles.

6. Hic suggeritur, non nullos, ita leves esse, ut cui- vis fere dicto fidem habeant. Respondeo, nimia facilitas non est vitium humanæ naturæ sed personarum; at rationi assentiri est jus naturæ; licet ergo multi temere assentiantur nemo tamen cujus rationi satisfit, dissentire potest, cum ratio unicuique detur ut sit ei regula vi- tæ.

7. Atque adhuc quidem egimus de traditione universali simplici seu singulari ; restat ob oculos ponere traditionem universalem complexam seu plurium ordinum , *quâ unum quidpiam per plures ætates de manu in manum pervehitur*. Atque hic adverte 1. hanc traditionem per plures ætates non satis commode à me explicatam fuisse in Inquisitione , dum dicerem integrum præsens seculum narrationem hanc vel illam accepisse a seculo integro immediate antegresso. Nam a solis præsentibus tas est quippiam accipere. Hoc volo: præsens seculum dividendum est in duas partes, quarum una tradit, altra accipit.

8. Ut autem res quam Explicatissima sit, partiamur præsens seculum in tres gradus hominum. Esto gradus infimus eorum qui jam docentur, quique nondum egerunt annum 24^{um}. Medius gradus desinat in quadragenariis. Ultimus erit eorum qui quinquaginta habent annos vel ultra. Sic ut in traditione universali 3 hominum tradant, & 3 recipiat historiam. Partitio autem facta præsentis seculi fieri potuit in quovis seculo per quod Traditio duravit ; quandoquidem omne seculum præteritum fuerit aliquando præsens.

9. Iterum, Quacunque in materia opus fuerit Traditionem universalem quæ per multa secula duravit, expedire (ad vitandam confusionem è frequenti eorundem Vocabu'orum repetitione menti oborituram) potes designare gradum infimum hominum seu discipulorum tantum per literam A, gradum medium per literam B, gradum summum præsentis seculi per literam C, gradum illum qui novissime exiit per literam D, eum qui immediate antecesserat per literam E, & sic fursum.

10. Jam vix necesse est monere quod A non possit decipi à B & C, cum sit ostensum, Traditionem universalem esse infallibilem, totaque vis Traditionis universalis sit

fit in B & C. Ulterius vero dico, non esse possibile ut vel B vel C sit mendax testis. Nam B & C sunt quasi paris roboris, ergo si B potest fallere, tum & C potest fallere, ac si alterutrum tum & utrumque; & sic rueret tota vis Traditionis Universalis.

11. Iterum, Meminerimus in Traditione Universali omnes omnino homines à quoquam consuli nec possibile esse nec necessarium. Meminerimus etiam, vim Traditionis Universalis sitam esse in multitudine testantium ita se habentium, ut nec falli nec in mendacio conformando conspirare possint. Meminerimus etiam in longæva Traditione veritatem novissimæ Traditionis pendere ex veritate singularum Traditionum antecessarum. Atque hinc sequitur, in Traditione Universali quæ per multa secula duravit, duo semper tradi, nimirum id quod principio gestum fuisse dicitur, & adhuc indubitatum numerum testantium. Ut B non solum dicit se accepisse hoc à C & D, sed adjungit & C & D tanto numero fuisse, ut à neutro formari mendacium possit, C testatur idem de D & E. Adhuc B non solum dicit se hoc accepisse à C & D qui fallere non potuere, sed etiam quod C & D dixerint se idem accepisse à suis Superioribus pariter infallibilibus, & qui idem testabantur de suis Superioribus, & sic ad summum scalæ.

12. Itaque in quantumvis longa Traditionum serie si novissima Traditio est ritè universalis, antecessæ omnes fuere universales; nam novissima confirmat penultimam, & fuisse universalem, & confirmasse antepenultimam parem fuisse, idemque confirmasse de ipsam præcedente, &c.

13. Novi qui totam hanc Traditionum certitudinem derideant, & fortasse quidem iis facilius erit in totam rem jocari, quam ullam partem demonstrationis positæ serio infirmare. Ego de multis rebus nos esse ex

D

mera

mera Traditione certissimos comperi; hujus ergo vim sequens vestigia naturæ inquisivi, & ut mihi videor, comperi, & quod satis sit explicatum posui. Restaret inquirendum quo pacto ab uno homine cæterorum omnium Testimonia possint colligi, nisi id jam satis expeditum esset *Sect. 11. Inquisitionis*; pergo itaque ad explicandum.

SECT. X.

Quæ sit vis Traditionis Universalis in veritate Religionis Christianæ ostendendâ.

1. **I**N primis constat B affirmare quod acceperit Evangelium tanquam verissimum à C & D affirmantibus se idem accepisse à suis Superioribus, &c. C quoque affirmat se idem eodem tenore accepisse à D & E, &c. secundum formam Traditionis Universalis superiori capite explicatam. Testimonium B & C non potest esse mendax per n. 1, 2, & 3 *Sectionis nonæ*. Nullibi enim potest major esse Universalitas testandi. Christiani certe in multis Religionem suam attingentibus Dogmatibus discordes sunt, sibi que invicem nimium infensi; in hoc autem Unanimes sunt, Religionem Christianam sibi Traditam fuisse tanquam sine dubio veram. Ipsi Turcæ agnoscunt hanc esse & semper fuisse Universalem Christianorum Professionem. Porro, si mendacium impossibile est in præsentī Traditione, tum & in præteritis impossibile fuit per n. 12. *Sectionis nonæ*.

2. Dices, *Quod Historia Christi & ejus Doctrina semper fuerit apud Christianos sacra, nemo in litem traxerit. Sed, num hæc vera sunt quoniam ea vera esse putarunt*
Chri-

Christiani? aut se putare professi sunt? Saltem, inquam, hinc habeo hæc nascentis Christianismi Phænomena. Ingens Christianorum numerus non solum in Christum credidere, sed etiam pro eo passi sunt, ergo Testimonio & Christianorum & Christianismi persecutorum erat in ea ætate Christus & crucigebatur, & eum resurrexisse prædicabant discipuli ejus, &c. prout in appendice ad Inquisitionem.

3. *His, dices, admissis quid sequitur?* Dico hinc multis argumentis patefieri veritatem Religionis Christianæ quæ visere liceat in compluribus Authoribus, qui tamen, puto, omnes supponunt aut postulant eas præmissas quas ego maxime necessarium duxi cogere, ostendendo firmitatem Traditionis qua ad nos delatæ sunt. His & iis quæ ubique Authorum & veterum & recentium in veritate Christianæ Religionis tuenda adhibentur, ego lineas tantum seu *indicia* istius demonstrationis apponam, quæ usus sum in Appendice.

Primo, Omnis Religio veris miraculis confirmata est vera per *Secl. 7. n. 3.*

Secundo, Curatio Morborum, suscitatio Mortuorum, &c. solo imperio effecta & maxime resurrectio Domini è mortuis sunt vere miracula. Per *Secl. 7. n. 15.*

Tertio, Ista opera à Christo & ejus Discipulis sic emanasse, habeo ex Testimonio primorum Christianorum qui nec decepti erant nec deceptores, ut ostensum est in dicta Appendice.

Quarto, Primos Christianos dictum Testimonium sic præstitisse habeo ex Testimonio omnium hominum qui fuerunt ab isto tempore quique sunt, & annos habent viginti quatuor per *n. 1. & 2. hujus Sectionis.*

Religio ergo Christiana probatur solis miraculis. Veritas autem miraculorum dijudicabatur à primis Chri-

stianis (ut alia) per sensus suos & rationem suam. *Quomodo autem eorum veritas patebit nobis tam longinquis?* Per Traditionem universalem quorundam Phænomena, ex quibus primos Christianos nec deceptos fuisse nec deceptores firmissimis ratiociniis concludimus. Observandum enim est, multa quæ nos tenemus fide tantum, fuisse evidentia sensibus Apostolorum; ut sunt infinita Christi Opera miraculosa ejus Resurrectio & Ascensio. Ob hæc visa illi crediderunt omnibus Christi dictis. Nobis ea non contigit videre, sed ob eadem ex universali hominum ore audita atque adeo credita, omnibus dictis Christi credimus.

SECT. II.

Corollaria quædam ad Doctrinam supra traditam.

Cœlesti Christianæ Religionis origine sic (pro meo Modulo) ostensa, non inutile videtur unum aut alterum adnotare, quæ ex modo & genio ipsius ostensionis sequi videntur.

1. Intelligimus quomodo Fides Christiana sit *ex auditu*, scilicet ut ex antecedente necessario, quatenus tradita à superioribus auditu accipimus.

2. *Vulgus autem putat, sibi Fidem ingeneratum iri frequenter audiendo Conciones Ecclesiasticas.* Conciones quidem istæ serviunt populo in Articulis Fidei instituendo, nec non ad *excitandum* Christianam excitando, non autem earum millesima quæque veritatis Religionis Christianæ ostensionem aggreditur; nec fortasse id frequenter fieri commodum esset.

3. Sed scilicet *dum audiunt, infusionem Fidei expectant.* 1. Quo textu Scripturæ freti hanc spem alunt?

2. An

2. An non hoc est nosmet ipsos disponere ad gratiam? Quod illis quam est Papisticum! 3. Hæc infusio erit miraculum, & quo titulo miraculum expectas? Vide etiam, an nova miracula expectare non sit derogare veteribus, tanquam aut non sufficientibus aut non sufficienter ad nos delatis. 4. Quod non est ex fide est peccatum, peccatum ergo est hæc auditio quæ antecedit fidem; & quis putet peccatum esse aptum medium ad acquirendum Fidem Christianam? Sed apage ineptias. Si amas Evangelium ejusque veritatem tibi confirmatam cupis; Speculare miracula per quæ mundo primitus commendabatur, tum auctoritatem testium per quos illa miracula nobis tradita sunt, perpende. Si in neutro horum quicquam infirmi reperiis, tibi facta est fides; adde obedientiam & perfectus es Christianus.

4. Sed *vulgus & literarum rudes*? Num hi quoque dijudicationi Miraculorum & Traditionis examinationi pares sunt? Resp. In miraculis dijudicandis simpliciores videntur fallaciis non parum obnoxii; quod quid est nisi, eruditionem esse magno hominibus emolumento? Memorantur vero quædam in Evangelio miracula, in quibus hebetissimus quivis oculus digitum Dei conspiciere valeat; qualis fuit multiplicatio panum, suscitatio Lazari post quatrimum mortis, Resurrectio Domini, &c. Ad hæc, semper meminerimus, Deum neminem esse rejecturum qui quantumvis levi argumento veritatem amplectitur. Tamen, ut antea monui, non putandum est quod Deus veritatem Christianam levibus tantum argumentis humano generi commendaverit. Christus se videndum & tractandum suis præbuit; licet eos etiam beatos declaraverit, qui non videntes crediderant. Quod vero attinet ad Traditionem universalem, ejus roboris aio indoctos non minus quam doctos esse capaces; nisi putes hominibus qui omnes annos in

Hibernia egerint, opus esse artibus & eruditione ut possint credere Londinum esse vel Romam. Nec id obest, quod Idiotæ rationem Fidei suæ non tam explicatè reddant, quam doctis in promptu est facere. Nam reddere rationem Fidei est artis, cum ad alios instituendos tendat; at Fidem habere est actus Naturæ rationalis quæ etiam rudibus non novercatur.

5. Hic etiam jure disquiritur *in quo differant Traditiones per quas derivantur Gentilismus, Mahometanismus, &c. ab hac quæ nostram Religionem pervehit.* Respondeo ex dictis, in hoc esse vim Traditionis nostratæ quòd ortus ejus ab iis fuerit qui nec potuerunt falli nec fallere. Mahometes e.g. inepta quædam miracula edidisse fertur. Sed vel ista quis vidit? Nihil traditur quod probet primos ejus Discipulos non fuisse deceptos; fuisse verò deceptores, multa sunt quæ insimulent. Nam fœditate commenti sui libidinosos populos irretiendo, & voluptatibus & opibus & imperio sese muniêrunt. Pariter fari licet de Lycurgo, de Numâ, de Apollonio Tyanæo, &c.

6. Demum ex dictis habetur certissima regula Fidei Christianæ. Nam quæcunque doctrina pervenit ad nos ut Christiana per Traditionem universalem, ea est certissimè doctrina Christiana per Sect. 9. Imò cum Christianismus quoad credenda, nihil sit nisi aggregatum ex articulis doctrinæ Christianæ, sequitur nihil Christianissimi ad nos certò pervenire posse per Traditionem universalem, nisi aliquis particularis articulus ita perveniat. Et si Traditio universalis satis nobis confirmat hunc articulum, quid ni & illum? Quid ni & alios quotcunque?

7. Quod satis nonnullos ex Neotericis redarguit, qui *Bibliis quidem sacris fidem adhibent ob testimonium tradentium, cæteros verò articulos Doctrinæ Christianæ ex Scripturis admissis hauriendos esse affirmant, & non ab*
Ec-

Ecclesiâ tradente accipiendos. Quid verò? Integra vis testimonii in autoritate testis sita est; ergo diversitas materiæ prorsus per accidens se habet ad fidem; sic ut cui testi credatur in unâ causâ, ei in omnibus causis credendum sit.

8. Sed tutius, dicunt, *servantur articuli Fidei in repositoio Scripturarum sacrarum, quàm in labili hominum memoriâ.* Regero; non hîc agi de præservatione articulorum omnium, sed de certitudine Traditionis eorum qui ad nos pervecti sùnt. Nec in Testimonio ferendo (quod etiam antea monui) id exigitur ab Ecclesiâ præsentē ut meminerit omnium quæ acceperit à superioribus, sed ut nihil tradat, nisi quod meminerit se accepisse.

9. Sed facilius, aiunt, *traditur Religio Christiana summatim in Bibliis sacris, quàm articulatim per ora hominum; ut leviori operâ integrum volumen Ciceronis porrigitur, quàm vel una pagina memoriter profertur.* Neque ego hoc inficias eo; nam facilius traditur unus articulus quàm multi, multorum autem Fidei Christianæ articulorum hic unus est: has Scripturas esse Verbum Dei. Nontamen si facilius ideò & veriùs traditur unum quàm multa, siquidem author omnium sit infallibilis.

10. *Maximè autem huic regulæ adversari videntur reformationes in Ecclesia adhibitæ, & potissimùm illa Protestantium.* Multa enim à Nostratibus rejiciuntur ut falsa & sacrilega, quæ universæ Ecclesiæ Romanæ testimonio sunt de Fide Christiana. Ecclesia autem Romana (ut ut sit particularis Ecclesia) tanto est numero hominum, ut si eos mendacii formati suspicari possimus; nescias ulli humano testimonio credere. Unde sequi videtur aut condemnandam esse reformationem nostram, aut Ecclesiæ Romanæ traditionem quæ perinde est ac traditio universalis. Respondedo.

11. Tra

11. Traditio supra explicata non est norma Fidei in Ecclesiâ Romanâ; sed illud inprimis statuunt, Ecclesiâ suam etiam judicantem de articulis Fidei esse infallibilem; & tum illa sola atque omnia quæ ipsi decreverint, appellant articulos Fidei. *Quid tum, dices? Tum, inquam, quæ apud illos traduntur ut de Fide nihil sunt nisi decreta Ecclesiæ Romanæ. Quique ea recipiunt, non attendunt tradentium universalitati, sed authoritati præcipientium. At, dices, Ecclesia Romana nunquam decernit aliquid esse de Fide, nisi quod ut tale universim acceperit.* Respondeo, sic fieri debere quidem; at quo argumento vincor sic factum fuisse?

12. Quin verò non pauca contrarium insinuant. Nihil enim familiarius apud Authores Romano-Catholicos habetur, quàm quòd multi è veteribus ea tenuerint quæ jam sunt hæretica, eos tamen Hæreticos non fuisse, quia ipsorum ævo hæc à nullo concilio damnata memorantur.

~~Quod, quæso, an non hæc duo aherit? Decretum Ecclesiæ docentis esse regulam Fidei, &, nonnulla in præsentî Ecclesiâ Romanâ censerî Hæretica quæ apud veteres non habebantur ut talia. Imò, non ita pridem obnixè contenderunt quamplurimi in Ecclesiâ Romanâ, ut immaculata conceptio B. Virginis declaretur articulus Fidei (de quo antiquorum nemo vel somniavit); & hoc si assequuti non sunt, tamen id aliquando se assequi posse dicuntur adhuc sperare; tum nimirum cùm majorem partem conclavis Romani doctrinâ Scoti perfuderint. Summatim loquendo, cùm id firmum apud eos ratumque sit, Ecclesiâ suam esse in rebus Fidei infallibilem, non est ambigendum, quin apud eos tradita & decreta parem seu eundem locum habeant & indiscriminatim teneantur; adeoque progressu temporis decreta hominum pro universaliter traditis vulgò accipi posse. Et si hinc populo impositum non est, ei potuisse hinc imponi mihi liqui-~~
dum

dum est. Ubi autem menti ostenditur possibilitas fallacia, ibi efficitur impossibilitas Fidei. Unde apparet, reformationem etiam in articulis Fidei in Ecclesiâ Romanâ receptis posse esse justam; neque inde labefactarî vim Traditionis universalis, cum illi in decretis suis non purè nitantur infallibilitate testimonii omnium sed sui ipsorum (quâ interpretando quâ ratiocinando) iudicii.

13. *Sed quæ est, dices, certitudo in rebus Christianismi, si decreta pro traditis jam à multis seculis supposita sunt? Quicquid habemus Christianismi, ab Ecclesiâ Romanâ id videmur habere. Hi Bibliâ sacra, hi Patres tradiderunt, hi articulos Fidei docendo instillarunt; & omnes quidem articulos eodem tenore, & sub eadem necessitate credendi. Quî possumus unum articulum accipere ut traditum, alium ut supposititium rejicere?* Respondeo, Traditionem Ecclesiæ Romanæ magnopere conturbatam esse ex creditâ ejusdem Ecclesiæ infallibilitate; Nec tamen omnis ejus vis interiit. Ubi enim ei convenit cum Scripturis sacris, earumque per Sanctos Patres Expositionibus, ubi cum aliis omnibus, aut quasi omnibus Ecclesiis veteribus vel præsentibus, eatenus non potest esse suspicio quòd dogma ex propriâ Ecclesiæ Romanæ judicatione natum fuerit, nec per Traditionem universalem descenderit. Nam ut ait Tertullianus: variâsse debuerat error Ecclesiarum. Quod in diversis idem est, non est erratum sed traditum. Sed hæc copiosius ostenduntur, ubi de Reformatione Ecclesiæ agendum erit.

14. Impræsentiarum conclusum puto, Traditionem universalem esse firmam Fidei regulam; nec tamen eam unicam esse regulam ausim ponere. Potuit Deus alias adhibere. Itaque alii dirigunt fidem suam secundum Expositionem privatam Scripturarum Sacrarum; alii

toti dependent ab Enthusiasmis & alio iudicium Ecclesiæ Romanæ sibi regulam statuunt credendi; de quibus suis locis. Nunc sit finis primæ partis hujus Summæ, in quâ fategi ostendere originem Theologiæ Christianæ, *i. e.* unde in mundum primitus inducta, & quomodo ab ejus primordiis ad nos deducta sit. Reliquum est contenta seu partes hujus Theologiæ exponere; quod alii aliter conantur. Mihi animus est regulæ compertæ adhærescere, & ea solum dogmata adferre ut Christiana quæ omnium Christianorum consensu pro talibus habentur. Capitibus autem seu Doctrinæ traditæ, commentationes meas, ubi videbitur, subjiciam, aut commodo Lectoris, aut certè sine tædio. Methodo etiam hæc usus sum. Inprimis ista ponam quæ hæc Theologia communi omnium Christianorum ore pronunciat de seipsâ, deque Ecclesiâ per ipsam constitutâ, tum ad ea migrabo quæ de aliis suis objectis profert. Sit ergo

S E C T. I.

Secunda Pars hujus Summæ de iis quæ Theologia Christiana pronunciat, de seipsâ.

INprimis, Theologia Christiana proclamât se exhibere consilium Dei de hominibus ad vitam æternamducendis, patelactum per Jesum Christum.

1. Quia hæc Theologia est nuncia consilii Dei non potuit hominibus innotescere nisi per revelationem divinam. Nam consilium est actus liber, atque adeò absconditus ab omnibus extra eum cujus consilium est. Nec, cum revelaretur hæc doctrina poterat ejus veritas ostendi argumentis intrinsecis seu ex natura rerum quas exhibet petitis. Nam consilium est actus liber, ergo potuit non

non iniri, ergo non liquet ex terminis initum fuisse, ut dictam est 1. p. f. 3. Nec aliunde quidem quam collitus. i. e. per miracula assensum sibi cogit. Nam supernaturalia demonstrari non possunt ex naturalibus; ut 1. p. S. 3. n. 2.

2. Ex eodem etiam Capite sequitur partes hujus Theologiae proprias non subijci discursibus Christianorum, nec de quoquam effato doctrinae Christianae quicquam inter Christianos disputari posse, nisi an sit effatum vere Christianum. Dico, *inter Christianos*, quia hi agnoscunt hanc Theologiam esse *revelationem consilii divini*; & quis tu es homo qui respondas Creatori tuo?

S E C T. I I.

Nihilominus, hæc Theologia proclamatur se esse doctrinam rationi rectæ prorsus consentaneam & iucundam, eique omnes cessuros esse, qui se dociles, i. e. attentos & non malevolos præbuerint Auditores. Et hoc sibi asserit duplici titulo, Primò quia demonstraverat se esse revelationem consilii divini, cui rationem submittere & iustum est & snave. Secundo, Quia nihil sibi inesse aut à bonis moribus alienum aut absurdum involvens, per multa secula contra mundum incredulum feliciter contendit. Hinc jure gloriatur se multa quidem asserre rationem humanam superantia, ei repugnans nihil.

1. At hæc Sectio præcedenti videtur repugnare. Si enim omnia afferuntur in Doctrinâ Christianâ ut rationi humanæ consentanea, tum rationis humanæ est dispicere, ne quid rationi repugnans obtrudatur ut Doctrina Christiana. Nam frustra quispiam sua jactat esse secundum rationem, si ea per rationem examinari non patitur. Ego verò regeo, quòd frustra id in trutinâ ra-

tionis humanæ pones, de quo certus es quòd sit divinitus oriundum. Deus quidem loquitur tam per naturam quàm per supernaturalia, nec magis fallit per rationem, *i. e.* per principia rationis naturalis quàm per Miracula. Licet verò rationem humanam fecit Deus veracem in omnibus quæ comprehendit ut tamen omnia compræhendat ei non concessit. Quæ ergo sunt certò Christiana & nostro tamen sensui repugnantia, ea & credimus esse & rationi rectæ adversa non esse, quicquid obstrepat ratio principiis ordinariis fulta & metiens cœlestia per terrestria. Si Christus ipse dixit, Christianus non u'tra ambigit.

2. Dices, *Indagationem rationalem sic comperescere sit humilitatis Christianæ, at si evidens se ostendat contradictio, animus humanus ei non potest submittere.* Concedo non posse, sed nec posse, aio, evidentem esse contradictionem in Mysteriis Fidei Christianæ. *Cur?* Quia ab iis omnibus stat aut infinita Dei essentia, aut ejus omnipotentia, quibus intellectum nostrum æquiparare non magis impium fuerit quàm fatuum. Rem sic edissero. Multa in Deo clarè videmus infinites plura aciem nostram superant. In propositionibus autem de fide Christianâ prædicatum attribuitur subjecto non ratione ejus quod à nobis videtur, sed ratione ejus quod superat visum; alioqui enim istæ propositiones non occuparent fidem nostram sed scientiam. Esto exemplum instar omnium. In Deo clarè video quòd est unus, quòd est vivens, quòd est sapiens, bonus, &c. Clarè etiam video Deum non quà unum, aut quà viventem, aut quà bonum, &c. esse Trinum in personis (dum scilicet has perfectiones concipio univocè cum nostris quæ sunt iis cognomines); sed infinitatem Dei in his perfectionibus non penetravi, in cujus abyssò nescio an non sit sufficiens causa attribuendi talem Trinitatem tali Unitati. Id est,

est, Trinitas Personarum evidenter repugnat Unitati essentiae limitatae, non evidenter infinitae. Age jam, tu contendis Deum non subsistere in tribus Personis ob repugnantiam obscuram terminorum, at clarè vides hoc sic esse revelatum à Christo. Quod quæso quid est nisi evidentiae suspicionem anteponere? Quid nisi abjicere id quod clarè vides ob id quod clarè videre non potes?

3. Et hæc generatim sic dici sufficiat; in singulis postea capitibus quod ab Atheismo objicietur conabor diluere. Nec pigeat tamen Monitionculam dictis adjicere. Si infideli suadere tendis ut Christianismum suscipiat, patet ex dictis testimonio tibi nitendum esse, testimonio inquam, Dei & hominum (ut i. p. ostensum est) tanquam causæ fundamento, ex naturâ verò rerum satis cum cautela esse disputandum. Si etiam Infidelis quamcumque Christianismi partem Philosophicis principiis arietat, Christiano defendenti ad Infinitæ Dei Essentiae & potentiae arces recurrendum est; nec sperare debet, supernaturalia principiis ex naturâ rerum inferiorum petitis defendi posse.

S E C T. III.

Iterum Theologia Christiana proclamat hanc revelationem consilii divini per Christum factam esse sufficientem nec hominibus opus esse alio commonstratore ad salutem; ultimam etiam esse quæ unquam dabitur de hominibus ad salutem ducendis.

1. Nec enim sicut Moses & Prophetæ successere Patribus, ac Christus Mosi & Prophetis, sic Christo alius Propheta addendus; sed per Christum & ex ejus
Evan.

Evangelio Vivi & Mortui, *i. e.* omnes homines in fine Mundi sunt judicandi. Hinc sic monet Dominus: Si dixerint, hic est aut ibi est, nolite exire. Hinc etiam Mahometi, ut impostura sua admitti possit, pernecessarium visum est Christum Divinitate suâ prorsus exuere. Intellexit enim post Filium Dei missum servulorum legationi locum non fore,

2. At quid dicemus de Revelationibus post Ascensionem Christi per Spiritum Sanctum factis? Respondeo: Quod Christus per Spiritum suum fecit, id ipse fecit; adeoque est una utriusque patefactio. Sciendum tamen est Christianis omnibus certum esse, quod Christus ipse in terris agens plenam Evangelii patefactionem Discipulis fecerit; nec Spiritum Sanctum quicquam de integro mentibus ipsorum instillasse. Itaque dicit Dominus: Ipse vobis reducet in mentem omnia quæ Ego vobis dixi, Jo. 4.

3. At Sanctus Paulus preclamat se nunquam edoctum fuisse Evangelium ab hominibus, sed per immediatam revelationem accepisse. Fateor; Sed accepit per revelationem à Christo, quem vidit licet serò. Nihil etiam de novo accepit, sed prorsus idem de Cælo edoctus est, quod cæteri didicere è Christi ore cum in terris esset. Hoc ipse testatur Gal. 1. Si Angelus de Cælo aliud Evangelium prædicaverit quàm quod nos prædicavimus sit anathema. Si autem S. Paulus prædicavisset aliud quàm quod cæteri Apostoli prædicavere, tum cæterorum erat prædicare aliud quàm quod S. Paulus prædicaverat; & sic essent anathema. Constat ergo eandem fuisse revelationem quoad res revelatas quam Christus exhibuit in terris, & quam è cælo aut exhibuit aut exhibebit.

S E C T. IV.

Iterum Theologia Christiana proclamat *se esse necessariam*, i. e. *se esse unicam Magistram viæ ad vitam æternam*, omnesque ejus exortes esse in tenebris & umbra mortis.

1. Omnibus Christianis certum est, neminem nisi per Christum ad vitam æternam posse pervenire. Verum non agitur in Theoremate de Christo ipso sed de ejus doctrinâ, de cujus necessitate ad salutem sic quod sentiam, explico.

2. Si quis aut non recipit oblatam aut acceptam rejicit Doctrinam Christianam, is Cælum ingredi non potest; quia Christum recusando sibi unicum Misericordiæ fontem ocludit. Itaque dicit Dominus: Hæc est condemnatio, quod lux venit in Mundum, & homines diligunt tenebras magis quàm lucem.

3. Iterum, sine cognitione Christi nemo sibi jure promiserit vitam æternam. Erravimus enim omnes; etiam plurimarum virtutum consciî. Mentem autem Domini quis novit? i. e. quis sciat quomodo Majestas Divina præmiis aut pœnis servos suos tractatura sit?

4. Qui tamen Ethnici inauditò Christi nomine operam virtuti obnixè navant (eorumque non pauci ita videntur fecisse), non possunt non alere spem quandam & expectationem præmii etiam post mortem. Nam naturâ docente se officio obstrictos agnoscunt, etque se promptè accingunt. Ubi autem est officium ibi est Dominus; nam qui obligatur à Superiore obligatur. Eadem demum naturâ docente, probi sciunt Ethnici virtutem laude ac præmiis esse dignam, iis autem in hac vitâ eam plerumque spoliari, auxilium ergo à

à justo bonoque Domino expectandum esse.

5. Verùm possuntne homines sine cognitione Christi per Christum ad vitam æternam perducì? Respondeo, nihil tale aut in Scripturâ sacrâ, aut in universali traditione comperio expressè dictum; nisi solummodo de infantibus baptizatis quos Ecclesia Christiana semper censuit esse in viâ ad felicitatem. Spes tamen aliqua hujus Misericordiæ videtur relicta. Sit exemplar bonus ille Samaritanus qui viatori saucio succurrebat. Is Doctrinam Christianam oblatam fuisset certissimè amplexus (*per Sect. 2.*), ergo pro virili suâ jam est eam amplexus. Nihil enim ei deest nisi doceri; docere autem est Dei munus. Ac licèt Deus huic muneri non sit astrictus, incredibile tamen est Deum bonum plus esse à quoquam expetiturum, quàm ei concediderit. Peccârunt, dices, optimi. Respondeo: satisfecit Christus. Ac attende sis: Christus mortuus est pro inimicis suis; in his non ferociter se gessit probus hic Ethnicus. Nec excludamus eum à Domini meritis ut alienum, quem Dominus proponit ut exemplar suis. Demum reputa, num Judæis omnibus qui ante Christi temporâ cum laude mortui sunt, intellectum fuerit Mysterium Incarnationis? num jam ab infantibus baptizatis intelligitur?

6. Vide etiam quomodo respondeas objectioni à Porphyrio factæ. *Si Christus venit in mundum ex amore hominum, cur non citius venit?* Quia, dices, Christi merita valebant ad hominum salutem à principio. *Sed*, dicet Porphyrius, *ad cognoscentium tantum salutem. Quomodo autem cognosceretur ab iis quibus nunquam erat promissus?* Videtur dicendum esse cum S. Paulo, quòd Deus etiam ante Christum non se reliquit sine teste apud Gentes; iis enim indidit lumen rationis naturalis quod si sequerentur, & suam conscientiam pacarent, & spem
etiam

etiam in Deo aserent. Ad hoc etiam Officium peragendum quotidianis Providentiæ Divinæ beneficiis invitabantur.

7. Salus quidem erat Judæorum (Jo. 4.) & Judæorum tantum vi legis sive positivæ. Quod verò in aliis Gentibus non fuerit salus ex observatione Legis Naturæ, non ausim dicere. Sic jam: Extra Ecclesiam non est salus; scilicet vi Religionis cujuscunque positivæ. An verò Religio naturalis proficiat Gentibus Christi ignaris ad vitam æternam, in Manu Dei Optimi Maximi est, contra cujus infinitam bonitatem non magis ausim disputare quàm contra infinitam ejus potentiam. Interea cum nulla de hoc habeatur cœlitas promissio, rem inter Miracula reponamus quæ expectare improbum est; stétque Theorema: *Religionem Christianam esse necessariam ad vitam æternam.*

S E C T. V.

I Terum Theologia Christiana proclamat se esse prædicandam omnibus hominibus, macerâ scilicet Ecclesiæ Judaicæ per Christum omnium Gentium Dominum diruta.

1. Sed cur tam enixè est edocenda hæc Doctrina, cum superiori articulo, quasi conclusum sit posse homines Christi ignaros per Christum salvari? Respondeo: Non est conclusum, sed vix quidem opinatum (exceptis infantibus baptizatis); idque ipsum natum est humano & omnibus hominibus benevolenti animo, non autem ullo in Ecclesiæ Doctrinâ fundamento. Salus verò hominum plaris est quàm ut sic freta relinquatur. Iterum posito quòd possit homo rationem sequens per Christum incognitum servari, est tamen ratio hominis

tam indocta Ductrix in tam salebrofis viis, *scilicet* inter tot irritamenta malorum quibus omnes obfidemur, ut vix quisquam non in multis deprehendatur delictis. Doctrina autem Christiana tam liquidò ostendit & Regnum Cœlorum & rectum eò iter ut non tam ducat quàm trahat nos ad vitam æternam.

2. Si tamen, dices, Christianæ Religioni non satis obsequentes eam nunquam fuissent edocti, levioribus ii suppliciis plectendi forent. Respondeo hoc accidere & suâ ipsorum culpâ & justitiâ Dei optimâ. Quid enim justius quàm ut ii severè puniantur qui ad Officia sua exequenda nullis præmiis allici poterant? Nec interea tam anxie cavendum est de gradibus inferni. Satis est miserum utcunque damnari. Et quæ spes est servari eos posse ductu rationis, qui claro Evangelii jubari tergadant?

3. Evangelium etiam obnixè prædicandum fuit in honorem Christi, qui ut Meritis universa complevit, sic & nomine complere debet, laudésque à Mundo redempto accipere. Charitate erga & Christum & homines ad obnixè prædicandum Evangelium devincimur; Itaque S. Paulus dicit de seipso: Væ mihi si non Evangelizavero.

4. Interea vitandus est Error Vulgi nostratis, qui putant prædicationem Evangelii stare solum, in habendis concionibus frequentibus & prolixis, qualibûsque nunquam aut Christus Dominus usus est, aut Apostoli ejus, aut per multa secula Patres. Ac sunt illæ quidem conciones aliquota pars Prædicationis Evangelicæ; Sed præterea, quicquid feceris quod tendat ad propagandam Fidem Christianam, eo ipso prædicas Evangelium; qualia sunt cultum publicum exhibere & ornare, vitâ & Moribus Religionem nostram commendare, Pastores procurare, Ecclesiis consulere. Jam omnes Martyres

res erant insignes Prædicatores Evangelii ; cùm sanguis Martyrum fuerit Ecclesiæ semen.

S E C T. VI.

Proclamat ulterius Theologia Christiana se fuisse per Christum ipsum & eius Apostolos, aliòsque Ministros omnibus prædicatam.

1. Non puto necesse esse ut credamus Evangelium omni homini aut omni omni Genti primo statim seculo promulgatum fuisse. Sufficit scire, quod certissimum est, ejus promulgationem terras ipsà Apostolorum ætate eo usque pervasisse, quousque incredibilis prædicantium & diligentia, & patientia, & perseverantia perferre poterant. Cùm itque audièris Christum omnibus apparuisse & omnibus imperare poenitentiam, intelligede valdè multis & quasi omnibus, quibus alii atque alii semper addendi essent.

2. Mireris cur Deus amator humani generis tam ferò nonnullas Gentes ad Christianismum invitet. Respondit aliquando S. Augustinus; quòd Deus prævidit eos rēcufaturos esse Evangelium oblatum. Sed retrahit hoc Responsum; ac videtur quidem hoc refundendum esse prorsus in absolutam Dei prædestinationem. Interea semper memineris Deum non reliquisse se sine testimonio etiam apud barbaros; ut § 4.

S E C T. VII.

DE ordine autem promulgationis Evangelii hic concors Christianorum sensus est. Evangelium primitus prædicatum fuisse in Paradiso, cum promitteret Deus semen mulieris quod caput serpentis percelleret. Quo nihilminus potuit intilligi quàm mortalis Redemptor qui homines eriperet omnibus iis malis in quæ incitante serpente, i. e. Diabolo, inciderant. Postea Abrahamo lucidiùs enunciatum fuit è semine suo Servatorem mundi esse oriturum. Id Moysi clariùs adhuc, & adhuc clariùs Prophetis sub nomine Messiaë revelatum fuit. Joannes Baptista Regnum Dei instare, jam in ipsis seu inter ipsos esse ad populum Judaicum clamavit. Max, populo Messiam identidem expectante, Tiberio autem Casare imperante, Christus se ostendit, & se esse Dei Filium asseruit. Mysteria autem Doctrinae suæ non promiscuè omnibus patefcit, sed seorsim à vulgo ea explicuit duodecim primariis suis Discipulis quos etiam Apostolos nominavit, quibusque promisit quòd super eas fundaret Ecclesiam suam, quorumque operà usus est in nomine suo prædicando & in Discipulis baptizandis. Elegit etiam Christus septuaginta alios inferioris Ordinis Discipulos quos in omnes Civitates, quas ipse visurus erat, in singulas binos præmisi, ut prædicarent Regnum Dei instare. Nec quicquam ulterius de his 70. traditum comperid. Cum autem non solum populus, sed ipsi etiam Apostoli quasi surdis auribus Evangelium capesserint, promisit suis Christus Spiritum Sanctum eos in omnem veritatem ducturum. Interea Christum complures sequebantur. Cum autem tempus ad hoc à Deo præfinitum advenisset, Christus crucifixus est & triduum jacuit sepultus, Discipulis ejus eo quod acciderat attonitis, atque adeo dissipatis, latentibus, nec de Christo quic-

quicquam hiscere audentibus. Tertio autem die Christus resurrexit, & apparuit primò aliquot suorum Discipulorum, post aliis & per quadraginta dies multoties omnibus, instituens eos in omnibus Religionis suæ mysteriis, mentisque eorum oculos aperiens, ut dicta sua intelligerent & caperent. Inter cætera autem declaravit se esse mox ascensurum in Cælos, & ibi usque ad finem Mundi esse permanens. Apostolisque mandavit ut eant, & Evangelii prædicationi per omnes terras obnixè incumbant, Ierosolymistamen maneant donec ipse cælitus demiserit Spiritum Sanctum, qui & corda ipsorum illuminaret confirmaretque, & Mundum miraculis convinceret, ipsos præsciens Ecclesiæ suæ colligendæ cum omni modâ potestate in rebus ad Regnum Dei pertinentibus, pollicitus se ratum in cælis habiturum quicquid ipsi fecerint in terris. Christus ascendit, & die Pentecostes insequente Spiritus Sanctus descendit super Apostolos, iisque insedit specie linguarum fissarum. Hoc illi afflati Doctrinam Christi statim apertè prædicant, primùm Judæis, mox etiam ubique terrarum Gentibus. Multitudo autem hanc Doctrinam profitentium dicebatur Ecclesia Christi.

1. Partes Historiæ Domini fusiùs postea suo loco in hac summâ tractandæ sunt; hîc tantùm attinguntur, quatenus exhibeant Methodum promulgationis Evangelii.

2. Ex dictis autem patet Christum reliquisse Ecclesiam ut Multitudinem ordinatam seu in formâ corporis politici. Quippe Apostolos fuisse Præpositos & Pastores, reliquos omnes horum ditioni in rebus ad Regnum Dei pertinentibus subditos, i. e. omnium Discipulorum fuisse Apostolis docentibus Fidem habere, & eorum constitutionibus Morem gerere. Quicquid enim illi solverunt aut ligârunt in terris, id in Cælo solutum aut ligatum fuit; deque hoc convincebantur Discipuli antequam

quam discipularentur. Jam autem de Ecclesiâ dicendum est quæ differt ab Evangelio solum ut concretum ab abstracto ; Ecclesia e. Christi est cœtus profitentium Doctrinam Christianam.

S E C T. VIII.

EST autem Fides Universalis Christianorum, *quod Ecclesia Christi est una, sancta, Catholica & Apostolica.*

1. Angeli beati non sunt partes hujus Ecclesiæ ; nam Christus non assumpsit Angelos. Ac licet Christus sit communis Salvator omnium hominum, tamen Fide'es sub lege improprie dicuntur partes Ecclesiæ, ob ingens discrimen dispensationum. Christus etiam dicit se conditurum esse Ecclesiam suam, loquens ut de re infectâ.

2. Cœtus Fidelium non appellabatur Ecclesia antequam 120. Discipulis adderentur circiter Tria Millia hominum concione Petri converforum. Tùmque incepit Christus præstare quod promiserat Petro: Tu es Petra, & super hanc Petram ædificabo Ecclesiam meam. Atque huic Primitivæ Ecclesiæ addebantur de die in diem per Prædicationem Apostolorum ii qui erant salvandi. *Act. 5. 14.* Et quotquot deinceps in hunc diem credere, addebantur eidem Ecclesiæ, & tenebantur firmiter permanere in Doctrinâ & societate, &c. quod dicitur de primis additis *Act. 2. 47.* Et esse prorsus unius cordis & unius animæ. *Act. 4. 32, & 5. 14.*

3. Jam Christus est Fundamentum Ecclesiæ absolute, quia tota Doctrina Evangelica est de Christo; à Christo etiam per revelationem. *Jo. 1.* Nemo unquam vidit Deum, Filius eum revelavit. Et hoc sensu dicitur :
aliud

aliud Fundamentum nemo potest jacere. 1 *Cor.* 3. 11. Ecclesia tamen dicitur etiam fundari in Apostolis. *Eph.* 2. 19, &c. scilicet secundum aliquid; in quantum totum Evangelium à Christo revelatum Apostolis in Mundo prædicabant, & Ecclesiam ad Voluntatem Domini constituebant.

4. Tantum commissum erat à Christo omnibus Apostolis quantum Petro, scilicet in solvendo & ligando quæ est potestas Clavium. Petro verò idem seorsum committitur, quia per eum Christus incepturus erat ædificationem Ecclesiæ suæ, cui cæteris Apostolis incubuit suas partes addere. Pèrque hoc Petro videtur Concessus Primatus Ordinis, nullo modo Auctoritas.

5. Doctrina Evangelica erat prior Ecclesiâ, utpote ejus Formatrix, itaque etiam est per eam invariabilis. Constitutiones autem Apostolicæ erant posteriores Ecclesiâ, quippe eam supponentes & ad ejus bene esse pertinentes. Itaque illæ quidem obligârunt Ecclesiam de præsentî, ob absolutam auctoritatem Apostolorum. Sed num eas poterat Ecclesia succedens mutare aut abigere? Affirmat Thorndicius, quia sunt posteriores Ecclesiâ constitutâ, adeoque judicio ejus relictæ, cui nihil non commissum ad Regnum Cæli pertinens. Ego sic dicendum reor: Poterant Apostoli constituere nonnulla ex Mandato Domini, & hæc stabilitatem perpetuam habuisse constat, nisi expressè dictum sit ea in tempus tantum constituta fuisse. Poterant etiam constituere alia pro ratione Personarum, Temporum & Locorum, & hæc vim non habuisse constat nisi rebus judicio Ecclesiæ sic stantibus, ut apparet in Cænâ ante Eucharistiâ, & in Mandato esum Sanguinis prohibente. Unde sequitur non sine periculo moveri Constitutiones ignotæ Originis, sed in Ecclesiâ antiquitus receptas, ne fortasse

tasse fuerint Apostolicæ, & si Apostolicæ fortasse Divinæ.

6. Hæc utcumque se habeant, constat Christum non formasse Ecclesiam nisi mediantibus Apostolis, adeoque vim omnem constituendi aut abolendi quam habet Ecclesia ab Apostolis esse. Tandem constat cur Ecclesia dicatur Apostolica, nempe quia fundabatur Prædicatione Apostolorum, eorumque doctrina & constitutionibus continetur. Religionem ergo in novis illuminationibus fundare est Christianismum abjicere, & somniis se dedere.

7. Cur dicitur Ecclesia una cum sint multæ? Respondet: Sunt multæ Ecclesiæ Materialiter, *i. e.* sunt multi Cœtus particulares Christianorum. At omnes illæ sunt formaliter una, quia omnes super ædificantur eidem Fundamento, nempe Christo & Apostolis; habent omnes eandem Doctrinam, exercent eundem cultum, *Ad. 2. 41, 42, &c.* Adde unitatem Spei. *Eph. 4. 4.* Unitatem Charitatis. *Eph. 4. 3.* Et unitatem Regiminis in quantum Christus regit & ducit omnes per Ministros. *Cyprianus Ep. ad Antonianum.* Cum sit Ecclesia à Christo per totum Mundum in multa Membra divisa, item Episcopatus unus, Episcoporum multorum concordia numerositate diffusus.

8. Unitati Ecclesiæ apponitur Heresis quæ est dissidium ab Ecclesiâ in Articulis Fidei; & Schisma, quod est dissidium ab Ecclesiâ ob Constitutiones & Formas cultus. Cui vide quantum inest mali: Schismatici non uniuntur Charitate cæteris Christianis, ergo Fides & Sacramenta iis non prosunt. In cassum cætera præstant qui charitate destituuntur. In omni tamen divisione una quævis parsest ab altera tantundem divisa. In schismate ergo non distantia sed causa distantiae est crimen.

9. Ecclesia dicitur Catholica, *i. e.* Universalis, quia non est astricta uni Genti sicut Synagoga. Itaque si particularis Ecclesia dicitur Catholica, aut quivis homo dicitur Catholicus, hoc est, quia adhærent Ecclesiæ Catholicæ, seu Generali. 2. Ecclesia potest dici Catholica ob Universalitatem Doctrinæ quæ comprehendit omnia scitu necessaria, ut nemo opus habeat exire ad privatos Magistros. 3. Ecclesia præscribit omnimodam obedientiam omnibus hominibus. 4. Præbet omnes gratias, *i. e.* Medicinam contra omnes Morbos spirituales, & vim ad omne bonum opus. Ita Pierſonſus. Verùm ego putaverim Ecclesiam in principio dictam fuisse Catholicam non in oppositione ad Synagogam, sed ad Conventicula Hæreticorum. Ecclesia enim vera omnibus insedit terris, Hæretici autem multi in multis Sectis, sed in singulis pauci in suis quique quasi speluncis agebant, & se invicem & Ecclesiam generalem mordicus tractantes.

10. Ecclesia constat è veris fidelibus & Hypocritis; itaque comparatur reti quod capit Pisces omnium generum; & segeti in quâ Zizania tritico coalescunt. Tamen hæc Ecclesia jure dicitur sancta, 1. Quia omnes per Baptismum Vocationem habent à mundo, quæ separatio est quædam sanctificatio. 2. Munia Ecclesiastica sunt sancta utpote sanctitatem operantia, ergo Ecclesia in quâ exercentur, est sancta. 3. Omnes profitentes Christianismum ad internam sanctitatem obligantur. 4. Finis constituendæ Ecclesiæ erat comparare populum purum & sanctum. Ecce etiam Jerusalem appellabatur urbs sancta cum esset cultu & Moribus valde depravata, *Mat. 27.* Ecclesia ergo tota est sancta sanctitate institutionis, at respectu verè Fidelium in hac vitâ est sancta internè licet imperfectè. Erit perfectè sancta tum cum in infernum detrusis Hypocritis Fideles

gloriâ coronabuntur, *Eph.* 2. 27. & 5. 25. &c. Ecclesia ergo Militaris & Triumphans non sunt duæ Ecclesiæ, sed ejusdem Ecclesiæ duo status. In priori sancti commiscuntur improbis, in posteriori nihil est impuri.

11. In Symbolo Articulus de Ecclesiâ ponitur statim post Articulos de Trinitate. Rationem reddit Tertullianus de Baptismo: Cum sub tribus & testatio Fidei & sponsio salutis pignorentur, necessariò adjicitur Ecclesiæ mentio, quoniam ubi tres ibi & Ecclesia quæ trium est corpus. Indidem Augustinus probat Divinitatem Spiritus Sancti. Si Spiritus Sanctus esset creatura, non præponeretur Ecclesiæ ad quam pertineret. Ut additamentum ad Articulum de Ecclesiâ quis Christianus dicit.

SECT. IX.

Credo Communionem Sanctorum.

1. **H**ÆC pars Articuli de solis verè Sanctis intelligenda videtur. Et hi communionem habent cum Deo Patre, 1 *Jo.* 1. 3. in quantum pro iis curat, *Jac.* 2. 23. Et cum Filio, quia ipse Maleficia eorum sustulit, & nos de gratiâ ejus participamus. Et cum Spiritu Sancto, 2 *Cor.* 13. 14. Imò ipse nos sanctificando communicat nobis & Patrem & Filium. Habent etiam Communionem cum sanctis Angelis, *Luc.* 15. 10. *Heb.* 1. 14. *Mat.* 18. 10. Item cum omnibus Sanctis in terrâ, scilicet in gratiis internis & cultu externo, 1 *Jo.* 1. 7. Sunt omnes Membra unius corporis, *Col.* 2. 19. Item cum Hypocritis in omnibus externis Dei cultus. Item cum omnibus peccatoribus in iis quæ non sunt peccata,

cata, sed non in peccatis, *Eph.* 5. 11. *1 Tim.* 5. 22. *Apoc.* 18. 4. Item cum Sanctis glorificatis; nam Unio omnium Sanctorum cum Christo est Fundamentum Communionis eorum inter se; at illa Unio non tollitur per Mortem, ergo nec hæc Communio, sed perficitur, *Heb.* 12. 22, 23. Hæc Communio ex parte sanctorum vivorum stat in spe Gloriæ quam illi possident, & in æstimatione & imitatione virtutum. Ex parte Sanctorum beatorum hæc Communio stat in Votis & supplicationibus pro nobis. Copiosa turba de sua incolumitate secura, adhuc de nostrâ salute sollicita est, *Hom.* 81. *De tempore.*

2. Et hæc omnia vera sunt; in hæc tamen particulâ Symboli putaverim præcipuè intelligendam esse Communionem inter Sanctos in terrâ, quoad omnia bona & corporalia & spiritualia. Nam licet omnia Sanctorum corporalia non ita formaliter tradantur communitati ac factum fuerit in Primordiis Ecclesiæ, tamen virtualiter idem fit, in quantum obligamur omnes ad opitulandum egentibus quantum possumus. Jam quod ad spiritualia patet ea esse communia omnibus Christianis.

3. Veteres videntur præcipuè attendisse ad Communionem Sanctorum in terrâ cum iis qui sunt in Cælo. Bellarminus addit Communionem Sanctorum in terrâ cum Sanctis in Purgatorio, *i.e.* in Utopiâ.

S E C T. X.

ULterius omnes Christiani testantur quòd omnes qui hanc Doctrinam suscipiunt, eam, ubi opus erit, profiteri seu coram hominibus agnoscere teneantur.

Atque hinc sequitur Ecclesiam Christi esse essentialiter visibilem in hoc Mundo. Cùm enim Professio sit de Essentiâ Christianismi, non est Christianus qui ab hominibus Christianismum suum abscondit. At dices; Frequens est apud Theologos Mentio Ecclesiæ invisibilis. Respondeo: In Ecclesiâ sunt quædam Membra viva, nempe verè fideles; quædam etiam Mortua, nempe Hypocritæ. Per Ecclesiam invisibilem intelligunt verè fideles, quia eorum sinceritas est nobis invisibilis atque adeò eorum numerus. Itaque Ecclesia non dividitur in visibilem & invisibilem, sed se habent ut totum & pars. In Symbolo verò per Ecclesiam sanctam intelligenda est Ecclesia visibilis, ut explicatum est *Seç. 8.*

2. Sed quomodo judicabitur quando opus sit aut conveniat Professionem Christianismi facere? Respondeo: Omnes Christiani agnoscunt sibi incumbere ut auctoritate publicâ interrogati de Religione suâ, eam agnoscant. Nam qui tum non profitetur Christum, eum negat; & qui eum negat, ab eo negabitur. Sed quid dicemus Hobbeo, apud quem licet abjurare Christum mandante supremo Magistratu? Quippe peccatum non esse abjurantis sed mandantis. Ego verò dico huic quod Angelus olim Satanæ: Increpet te Dominus qui Religionem quam Filius Dei docuit, humanæ subdis libidini. De quo plura ubi de Martyrio.

S E C T.

S E C T. XI.

Ulterius omnes Christiani testantur infinitam hominum multitudinem ab Apostolis ipsis Christianissimum suscepisse, eique per omnes vitæ mortisque labores adhæsisse.

Non ut Israelitæ Cananæos ferro & laboribus subegere, non ut Mahometes ferro & voluptatibus vicinos suos attraxit; sed contra Apostoli omnia passi omnia passuros sibi ascivere, eosque tam multos ut furor inimicorum etiam patiendo vicerint.

S E C T. XII.

Certum etiam est apud omnes Christianos, hanc Doctrinam à Christi temporibus ad nostra viguisse, & innumeros singulis seculis Professores habuisse, qui & Regionibus disjuncti & linguis discrepantes essent, postremo nihil ultra humanitatem haberent commune præter Religionem Christianam.

En Firmamentum Traditionis Christianæ, in quo apparet tam fuisse impossibile errorem in Christianissimum irreperere ullo post Christum seculo, quàm hoc idem in nostro seculo impossibile est. Impossibile, inquam, jam est & semper fuit ut error exoriat in Ecclesiâ testimonium gerens Traditionis Universalis; ut verò aliundè enascatur error & possibile est, & in nimium multis exemplis, actu evenit.

S E C T. XIII.

Ulterius Doctrina Christiana proclamat se esse semper apud homines valituram, & ad finem Mundi duraturam, nec unquam fore ut portæ Gehennæ eam prævincent.

1. Hic agendum est de mediis quibus curavit Christus Doctrinam suam factam tectam servatum iri. Atque ea duum generum esse video, alia ex naturâ rerum, alia ex Constitutione Domini. Alia, inquam, ex naturâ rerum Evangelio propagando tuendoque inserviunt, nempe ex naturâ Evangelii, & ex naturâ hominum. Inprimis ipsius Doctrinæ honestas, & in hoc ipso mundo utilitas eam commendat hominum animis. Verum bonorum tantum. Mali quales plerique sumus eam vel hinc oderunt. Itaque ut Doctrina Christiana in stirpe Adami, i. e. ut agna inter lupos ab interitu vendicaretur, propugnaculum aliquod ultra ejus essentiam addi debuit.

2. Accedit non nihil opis ex naturâ hominum scilicet bonorum. Postquam enim Christus Doctrinam suam valdè multorum animis per Apostolos iniecit, pii semper ex amore Dei & posterorum suorum ingenti zelo & industriâ eandem Doctrinam inculcaverunt & inculcabunt. Unde nonnulli (præcipuè Traditionistæ Romani) jactitant eam animis hominum per naturam rerum elabi non posse. Quod ego nunquam potui intelligere. Nam Christianos quàm plurimos posse ab hostibus obrui ex fortunâ multarum in oriente Gentium comperi; quodque jam accidit valde multis, id potest per naturam rerum accidere omnibus; omnibus autem Christianis aut occisis aut à Fide lapsis, ubi est Christianismus? Christiana ergo Religio non satis est defensa à portis

portis inferni, aut suâ innocentia aut pio tam profentium zelo. Sint hæc adjumenta salutis ejus, firmamenta sunt altius petenda, nimirum ex constitutione Domini, atque ea video esse partim visibilia partim invisibilia.

3. Media visibilia per quæ Christus Religioni suæ propagandæ & conservandæ cavit sunt Ordines sacri & Scripturæ sacræ.

SECT. XIV.

QUOD attinet ad Ordines sacros, Christianis omnibus certum est, Christum elegisse duodecem Apostolos, in eorumque manu, cum ipse ascensurus esset, Ecclesiam suam reliquisse. Ulterius constat apud omnes Christianos, quod Apostoli ad munia Ecclesiastica quibus adesse ipsis non vacabat, elegerint nonnullos e Discipulis, & solenniter per impositionem manuum ordinaverint, nec non Ordinatorum nonnullis auctoritatem dederint alios ubi resposceret ad munia Ecclesiastica ordinandi & Ecclesias regendi; hisque omnibus injunxerint ut nunquam ab opere desistant. Perque hæc providerunt ut nullaseculo Ecclesiæ deessent qui Christianæ Doctrinæ propagandæ ac tuendæ incumbant. Nam quod Apostoli præstitere suo seculo ad ædificationem Ecclesiæ, id præstandum incubuit per succedentia secula præsentibus Ecclesiæ Rectoribus.

1. Observa primò, per Ordinationem apud Christianos imprimi characterem personalem, i. e. hominem ordinatum esse devotum & consecratum famulatio Christi, nec posse officium suum ad extremum halitum exuere. Apud Turcas Ministri identidem relinquunt sua, apud Christianos nunquam, nisi fortasse apud Russos, à quâ gente barbarie non ita dudum opple-

tà & Christianismum sub pessimâ formâ proficiente, non sunt Christianorum consuetudines censendæ. Non nulli quidem apud nos ex ordine Diaconatus elabuntur ad curas hujus Mundi, sed (uti mihi videtur) non sine culpâ. Nam cum te Familiæ Christi ascribi curaveris, iniisti pactum cum Christo; at pactum nisi utrâque parte consentiente non jure solvitur. Nulla ergo est libertas ab hoc servitio nisi per Manumissionem Christi. *Quid*, dices, *cum Diaconus sit Presbyter*? Dico eum esse adhuc Diaconum, i. e. habere potestatem ad omnes actus Diaconatus, iis tamen solis non alligari, quia plus quàm Diaconus est.

2. *Sed quid dices de iis qui ob delicta sacris Ordinibus Canonice exuuntur*? Dico, Probabile esse characterem Ordinatorum indelebilem esse, & jure exutos Ordinibus habere adhuc potestatem sed ligatam, sic ut qui pœnitentiâ meruerint in gratiam recipi possint sine novâ Ordinatione Munera Ecclesiæ obire. Nam apud Christianos pœnitens est quasi innocens; & quod tollit crimen videtur auferre omnia incommoda illud crimen insequentia. Nec minùs tamen verissimile est huic contrarium Dogma. Nam cum Ecclesia quempiam è sacris Ordinibus ob flagitia deturbat, quantum in ipsâ est, ei aufert omne quod dederat. Cur autem suspicemur eis denegari auctoritatem malè meritos absolutè ejiciendi, quorum est judicare de Meritis recipiendorum. Nec incommodum est ut tales post pœnitentiam (si videbitur) de integro ordinentur.

3. Observa iterum non esse populi Christiani Ministros ordinare aut constituere. Nam in primâ conformatione Ecclesiæ Christus Apostolos rebus præfecit, Apostoli alios rebus præfecerunt, & sic deinceps. Unde ergo Christiano homini in mentem veniat, Ministros Christi pendere prorsus ab Electione populi, nec aliun.

aliunde auctoritatem habere? Num hoc in Scripturâ sacrâ legit? Num in Praxi Ecclesiæ videt? Quod Christus, quod Apostoli, quod omnes Ecclesiæ fecere, nos facimus. Isti Fanatici quos habent Authores? Dices, *Diaconos septem primos elegit populus*. Elegit quidem, sed jussu Apostolorum. Et quid eorum erat Electio, nisi exhibitio testimonii quòd septem illi essent idonei tali officio? Quo tamen officio non investiebantur, nisi per impositionem Manuum Apostolicarum.

4. Observa iterum in Scholâ dici Ordinem Ordinati traduci ex Ordine Ordinantis ut simile à simili. Quod ego non intelligo; nec enim in Ordinatione ullam video Physicam actionem Ordinantis in animam ordinati, sed tantum politicam. Nec ideo Episcopus cum Presbyteris dat Ordinem Presbyteratus, quia ii sunt omnes Presbyteri, sed quia Episcopus cum Presbyteris habet potestatem Ordinem Presbyteratus communicandi. Ut Rex non facit Baronem quia ipse est Baro, sed quia est Rex, *i. e.*, Fons omnis Honoris. Dices, Episcopi dant Ordinem Episcopatus, quid ni Presbyteri Presbyteratus? Respondeo: Episcopus est supremi Ordinis in Ecclesiâ, itaque habet potestatem omnium Ordinum.

S E C T. XV.

Epis copos Presbyteros & Diaconos constat ordinatos fuisse ab Apostolis, in eorumque manibus res Ecclesiæ relictas fuisse, hosque Ordines à principio ad hodiernum diem in Ecclesiâ perstitisse.

1. Si potest de ullo horum ambigi, de Presbyteratu ambigi potest. Satis enim probabiliter autumant nonnulli in primordio Ecclesiæ solos Diaconos sub Episcopis

H

fuisse,

fuisse, pòst verò crescente onere Presbyteros assumptos fuisse in partem curæ Episcopalis. Mihi verò probabilius videtur Presbyteros fere statim ab initio sub Apostolis fuisse, iisque in certis districtibus quibus adesse ipsi Apostoli non potuerunt, præpositos fuisse Episcopos, qui curam Apostolicam in suis singuli districtibus susciperent; Quippe Apostolos solos primò omnia peregrisse, tum Diaconos in adminiculum assumpsisse, tum ad alios actus Presbyteros constituisse, tum Presbyteris & Diaconis præfecisse Episcopos; necessitate omnia inducente.

2. Omne autem Officium videtur esse in Ordine ad aliquem actum proprium, dispiciamus ergo ad quos actus hi tres Ordines deserviant. Diaconatus est potestas prædicandi baptizandi, Episcopo seu Presbytero in Eucharistiâ celebrandâ assistendi, nec non poculum à Presbytero consecratum Ministrandi, invisendi etiam pauperes & ægros, eorúmque indigentiam Ecclesiæ ostendendi, ut iis succurrendi ratio ineatur. Presbyteratus ultra hæc quæ Diaconatus habet, dat potestatem consecrandi & ministrandi Sacramentum Eucharistiæ, nec non Claves exercendi. Episcopatus his addit potestatem Ordinandi, Confirmandi, in Synodis præsidendi, atque adeò Ecclesiam commissam secundum Canones regendi. Jam apparet hos actus esse necessarios ad conservationem Ecclesiæ; ergo & hi Ordines sunt necessariò adhibendi in Ecclesiâ.

3. Calvinistæ fateor non his omnibus Ordinibus distinctè utuntur; verùm quos rejiciunt, eos concedunt ante ipsos in Ecclesiâ universim viguisse. Imò, dicent, *ista nomina in usu fuere etiam tempore Apostolorum, at fortasse non eodem sensu quo nunc usurpantur.* Cur suspicaris? Ego cur non suspicer, ostendo. Hæ potestates fuere in Ecclesiâ tempore Apostolorum, nam & baptizabant

bant & prædicabant, & Eucharistiam celebrabant, & Presbyteros & Diaconos ordinabant, &c. Imò, dicent, *sed num hæc Officia pertinuerunt ad distinctos Ordines sicut nunc pertinent?* Pertinuisse putant omnes Ecclesiæ præsentēs: (ut loquamur quasi Calvino coævi), nec ex Scripturâ sacrâ, aut sanctorum Patrum Commentariis quicquam in contrarium hauritur, ergo verisimillimè pertinuerunt. Multa sunt quæ suadeant, quod dissuadeat nihil nisi inquietus Fanaticismus. Nostra Ecclesia in multis dissidet ab Ecclesiâ Romanâ, at nullibi sine firmamento aut rationis aut Scripturæ sacræ aut sanctorum Patrum. Presbyteriani nihil horum opponunt Universalis Ecclesiæ praxi, sed unum Calvinum etiâ sine Argumento omnibus præferunt. Verum nisi demonstrato quòd hæc aliter se nunc habeant quàm tempore Apostolorum, nihil esse mutandum omnes sobrii iudicabunt, ne fortè Constitutioni Apostolicæ; atque adeò Deo repugnemus.

4. *Quid de Papâ dicemus?* Eum non esse alterius Ordinis à cæteris Episcopis. Non certè quia est Petri Successor; nam cæteris Apostolis tantum datum erat quantum Petro, nimirum absoluta authoritas solvendi & ligandi. *Sed Petro hæc promissit speciatim.* Respondeo, Quia Christus erat incepturus ædificationem Ecclesiæ suæ à Concione Petri, cui principio suas postea partes addere debebant cæteri Apostoli. Erat ergo Petrus primus Ordine omnium Apostolorum; nam omnis Multitudo sine ordine est confusio; de authoritate verò ejus in cæteros Apostolos non vel ⁱⁿ legitur. Et hanc quidem Ordinis Primatum Episcopo Romano passim concedunt, & per omnia secula concessisse videntur. Quòd attinet ad hyperbolicam illam & infinitam potentiam quam sibi Papa arrogat, ea à solis pene Jesuitis agnoscitur. Cæteri ejus sequaces potestatem solum

Canonicam ei jure deberi aiunt. Ob hanc autem usurpationem eum alieni plerique Tyrannum, permulti etiam Antichristum appellitant. Cæteri autem Patriarchæ & Archiepiscopi nullibi reputantur ab Episcopis Ordine discrepare, sed tantum jurisdictione excellere, & eâ quidem Constitutionibus Ecclesiasticis nixâ.

5. *Num Rex est Ordinis Ecclesiastici?* Non quâ Rex, nam & ante Christianismum multi erant Reges, & in multis Regnis Ecclesia Ordinibus complebatur, cum adhuc Rex Christianus nullus esset. *Num est Rex Ecclesiasticus quâ Rex Christianus?* Mihi non videtur; nam Religio Christiana est æqualis & eadem omnibus eam suscipientibus; ergo Regibus nihil addit quod non & subditis. Christiana Religio nihil mutat rerum hujus seculi, 1 Cor. 7. 17, 24. Itaque Christus dicit, *Regnum suum non esse hujus mundi*, Jo. 18. 33. quam Fidei professionem esse docet. S. Paulus, 1 Tim. 6. 14. Adeo absurdum est asserere, *in gratiâ fundari hujus seculi Dominium*.

6. *Cur apud nos dicitur Rex Caput Ecclesiæ?* Spectemus omnes Reges in uno Constantino Magno. Is adhuc infidelis erat Caput Imperii & omnium causarum Judex; interque alia ei incubuit judicare an Doctrina Christiana sit admittenda. In eam ergo inquisivit, particulatim examinavit, omnia probavit & tandem Christianismum suscepit, & quidem quia Imperator tuendum. Christianismus autem duobus contineri videtur, Doctrinâ Christi & Constitutionibus Ecclesiæ. Doctrina Christi est Verbum Dei, atque adeo non variabilis per Ecclesiam, aut per Imperatorem aut per Angelum de Cælo. Constitutiones autem Ecclesiæ antecedentes Christianismum Constantini Constantinus susceptione Christianismi confirmavit. *Sed quomodo condendi erant Canones de futuro?* Per Ecclesiam sicut antè, sed non fine

ne confirmatione Constantini Approbavit quidem ille priores se constitutiones, quia vidit eas esse innocuas & sibi & imperio. Permittere autem ut constitutiones Ecclesiasticæ futuræ habeant vim legum sine suâ sanctione per Imperium non potuit. Primò, quia faceret damno suo; nam poterit Ecclesia subditos imperii obedientiâ solvere; & sic Constantinus non imperaret nisi durante beneplacito Ecclesiæ, *i. e.* non imperaret sed serviret. Constat autem neminem juris sui aut naturalis aut civilis quicquam amittere suscipiendo Christianissimum, sicut etiam nihil ei addit. Secundò, Constantinus hoc permetteret damno Populi sui, quem iis traderet à quibus fortasse malè tractandus foret. Ipse accipiendo imperium in se suscepit omnimodam curam de bono subditorum, ergo eos non debuit tradere iis de quorum curâ certus esse non potuit. Nec enim demonstratum tum erat Ecclesiam non posse errare in Temporalibus. Nec refert si dicas, *improbabile esse quòd populus malè passurus sit ab Ecclesiâ*; sufficit quòd sit possibile. *Major erat prudentia Ecclesiæ quàm Constantini.* Fortasse, sed Populus prudentiæ Constantini fuit concretus.

7. Erat ergo Constantinus tam caput fidelium quàm infidelium sui imperii; nam & eos pariter tuebatur & per leges à se sancitas regebat. Erat etiam iudex in omnibus causis Ecclesiasticis, quia omnes determinabantur per leges ejus. Nec enim leges dicendæ sunt eorum qui meditabantur aut rogabant, sed ejus qui vim indidit. Summatim, non erat Constantinus Ordinis Ecclesiastici, sed facultatem dedit Ecclesiasticis in suo imperio exercendi eam Potestatem quâ Christus eos munivit. Peregit ut Temporalia per Ordines Temporales sic Ecclesiastica per Ordines Ecclesiasticos.

8. Conventus Ordinum Ecclesiasticorum per totam Eccle-

Ecclesiam dicitur Concilium Generale & Oecumenicum. Tale Concilium non est absolutè necessarium in Ecclesiâ; nam sensa Ecclesiarum possunt haberi per Tabellarios, operosius fortasse sed non minùs fideliter quàm in Concilio. Sic ut Ecclesia Ipsa sit perpetuum ac statum Concilium. Si etiam ante Constantinum tam multi Christiani convenissent, opportunum fecissent Persecutoribus capita omnium Ecclesiarum quasi uno ictu abscindere.

9. In declarandis Articulis Fidei Concilium Generale procedens per modum Testimonii & consensus omnium de Traditis videtur esse infallibile. Adeò enim impossibile est, ut omnes affirmant id esse quòd omnes sciant non esse, ut nec unus possit mentiri in illâ formâ sine sibilo cæterorum. Si autem Concilium procedat per modum disceptationis, quantum ad naturam hominum potest decipi.

10. *Sed an non Spiritus Sanctus tuetur ab omni errore Concilium Generale, quod representat totam Ecclesiam?* Ita statuitur in Ecclesiâ Romanâ. Sed quâ promissione Evangelicâ? *Christus dicit: Si duo aut tres convenerint in meo nomine, Ego ero in medio eorum.* Respondeo: Christus est in medio eorum qui stant ejus dictis, at non eorum quî suis ingeniis nituntur; nam hoc non est convenire in nomine Christi (nisi quoad vocem tantum) sed in Nomine suo. Ac vide, quantulum differunt, qui petunt Religionem suam ab illuminationibus Spiritus Sancti, & qui eam eruunt è suis discursibus per Spiritum Sanctum ab errore defensis? *Sed Christus promisit quòd Spiritus Sanctus duceret Apostolos in omnem veritatem; ergo & Ecclesiam cum quâ Christus est usque ad finem Mundi.* Respondeo: Spiritus Sanctus duxit Apostolos & ducit Ecclesiam in omnem veritatem; sed non præstat utrumque eodem modo. Duxit Apostolos no-

vis illuminationibus, at ducit Ecclesiam per infallibilem Traditionem Doctrinæ Apostolicæ. Huic Doctrinæ traditæ si adhærescimus Spiritum Sanctum ducem habemus, ab eo autem fugimus in quantum nostrosmet sequimur discursus.

S E C T. XVI.

Constitutis in Ecclesiâ Ordinibus ut personæ idoneæ semper præsto sint Evangelio propagando & tuendo, Apostoli eidem ulterius consulere Doctrinam Evangelicam scriptis mandando. Eæ Scripturæ Sacræ nominantur, & peculiari nomine Novum Testamentum, quia continent Doctrinam Novi Fœderis expressè & clarè quam Vetus Testamentum solummodo adumbravit. Has Scripturas omnes Christiani habent ut Repositorium Theologiæ Christianæ, ut scriptas à Viris sanctis quibus adfuit Spiritus Sanctus eos ducens in omnem veritatem, atque adeò ut indubitatè veras & quæ sint ut Lydius lapis dogmatibus Theologicis.

1. De numero horum librorum convenit inter se omnibus Christianis. Quod attinet ad varias Lectiones, eæ tenentur non tangere substantiam hujus Religionis, nec afferre differentiam ullius ponderis.

2. In determinandis autem Controversiis per Textus sacros non parva lis est de interprete. Sacras Scripturas posse omnes in Christianismo lites solvere indubitatum est, quo verò judice genuinus eorum sensus habebitur? Num singulorum est pro seipsis exponere? Ego non puto ob Argumenta adducta in Inquisitione. Nam & Ecclesia in mille fragmenta descindetur, & Respublica sub specie Religionis vexabitur. Hoc posterius in dicto libello fufiusculè ostendi. Prius sic cogo. Scripturas unus-

unusquisque exponit secundum suum animum, *i. e.* pro-
ut ipse afficitur Ingenio, Moribus, Educatione, Stu-
dio; ergo pro diversitate Ingeniorum, Morum, Edu-
cationum, Studiorum & quarumcumque mentis præ-
possessionum diversæ erunt Expositiones sacrorum Tex-
tuum; & hoc quid est nisi Ecclesiam in fragmenta di-
scindi? De facto, an non omnes Sectæ Christianismi
Scripturam sacram sibi cuique propitiam esse ac propri-
am gloriantur? Atque ita necesse est esse. Quicquid
enim recipitur, recipitur ad modum recipientis non
minus in Moralibus quàm in Naturalibus. Quantâ ergo
diligentiâ Schismata vitanda sunt, tantâ est ea senten-
tia reprimenda quæ omnibus Biblia sacra tradit, ut ab
unoquoque suo usui exponantur.

3. Sed omnia, aiunt, quæ sunt necessaria ad salu-
tem in Scripturâ sacrâ liquidò habentur; privata ergo
ejus interpretatio tuta est unicuique Regula Fidei in ne-
cessariis quidem ad salutem; quæ verò obscura sunt ea
ut non necessaria reputari debent. Atque hæc non dif-
fiteor à viris doctis dici, & à valdè multis & ingeniosis
cum plausu accipi; mihi certè non probantur. Nam
primum, habeo ex secundâ Epistola Sancti Petri, Scri-
pturas sacras passim distorqueri ab indoctis & instabili-
bus in suum ipsorum exitium; ergo necessaria ad salu-
tem non satis liquidò exhibentur in Scripturâ sacrâ in
usum indoctorum & instabilium. Dices etiam necessa-
ria ad salutem, nam in non necessariis impingere non
esset exitiale. Jam si solum doctos & stabiles admittis
ad exponendum sibi Scripturas sacras, quàm paucis ho-
minum confalis? Quàm innumeros excludis ab Exposi-
tione privatâ Scripturarum sacrarum, quam tamen uni-
cam statuis Fidei Christianæ Regulam? Quàm pauci
sunt, dixi, docti & stabiles? Imò quis omnium se ju-
dicare debeat satis doctum & stabilem, ut huic operi
par

pâr sit? Distorquent, ait Apostolus, Scripturas sacras indocti & instabiles in suum ipsorum exitium. Quàm periculosum ergo est nostrismet Expositionibus adhærescere? si sumus indocti & instabiles possumus distorquere Scripturas sacras, & hæc distorsio nobis erit exitialis, ergo Scripturas sacras unicuique tradere exponendas est miseris animabus foveam objicere.

4. Iterum non satis est in facinorosa Adami stirpe, omnia ad salutem necessaria liquidò haberi in Scripturis sacris, ad hoc quidem ut ex unicuique pro seipso exponendæ tradantur. Nam cum tota Scriptura sit Verbum Dei, nisi omnes Textus sint liquidi, relinquentur aliquot Textus interpretationibus indoctorum & nequam hominum ridiculis & perniciosis; quod malum in his regnis plûs satis experti sumus & experimur. Rem autem exemplo fusè posui in inquisitione.

5. Iterum, nihil videtur indignius Verbo Dei scripto, quàm ut prostituatur Expositionibus cujusque legis fortasse etiam legere nescientis. Quotus quisque vulgi est cujus judicio res nostras ad hanc vitam vel mediocre Momentum habentes libenter committeremus? Ergo res Christi ejusque regni judicio cujusque subdicere, an non est declarare nos fûsque deque habere quid de Christianismo eveniat? Illud verò non ferendum, quòd quidam in honorem Scripturarum sacrarum eas nolunt subdicere Expositionibus Ecclesiæ quantumvis magnæ, ipsi tamen eas subiciunt Expositionibus quantumvis indocti quantumvis scelerati lectoris.

6. Ergone, dicetur, non permittentur lectioni vulgari Biblia sacra? Ego verò permitti velim, modò Vulgus constanter edoceatur quanto cum periculo facrorum Textuum Expositionem in rebus dubiis sibi arrogent. Ut verò viri docti in Concionibus & libris editis inculcent populo, quòd eorum sit Scripturas sa-

cras manibus terere, atque inde articulos Fidei suæ eruere, quis potest probare? Eadem operâ jubent miseros insanire.

7. Oportet tum ostendere, dices, quomodo Scripturæ sacræ Evangelio perpetuando inserviant. Tradebantur, inquam, in Manus Ecclesiæ tanquam signa & memorialia Doctrinæ jam receptæ; non ut ex iis Articulos Fidei de integro eruant Christiani, sed ut eas legendo Doctrinam receptam recognoscant, & Mentibus penitiùs infixam retineant.

8. Demum, qui Textus clari sunt de necessariis ad salutem, hoc videntur habere non ex vi Phrasidis (quæ in Materiis obscuris ambiguum interpretationem vix effugiat) sed ex unanimi consensu quo tenetur Doctrina in iis contenta, *i. e.* ideo non ambigitur de sensu horum Textuum, quia semper visi sunt præ se ferre Doctrinam de quâ nemo dubitavit. Unde etiam multoties in Ecclesiâ obvenit, ut subortis novis Dogmatibus multi Textus novas facies induerint & fuerint coacti novos sensus subire.

9. Atque hinc prospicere liceat effectum Christianismo perniciosum, si hoc semel irrobora-verit in Ecclesiâ, quod sacra Scriptura nuda, *i. e.* sine concurrente testimonio Ecclesiæ tam evidenter proponat necessaria ad salutem, ut sit cuique interpretanti iusta regula Fidei. Hinc enim eventurum est ut nihil videatur necessarium ad salutem, quod ab Hæresi aliquantisper prosperâ oppugnatum fuerit; Textus enim quondam clari nunc obductâ sophismatum caligine offuscantur. Itaque hoc semper urgent Socinianismo amiciores. *Quicquid est necessarium ad salutem, hoc bonus Deus, inquiunt, clarè exprimi curavit in Verbo suo; at Articuli de Mystério Trinitatis minùs clarè ibi habentur.* Imò, inquam ego, ut mihi videtur clarissimè. *Quid, regerunt illi, num illi Textus clari sunt de quorum sententiâ tot viri docti*
li.

litigant? Ecce ordo rerum. Fidem non habent huic Articulo, quia non est necessarius ad salutem; non est necessarius ad salutem, quia non habetur clarè in Scripturâ sacrâ; & hinc apparet quòd non habetur clarè in Scripturâ sacrâ, quòd de Textibus eò pertinentibus à multis doctis disputatur, *i. e.* si Diabolus potest Hæresin in Ecclesiâ excitare (& quod poterit præmoniti sumus) tum poterit efficere ut quod antea semper & ubique videbatur necessarium esse ad salutem, non dehinc ut tale videatur; quod est Religionem Christianam maculare, & paulatim ad nihilum redigere.

S E C T. XVII.

DE Mediis Visibilibus quæ Christus Ecclesiæ suæ perpetuandæ adhibet, dictum est. Eum invisibilia quoque Media duo promississe comperio, auxilium Spiritus sancti & Providentiam Patris sui. Primò, testantibus omnibus Christianis, *Christus ad sustentandam Ecclesiam suam utitur ope Spiritus sancti, eaque duplici; nam & Mundum miraculis convincit, & corda piorum consolatur ac contra omnia inferni molimina confirmat.*

1. Dices: *Spiritus sanctus non omni ævo edit miracula.* Respondeo, Spiritus sanctus Miracula quæ per Apostolos egit jam facit; non quidem similia edendo, sed eadem notitiæ nostræ infallibiliter tradendo; adeò ut vis Miraculorum tum olim editorum sit in hominibus convincendis eadem nunc quæ fuit cùm primò ederentur.

2. Quòd verò Spiritus sanctus sit omnibus Christianis immediatus Doctor Doctrinæ Christianæ prorsus abhorret à Fide Catholicâ, quâ Doctrinam ab Apostolis traditam obnixè tenere jubemur, eorûmq; Doctri-

nâ Universam niti Christi Ecclesiam profiteri cogimur.

3. Imò, dices, *profitemur Doctrinam Apostolicam, hancque auribus haurimus à Pastoribus Ecclesiæ, sed quæ solo instinctu Spiritus sancti animis imprimitur.* Quæso, si solo instinctu Spiritus sancti, quid opus est Prædicatione humanâ quam tamen Christus instituit? Si nulli usui est, frustra est, quod de Operibus Dei dicere est impium. Iterum, si frustra prædicatur Evangelium, soloque instinctu Spiritus illuminamur, tum nemo suâ culpâ Evangelium rejicit, contra Dictum Domini: *Hæc est condemnatio quòd lux venit in Mundum, & homines diligunt tenebras magis quàm lucem.* Nemo enim potest instinctum Spiritus sibi attrahere aut ullo modo conciliare. Quid ergo? *An non Spiritus sanctus est Author Conversionis peccatorum?* Omnino, & instrumentum ejus est Prædicatio humana, Sacramenta, &c. Illuminatio S. Petri & S. Pauli, & sine dubio multorum aliorum præstita fuit sine ullo Medio externo per absolutam Creationem luminis. Sed hæc sunt Miracula; si vero Spiritus sanctus Conversionem omnium peccatorum efficeret sic, omnia Media Gratiae redderentur inutilia, omnes Reprobi excusabiles.

4. Observandum etiam est, quòd cùm Dominus craret pro omnibus suis, totum eorum numerum divisit in duas Classes, scilicet in Apostolos & in alios qui per Prædicationem Apostolorum credituri essent, Jo. 17. 20. Quo nihil minus significari potest, quàm Spiritui sancto immediatè operanti non sic tradi Ecclesiam ut Fanatici somniant; sed eam ad finem conservatam iri per Prædicationem Apostolorum, i. e. per eos Prædicatores qui constitutione nituntur Apostolicâ, quibûsque concursum suum constanter præstat Spiritus sanctus.

S E C T. XVIII.

Postremò, omnes Christiani testantur, *Christum promississe Ecclesiæ suæ, se ei semper affore per providentiam Patris sui, qui sic omnia moderabitur ut portæ Gehennæ non sint prævalituræ.*

1. Vides Media tria superiora perpetuandæ Ecclesiæ conducere, firmamentum verò omnium fesse hoc ultimum. Nam quòd Ordines Ecclesiæ non dissolvantur, quòdque sacræ Scripturæ non comburantur, Providentiæ Divinæ est quæ cohibet frangitque Malorum impetus. Spiritus sanctus etiam piis in Officio fungendo constanter fert opem; sed Providentiæ Divinæ est, quòd sint pii impiorum odiis superstites, quibus Spiritus sanctus opem ferat.



S E C T. XIX.

Posthæc consentiunt omnes Christiani, *Purissimam hanc Doctrinam multoties & in multis Professoribus, erroribus interrepentibus aspergi; Satanâ scilicet interserente tritico Zizania, eique hæc affigere conante, & Commenta sua tanquam dicta Domini proponi satagente.*

1. Hujus mali tractari deberent causæ & remedia. Ac Diabolum quidem causam primam exitisse, & esse omnium humani generis Malorum, Christiani omnes consentiunt; hujus Ministras esse superbiam, instabilitatem, & ignorantiam hominum qui principiis suis terrenis Cœlestia merentur, & Scripturas sacras distorquent in sui aliorumque perniciem.

2. *Sed cur superbiam nominavi? Quid superbius quàm*

quàm ut instabiles & indocti homunciones se ponant in Tribunali Christi, judicéntque quæ Doctrinæ sint verè Christianæ, quæ non? Adde quòd multi homines astuti, famæ & Magni Nominis gratiâ multa fingunt, & per Captiones suas Brutis populi animis instillant. Nonnulli etiam pias fraudes admiscuere, fortasse zelo in bonum non bono, multò sæpiùs ad Dominationem in animos hominum conciliandam. Hinc fictæ Historiæ, ficta Miracula, quibus imperita ingenia capta, se suæque tantorum Prodigiorum quasi Dominis committunt. Quin hæc mala attribuit Christus non solùm Diaboli hominûmque malitiæ, sed etiam negligentia bonorum Christianorum. Dum dormiêrunt, inquit, homines inimicus Zizania interfecit tritico. Interea, an hæc corruptela possit totam, aut quasi totam visibilem Ecclesiam fœdare, acerrimè disputatur.

SECT. XX.

Nihilominus convenit inter Christianos, hanc Doctrinam etiam multis Erroribus sædatam fore salvificam. Scilicet, superstructiones comburendas esse, homines verò salvandos; atque adeò hæreticis Damnationem imminere non ex deceptione, sed ex superbiâ & contumaciâ.

Agendum hîc esset de Reformatione quæ est Medela Morborum Ecclesiæ; & de eâ jure quæreretur, an sit necessaria & quando? Tum, penes quos sit jus Reformandi? Postremò, in reformando quâ regulâ utendum sit. Sed cùm de his omnibus valde malè conveniat inter Christianos. non est ut de iis disputatio me Theologiam omnium Christianorum consensu Christianam pollicitum moretur.

Jámque

Jámque de iis quadantenus differui quæ Theologia Christiana pronunciat de seipsâ & de Ecclesiâ per eam constitutâ, fortasse nimio cum studio brevitatis pro tantæ molis materiâ; sed meminerint Lectores, me hæc adferre non ut alios non legant, sed ut legant sine noxâ. Quid de aliis suis objectis proferat hæc Theologia, restat dicendum. Atque hæc quidem omnia in duas Classes repono; alia enim ab hæc Theologiâ supponuntur & comprobantur, alia de integro eduntur. Sit ergo hujus Summæ

TERTIA PARS.

De iis quæ Theologia Christiana supponit & comprobat.

SECT. I.

Imprimis Theologia Christiana supponit rectum usum rationis in homine, eumque in omni re comprobat & exigit.

Religio Christiana exigit rectum usum rationis, & in se capeßendâ exercendâque (ut 2. p. §. 2.) & in omnibus vitæ humanæ partibus, stultitiam & errorem ubique ut morbum animi damnans.

SECT.

S E C T. II.

A *T*que aded ab omnibus Christianis Philosophia & probatur & pro facultate adhibetur.

Nam Philosophia nihil est nisi ratio Doctrinâ & Meditatione aucta. Nec Apostolus Philosophiam aliter condemnat quàm si vana sit & mendax, *i. e.* nomen Philosophiæ falsè assumat. Constat etiam, apud Josephum per Philosophiam denotari Sectam Judaicam. Interea non est diffitendum nonnullos Philosophantium præsertim *quæ sunt* (*quo genere*, inquit Cicero, *nihil arrogantius*) & fuisse & esse Christianismi hostes. Vitium hominum non Doctrinæ; nam pleròsque eorum qui Philosophiam maximè callent, Religioni Christianæ amicissimos videas. Nec mirum est si in stirpe Adami inveniantur nonnulli, etiam inter Philosophos, qui contra Deum ipsum turgescant. Tumefacti scilicet speculationibus suis & plebem hominum ut Naturæ ignaram contemnunt, & Religionem quidem quia ejus etiam Plebem capacem vident. Sed quàm multa incognita pro cognitis habent & vento Opinionum insistant loco scientiæ rerum? Hi tamen Gigantes adhuc disputandum reliquerunt, sciaturne aliquid in naturâ, necne. Tamen.

S E C T.

S E C T. III.

Philosophiam etiam speculativam Christiani exercent ;
Metaphysicam dico & Physicam.

1. Deum esse, esse Unum, Vivum, Omnipotentem, Omniscium, Æternum, Optimum, Infinitum, &c. Et docent Christiani Philosophi, & Argumentis à ratione petitis demonstrant, cognoscique lumine Naturæ feliciter contendunt. Idem censent de Operationibus Dèi ad extra quæ sunt Creatio, Conservatio & Concursus; idem de immaterialitate & immortalitate Animæ humanæ. De quibus omnibus tractare Metaphysicorum est, ad quos Lectorem remitto. Cum vero in his ingens illustratio lumini Naturæ accesserit ex patefactionibus Divinis. (& accessisse liquidissimum est) Metaphysicorum Christianorum erit rationibus lumine naturali præbitis testimonia è sacra Scripturâ, ubi opus erit, adjungere, ne legentes hæc ut prorsus Philosophica libertati suæ permissa putent. Hobbeus hoc præstitit in Moralibus, quàm pio tamen consilio id fecerit, non satis comperio.

2. Physicam excolunt Christiani duplici præcipuè bono: Primò, quia pleræque contemplationes Naturæ ad Praxin humanæ vitæ utilem dirigunt; tum maximè ut consideratione creaturarum mens humana excitetur ad Deum Authorem gratiis & admiratione colendum. Studere autem Philosophiæ quæstus aut nominis causâ non est Christiani sed Artificis.

K S E C T.

S E C T. IV.

Differtissimè autem Philosophia practica seu moralis commendatur à Theologia Christiana; Ethicam dico Oeconomicam & Politicam.

1. Nam Theologia Christiana omnem virtutem suis imperat, omne vitium prohibet, declaratque cognitionem exercitiūmqne Mysteriorum Christianismi nulli usui iis fore qui Præcepta Naturæ non servaverint.

2. Nec tamen explicat hæc Theologia naturam virtutum & vitiorum, nec circumstantias sistit actionum humanarum per quas earum indifferencia tollatur; sed alterum præcognitum supponit lumine Naturæ, alterum Prudentiæ humanæ alligat. Summa Philosophiæ Moralis est, secundum rationem agere, nec quicquam ulterius exigit Theologia Christiana. Ponam exemplum unum aut alterum superioris Theorematis.

S E C T. V.

Obedientiam Magistratibus præstari, summâ cum sedulitate mandat Doctrina Christi.

1. Nulla quidem est Christianitatis Regio quæ non hanc prædicat ut Doctrinam Christi; apparet tamen ex Argumentis quibus eam Christus & Apostoli muniêrunt quòd ea supponitur potius quàm edocetur. Date Cæsari quod Cæsaris est, *i. e.* Date quia est justum. Sic S. Paulus: Date suum cuique, tributum cui tributum debetur, &c. Supponit certè Dominus, subditos Magistratibus lege Naturæ obstrictos esse; & virtutem hanc

hanc obedientiæ ideo tam inculcat , ne Discipuli quibus libertatem promiserat , putent se à Regimine civili liberos fore.

2. Atque hinc sequitur , non determinari in Evangelio quanta obedientia debeat Magistratui. Id solum edicitur ut omnes Christiani justè se gerant erga omnes , ac inprimis erga Magistratus , *i. e.* tantum lis obsequium præbeant , quantum ad eos jure pertinet. Id autem quantum sit ex principiis rationis naturalis , & ex legibus Patriæ cognoscendum est. Ponam Exemplum contra Hobbeum qui sceleratam induxit obedientiam. Non licet , inquam , ~~Deum~~ contumeliâ afficere ex Mandato Principis ; quia Natura jubet Deum colere. *Coles* , inquit , *corde tenus ; sed ore violabis ex mandato ejus cui omnimodam debes obedientiam.* Insto : Do Cæsari quæ Cæsaris sunt ; non est autem Cæsaris imperare id quod non possum præstare sine peccato ; & ubi non est officium ejus imperare , non est meum obsequium. *Sed peccatum erit imperantis.* Imò & obsequentis. *Sed tu ei permisisti judicium boni & mali.* Imò quantum ad præmia externa & penas externas , itaque etiam ei in impio decreto exequendo non resistam.

3. Sequitur ulterius Christianos rebelles non solum deficere à Magistratu Civili , sed etiam à Christo ipso qui & omnem improbitatem damnat & disertissimè hanc inobedientiam erga Principes. Quid dicam de armis susceptis contra Magistratum etiam Christianæ Religionis ergo ? Dico nihil eo esse magis Antichristianum , si ve Christi vitam mortemque spectes ubi omnia potens omnia passus est , si ve Doctrinam quæ injuriis inferendis adeò non indulget , ut etiam patientibus injurias compensationem coelestem proponat. Sit alterum exemplum connubium. Nam

S E C T. VI.

Connubia etiam, & Ethnicorum & Judæorum comprobavit Religio Christiana. Aliqua tamen addunt Christiani; affirmant enim Fœminam è costâ viri per Deum desumptâ primitus factam fuisse, ac proinde uxorem cum viro unam esse carnem, divortiumque vix posse fieri in solidum, nec separationem quidem perpetuam à thero & mensâ nisi causâ adulterii.

S E C T. VII.

Ulterius. apud Christianas. Matrimonium est sacrum, quatenus est Symbolum Unionis Christi cum Ecclesiâ. Itaque vix licere putant fideli cum infideli connubio jungi, aut certè non debere fieri nisi gravissimis de causis. Ubi tamen ante Baptismum Matrimonium contractum erat, fidelis non potest à consorte infideli discedere. Jam vitia opposita Matrimonio ut adulterium & incestus in Philosophiâ tractanda sunt, nec enim de iis quicquam habet peculiare Theologia Christiana.

S E C T. VIII.

Ultra ea quæ rationi naturali obversantur Theologia Christiana supponit veritatem historicam Veteris Testamenti. Vetus autem Testamentum consulitur ex Pentateucho & cæteris Libris prout apud Nostrates vulgò in manibus habentur. Hos omnes non solum Judæi, sed etiam Christiani ad amussim defendunt; & ope Spiritus sancti

sancti à viris sanctis conscriptos fuisse contendunt, adeoque indisputabiles esse.

1. Litigatur de Libris quibusdam qui vocantur Apocryphi, quorum pleróque recipit Ecclesia Romana ut Canonicos; nostras Ecclesia tantum ut utiles adhibet, divinitus verò datas fuisse minimè agnoscit; nec enim sic traditum est.

2. Nominantur etiam aliquot Libri in Veteri Testamento qui jam non habentur, & qui sine dubio periére. Nec itaque hoc dicunt, Christiani, has esse omnes quæ unquam fuerunt Scripturas sacras Veteris Testamenti, sed solum has quæ habentur esse veras & legitimas.

3. Variæ Lectiones magis turbant Novum Testamentum quam Vetus. De iis non nihil dictum est in 2. p. Addo, non sine ratione de his dici quod de libris amissis dicitur. Deus non conservavit omnes libros auctoritate suâ editos; quos conservavit hi sunt verba Dei. Similiter, Deus non conservavit indubitatas omnes partes horum qui restant librorum, quæ verò sunt indubitatae partes horum librorum sunt indubitatae verba Dei. Ubi turbas variâ Lectio creavit, ibi sistendum est nec temere judicandum quæ sit vera, ne fortasse veram abjiciamus & notham amplectamur.

4. Ex hac autem disceptatione exargit difficultas non mediocris. Sunt multæ variæ Lectiones, harum omnes unâ exceptâ sunt mendosæ. Iterum fortasse sunt multæ variæ Lectiones quæ nobis non apparent, fortasse multæ periére, & inter illas fortasse intercidit genuina, unde sequitur posse usu venire ut menda irrepserint in partes Scripturæ sacrae indubitatas; nam omnis ejus pars est indubitata in quâ nulla est varietas Lectionis. Cùmque aliquot integris libris non fuerit ab interitu cautum, non apparet unde sit tanta permanentium librorum immunitas, ut nullam omnino ne in circum-

stantialibus quidem corruptionem pati potuissent. Adducitur etiam Veteris Testamenti longævitas; asseritur illud habuisse solam Gentem Judæorum ejus saluti caventem, omnes autem alias Gentes ejus pernicipi studentes. Multæ etiam memorantur Judæorum conturbationes & quidem oppressiones usque ad linguæ vernaculæ commutationem. Deinde certum est Versionem à 70. factam Canonicam habitam fuisse temporibus Domini & Apostolorum diuque post; ea tamen in multis differt ab Hebræo Textu; Hebræus ergo Textus & Versio à 70. ut variae Lectiones reputandæ sunt.

5. Multa his similia apud Authores & malevolos & benevolos invenias. Ego mihi has posui Regulas. 1. Deum pro bonitate quâ scribi sacra curavit, curaturum etiam ut ea scripta salva persistant quoad substantiam, i. e. quod ad eorum finem satis esset. 2. Ubi suggeritur corruptionis suspicio, sustineo me; & si difficile est credere hoc esse Verbum Dei, tamen quia Verbo Dei insertum est nihil contra disputo.

6. Post hæc, compertum est omnes Textus de quorum autoritate dubitatur versari in circumstantiis, & quasi vestitu Religionis. Essentialia enim Religioni Christianæ non solum verbis Scripturæ sacræ continentur, sed etiam in animis fidelium omnium conservantur; & traditione orali ac practicâ devehuntur. Quæ verò sunt minus essentialia Religioni non reponuntur, nisi in Scripturis & quorundam doctorum animis quorum traditio adversus mendas irrepentes non satis habeat tutaminis, i. e. Textus spectantes ad essentialia Religionis à valde multis curantur, non nisi à paucis ii qui spectant ad accidentalialia.

7. Sed num est de fide nostrâ, Pentateuchum esse ^{Aut, ex} Mosi? Videtur esse sensus Christianorum communis Mosem scriptam reliquisse saltem substantiam horum

rum librorum. Sed multa suadent Authorem Mose longè juniorem commentationes suas interfervisse, manamque ultimam apposuisse. Hic enim edicitur de Morte Moysi & Israelitarum luctu, &c. quorum observator & Collector nimis diligens est Tractator Theologico-politicus. Per quæ tamen nihil derogatur veritati Pentateuchi; cum eos libros in Canonem reposuerint Christiani, non quia noverint eos à Mose scriptos fuisse, sed quia ab Ecclesiâ Judaicâ approbatos viderent. Librorum enim Ruth, Jobi, &c. prorsus nescimus Authores, eos tamen pari hospitio excipimus cum Pentatecho.

8. Demum, an quatuor prima Capita Genes^{is}, prorsus ad literam exponenda sint, seu potius allegoricæ in plerisque admitti debeant, inter doctos non ita convenit. Ambigitur, an liber Job sit parabola, vel Historia. Canticum Canticorum totum allegoricum agnoscitur, ut millia in Psalmis & Prophetiis. In tantâ vetustate non est ut clarè videamus.

SECT. IX.

Historiæ Veteris Testamenti tres tantum periodos, easque paucis considerabo; creationem Mundi, lapsum primorum Parentum, & electionem Populi Israelitici. Ab his enim multa in Christianismo aut dependent, aut certè illustrantur. Creationis Mosaicæ consideremus tempus & formam. Quod ad tempus Creationis attinet.

Christiani non dubitant Adamum fuisse primum hominem, ex eoque & Evâ omne humanum genus oriundum esse, Mundumque exordium habuisse prout statuitur, 1 cap. Genes.

1. Mundum habuisse initium. Philosophorum longè maximi tenuere, ut patet per Aristotelem in *acroamaticis*. De tempore quidem dicit ille Philosophus, *Πάντων γένεσις*. Epicurei Aristotele posteriores posuere *atomos æternos*, Mundum ex eorum fortuito concursu in tempore natum fuisse. Philosophia ergo disputat Mundi non habuisse initium, eum habuisse initium hoc stato tempore ex insalubili Scripturâ affirmant & Judæi & Christiani. Et quid contrâ adfertur?

2. *Adamus quidem* (inquit Pater Præadamitarum) *creabatur ut habemus in Genesi, & erat Pater Incolarum Palæstinæ, at multò ante ipsum fuerunt homines. Nam scribitur Gen. 6. Filios Dei introiisse ad filias hominum, i. e. Adamitas ad præ-Adamitidas.* Verùm liquet hîc per filias hominum intelligi filias Adamitarum: dicitur enim *v. 1. Cum homines inciperent crescere in terrâ, & filia iis natæ essent, filii videntes quòd essent pulchræ, &c.* Vel per hunc Authorem non Præ-Adamitæ sed Adamitæ jam inceperunt crescere, ergo filia hominum erant filia Adamitarum. *Sed qui erant hi filii Dei?* Mihi probabile videtur, per filios Dei hîc intelligi Raptores, qui viribus freti omnia ex libidine egere. Sic autem appellantur non ob ista vitia, sed aut ob magna corpora aut ob magnam potentiam Imperii, unde etiam dicuntur Gigantes. Patet enim multa ad Deum referri in Veteri Testamento ob extraordinariam, aut magnitudinem, aut vim; ut Mons Dei, Cedri Dei, Urbs Deide Ninive.

3. Imò, ratione redditur maximè probabile, Mundum hoc tempore initium cœpisse. Reputa enim quàm ferò partes permagnæ orbis hominibus sitæ essent. Græcia parvis momentis notâ fuit ante Bellum Trojanum. Homeri ævo Sicilia & Italia putabantur Gigantum Terræ. Vinum multò post in Galliâ non nascebatur. Britannia &

& Hybernia etiam Cæsaris ævo sylvis pene tota incolebatur. India Occidentalis duo tantum Imperia ostendit Hispanis, & ea penè noviter incepta. Per orbem multò diutius cultum qui claruerunt bello (extra scripta sacra) ante Bellum Thebanum, & Funera Trojæ? Ægyptiorum Dynastias quis Veterum non risit? Quis non Arcadas vetustiores Lunâ? Jam Artes quàm serò inventæ! Quid vis? Homines multa secula ante Adamum fuisse, sed nullas Artes invenisse, Bellis non claruisse, terras aliquas prægrandes non nisi valde serò occupasse. Non homines sed stipites narras. Quis contenderet de longâ prosapiâ nullo facto clarâ?

S E C T. X.

Formam etiam Creationis Mundi Mosaicam indubitanter agnoscunt Christiani.

1. Multi quidem multa in principio Genesis allegoricè exponenda censent. In aliquibus partibus an ita se habeat necne, haud scio. Sed res scribitur quasi planâ narratione; & Textum in Allegoriam trahere est in multos; i. e. nullum certum sensum tradere. Nam si unus unam allegoriam invenit, alius aliam inveniet, centenas centum.

2. Interea, cur pudeat Philosophiæ Mosaicæ in tradendâ Methodo Creationis Mundi? Si ibi tradidisset Doctrinam de Vorticibus, nun acciperetis? Si induxisset atomos hamatos, uncinatos, & sine causâ se desolantes, non rideretis? *Deus*, dices, *fecit lucem & diem ante Solem*. Quid ni? Hoc nihil sonat nisi Deum esse majorem Naturâ, & res aliter administrasse in creando Mundum, quàm in Mundo creato. Ecce, integra Ecclesia Christiana hanc Scripturam amplexa est ut

Verbum Dei; Deus Christianorum fidem multis Miraculis confirmavit. Nullus Philosophorum hypothesein suam de initio Mundi demonstrasse censetur. Imò, quòd de atomis Democriti dicit Cicero (*Quaest. Acad. l. 4.*) id liceat de singulis aliorum Dogmatibus dicere, scilicet quòd sint somnia Philosophi non docentis sed optantis. Nos pro Hypothesi Mosaicà adducimus testem (per omnes Christianos) Deum. Non debes à tantà authoritate discèdere, certè sine evidenti demonstratione.

S E C T. XI.

Lapsus primorum Parentum consideranti incumbit dispicere, quis fuerit eorum status innocentium, quod labentium peccatum, & quæ mala peccatum illud sunt sequuta. Quod ad primum attinet, Christiani credunt omne creatum fuisse bonum (nec enim aliud ab Optimo & Potentissimo Opifice potuisse procedere); eminentiori modo Adamum, utpote qui creatus fuerit ad imaginem Dei, ejusdem quidem Naturæ nobiscum; sed tam rectè dispositæ, ut officio suo peragendo habilis & promptus fuerit. Officium etiam ejus fuisse (ultra legem moralem), ad amussim observare legem Dei positivam quæ vetabatur sub pænâ mortis comedere fructum arboris in medio horti; Postremò Adamum, si stetisset rectus, vitam fuisse conservandam virtute ligni vitæ.

1. Quid autem est imago? Est simile alicui secundum speciem, & ex eo expressum. *Aqui. 1. p. q. 94.* Ovum ovo simile est, tamen non dicitur imago ejus, quia non ex eo processit. Irrationalia processerunt è Deo, & sunt ei similia in rationibus genericis, quatenus scilicet sint & vivant, improprie tamen dicerentur facta ad ima.

- imaginem Dei ab defectum intelligentiæ, qui est iis specificus. Plerique existimant hanc Dei imaginem in Adamo fuisse animam rationalem; alii libentius dicunt hanc imaginem fuisse rectitudinem & sanctitatem animæ Adami; ac utrumque satis commodè videtur dici.

2. In quo verò stetit rectitudo Adami? Respondet Aquinas ubi supra, *Adamum rectum fuisse factum in hoc quod ratio ejus subderetur Deo, & vires inferiores rationi.* Unde colligit primum hominem non impeditum in intelligendo ab inferioribus multò clariùs cognovisse Deum, & alia quàm nos cognoscamus. Imò, eum omnia scripsisse quæ continentur in primis notionibus. Hæc mihi non videntur sequi. Nam imprimis, Adami ratio impediabatur ab inferioribus potentis naturaliter, licet non morbosè. Sic enim communiter philosophamur: animam rationalem esse in corpore tanquam in Ergastulo, & in rebus cognoscendis alligari speculationi phantasmatum, multò liberiores futuram in statu separationis à corpore. Non ergo ex hoc quod ratio Adami non impediabatur morbosè, non ex hoc, inquam, sequitur etiam statim res melius quàm nos cognovisse, sed sequitur quod melius cogniturus erat; ad quod tamen multum & Meditationis & temporis videtur jam tum fuisse necessarium.

3. Aquinas videtur præoccupasse solutionem hujus objectionis, dicendo, *hanc extraordinariam Adami cognitionem fuisse non per species acquisite sed infusas.* At nihil de hoc habet Scriptura sacra, quo ergo ratiocinio hoc dicit? *Quia Adamus creatus erat ut sit principium humani generis non solum generandi sed etiam instituendi.* Sed ad institutionem aliorum tam requiritur scientia perfecta, quàm ad generationem vis corporis perfecta. Potest verò dici, Adamum sine instantaneâ Artium infusi-

one potuisse scientiam acquirere satis in tempore ad instituendam prolem nondum genitam. Præterea, si Adamus stetisset integer, proles ejus nascitura erat cum integrâ sanctitate, rationemque haberet non impeditam, adeoque nec institutione indigentem. Sed hæc utcumque se habuerint, certum est Adamum sat cognitionis habuisse ad defungendum officio suo, nec sine sua culpâ potuisse decipi. Alioqui enim Deus statueretur Author omnium Humani Generis malorum. Dices, *Eva decepta fuit.* Respondeo, Non in statu innocentie, nam elatio animi quâ cupivit scientiam Divinam præcessit deceptionem.

4. Non dicitur in sacra Scripturâ quod Adamus creatus esset ad immortalitatem; cum tamen Mors statuatur peccati stipendium, videtur innui Adamum innocentem fuisse immortalem; non quidem impassibilitate naturæ suæ, ejusdem enim erat nobiscum, nutritione egens & impetuosus externorum actionibus obnoxius, quippe qui mollior esset quàm arbores, saxa, dentes & cornua ferocium animalium. In omnibus autem quæ non sunt expressè de fide, secundum ordinem Naturæ differendum est. Unde ergo sortitus est immortalitatem Adamus? Videtur tutus fuisse à decrementis internis edendo identidem de arbore, Vitæ à vi externâ per rationem suam & Providentiam Divinam. Quæ satis est tetigisse.

S E C T.

S E C T. XII.

C*Redunt omnes Christiani primum primorum Parentum peccatum fuisse esum fructus vetiti.*

Cum peccatum sit transgressio Legis constat formale omnis peccati esse inobedientiam. Materiale autem primi hominum peccati videtur incepisse per elationem animi, quâ cupiêrunt primi Parentes fieri similes Deo in cognitione boni & mali. Tum consummationem habuit hoc peccatum in edendo, seu in proposito edendi fructum vetitum. Prior pars erat transgressio Legis Naturæ, posterior pars erat transgressio Legis positivæ.

S E C T. XIII.

M*Alia consequentia primi peccati statuuntur à Christianis, denudatio animæ per ablationem gratiæ quâ originalit & muniebantur primi Parentes, tum ejectio è Paradiso quâ significabatur, eos dehinc mortales fore & vitam cum labore & periculis peracturos, tum etiam reatus obligans ad mortem æternam. Hæc sibi primi Parentes attraxerant peccando, nobis etiam pœnales quos in peccato originali genuerunt.*

I. Formale peccati Originalis ponitur in Scholâ defectus Originalis justitiæ quâ voluntas subdebatur Deo; Materiale ejus ponitur concupiscentia seu inordinata inferiorum facultatum conversio ad bonum commutabile. Dicunt etiam, peccatum non dici univocè de peccato actuali & originali, sed priùs de actuali, & per analogiam de originali; quasi dicerent, peccatum originale

nale in posteris Adami esse minùs peccatum quàm actu-
ale.

2. De traductione hujus peccati difficilis est, nec val-
dè utilis Disputatio, itaque impræsentiarum ei non im-
morabor. Interea, statuitur hoc peccatum esse æquali-
ter in omnibus secundum naturam ab Adamo ortis, ef-
fèque fontem omnium malorum quæ iis contingunt;
hinc quippe peccata actualia emanant, & consequenter
omne malum. Imò nonnulli affirmant *tam malignam
esse hujus corruptelæ vim, ut ad nihil boni sed ad omne
malum omnis homo per naturam propendeat.* Mihi vide-
tur magis cum ratione dici ab aliis, quòd inclinatio in
bonum multum in nobis detrimenti acceperit ex peccato
originali, non autem fuisse ablatam, quia radicem ha-
bet in ratione quæ non est prorsus pessundata. Hæc au-
tem inclinatio debilis in bonum an placeat Deo necne,
est alia quæstio.

3. Quod ad mortem attinet æternam, alii peccatum
originale puniunt solâ pœnâ damni, unde limbus infan-
tium non baptizatorum; alii idem puniunt Gehennâ;
quod quid est nisi penè totum humanum genus æternis
cruciatibus devovere? Quid est nisi infantes perso-
naliter innocentes noxiis parentibus misèriores decer-
nere?

4. *Quid*, dicet aliquis, *tunc limbum infantium mæ-
vis?* Certè quàm Gehennam, utpote mitiorem carce-
rem. Multò autem mihi verisimillimum videtur, om-
nes personaliter innocentes in gradum quendam felici-
tatis admitti, reatumque peccati originalis à toto huma-
no genere Christi sanguine fuisse ablutum. Quomodo
enim potest intelligi, secundum Adamum scilicet Do-
minum de Cælo minùs valuisse in restituendo humano
genere, quàm in eo perdendo primum? Dices, *Con-
stat Christum non reddidisse Paradisum.* Respondeo:

Si

Si Christus statum invexit meliorem, non tenebatur restituere eundem. Non restituit Christus Paradisum terrestrem, sed præparavit Cælestem eumque non amissibilem. Dices: *Christus nos non munit tam celsis gratiis quàm eæ fuerunt, quas Adamus peccando amisit.* Primo, unde hoc constat? *Quod tam proclives simus ad peccandum?* Certè Adamus videtur valde citò peccasse. Sed si non tantas nobis concessit Deus gratias, unâ tamen nos ditavit omnibus Adamicis fortiore scilicet pœnitentiâ, cui in Adamo nullus fuit locus quantum ad primum peccatum; nam nondum promissus erat Christus; pœnitentia autem nostra non valet, nisi virtute Meritorum Christi.

5. *Sed an non sumus naturâ filii iræ?* Respondent nonnulli, quòd sumus naturâ filii iræ minoris quæ denegat nobis Cœlum; terram etiam gravem reddit, non verò majoris quæ torquet in æternum. Ego respondeo, quòd sumus filii iræ naturâ, sed ob Meritum Christi absolvimur. Nascimur in peccato, sed cujus reatum Christus sustulit. *Quid igitur necesse est baptizari infantes in remissionem peccatorum?* Dicetur suo loco.

6. Cùm Mors sit stipendium peccati, dissertationi de primo peccato justa est appendix, dissertatio de Morte. Ejus Historiam me memini fusiùs ante aliquot annos concinnasse in Funere Doctissimi mihiq̃ue amicissimi Georgii Rust Episcopi Dromorensis; nunc tantum delineabo. Tragedia ergo Mortis quinque constat a stibus. Primo actu concipit hunc fœtum ipsa humana constitutio ex Elementis sibi invicem repugnantibus, &c. Et adhuc Mors est homini naturalis. Eam secundo actu exclusit Dei specialis gratia hominem in Paradiso unâ cum ligno vitæ sistens. Tertio actu, Adamus peccando revocavit Mortem. Quarto actu, Christus Mortem vincit & ligat per suammet Mortem resurrectionem,

nem, &c. Quinto actu, per Resurrectionem Mortuorum Mors enecabitur & sepeliatur; cum enim omnes Mortui revixerint, sola Mors in sepulchro erit.

S E C T. XIV.

Chriftiani credunt Gentem Israeliticam fuiffe peculiarem Dei Populum, electamque fuiffe non solum ad bona temporalia, sed si legem servaverint etiam ad vitam æternam. Eis concedita fuiffe Dei oracula, eosque à lege datà ad Christum unicam fuiffe Dei Ecclesiam in terris, nec ulli aliæ Genti media salutis æternæ concessa fuiffe.

1. Tractatus Theologico-politicus asserit Electionem Populi Israelitici præ aliis Gentibus fuiffe solum ad bona corporalia. Nam, inquit, quicquid honestè cupimus, refertur aut ad scientiam rerum, aut ad virtutem, aut ad sano securòque corpore vivendum. Media autem ad primum & secundum continentur in ipsa natura humana, ergo ea sunt communia omnibus Gentibus; atque adeò populus Israeliticus electus fuit solum in ordine ad tertium. Verùm hic Author non sufficienter enumerat bona humana; nam præter numeratà honestè cupimus beatam immortalitatem animæ, & ad hanc præcipuè electum fuiffe dicimus populum Israelis, ad commoda temporalia & corporea secundariò. Rectè quidem ostendit ille leges & ceremonias multum conferre ad imperium Gentis (in quo continetur salus singulorum) conservandum; sed nos asserimus & leges & ceremonias & Imperium Judæorum & singulorum felicitatem temporalem ad salutem animarum primo loco tetendisse, & hoc ille nullatenus infirmat.

2. Iterum dictus Author asserit contemplationem naturæ esse fastigium bonorum humanorum; inducens alias Gentes fuisse chariores Deo quàm erant Judæi valde *apud seipsum*. At hoc etiam non probat, cum tamen passim fateantur (Hobbeus expresse) cognitionem esse propter actionem; & Philosophiam naturalem non ob aliud coli, quàm aut ut excitet nos ad gloriam Deo exhibendum, & ad Officiis nostris fungendum, aut ut usus humane vite deserviat.

3. Iterum adfert iste Philosophus nos esse beatiores ob bona possessa, quia ea possidemus, non quia soli possidemus. Quis unquam contrarium sensit? Tum, inquit, Judæi aut stultè aut invidè gloriati sunt, se supra omnes Gentes gratiâ Dei florere. Respondeo: Si omnino sunt gloriati, stultè fecerunt; nam quid habebant quod non acceperant? Si autem gèvisi sunt quòd alii lege exclusi essent, id & stultum fuit & invidum. Invidum, quia ipsi non minùs his bonis fruerentur, si ea cum aliis Gentibus communia habuissent. Stultum etiam hoc erat gaudium, nam si omnes Gentes his donis cœlestibus muniti fuissent, Judæi nullos habuissent inimicos; jam omnibus sunt odio. Apud Judæos igitur non gloriati sunt boni, sed privilegiis cœlestibus sunt letati; non quia alii posthabiti fuere, sed quia ipsi Electi; cum Deus omittendo alias Gentes ostenderit, se hanc etiam jure potuisse omittere.

4. Asserit etiam hic Philosophus apud alias Gentes fuisse Dei Prophetas, eas etiam miraculis claruisse. Ac certum quidem est nonnullos è Prophetis Judæorum de futuris rebus aliarum Gentium prophetasse; Jonam etiam ad Ninivitas missum fuisse. Balaamus loquutus est apertè in Nomine Domini. An nonnulla ex oraculis, è Vaticiniis etiam Sybillarum, aliorumque Vatum Gentilium, fuerint cœlitus missa, nec scio, nec video un-

de de his certiores reddi queamus, nisi per novam revelationem. Sanctus quidem Paulus declarat, Deum non se reliquisse apud Gentes (etiam ultra legem Naturæ) sine testimoniis.

5. Statuendum tamen est solam Gentem Israeliticam habuisse media ad salutem æternam, scilicet vi constitutionis Nationalis. Judæi enim, observando leges Gentis suæ à Deo datas, sub Deo meruerunt, iisque propositum fuit præmium Deo dignum. In cæteris autem Gentibus qui leges Patriæ observabant, sua ipsorum commenta observabant, nec à Deo præmium expectare poterant. Cum autem lex Naturæ sit lex Dei, qui eam apud Gentes sanctè observaverint, nescio an non in aliquam cœlestium Mansionum admitti debeant. De quo etiam egi 2. p. §. 4.

6. Postremo licet unicuique suis pro suo beneplacito uti. Omnes autem Gentes erant in Manu Dei ut Vasa Domus ejus. Ipse ex mero suo beneplacito Gentem Israeliticam vas fecit honoris, i. e. Media exhibuit quæ iis (nisi ipsorum culpa) sufficerent ad vitam æternam. Et ad hanc Metam multos è veteribus Israelitis anhelasse, luculenter ostenditur Epistolâ ad Hebræos, c. 11. Verum non ita compertum est, cognitionem vitæ æternæ apud antiquiores Israelitæ fuisse vulgarem. Pars tamen affirmans est multò verisimilior, cum spes vitæ æternæ tempore Domini totam Gentem (exceptis Sadducæis) possederit; nec tamen quisquam ullam de hac re ultra legem & Prophetas revelationem memoraverit. Fortasse apud antiquos idea vitæ æternæ erat obscura, quæ spem etiam valdè debilem peperit; appropinquante autem Christi vitæ æternæ Authoris exortu, vita æterna magis magisque indies claruit. Deus qui per sic res disposuit, ut Judæi Doctrinæ Christianæ perquam dociles reddantur, eique non nisi summo scelere possint ob-

obfistere. Demum, posito quod pauci è veteribus vitam æternæ sensu afficerentur, omnibus tamen (nisi suâ ipsorum culpâ obstante) Lex & Prophetæ etiam ad vitam æternam valere, cum Deus proclamet, se suis ea præstiturum quæ oculus non vidit, nec in mentem ipsis venerit.

7. Ut hæc clariora reddantur, observa legem Judæicam fuisse & carnalem & spiritualement. Carnalis erat in quantum ab aliis Gentibus populum secrevit, formam & ritus Deum colendi instituit, & terræ Cananæ fructus ut præmium proponit. Spiritualis erat in quantum per ista carnalia, Christus Evangelium & Regnum cælorum significabantur. Itaque etiam Veteris Testamenti duplex est sensus, apertus & mysticus. Hoc luculenter ostendit Thorndicius libro de ratione ac jure finiendi controversias in Ecclesia. Ego unum aut alterum excerptam. 2 ad Cor. 3. 6. litera occidit, spiritus autem vivificat; significans sensum literalem legis esse ceu velamentum super faciem Moïsis, sic ut qui ei adhæreat nec sensui spirituali attendat, adversus fidem exitialiter obduretur. 1 ad Cor. 2. 13. Spiritualia spiritualibus comparantur, i.e. Evangelium sensui legis spirituali seu mystico. Jo. 1. 17. Gratiam pro gratiâ, i.e. Gratiam Evangelio revelatam pro eâ quæ lege velabatur. S. Irenæus contra Hæreses, 4. 43. facilem ad idola reverti populum erudiebat per multas advocaciones præstruens perseverare & servire Deo; per ea quæ erant secunda ad prima advocans; hoc est, Per Typica ad Vera, per Temporalia ad Æterna, per Carnalia ad Spiritualia, & per Terrena ad Cœlestia. Omnia, inquit Apostolus, contingebant illis in figurâ. Sed, ut dixi, qui vel figuras seu umbras fideliter observabant, id iis salutiferum erat.

S E C T. XV.

Chriftiani ulterius fupponunt & credunt legem Mo-
faicam fuiſſe à Deo dictatam, imò Decalogum ipſi-
us digito exaratum.

1. Tractatus Theologico-politicus negat lumine Na-
turæ Deum poſſe concipi tanquam Principem leges ho-
minibus præſcribentem. Arque ego facile concedo,
modum quo Deus leges ſuas Moſi impertiverit, à nobis
non intelligi lumine Naturæ. Id verò factum fuiſſe
probe intelligimus, non nativo rationis jubare, ſed ra-
tione per revelationem auctâ; quæ revelatio compro-
bata fuit per Miracula, & ea Miracula nobis per Tra-
ditionem univerſalem innotefcunt.

2. Iterum, Tractatus Theologico-politicus dicit, in
Deo idem eſſe ſcire & velle, ideòque omnes divinas voli-
tiones æternam involvere neceſſitatem; Ergo ſi Deus non
vult aliquid fieri, impoſſibile eſt ut illud fiat, e. g. Si
Deus noluit, quòd Adamus ederet de fructu arboris quæ
erat in medio horti, impoſſibile fuit quòd Adamus inde
ederet. Et hoc poteſt dici de omni præcepto Dei, ergo
alia præcepta ſunt irrita, & nihil ſignificant. Quod
attin et ad neceſſitatem divinæ volitionis ob ejus identi-
tatem cum Divinâ cognitione, ſatis mihi videor di-
xiſſe 1. p. §. 7. n. 8. Plura etiam dicta ſuppono in Me-
taphyſicâ ubi diſſerendi de Naturâ Dei locus proprius
eſt. Sed ſine hiſ ambagibus ego concedo nihil poſſe fi-
eri quòd Deus fieri noluerit. Nec hinc ſequitur legem
poſitivam, quæ poteſt obſervari & violari, quæque præ-
miis & poenis fancitur, non poſſe à Deo præſcribi. Et
hoc etiam jure ſupponerem expeditum in Metaphyſicâ.
Sed quod præſenti negotio ſatis ſit, dico e. g. Deum
non noluiſſe ut Adamus non ederet, ſed ut non ederet
&

& viveret et in Paradiso maneret; Deum etiam non voluisse ut Adamus abstinere ab esu (nam tum revera fuisset impossibile ut ederet) sed ut abstinere ab esu si vellet vivere, in Paradiso manere, &c. Hæcque præmia pœnæque non consequerentur ex natura esus istius fructus (ut Tractator sonniat) sed ex mero Dei beneplacito.

3. Licet autem Christiani coelestem Mosaicæ Legis originem agnoscant, se tamen ei subdi non censent; legem quippe datam fuisse uni genti Israeliticæ, eamque solam gentem eâ teneri.

4. Iterum observa Legem Mosis esse ex parte moralem, & ex parte positivam. Lex Mosis, quæ moralis, præcipit dictata rationis humanæ; ut, non coles nisi unum Deum, non occides, &c. Dices, *Quid opus erat ut id per Moysen de integro præscribatur, quod per rationem naturalem satis fuit præscriptum?* Respondeo, id ex benignitate suâ fecisse Deum, ut qui non essent obsequuturi legi Naturæ ex officio, ii tamen spe & metu per legem positivam continerentur. Dices, *qui solum spe & metu bonus est, is non est revera bonus, nec itaque Deo gratus.* Respondeo, Is non est gratus Deo ut iusto, sed Deo ut misericordi gratus esse potest. Qui est utcumque bonus, is Deo benignissimo gratus esse potest. Respondeo 2. licet spes & metus non reddant obsequium formaliter perfectum, tamen apta nata sunt efficere ut obsequium evadat perfectum. Qui enim à malo aliquandiu abstinet metu pœnæ, is malum ipsum sensim odio habet; & qui virtutem colunt primò spe præmii, ii postea ipsius virtutis amore capiuntur.

5. Lex Mosis quæ positiva spectat vel ad Religionem, & dicitur ceremonialis; vel ad Regimen civile, & dicitur judicialis.

SECT.

S E C T. XVI.

De Lege Moſis Morali.

Chriftiani non ſolum agnoſcunt multa moralia eſſe in Lege Moſis, ſed Decalogum quidem ſuſpiciunt, ut totius Legis Moralis ſummam; hiſque ſe ſubjiciunt; ut tamen moralia ſunt, non verò ut à Moſe præcipiuntur.

1. Quomodo Decalogus comprehendat omnia moralia, à multis oſtenditur; cùmque tritum ſit nec tamen ita magni ad Chriſtianiſmum momenti, ei impræſentiarum non immorabor.

2. Obſervandum eſt, omnia præcepta Decalogi, excepto quarto, eſſe apud Chriſtianos moralia; quarum verò aut ceremoniale fuiſſe aut mixtum. Hujus ergo loci eſt de naturâ Sabbati & Judaici & Chriſtiani diſſerere, cùm de eâre mala lites in Eccleſiâ & fuerint & ſint.

3. Inprimis, prorſus morale pono eſſe, ut in omni Republicâ certum aliquod tempus publico Dei cultui ſeponatur & addicetur. Suppono enim demonſtratum in Metaphyſicâ, Deum eſſe, Mundumque creâſſe, conſervare & gubernare, atque proinde eſſe colendum ab hominibus, huncque cultum continere in ſe ſummam, quam poſſumus præſtare, honoris exhibitionem; exhibitio autem honoris quò communior eò eſt grandior; ergo Deus non ſolum privatim ſed etiam publice colendus eſt. Sed publico cultui magis conſulitur, niſi populus ſciat quando & quo in loco conveniendum ſit; ſtata ergo loca & ſtata tempora Dei cultui debentur, atque adeo ſecundum rationem eſt ut adhibeantur. Apud gentes, quod ſciam, omnes adhibita ſunt; quod ipſum non leviter diſputat. Nam ubi valde multi in valde multis

multis dissentientes nemine præcipiente conveniunt, in eo se vim Naturæ pati fatentur.

4. Statum ergo tempus aliquod in publicam Dei cultus administrationem seponendum esse ponatur vox Naturæ & omnium Gentium, saltem quæ extremam barbariem effugere. Apud Judæos quæque Dies septima huic operi Dei ipsius jussu sacra fuit. Atque hæc observatio duabus apud eos rebus continebatur, scilicet quiescendo à communi opere, & in Templo ac Synagogis publicum cultum administrando.

5. Triplici autem titulo septimam Diem seu Sabbatum observarunt Judæi. primò. Quia Deus sex diebus creationem & formationem Mundi absolverat; septimam autem Die quievit, eamque sacram fecit. Secundum fundamentum constitutionis Sabbati Judaici erat liberatio populi ab operibus servilibus quibus eos Ægyptii alligaverant. Erat tertio Sabbatum institutum, secundario quidem fine, in requiem ac refectionem servorum ac jumentorum.

6. Ecce ergo integra ratio Sabbati apud Judæos. Quod certum aliquod tempus seponerent in publicum Dei cultum, id erat prorsus secundum rationem humanam atque adeo legis Naturæ. Quod secretum hoc tempus esset septima quæque dies, erat in honorem Creatoris qui septimam die quievit ab operibus Creationis. Quod hæc stata dies primum fuerit Sabbatum, id erat in recognitionem Dei Liberatoris ex Ægypto. Itaque etiam Prophetæ appellant Sabbatum signum populi Judaici quo distinguebatur à cæteris gentibus & Deo proprius habebatur. An autem dies egressionis ex Ægypto fuerit, septimanas ab initio numerando, exacte septima Dies; seu an placuerit Deo septimanas deinceps à Die egressionis ex Ægypto numerandas esse, nec dictum comperio, nec alicujus est ad officium Christiani peragendum.

dum momenti. Postremo, Judæi observantes Sabbatum requiem dederunt servis & jumentis, in eoque Deum qui ipsis requiem dederat & agnoverunt & gratitudinis plenâ imitatione coluerunt.

7. Ac Christiani quidem, ut dictum est, observant tempus aliquod statum cultus publici, quod prorsus est morale. Tempus etiam illud septimam esse Diem statunt in honorem Creatoris, prorsus ut Judæi, cum utrobique formam Creationis ab uno Mose didicerint. Septimam autem Diem sumunt Christiani à Die Resurrectionis Domini Liberatoris à Diabolo seu Pharaone spirituali, &c. Memini tamen me legisse in Hospiniano de Festis, è primis Christianis multos septimam Diem numerasse ab Ascensione Domini, eorumque Diem Dominicam fuisse diem Jovis, nec consensum in Diem Solis fuisse generalem ante Decretum Constantini Magni.

8. Sic, inquam, observant Christiani Diem Dominicam; quâ tamen constitutione, non ita compertum est. Vix dubitatur quin dicta observatio fuerit in usu tempore Apostolorum, ac proinde dubitari vix potest quin constitutione nitatur Apostolica.

9. Observandum postremo est, nos non observare Sabbatum Judaicum, ideoque nec astringi regulis Judaicis in observatione nostrâ, sed prorsus pendere in modo observandi Diem Dominicam à constitutione Ecclesiæ, aut universalis, aut etiam ejus in quâ vivimus.

SECT. XVII.

De Lege Moſis Cæremoniali.

Theologia Chriſtiana legem Moſis cæremonialem, ſeu ſive quod data fuit, approbat; quod ſcilicet primo, edecet ex Dei ore cultum illum, quem ſibi ante Meſſiæ tempora exhiberi Deus voluit; quodque ſecundo, cæremoniæ illæ in omnibus repræſentaverint diſpenſationem Evangelicam, fuerintque ei ut umbra corpori.

1. Sic e.g. Paſcha figuravit Chriſtum ut pro nobis paſſum, &c. quæ paſſim apud Evangeliſtas, Apoſtolos aliôſque omni deinceps ævo Scriptores Evangelicos reperies; qui conſulendi ſunt. Licet enim horum cognitio non ſit neceſſaria ſaluti cuiuſque animæ Chriſtianæ, pertinere tamen eam puto ad plenitudinem Chriſtianæ Eruditionis; & deſervit, cum ad noſtramet Fidei confirmationem, cum ad Judæos convincendos.

2. Verùm à Judæis ſolùm exigebatur ut legem compleant, non autem ut omnes Cæremoniarum ſignificationes intelligant. Chriſtiani novo lumine de cælo perſuſi, naturam legis Moſaicæ perfecte callent.

S E C T. XVIII.

Dicunt etiam Christiani Cæremonias Mosaicæ & totum istud Sacerdotium expirasse, tum cum promulgaretur Judæis doctrina Christiana.

Non esse scilicet attendendum umbris, ubi substantia se exhibuit; nec locum esse lucernulis Legis Sole ipso justitiæ exorto. Itaque tota hæc Cæremoniarum lex effectivè amovebatur; per Passionem, Resurrectionem & Ascensionem Domini, formaliter verò & ordinatè, per promulgationem Evangelii, die Pentecostes inceptam.

S E C T. XIX.

Essentia omnium Christianorum, Lex Moysi quatenus judicialis continebat statum Judæorum; nulloque modo ad quamcumque Rempubicam Christianam pertinet, nisi in quantum nonnullæ ejus partes figurabant quædam officia Christianorum.

1. Lex dicit, *Non obturabis os triticum triturientis*, i. e. per Expositionem Apostolicam: *eos liberè ales quibus cura animarum committitur*. Quia scilicet majus est commodum, expedire alimentum animarum, quam alimentum corporum.

2. Subjiciam his quod attulit Hugo Grotius de jure Belli & Pacis. lib. 1. p. 9. De usu legis Mosaicæ apud Christianos. Primò ostendit lex Hebræa, id quod eâ lege præcipitur non esse contra jus Naturæ; nam jus Naturæ est effatum Dei, ergo nihil à Deo manans ei repugnare potest. Secundò, Licet Christianis leges ferre ejus sensus cujus sunt leges per Mosem datæ, nisi ubi

ubi leges Moſis ad tempus Evangelii nondum revelati pertinent ; aut niſi Chriſtus ipſe contrarium , aut in genere aut in ſpecie , conſtituerit. Tertio, Quicquid lege Moſis præceptum eſt , quod pertinet ad eas virtutes quas Chriſtus à ſuis exigit , id nunc , ſi non & amplius , à Chriſtianis præſtandum eſt. Nam virtutes Chriſtianorum debent eſſe gradu intenſiores quàm quæ exigebantur à Judæis , cùm promiſſiones cœleſtes ſint multò clarioreſ ſub Evangelio quàm antè. Lex ergo vetus de Sabbato , & illa de decimis ſolvendis , monſtrant Chriſtianos obligari , ne minus ſeptimâ parte temporis , ad cultum Dei ; nec minus fructuum decimâ , in alimenta eorum qui in ſacris rebus occupantur , aut ſimiles pios uſus , ſeponant.

3. Ecce , Cultus Dei publicus eſt neceſſarius , ut ſuprà oſtenſum eſt ; & in quâcunque formâ cultus publicus peragatur , quorſdam ejus adminiſtrationi præeſſe neceſſe eſt ; & hiſ alendis , nonnihil à reliquo populo eſt expendendum. Huc uſque expenſio eſt moralis. Quòd verò hæc expenſio fiat per decimas , fundos , ſuburbia, &c. erat legis Moſaica.

4. Et in Judæorum imitationem Chriſtiani veteres Clerum ſuum induerunt decimis fundis aliſque obventibus , fortàſſe plùs ſatis. Jam mos eſt omnia invidere Eccleſiæ , quantum quiſque poteſt etiam abripere. In quo nec proavis ſuis Chriſtianis ſimiles ſunt ; nec Judæis abavis ; iſti autem Diſcipulo qui Domino invidēbat charam unctionem , ſimillimi ; ut ſcias ſacrilegos (quicquid illi aut pietatis ſimulent aut charitatis) eſſe hypocritas & caput Domini ſi ipſum in ſuis manibus haberent , tradituros. Sed à lege tranſeamus ad Prophetas , à quibus duobus pendeat tota Religio Judæorum.

S. E. C. T. XX.

Omnēs etiam Prophecias ab Ecclesiâ Judaicâ agnitas, agnoscit Ecclesiâ Christiana; & quidem effata Spiritus sancti fuisse eas proclamat.

1. Tractator Theologico-politicus (c. 1.) dicit, Prophetiam esse rei alicujus certam cognitionem à eo hominibus revelatam. Atque hanc revelationem fieri vel lumine mentis naturali (scilicet in iis rebus quæ continentur in primis nostris notionibus) vel ope imaginationis, nimirum per verba & imagines. Vulgusque priorem revelationem non considerare, quia communis est omnibus hominibus; posteriorem solam nomine Revelationis & Prophetiæ dignari. Quomodo autem hæc posterior revelatio sit certa, fatetur se ignorare.
2. Mihi videtur indignum Deo, in revelando astringi verbis aut imaginibus; hoc verò obtrudere sine probatione est indignum Philosopho. *Ut mens immediatè edoceret à Deo ultra primas notiones; deberet, inquit, esse perfectior humanâ.* Quo argumento hoc dicit? Nullo. Imò sibi bis in hac causâ contradicit. Primò, dicit *Christi animam immediatè Dei placita edocuisse.* At Christi anima non erat perfectior humanâ, sed verè humana. Tum fatetur hic author Deum immediatè communicare essentiam suam menti humanæ, i.e. habemus in animâ ideam Dei independentem à sensibus. At si anima est immediatè capax ideæ Dei, quidni & placitorum ejus? Apud Christianos firmum est, Deum tractare creaturas pro beneplacito suo, dona etiam dare Deo digna non meritis nostris astricta, posseque nos edocere multis modis quos hebetudo nostra non percipit.

3. Esto

3. Esto verò quòd pleraque repræsentata fuere Prophetis per verba & imagines, ut sanè videntur fuisse; sed unde habebat Propheta certitudinem quòd Deus hæc verba protulerit, aut has imagines immiserit? Nam simplex imaginatio non involvit certitudinem, quòd clara mentis perceptio facit. *In primis*, ait Tractator, *viridissime imaginabantur, ut nos vigilando ab objectis affecti solemus.* Verum ut ut vivida fuerit imaginatio, imaginatio adhuc erat, nec involvens certitudinem. Itaque secundo loco dicit, prophetis concessum fuisse signum quò certi reddebantur, ista fuisse divinitus revelata. Hoc ostendit exemplo Abrahami, *Gen. 15. 8.* & Gideonis, *Judicum 6. 17.* ubi dicitur, Fac mihi signum quòd tu mecum loqueris. Et hoc quidem liquidò se habet in philosophiâ nostrâ, quæ præter Naturam admittit etiam miracula tanquam immediata Dei testimonia. Hic verò Tractator statuit nihil posse evenire in mundo nisi quòd sequitur ex Naturâ. Quo principio stante, quòd est præsens non potest significare aliquid esse futurum, nisi in quantum est ejus causa. In Naturâ enim, sublata causâ tollitur effectus; ergo posito quocunque respectu rei præsentis ad futuram omisso respectu causæ, res futura tollitur seu potius non ponitur. Num ergo vellus madidum erat effectivum victoriæ Gideonis? Nam ficcum etiam? Isto etiam principio stante, quòd est præsens non potest esse signum rei præteritæ, nisi quatenus est ejus effectum. Nam, sublato effectû tollitur causâ, *i. e.* si hoc non est effectum illius, non apparet ex hoc quòd illud fuit, quia hoc ut prodiens ex aliis causis potuit esse etiam si illud non fuerit. Num ergo hæc duplex fortuna velleris erat effectum naturæ revelationis factæ Gideoni? Si minùs, quomodo ejus realitatem significavit?

4. Puto fore, ut Tractator dicat quòd vellus madidum & vellus siccum erant signa Gideoni, quia ipse putabat immediato Dei digito utrumque factum fuisse. At per Tractatorem, apud quem miraculum est merum absurdum, Gideon hoc stultè putavit. En Contemptor prophetarum. Erat Gideon certus revelationis ex signo quod ille stultè putavit factum fuisse præter ordinem Naturæ ad dandum sibi certitudinem, *i. e.* erat certus quia erat stultus. Et sic de cæteris prophetis.

5. Post hæc periculosè sibi objicit Tractator, quòd Deus aliquando concessit signa etiam falsis prophetis, itaque nullum prophetam è signo fuisse certum suæ revelationis. Antecedens videtur evidens ex *Deut.* 13. 1. *Ezek.* 14. 9. *1 Reg.* 22. 22. *Mat.* 24. 24. Itaque respondet Tractator, prophetam tum solum fuisse certum è signo quum animum habebat ad æquum & bonum propensum. Deum enim nunquam decipere pios, sed iis uti tanquam suæ pietatis instrumentis, impiis verò utitur tanquam suæ iræ mediis & executoribus.

6. Ad hæc dico, certum videri Deum tentandorum Judæorum ergò falsos prophetas aut excitasse, aut ut Diabolus excitaret instrueretque permisisse. Idémque usu venturum apud Christianos prædixit Dominus, de quo luculentè agit Vincentius Lerinensis. Quantum autem concursum præbuerit Deus Optimus Maximus horum prophetarum præstigiis non venit hîc disquirendum, sed est pars quæstionis generalis de origine mali, quam in Philosophiâ tractatam suppono. Vera tamen miracula ab istis impostoribus edi non est concedendum. Ut ut enim homines qui non amant Veritatem meruerint decipi, & in peccatis suis obdurari, non est tamen credibile quòd Deus brachium suum falsariis committat, aut ut illud argumentum cum Diabolicis commentis

mentis communicet, quò solo placita sua supernaturalia hominibus commendavit.

7. Quia verò falsi prophetæ signa ostenderunt, concludit Tractator, *veros prophetas non habuisse Mathematicam certitudinem suarum revelationum, sed tantum moralem.* Verum, si quibus revelatio facta est per immediatam illuminationem mentis, sine dubio hæc illuminatio agnatam attulit certitudinem, sicut etiam facit lumen Naturæ. Ubi autem revelatio facta fuit menti mediante imaginatione, ibi tenendum est, prophetam fuisse absolutè certum aut ex signo aut alio modo ut Deo placuit, qui tamen vix est perceptibilis nisi prophetæ. Per absolutam & Mathematicam certitudinem hic intelligo tantam certitudinem quanta tollat omnem dubitationem. Si Tractator per certitudinem Moralem intelligit fiduciam cum dubitatione mixtam, tum omnes prophetas præter Christum insinuat falsitatis. Illi enim ore dixerunt: *Sic dicit Dominus*; animo autem dixerunt: fortasse non sic dicit Dominus, nam ego tantum imaginabar eum sic dixisse. Et hoc signum quo fretus hæc prædico potest esse fallax. Quid autem est mentiri nisi loqui aliter ac sentias?

8. Addit Tractator revelationes factas fuisse variis variis pro diversitate temperamentorum, opinionum, &c. Tristibus tristia, jucundis læta revelata fuisse. Aulicus solum & pompam regiam imaginabatur, Rusticus boves, oves, & similia. Hocque exemplis satis cum industria illustrat. Non injucunda Lectio, sed cui bono? Scilicet ut probet *donum propheticum non reddidisse prophetas scientiores in speculativis, & philosophiam ab iis non esse petendam.* Certè ego neminem unquam conveni, qui rebatur prophetas ex revelationibus quicquam edoctos fuisse præter ipsissimas res revelatas.

9. Quoniam autem revelatio facta fuit ad captum prophetae, & eum reliquit iisdem opinionibus imbutum, quibus antea affectus erat, Tractator concludit, nos prophetis nihil aliud teneri credere, præter id quod finis est & substantia revelationis, e.g. Cum Deus revelavit se Caino, substantia & intentum revelationis erat Cainum monere ad veram vitam, non docere libertatem voluntatis aut ullas res philosophicas. Licet ergo in verbis illius monitionis, libertas voluntatis clarissime continetur, nobis tamen licet contrarium sentire, quandoquidem verba illa & rationes ad captum tantum Caini accommodatae sunt. Hæc ille. Ego mecum sic statuo. Quicquid in revelatione ad imaginationem tantum pertinet, id ad rationem nihil concludit, e.g. Micaïas vidit exercitum cœli ab utroque Dei latere stantem; Malum Spiritum comparentem, Deum interrogantem de expediendâ Achabi ruinâ. Non est hinc concludendum, Deum habere dextram & sinistram, aut etiam interrogationibus uti, sed totum hoc dandum est imaginationi prophetae, cui Deus voluit sub hâc formâ exitum pugnae Achabi contra Aram revelare.

10. Ubi autem in revelatione quippiam offertur rationi, i.e. ubi proponitur ratiocinatio, num assumptum est semper verum in rigore philosophico? vel, num sufficit quod sit verum in opinione ejus qui revelationem accipit, quod appellant argumentum ad hominem? e.g. in Monitione factâ Caino dicitur à Deo. Tu potes peccare vel non peccare; num sensus est: Tu putas te habere hanc potestatem, ergo libidinem peccandi cohibere debes? Cum Christus dixit suis (Mat. 18. 10.), videte ne contemnatis unum ex his parvis, Dico enim Angelos eorum constanter aspicere faciem Patris mei; num sensus est: Nolite superbire aut quenquam contemnere, nam vos putatis quod unicuique est datus assecla,

An-

Angelus cœlestis ? Respondeo primò , mihi sæpe de hac re meditati nondum occurrit demonstratio , quòd argumentum ad hominem non potuit adhiberi in revelationibus divinis. Secundò , Deus nunquam argumentatur ad hominem ex præmissis impiis aut improbis. Nam est contra *hanc opinionem* ejus homines obdurare in opinionibus exitiis. Tertiò , In exemplis allatis video opinionem asserentem voluntatis libertatem deservire Monitioni ad veram vitam ; opinionem etiam asserentem Angelos tutelares deservire ad dissuadendum à superbiâ & humilium contemptu. Cui verò bono deservit opinio statuens hominem esse animal *rationabilem* , quòdque non agat homo sed trahatur & pellatur ? Cui etiam bono deservit opinio negans Angelos ? Postremò , si Deus argumentis utitur quæ non apertè valent ad rationem , sed tantùm ad opiniones audientium , tamen non videtur licere assumptis ejus contradicere , certè sine demonstratione ; nam qui probabili tantùm argumento id faceret , id faceret fortasse nullo ; sæpe enim usu venit ut argumentum quòd hodie probabile videtur , id cras videatur nullum.

II. Atque hæc sufficiant dici ad ea quæ à Tractatore eduntur c. 1. & 2. Nèc quicquam addam de Prophetiis Veteris Testamenti , nisi Monitionem ad modestam earum interpretationem. Cùm ex plerumque allegoriis aliisque tropis involutæ fuerint , ipsius etiam loquæ formâ quasi Pompam Poeticam præ se ferant. Adde , Modos loquendi variis gentibus varios fuisse ; atque adeo idiomatica Hebræa auribus Europæis esse valde aliena. Circumstantiæ etiam tum cùm Prophetiæ ederentur multis familiares nos prorsus latent. Hinc evenit multoties ut eadem Prophetia à diversis Expositoribus ad dissitissimas Materias trahatur. Itaque valdè fidenter suas Prophetiarum Expositiones aliis obtrudere ar-

rogantiæ esse videatur , animique suas potius jactantis dotes , quàm debilitatem totius humanæ intelligentiæ cogitantis. Quòd etiam hæ Prophetiæ manibus indoctorum quotidie terantur , vide an non sit contra consilium Sancti Pauli ad Romanos, c. 14. v. 1.

Ac de iis quæ Christianismus supponit utcumque differuimus , reliquum est ea ponere quæ hæc doctrina prorsus de integro adfert ; & hæc quidem omnia pertinent aut ad Fidem aut ad Obedientiam. Sit ergo hujus Summæ

QUARTA PARS.

De CREDENDIS à Christiano.

Credenda à Christiano (ultra Judaïsmum , & ea quæ Theologia Christiana proclamat de se ipsâ & de Ecclesiâ per ipsum constitutâ , de quibus actum est p. 2, & p. 3.) tractabo primò collectivè tum sigillatim.

SECT.

S E C T. I.

De Credendis Collectivè.

Collectiones Credendorum sunt Arculæ in quibus credenda reponuntur in usum Ecclesiæ. Vel sunt vehicula quibus credenda per dissita loca & tempora devehuntur. *Ea memorantur Scripturæ sacræ, tria Symbola, scilicet, Symbolum Apostolorum, Nicenum & Athanasii, & quidem omnia omnino Decreta quatuor primorum Conciliorum Generalium, quæ quidem omnia per Traditionem universalem ad nos debeantur.*

1. Sed hæc non proponuntur Fidei nostræ, omnia eodem tenore. Scripturis sacris fidem habemus ut Verbo Dei. Ac de iis quidem, quod satis sit instituto nostro, egimus in secundâ Parte; ac de Traditione quidem universali, in primâ Parte. Non est autem ita clarum Conciliis veteribus, aliisque Symbolorum Conditoribus affuisse Spiritum infallibilitatis (quem sibi certissimis signis vendicabant Apostoli); itaque iis credimus, ut Testimoniis Ecclesiæ istorum temporum, quod dicta Decreta & Symbola cum Scripturis sacris prorsus concordent.

2. Dico ut Testimoniis Ecclesiæ; nam non credimus Symbolo Apostolorum tanquam ab ipsis Apostolis condito; hoc enim non est ex omni parte liquidum. Nec credimus Symbolo Nicæano, quia condebatur à Concilio Nicææ, nec Symbolo Athanasii ob Authorem, Athanasium, sed quia ab Ecclesiâ recepta sunt ut perfectè concordantia cum Scripturis sacris.

3. Quid, inquires? *Tu Socinianorum oblitus es, qui non hæc omnia Symboia recipiunt.* Nequaquam, sed quod rejiciant hæc Symbola tanquam Nihilum reputo. So-

ciniani sunt à Socino. Quòd ante Socinum hæc Sym-
bola universim recipiebantur, sunt Testes omnes Ec-
clesiæ, Protestantes, Romana, Græca. Ergo Socinus
defecit à Fide in quâ falsus est totam fuisse Ecclesiam.
*Imò negat hoc Socinus, nam ante eum Arius idem
professus est, & tanto cum successu ut inimici ejus clama-
rent, mundum sub Arianismò gemuisse; & quòd Atha-
nàsus esset contra mundum, & mundus contra Athanasium.*
At simul appellârunt Arianos *adversarij christi*. i. e. Re-
ligionis suæ primos Authores. Dico ergo de Ario
quod dixi de Socinò. Reliquit Doctrinam Ecclesiæ.
Quomodo probo? Ita censuit Concilium Nicæanum.
Dum accusatur & damnatur ab Ecclesiâ, an non procla-
mat se ab Ecclesiâ dissensisse? Nemo enim sic tractatur
à suis.

4. Atque hinc percipere licet, Traditionem univer-
salem Doctrinæ Christianæ minimè fuisse interruptam
per successus Hæresis Arianae imò ab iis robur ce-
pisse. Invaluit illa quidem Hæresis aliquantisper in
Ecclesiâ, sed tantâ cum pugná investa est, ut nemini
licuerit ignorare quæ ejus fuisset origo. Antè fuit dam-
nata illa causa quàm victrix, ut scias eam judicio Ec-
clesiæ periisse, potentiâ aulicâ revixisse. *Mundus ge-
muit sub Arianismò.* Gemuit magna pars Ecclesiæ, at
omnes simul falsi sunt Arium ob hanc Doctrinam à
Concilio Nicææ, i. e. quasi à totâ Ecclesiâ fuisse dam-
natum. Christiana Doctrina subegit Paganismum: At
non hoc evincit Paganismum prius occupâsse Mundum
quàm à Christianismo victus est? Ergo Catholicismus
erat ante Arianismum.

S E C T. II.

De Myſterio Trinitatis.

CRedenda à Chriſtiano poſſunt ad hæc Capita redigi; ſcilicet, ad Myſterium Trinitatis, Myſterium Incarnationis, & quæ ex Incarnatione ſunt ſequuta ſequuturæve. Loquor de purè credendis, non autem de credendis in Precatione, Sacramentis, &c. quæ tractanda ſunt in parte de agendis.

Inprimis igitur Chriſtian credunt Deum unum ſubſiſtere in tribus re diſtinctis Perſonis coæqualibus & coæternis, ſcilicet, Patre, Filio, & Spiritu ſancto; Filium procedere à Patre, Spiritum ſanctum à Patre & Filio, &c. ſicut in Symbolis.

I. Quia in tam ſublimi Myſterio non eſt audendum quicquam pronunciare, niſi quod in ſacris eſt Eloquiis, aut ſecundum verba aut ſecundum rem; itaque paucos Textus adnotabo è multis quibus Doctrinam ſuam muniunt Catholici. Quòd Pater eſt verè Deus, 1. ad Cor. 8. 6. Nobis non eſt niſi unus Deus, Pater, à quo ſunt omnia. *Ephes.* 4. 6. Eſt unus Deus & Pater omnium. Quòd Filius ſit verè Deus, *Jo.* 1. 1, &c. In principio erat Verbum, & Verbum erat apud Deum, & Deus erat Verbum. Per ipſum omnia facta ſunt, &c. Ad *Hebræos* c. 1. v. 6. Adorent eum omnes Angeli Dei. Et v. 8. Thronus tuus | O Deus eſt in ſecula ſeculorum. Quòd Spiritus ſanctus ſit verè Deus. *Actor.* 5. 3, 4. Cur Satan implevit cor tuum, ut mentiaris Spiritui ſancto? Non eſ mentitus hominibus ſed Deo. 1 *Jo.* 5. 7. Sunt tres qui teſtantur in cœlo, Pater, Filius, & Spiritus ſanctus, & hi Tres ſunt unum.

2. Universim ferè conceditur, hoc Myſterium non innotefcere lumine Naturæ; quod ſic probat Aquinas. Quod de Deo ſcimus lumine Naturæ eſt ex creaturis; at creaturæ non probant niſi potentiam, ſapientiam & bonitatem Dei, quæ ſunt eſſentialia in Deo, atque adeo communia toti Trinitati nec diſtinctionem probantia. Poſteſt tamen dici, Deum cognosci à nobis non ſolùm per creaturas, ſed etiam per Ideam cognatam; per quam tamen non auſim dicere quòd hoc Myſterium nobis pateat. Solùm adverto me ſtupenda audiviſſe de repræſentatione Trinitatis factâ per ſtultos, imò per homines ab ortu furdos. Memini etiam me olim legiſſe, puto alicubi apud Keckermannum, hanc Filii cum Patre conſubſtantialitatis oſtenſionem. Unumquodque quò eſt perfectius, eò generat ſibi ſimilius; ergo Pater infinitè perfectus generat Filium ſibi perfectè ſimilem, i. e. (niſi quoad Filiationem) prorsus eundem.

3. Sed ut demus non poſſe demonſtrari Trinitatem Perſonarum in Deo, eam tamen per multas repræſentationes ex creaturis explicare nituntur Theologi. Mihi optima videtur repræſentatio ſumpta ex mente humanâ. Homo enim ad imaginem Dei factus fuit, at non ſecundum corpus, ergo ſecundum animam rationalem. Animæ autem rationalis duæ tantum ſunt actiones immanentes, intelligere & velle. Intellectio procedit à ſolâ animâ, & dicitur verbum Mentis; velle autem procedit à Mente & Intellectione, nam ignoti nulla Cupido. Sic, Deus cognoscit ſeipſum, ecce Filius procedens, qui etiam dicitur, & ſapientia Patris. Deus cognoscens ſeipſum, ſeipſum amat. En Spiritus ſanctus procedens à Patre & Filio, qui etiam dicitur Amor.

4. Im hæc representatio, ut à Scholasticis vestita, videtur ambire formam demonstrationis. Cur enim non ponuntur nisi duæ processiones in Divinis? Quia Ens intellectuale non habet nisi duos actus immanentes. *Cur verbum mentis & amor ponuntur in Deo ut personæ cum in nobis sint accidentia?* Quia quicquid est in nobis accidens, est in Deo substantia. *Cur in Deo verbum mentis insignitur Nomine Filii, in nobis non item?* Quia verbum Mentis in nobis est accidens, at intelligere Divinum, est ipsa substantia intelligentis; unde verbum procedens procedit ut ejusdem Naturæ subsistens, atque adeo propriè dicitur genitum & Filius. Generatio enim; ut propria viventium, est productio similis in specie. *Cur Spiritus sanctus non dicitur generari, cum sit ejusdem Naturæ subsistens?* Quia objectum non movet voluntatem per similitudinem ei impressam, sed potiùs ut impellens. Itaque etiam procedens non dicitur Filius sed Spiritus, quod nomen motionem importat.

5. In Deo ponuntur quatuor relationes, paternitas, filiatio, spiratio communis Patri & Filio, & processio Spiritus sancti. Duo posteriora sunt nomina non relationum ipsarum, sed fundantium relationes. Processio etiam Spiritus sancti caret nomine proprio. Hæ relationes sunt reales, utpote fundatæ in realibus processionibus. Sunt etiam idem secundum rem cum essentiâ divinâ, in quâ scilicet nulla est compositio. Sed differunt ab essentiâ ratione, quia relationis nomen importat respectum ad oppositam relationem, qui respectus non importatur per nomen Essentiæ. Sic ergo, relationes Divinæ sumptæ in communi ratione accidentis quæ est esse in, sunt de essentiâ Dei; sumptæ verò secundum propriam rationem relationis quæ est esse ad aliud, sic distinguuntur ab essentiâ.

6. Hæ quatuor relationes non constituunt nisi tres personas, paternitas & Filiatio duas, & processio Spiritus sancti unam. Spiratio autem communis nec Paternitati opponitur nec Filiationi, ergo nec constituit personam distinctam aut à Patre aut à Filio. Nam personæ in Divinis non distinguuntur ullo absoluto, nec nisi per relationes realiter distinctas; & in Divinis nulla est realis distinctio nisi quantum ad esse ad, *i. e.* nisi ex oppositione relationum. Itaque etiam spiratio, licet sit relatio, non tamen dicitur proprietas personalis.

7. Hæ Personæ ponuntur coæquales, quia habent unam essentiam; nec potest quidem persona concipi ut Deus, si quicquam ei deest ob quod sit inferior aliâ personâ. Dices, *Procedens videtur esse inferioris ordinis quam persona à quâ procedit, sicut apud nos Filius cedit Patri.* Respondeo: apud nos Filius est æqualis Patri, alioqui à tot seculis degenerassemus in feiè nihilum. Imò, dices, *Filius est æqualis Patri quoad naturam, sed debet hoc Patri, quod importat inferioritatem conditionis.* Respondeo: Hæc inferioritas est moralis, ubi autem generatio est ex necessitate Naturæ (ut est in Divinis) ibi nulla cogitari debet inferioritas. Tamen inter Personas Divinas ponitur ordo; ut Pater sit prior Filio, & Filius Spiritu sancto. Nam ubi est multitudo sine ordine, ibi est confusio.

8. Missio Personæ in Divinis, non importat mutationem loci, sed inprimis connotat processionem Personæ missæ à Personâ mittente. Itaque Pater qui à nullo est, non dicitur mitti, Filius mittitur à solo Patre, Spiritus sanctus à Patre & Filio. Tum porro Missio importat existentiam Personæ missæ alicubi alio modo quam ibi ante fuit. Sic, Filius erat in terris ab initio, at non incarnatus. Erat etiam Spiritus sanctus in

in terris ab initio, sed non ut Consolator Ecclesiæ, nec ut convincens Mundum per Miracula.

9. Famossimæ Hæreses contra Doctrinam Ecclesiæ de Trinitate fuere & sunt, Arianismus, Sabellianismus & Socinianismus. Arius dicitur posuisse, quod Christus esset Deus factus, scilicet, prima creatura, & instrumentum Dei in cætera creâdo. Sabellius dicitur posuisse tres Personas solum ratione distinctas, unum scilicet Deum in eadem Personâ creâsse Mundum, redemisse hominem & Veritatem Evangelicam Miraculis confirmasse. Ut Creator dicitur Pater, ut Redemptor Filius, ut confirmans Fidem Spiritus sanctus. Socinus videtur statuisse Christum fuisse merum Hominem; & Spiritum sanctum non fuisse Personam, sed virtutem seu potentiam Dei. Jam reliquum est in hoc Capite, ut præcipuis horum objectionibus diluendis operam demus.

10. Inprimis objicitur contradictio in terminis; *unum enim excludit multitudinem, ergo tres Personæ non possunt esse unus Deus.* Ad hoc respondetur, Deum esse unum secundum Essentiam, & Trinum quoad personales proprietates tantum. Contra hoc sic insurgunt. *Proprietates personales sunt reipsâ eadem cum essentiâ, ergo & inter se; nam quæ sunt eadem uni tertio sunt idem inter se.* Respondet Aquinas, axioma valere in iis tantum quæ sunt eadem uni tertio & re & ratione; proprietates autem personales differunt ratione ab essentiâ, ut dictum est. n. 5. Ac valeat quidem hæc solutio quantam valere potest. Ego in his mihi sic satisfacio: Quæ sunt eadem uni tertio sunt idem inter se, in Entibus finitis concedo, in Ente infinito nego. Cujus solutionis rationem exhibui fufiusculè, 2 p. §. 2. n. 2. Et in Tractatiunculâ cui titulus, Supremus legibus solutus. Med. 1. §. 8.

11. Iterum disputant: proprietates personales vel sunt finitæ perfectionis vel infinitæ. Contra utrumvis assumptum multa adferunt sui Cerebri Monstra. Aut scilicet statuendum aliquod finitum esse in Deo, aut esse tria infinita. Ego respondeo, Quod planè ignoro, sintne hæ proprietates personales finitæ perfectionis an infinitæ; sicut etiam ignoras tu, componaturne continuum ex partibus finitis vel infinitis. Vide 1. p. Sect. 7. in Responsione ad Tractatum Theologico-politicum.

12. *Sed ita confitendo ignorantiam nostram in Mysteriis Fidei, an non profiteamur fidem nostram esse potius circa verba quam circa res? Minimè, nam nos profitemur intelligere Mysterium Trinitatis, sed non comprehendere, i. e. aliqua ejus intelligimus, sed non omnia.*

13. Sequitur objectio quasi Moralis: *Cai, inquit, bono obtruditar creaturis rationalibus tam obstrusum & incomprehensibile Mysterium? Quam partem officii nostri promovet? 1. Docet justitiam, ut colamus Filium & Spiritum sanctum, sicut Patrem colimus. 2. Doctrina de Trinitate Christianorum spes jubet esse ratas; qui enim dedit nobis Filium spiritumque ipsi consubstantiales, quomodo cum iis non dabit omnia? 3. Hæc Doctrina incendit amorem erga Deum; quid enim aut agere aut pati pro eo recusare poterimus, qui nos sic dilexit? Ex adverso, qui Christum merum esse hominem contendunt, omnia Christianismi quam reddunt vilia? Christum Sanctum fuisse & Servum Dei extimium agnoscunt. Agnoscit idem Mahometes. Et nisi Saraceni Christo superaddidissent Mahometem, essent ipsi quantum quidem ad credenda, Christiani Socii simillimi.*

SECT.

S E C T. III.

De Myſterio Incarnationis.



Fides Catholica eſt, æternum Dei Filium aſſumpſiſſe & uniſſe ſibi perſonaliter humanam naturam. . i. e. veram animam & verum corpus humanum, & conceptum ſeu formatum operatione Spiritus ſancti è ſubſtantia Virginis Mariæ, ad tollendum peccatum mundi, & ad ſalutem æternam hominibus procurandam, &c. Sicut in Symbolis.

1. Hoc etiam Myſterium eſt à nobis prorsus incomprehenſibile. Ad ejus tamen illuſtrationem à Patribus & Scholaſticis multa adducuntur ; quæ quidem potius docent quomodo ſe res non habeant, quàm quomodo ſe habeant ; & præcipuè adhiberi videntur cautione contra Hereticos. Ego, miſſis iis quæ mero diſputandi pruritu emerſerunt in Scholâ, nonnulla quæ aliquatenus uſui fore arbitror, adnotabo ; & tam objectionibus diluendis incumbam.

2. Incarnatio non ſtatuitur abſolutè neceſſaria ad Redemptionem hominum ; nam hoc eſſet coarctare Omnipotentiam ; fuiſſe tamen modum Redemptionis commodiſſimum. Hinc 1. Confirmatur Fides. Deo loquente quis non credat ? 2. Et ſpes. Quid enim non ſperemus à Deo qui ſic nos dilexit ? 3. Excitatur Charitas. Si amare Deum pigebat, ſaltem non redamare pudeat 4. Hinc habemus firmiſſimum exemplar vitæ. Sequimur hominem viſibilem, ſed qui Deus eſt inſalibilis. 5. Hinc reprimitur Diabolus ; ne ſe auſit homini anteponeſe, cum homo ſit Deus. 6. Hinc monemur non eſſe peccatis inquinandam naturam noſtram, quæ in Deum aſſumpta eſt. 7. Hinc à peccatis redi.

mimur; nam iustitiæ divinæ satisfaciendum fuit. Homo merus non potuit satisfacere, Deus non debuit; Homo qui est Deus, est certissimus Redemptor; patitur quā homo, & satisfacit patiendō quia Deus.

3. Licet non sit impossibile Patrem aut Spiritum sanctum incarnari; tamen convenientius videtur incarnatum fuisse Filium. 1. Enim, per Filium creabantur homines, ergo per eum erant reparandi; sicut artifex opus suum collapsum reficit eādē formā artis conceptā, quā condidit. 2. Perfectio hominis est per sapientiam; ergo summa ejus perfectio, per Filium qui est sapientia Patris, procuranda fuit. 3. Non nisi ut Filii per adoptionem, sumus hæredes Dei; ergo inferendi eramus Filio ejus per Naturam. 4. Primus homo peccavit per inordinatum appetitum scientiæ, ergo per verbum veræ sapientiæ reparandus fuit.

4. Assumere est ad se sumere; itaque est actio, & determinat principium & terminum suum. In incarnatione, principium assumptionis est tota Trinitas; nam opera Trinitatis sunt indivisa, *i. e.* per Potentiam communem Patri & Filio & Spiritui sancto, humana Natura est assumpta. Terminus autem hujus assumptionis est solus Filius, *i. e.* Tota Trinitas ad Filium assumpsit Naturam humanam.

5. Assumptio & Unio in Incarnatione sic differunt. Assumptio importat actionem assumentis & Passionem assumpti; Unio importat ipsam relationem divinæ & humanæ Naturæ, quatenus conveniunt in eādē personā. 2. Assumptio dicitur sicut in fieri, Unio sicut in facto esse. 3. Relatio æquiparantiæ, qualis est Unio, non aliter se habet ad unum Extremum quā ad alterum; Assumptio verò & omnis actio diversimodè se habet ad agens & ad patiens. Unde indifferenter dicitur quod humana Natura est unita Divinæ, & è con-
ver-

verso, divina humanæ. Non autem dicitur divina. Natura assumpta ab Humanâ, sed Humana à Divinâ.

5. Unio non ponitur in Essentiâ Verbi (nam tum esset communis toti Trinitati) sed in Personâ seu Hypostasi ; in quantum scilicet hæc Natura humana subsistit subsistentiâ Verbi. Itaque sunt duæ Naturæ in Christo sicut ante Unionem, sed una tantum Persona. Nam licet Natura humana Christi assumpta fuerit in individuo, tamen non est de se persona aut suppositum, quia existit in alio perfectiori ; sicut etiam brachium, licet sit substantia quædam singularis, tamen non est suppositum, quia existit in alio digniore, nempe toto corpore.

6. Christus assumpsit veram Naturam humanam ; atque ideo veram animam humanam, & verum corpus humanum, & veram Unionem animæ & corporis. Nam factus est similis nobis per omnia. Assumpsit tamen corpus, quasi mediante animâ ; tum quia anima est nobilior corpore, intèrque Deum & corpus posita ; tum ratione causalitatis, quia anima est quasi causa quòd corpus assumptum fuerit ; Caro enim non est assumpta nisi per ordinem quem habet ad animam rationalem, unde habet ut sit caro humana.

7. Dices, *Anima & corpus unita constituunt compositum.* Respondeo, Ita esse in nobis, quia existunt per se at non in Christo quia existunt in digniore. Eodem enim momento in utero Virginis uniebantur anima & corpus inter se, & cum Dei Filio. Nam si unita fuissent inter se antea quàm cum Verbo, constituissent Personam de se.

8. Unio personalis est creatura, quia incepit in tempore. *Sed quomodo potest creatura esse in Deo?* Respondet Aquinas, Relationes creaturarum ad Deum esse in cre.

creaturis reales, easdem in Deo esse relationes rationis tantum. Videtur etiam posse dici, creaturam posse esse in Deo, modo non trahatur in identitatem Essentiae, nam etiam anima & corpus sunt in Deo. Et licet Unio Hypostatica videatur esse immediatior Divinitati, tamen ea est in Personâ non in Essentiâ Dei.

9. Proximum est dispicere de coassumptis animæ & corporis perfectionibus & imperfectionibus. Inprimis anima Christi fuit ab Incarnatione gratiâ habituali abundè munita. Nam 1. Erat unita Fonti Gratiæ, ergo ejus influxum uberrimè recipiebat. 2. Hæc anima actura & passura erat res maximas, at gratia datur ad melius operandum. 3. Hæc anima debuit esse nobis Fons Gratiæ, ergo debuit ipsa abundare gratiâ. Dices, *Hæc omnia supplebantur per Verbum*. Respondeo, Debuit Christus agere non solum ut Deus, sed etiam ut Homo. Non tamen habuit Christus ut Homo gratiam infinitam, quia habuit animam finitam. Habuit autem gratiam sine Mensurâ & quasi indefinitam, i. e. non ut nos ad aliqua bona opera & ad poenitendum de peccatis, & quæ privato pro se sufficiat; sed prorsus omnem gratiam necessariam Capiti Ecclesiæ, i. e. omnem necessariam aut operi Redemptionis peragendo, aut Redemptis gratiâ muniendis. Gratia Unionis (quæ dicitur) nihil est nisi ipsa Unio personalis ut emanans ex merâ gratiâ seu favore divino, cujus effectus est gratia habitualis. Nec dubium est quin Christus habuerit omnes virtutes, quippe quæ sunt scaturigines gratiæ, gratia enim dicitur in Scholâ perficere essentiam animæ, virtus potentias.

10. Christus ratione gratiæ suæ jure dicitur per Metaphoram Caput Ecclesiæ. Nam 1. Principium rei dicitur ejus Caput, ut caput fluvii, caput viæ. Gratia

autem Christi fuit prior ullâ gratiâ Ecclesiæ, non quidem tempore sed Naturâ, nam omnes alii recepere gratiam per respectum ad Christi gratiam. 2. Caput est celsissima pars, & gratia Christi est celsior gratiâ totius Ecclesiæ. 3. Ob plenitudinem, nam omnis gratia est in Christo, ut omnes sensus tam interni quàm externi sunt in capite. 4. Christus gratiam infundit in omnem Ecclesiam, sicut in capite est vis sensitiva & Motiva. Christus tamen, ut Homo, dicitur instrumentum Dei in gratiâ influendâ.

11. Christus, ratione gratiæ suæ, est caput omnium hominum, sed maximè fidelium, 1 *Tim.* 4. 10. 1 *Jo.* 2. 2. Ipse est propitiatio pro peccatis nostris; nec pro nostris tantum, sed pro peccatis totius Mundi. Imprimis ergo & summo gradu, Christus est Caput eorum qui ei uniuntur in gloriâ. 2. Eorum qui ei uniuntur in Fide & Charitate. 3. Eorum qui ei uniuntur potentiâ quæ reducetur in actum. 4. Eorum qui ei uniuntur potentiâ quæ non reducetur in actum. Et hi postremi, exeuntes ex hac vitâ, i. e. exuentes capacitatem gratiæ, desinunt esse ullo modo Membra Christi.

12. Christus etiam ut homo dicitur caput Angelorum. Nam corpus (Metaphoricè) dicitur Multitudo ordinata in unum per diversos actus sive officia. Sed & homines & Angeli ordinantur ad fruitionem Dei, itaque corpus Mysticum Christi videtur consistere ex utrisque, & utrorumque esse caput, quia propinquius se habet ad Deum, & dona ejus perfectius participat. *Col.* 2. 10. Qui est caput omnis potestatis, *Eph.* 1. 21. Constituit eum supra omnem potestatem & principatum.

13. Solus Christus est Caput Ecclesiæ ratione influxus interioris, at secundum Gubernationem exterior-

rem

rem etiam alii dicuntur capita. Sed cum hac differentiâ. Christus est caput hominum, omnibus temporibus & locis; homines sunt capita solum in suis districtibus & pro suis temporibus, ut Reges in suis regnis, Episcopi in suis Dioccesibus. 2. Christus est Caput suâ propriâ virtute & autoritate; homines verò, non nisi autoritate commissâ à Christo, 2 Cor. 5. 20. Pro Christo legatione fungimur, tanquam Deo exhortante per nos.

14. In Christo non admittitur fides aut spes, ob defectum utrique adhærentem. Habuit donum timoris Dei. *Isa. 11. 2. Quiescet super eum Spiritus scientiæ & timoris Domini. Sed num Christus timuit malum à Patre?* Respondeo, Objectum timoris non est solum malum, sed etiam is qui potest malum inferre; posse autem malum inferre, est eminentiæ. Christus ergo timuit Deum non ut illaturum malum, sed ob eminentiam potestatis, i. e. reverebatur. *Heb. 5.* In omnibus exauditus est pro reverentiâ suâ.

15. Aquinas ponit in animâ Christi triplicem scientiam. 1. Beatam, quâ vidit Deum, & in Deo omnia; 2. Inditam seu infusam, quâ cognovit res intelligibiles per species infusas humanæ menti proportionatas; 3. Experimentalem, quâ cognovit res trahendo species ex Phantasmatis. Hoc sic ostendit: anima Christi licet finita, tamen gratiâ unionis habet omnem perfectionem sibi possibilem; ergo omnis ejus potentialitas reducta est in actum; itaque cognovit Deum, quantum ab animâ humanâ cognosci potest, i. e. attingit, sed non comprehendit. En scientia Beatorum! Iterum, est naturalis facultas animæ, per intellectum agentem species intelligibiles facere, easque per intellectum possibilem recipere; En in Christo scientia acquisita seu experimentalis. Iterum, omnis creatura, præter

præter Potentiam passivam naturalem quæ respicit agens naturale, habet Potentiam obedientialem respectu Dei. En in animâ Christi scientia infusa. Hinc statuitur Christum fuisse à Conceptione comprehensorem, quoad quidem partem animæ superiorem; licet fuerit Viator quoad Corpus, quod patiendo tendebat ad gloriam; & quoad partem animæ inferiorem, quæ Corpori compatiiebatur.

16. Si objicis Luc. 2. 52. crevit in sapientiâ, &c. Respondet Aquinas, Christum crevisse in sapientiâ, i. e. Visum fuisse crescere, quia plura indies & majora sapientiæ suæ documenta exhibuit.

17. Si objicis Mar. 13. 32. Ne Filius quidem, &c. Respondet Aquinas, Christus non novit eum Diem tanquam narrandum.

18. Si objicis 1 Cor. 13. 10. Adventu perfecti imperfectum abigitur; ergo si Christus cognovit omnia modo perfectissimo nimirum Visione beatificâ, non opus fuit addere Modos imperfectiores eadem cognoscendi; scilicet, per species infusas, & per species naturales. Respondet Aquinas, *Quod perlinuit ad perfectionem animæ Christi, ut habeat omnes potentias animæ humanæ, easque reductas in actum.* Sed frustra fit illud pluribus modis, quod uno modo satis fit. Nec est imperfectionis, quod aliquæ Potentialitates in animâ Christi non reducantur in actum suo modo, cum reductæ sint in actum modo eminentiori: Sicut humana Natura Christi non est imperfectior, quia Potentia ejus subsistendi per se non reducitur in actum, cum subsistat in digniore.

19. Tandem alii commodius putant dici; Christum, secundum Naturam humanam, non fuisse illico comprehensorem, nec omnia scivisse, sed ea solum quæ erant necessaria singulis Redemptionis nostræ partibus

tibus peragendis. Nam factus fuit similis nobis per omnia, solo peccato excepto. Non est autem peccatum in nobis, nescire quæ nihil attinent. Cumque non possit intelligi, quomodo, Deo quoad animam rationalem perfectè fruens, possit corporis sentire dolores, statuere Christum Comprehensorem ante Passionem, videtur favere Manichæis, & fictæ Passionis suspicionem inducere. Si objicis, quòd Christus novit omnia, quia est omnium Judex; Respondent, Quòd necesse est ut sciat omnia, tum cum judicaverit, at non in utero Virginis.

Si objicis Jo. 2. 24. Quòd Christus novit quid est in homine cum esset, in terris; Respondent, Hoc posse intelligi de Deitate Christi; per infusionem etiam verum erat de Humanitate Christi, quatenus ea munita erat omnibus necessariis ad sui Præservationem usque ad tempus Mortis præfinitum; atque adeo cognitione cogitationum, non fortasse omnium hominum sed omnium quibuscum versabatur. Ex Sancto Paulo ad Galatas 4. 1. Ego sic mecum statui. Christus ut Homo titulo Unionis hypostaticæ est Hæres Dei & Dominus omnium rerum, non solum jure sed etiam possessione, usum tamen hujus Domini detentum fuisse in Manu Dei usque ad consummationem Redemptionis, nisi in iis quæ necessaria erant Humani generis Redemptioni peragenda.

20. Post considerationem intellectus & voluntatis in Christo, proximum est de Potentiâ animæ ejus dispicere. Omnipotentia autem est propria Deo, certum ergo est animam Christi non fuisse omnipotentem. Potuit tamen Christus quia Homo omnia quæ voluit; impossibile enim erat ut voluerit aliquid quod non debuit fieri. Itaque dicit; omnis Potestas mihi data est in cælo & in terrâ.

Obj.

Obj. Præceptum est Signum voluntatis ; at Mat. 9. 30. Christus dicit , Videte ne quis sciat. Illi autem exeuntes diffamaverunt eum. Respondeo , Potuit Christus omnia quæ fieri voluit per se , non quæ per alios , quorum arbitrii libertas non erat violanda : Nec itaque absolute voluit ut non dicerent , sed ut non dicerent , si benefactori quidem obsequi velint.

Obj. 2. Nemo petit ab alio quod ipse potest præstare , at Christus oravit Patrem. Respondeo , Petiit à Patre quæ ipse suâ voluntate perfecturus erat , quia & virtus ejus & voluntas dependebant à Deo , qui operatur in nobis & velle & perficere.

21. Deinceps dispiciamus de imperfectionibus co-assumptis. Ac inprimis Christus assumpsit Corpus humanis infirmitatibus subjectum. Nam 1. ut possit satisfacere pro Peccatis Mundi , famem , sitim , mortem , & cæteras poenalitates pati debuit. 2. Nisi per has infirmitates non verum sed phantasticum Corpus assumpsisse videretur , ut somniarunt Manichæi. 3. Nobile exhibuit patientiæ Exemplum fortiter tolerando Passiones & imperfectiones humanas.

Obj. Anima Christi per gratiam & scientiam erat secunda ab errore , quid ni & Corpus à Malis corporeis ? Respondeo , Ad satisfaciendum pro Peccatis firmitas animi & infirmitas Corporis erat utraque necessaria ; infirmitas Corporis ut possit Christus pati , firmitas animi ut bene patiarur , nam passio Corporis sine charitate nihil est , 1 Cor. 3. 13.

Obj. 2. Hæ infirmitates impedimento erant Deitati Christi agnoscendæ , Isa. 53. 3. Despectus erat nec reputavimus eum. Respondeo , Christus aliunde satis probat Divinitatem suam , ex infirmitatibus veram humanitatem ostendit.

Obj. 3. Patres expectarunt minimè infirmum, Isa. 51. 9. Exurge, exurge, induere fortitudinem. Respondeo, Induit Christus fortitudinem, sed spiritua-lem, per quam & Diabolum vicit & humanam infirmitatem sanavit.

22. Observandum autem est, Christum solum eas infirmitates sumpsisse quæ consequuntur totum genus humanum ex Peccato Originali, ut sunt mori, esurire, sitire, fatigari, &c. Non autem eas assumpsit infirmitates quæ nonnullas Personas affligunt è causis particularibus, ut sunt Lepra, Morbus caducus, &c. Formatio enim Corporis ejus erat è Spiritu sancto infinitæ & sapientiæ & potentæ artifice.

23. Non assumpsit Christus Peccatum, quia non pertinuit ad Naturam humanam Dei opus, sed contra Naturam per seminationem Diaboli introductum est. Et, Peccatum impedivisset satisfactionem.

Obj. Nos habemus Peccatum originale quia fuimus in Adamo, at Christus etiam fuit in Adamo. Respondeo, Christus in Adamo fuit solum secundum Materiam (quæ erat Dei opus) non autem secundum seminalem rationem, quippe formatus desuper; itaque ex Conceptione non contraxit Peccatum Originale.

24. Caro Christi naturaliter appetebat Escam, Potum, &c. quæ secundum rectam rationem appetuntur. Non autem habuit concupiscentiam delectabilem præter ordinem rationis, quæ dicitur fomes peccati; hæc enim excludebatur per plenitudinem gratiæ.

Obj. Magna nostra Victoria est subicere istiusmodi concupiscentiam, at Spiritus Christi est victoriosissimus, ergo omnes habuit Adversarios. Respondeo, Magna est Victoria concupiscentiam rebellem subigere, at major eam tollere.

Obj. 2.

Ob. 2. Tentabatur sicut & nos. Respondeo, Tentationis Christi erant ab extra.

25. Affectus appetitus sensitivi erant in Christo; pertinent enim ad Naturam hominis. Non tamen in eo erant sicut in nobis corruptis. Nam 1. Passiones Christi nunquam ferebantur ad illicita, nostræ plerumque. 2. In Christo oriebantur Passiones secundum dispositionem rationis, in nobis frequenter præveniunt Judicium rationis. 3. Hæ in nobis sæpe trahunt rationem, in Christo sistebant in parte sensitivâ.

26. Itaque Christus habuit verum dolorem; nam habuit Corpus læsum & sensum hujus læsionis. Veram etiam habuit tristitiam, scilicet de Passione & Morte, & de Peccato tum Discipulorum tum Judæorum ipsum occidentium.

Ob. Quomodo potuit tristiari de his cum contemplaretur Deum? Respondet Aquinas, Quòd delectatio divinæ Contemplationis retinebatur in Mente Christi, nec derivabatur ad vires sensitivas quo excluderetur tristitia aut dolor sensibilis.

Obj. 2. Tristitia est de iis quæ nobis nolentibus accidunt, at Christo nihil tale accidit. Respondeo, Aliquid potest esse contrarium Voluntati secundum se, licet sit volitum ratione finis; ut patet in sumptione Pharmaci; & talis fuit Mors Christi.

27. Timor etiam fuit in Christo, *i. e.* fuga futuri nocivi. Et ira, in quantum est ordinata per rationem cupiditas vindictæ, & vocatur ira per zelum. Dicitur etiam Christus admirari; non quòd novum ei accidit: sed miratus est, *i. e.* hoc mirandum proposuit nobis, quibus istiusmodi admiratio est adhuc utilis. *Omnes tales motus ejus non sunt perturbati animi signa, sed docentis Magistri.*

28. Voluntas sensitiva Christi, & etiam Voluntas rationalis ut Natura poterant differre à Voluntate Dei. Deus enim volebat ut Christus pateretur pro salute hominum; at Voluntas Christi ut Natura hoc refugiebat. Verùm Voluntate rationis Christus omnino concors fuit cum Voluntate Dei, *i. e.* ista quæ Naturâ refugit, ob finem suscepit.

29. Christus orabat, quia habuit Voluntatem humanam quæ de se non est efficax Volitorum, itaque petenda erant à Deo.

30. Christus secundum humanam Naturam est subiectus Patri sicut alii homines. 1. Quoad bonitatem; nam Natura Divina est essentia bonitatis, quam habet Natura humana participativè, quasi radiis Divinæ subiecta. Secundum hoc dicit Christus, Mat. 19. 17. Non est bonus nisi solus Deus. Itaque increpavit eum qui ipsum appellaret bonum quem Deum esse non crederet. 2. Humana Natura Christi subicitur Deo quoad Potestatem. Secundum hoc dicitur Phil. 2. 7. Suscepit formam servi. 3. Humana Natura Christi subicitur Deo in quantum propriâ suâ Voluntate Mandatis Dei obsequitur, Jo. 8. 07. semper facio quæ ei placent.

31. Honor exhibetur Personæ, itaque non licet unâ adoratione colere Naturam Divinam & Humanam aliâ, sed unâ Christum. Plures tamen sunt causæ hujus unius cultus; ut *e. g.* Si colas ob sapientiam increatam & obcreatam. Cultus autem qui tribuitur Christo propter Perfectiones humanas dicitur in Scholâ non latría quæ soli Creatori debetur, sed dulia; quæ tamen duo nomina non habent nisi precariam differentiam significationis. Adorare carnem Christi tanquam objectum est ipsum Christum adorare, sicut qui osculatur Manum osculatur Hominem.

32. Ex Unione Naturarum Christi hypostaticâ sequitur Communicatio idiomatum, *i. e.* Quod est proprium Naturæ Divinæ ritè attribuitur Filio hominis tanquam Personæ Divinæ. Et quæ sunt propria Naturæ humanæ rite tribuuntur Filio Dei tanquam Naturæ humanæ hypostasi. Verum licet eadem dicantur de Deo & Homine in Christo, non tamen dicuntur secundum idem, *e. g.* Deus est crucifixus, sed solum secundum Naturam humanam; Filius hominis fuit ab æterno, at solum secundum Naturam Divinam. Itaque interdum determinatio additur, ut Filius Dei est Filius Abrahamæ secundum carnem. Atque hæc determinatio semper intelligitur in istiusmodi affirmationibus, & ubi dubitatio potest esse addenda est cautio contra Hæreticos.

Obj. Assumî dicitur de homine in Christo, at non de Deo. Respondeo, Nec de homine quidem, nam est proprium Naturæ in abstracto.

33. Conceptio Christi est opus totius Trinitatis, tamen per appropriationem quandam attribuitur Spiritui sancto. 1. Quia Incarnatio est à summo amore Dei, & Spiritus sanctus est amor. 2. Ad ostendendum quod hoc factum erat sine ullo merito Naturæ assumptæ, sed è solâ gratiâ quæ attribuitur Spiritui sancto. 3. Per Incarnationem Filius hominis est Sanctus & Filius Dei, quorum utrumque est à Spiritu sancto, *Gal.* 4. 6. Quoniam est is Filii Dei, Deus misit Spiritum Filii sui in corda vestra. Tamen Christus non dicitur Filius Spiritus sancti secundum carnem, quia formabatur Corpus ejus à Spiritu sancto non tanquam generante, sed tanquam Omnipotente. Maria autem rite dicitur Mater Christi, quia Materiam ministravit, quod est Matris.

34. Deinceps objectionibus quibusdam solvendis operam dabo.

Obj. 1. Persona Verbi identificatur cum Essentia Divina, ideoque quod unitur Personæ Verbi, unitur Essentia Divina, atque adeo omnibus tribus Personis. Ad hoc respice quæ dixi §. 2. n. 10.

Obj. 2. Si Filius Dei venisset ex amore hominum, venisset citius, quo plures in eum crederent & salvarentur. Respondeo 1. In operibus Dei nihil ultra Voluntatem Divinam inquirendum est. Venit quia ipsi placuit, & venit quando ipsi placuit. Respondeo 2. Redemptio facta per Christum quoad efficaciam immediate sequebatur primum peccatum; in eâ enim fundata est illa promissio, quod semen Mulieris conteret caput serpentis. Sed, dices, si Christus venisset citius, plures Gentes eum scivissent. Respondeo, certum esse Redemptionem Christi multis prodesse quibus ipse non est notus, ut patet in Infantibus baptizatis, spero etiam in non baptizatis & in Gentilibus adultis ante adventum Christi qui sincero animo virtuti studebant; de quo respice quæ dicta sunt 2 p. sect. 4.

Obj. 3. Impossibile est ens perfectissimum & immutabile descendere & exinaniri. Respondeo: Descensus Filii Dei non importat mutationem loci, sed solum Manifestationem sui in terris alio modo quam se antea manifestaverat. Filius etiam Dei quâ Deus est & semper fuit Dominus omnium, sed dictus est exinanire seipsum per Communicationem idiomatum, quia Filius hominis qui induit formam servi est Filius Dei.

Obj. 4. Corpus Christi nutriebatur, at nutritio sequitur detritiorem partium; at quod assumptum est in Deum videtur non posse deperdi, ergo videtur corpus non

non fuisse assumptum. Respondeo, Corpus fuit assumptum ratione animæ, i. e. ut humanum & sub conditione humani corporis; itaque partes ejus & detrita erant & per nutritionem reparatae, & tamen idem erat corpus nutritum & primò assumptum, sicut etiam apud nos corpus nutritum est idem quòd primò nascebatur.

SECT. IV.

De Nativitate Christi.

Fides Catholica est, Christum natum fuisse ex Mariâ Virgine.

1. **N**ON ambigitur inter Christianos, quin Mariâ in Conceptione Christi fuerit Virgo, i. e. intacta à viro. Nonnulli autem dubitant an Christus exiverit ex utero Matris clauso, quomodo certissimè eò intravit; neque hoc putant necessarium esse ad Virginitatem Mariæ, cum Virginitas solâ Mixtione Venereâ lædi videatur.

2. Quòd autem Mariâ permanserit Virgo per totam vitam, si non est de fide, tamen ita sentire est prorsus secundum rationem, Nam 1. Contrarium esset indignum Spiritu sancto ejus sacrarium erat uterus Virginis, *Ezek. 44. 2.* Porta hæc clausa erit in æternum, & vir non transibit per eam, quoniam Dominus Deus Israel ingressus est per eum, 2. Talis commistio derogaret dignitati Matris Christi, quæ ingratissima videretur, si tali Filio contenta non fuisset. 3. Maximæ fuisset præsumptionis in Josepho, si attentasset eam polluere quam ex Angelo novit concepisse è Spiritu sancto.

R

Obj.

Obj. Fit mentio fratrum Christi. *Respondeo*, Judæi consanguineos appellarunt fratres.

Obj. 2. *Mat.* 1. Accepit conjugem suam & non cognovit eam; donec peperisset Primogenitum. Quod videtur significari quod eam post cognovit. *Respondeo*, Donec interdum definit tempus, ut *Gal.* 3. 19. Lex posita est donec veniret semen. Interdum autem donec relinquit tempus indefinitum, ut *Psal.* 123. 2. Vertentur oculi nostri ad Dominum, donec misereatur nostri. Ex quo non est intelligendum quod post impetratam Misericordiam oculi à Deo averterentur, sed quod multò magis in eum figerentur. Sic Josephus non cognovit Mariam usque ad Partum, & multò minùs post.

3. Nativitas Christi fuit revelata Magis ut Idololatriis, Gentilibus & Divitibus; Pastoribus ut pauperibus Judæorum; Simeoni & Annæ ut Piis: ut significet Christum venisse Servatorem hominum, cujuscunque sint illi Gentis Religionis & Conditionis.

S E C T. V.

De Legalibus circa Puerum JESUM adhibitis.

Octavo die Christus fuit circumcissus, & nomen JESU accepit, & in Consummatione Purificationis Mariæ allatus est in Templum & Domino oblatu, &c. secundum Legem Moysi.

1. **C**HRISTUS quia Peccati exors non erat Legi obnoxius, se tamen Legi subdidit, ut redimeret eos qui erant sub Lege, & ut Legem confirmaret, & ut daret humilitatis exemplum, & ut ansam calumniandi Judæis præriperet.

2. Sic

2. Sic Mater Christi non indigebat Purificatione Mosaicâ , nam purissimè conceperat è Spiritu sancto , ei tamen ritui se subdidit ad evitandum calumnias Judæorum , & ad imitandum humilitatem Filii sui.

3. Sed cur est Christus dictus Jesus , cùm Isaias prædixisset , Quòd vocaretur Immanuel? Respondeo, Appellatur & Immanuel & Princeps Pacis, &c. Sed in Circumcisione Nomen Jesu adhibitum est, quod significat Servatorem , & comprehendit omnia alia Nomina quibus est insignitus , e. g. dicitur Immanuel ob Incarnationem quæ est causa Redemptionis; dicitur Princeps Pacis quæ est consummatio Salutis per Redemptionem partæ; dicitur Consiliarius , quia ejus consilio peragebatur opus Redemptionis, &c.

Obj. Sed hoc Nomen Jesu erat commune multis aliis. Respondeo, Potuit aliis attribui ob salutem temporalem aliquibus partam; at solus Christus est dictus Jesus ut Servator omnium hominum & ab omnibus Malis.

S E C T. V I.

De Baptizatione Christi.

Cùm multi à Joanne baptizati fuissent , Christus etiam ab eo baptizabatur , &c. Mat. 3. 13.

1. **J**oannes missus fuit à Deo ad baptizandum , Jo. 1. 33. Non ut institueret ritum permanfurum, sed tantum præparatorium. Nimirum 1. Ut Christus ab eo baptizatus Baptismum consecraret. 2. Ut Christus manifestaretur , Jo. 1. 31. Concurrentibus enim turbis ad Baptismum, Joannes Christum an-

nuntiabat, quod facilius sic factum fuit quam si per singulos discurrisset. 3. Ut assuefierent homines ad Baptismum Christi. 4. Ut ad pœnitentiam homines inducens eos prœpararet ad dignè suscipiendum Baptismum Christi.

2. Baptismus Joannis videtur lavisse solam carnem, non autem gratiam contulisse, *Jo. 1. 26.*

Obj. Joannes prædicavit Baptismum pœnitentiæ in remissionem Peccatorum, *Marc. 1. 4.* Respondeo, i. e. Baptismum inducentem ad pœnitentiam quam sequebatur remissio Peccatorum per Baptismum Christi. Quod consummatum fuit per Sponsum initiabatur per paranympum.

3. Baptizati Baptismo Joannis baptizabantur denuo Baptismo Christi, *Act. 19. 5.*

Obj. Apostoli baptizabantur à Joanne, nec dicuntur de integro baptizati fuisse à Christo. Respondeo, Christus qui lavit eorum pedes non defuisset Ministerio eos baptizandi, per quos baptizaturus erat Mundum.

4. Christus baptizabatur, non ut ablueretur caro ejus purissima, sed ut ablueret aquas, easque aliis baptizandis sanctificaret. 2. Licet ipse à Peccatis purus erat, tamen ejus Natura in aliis suppositis erat depravata, atque adeo ratione illorum abluenda. Christus erat baptizatus, ut totum veteranum Adam aquæ immergeret. 3. Ad complendum omnem justitiam. Hæc autem est justitia, ut quod alterum facere velis prior ipse incipias, & tuo alios hortaris exemplo. 4. Ut Baptismum Joannis comprobaret.

5. Spiritus sanctus formavit veram columbam in quâ appareret, licet eam non assumpserit in Unitatem Personæ.

6. Spiritus sanctus descendit visibiliter super Christum, ut ostendatur eum esse revera licet invisibiliter descensurum super omnes qui non ficto animo accedunt ad Baptismum.

SECT. VII.

De Conversatione CHRISTI.

Christus vitam egit non solitariam sed inter homines, nec austeram sed victu & vestitu ut alii. Pauper etiam fuit, & Legem Mosaicam observator.

1. **V**itam egit inter homines ad fines Adventus ejus in Mundum expediendos. Hi erant 1. Manifestare Veritatem, Jo. 18. 37. Ergo debuit publice prædicare. 2. Homines à Peccatis liberare; itaque perambulare incubuit & quærere pereuntem, sicut Pastor Ovem perditam, & sicut Medicus accedit ad infirmum. Ac licet Christus poterat omnes ad se trahere in unum locum, non tamen per hoc nobis exemplum reliquisset. 3. Christus venit ut per ipsum habeamus accessum ad Deum; at familiariter cum hominibus conversando fiduciam omnibus dedit ad ipsum accedendi.

2. Christus cibo & potu ut alii, utebatur. Cum enim ei cum hominibus conversandum esset, conveniens erat ut se iis in conversatione conformet, 1 Cor. 9. 22. Infirmis quasi infirmus factus sum, ut infirmos lucrificerem. Itaque dicitur Mat. 11. 19. Venit Filius hominis manducans & bibens, i. e. utebatur victu Judæorum. Joannes nec manducavit nec bibit, i. e. vescabatur aliter quàm Judæi, nimirum locustis & melle agresti.

3. Chr-

3. Christus elegit pauperem vitam. 1. Ut commo-
diorem officio prædicantis, cui vacandum est à Munda-
nis, *Mat. 10. 9.* 2. Corporali suâ paupertate spiritua-
les nobis meruit divitias, sicut vitam spiritualem Mor-
te suâ temporali. 3. Ne cupiditati Prædicatio ejus ascri-
beretur.

4. Christus secundum Legem vixit, 1. Ut Legem
veterem comprobaret. 2. Ut eam observando con-
summaret, ostendens quòd ad ipsum erat ordinata. 3.
Ut Judæis occasionem calumniæ subtraheret. 4. Ut
homines à servitute Legis liberaret.

Obj. Quomodo Christus vixit secundum Legem cum
homini sanato mandaverit in Sabbato ut lectum suum
tollat? Et cum excusaret Discipulos de vellendo spicas?
Respondeo, Ostendit Dominus tripliciter, se non vi-
olasse Mandatum de Sabbato, 1. Illo Præcepto veta-
tur opus humanum non divinum. Nam Deus licet qui-
evit à Creatione Die septimâ, in eâ tamen Mundum
conservavit. Jam Miracula sunt opera Divina. Ita-
que dicit, Pater meus usque operatur & ego operor.
2. Illo Præcepto non vetantur opera necessaria etiam
ad salutem corporalem, *Luc. 13. 15.* Quis vestrum
non solvit bovem in Sabbato? 3. Illo Præcepto non ve-
tantur opera pertinentia ad Dei cultum, *Mat. 12. 5.*
Nonne legistis in Lege? &c. Paralyticum verò portare
lectum ad laudem divinæ virtutis pertinebat.

S E C T. VIII.

De Jejunio & Tentatione CHRISTI:

Christus post Baptismum jejunavit 40. dies & 40. noctes in deserto, & postea esuriens à Diabolo tentatus est, &c.

1. **C**hristus tentationi futuræ præmisit jejunium; 1. Propter exemplum; non jejunio indigens, sed nos instruens quod per jejunium oportet nos contra tentationes armari. Itaque jejunium ponitur inter arma justitiæ, 6 Cor. 6. 5. 2. Ut ostendat Diabolum aggressurum esse jejunantes sicut aliis etiam bonis operibus vacantes. 3. Post jejunium sequuta est esuries, quæ dedit Diabolo audaciam eum aggrediendi.

2. Non jejunavit Christus ultra exemplum Moysi & Eliæ, ne incredibilis videretur carnis assumptio.

3. Christus non fuit tentatus à carne aut à Mundo; nam tales tentationes sunt cum delectatione, & non sine Peccato. Se autem à Diabolo tentari passus est: 1. Quia tentationes nostras suis tentationibus vicit, sicut suâ Morte nostram. 2. Ad monendum ne quantumcunque sancti putemus nos esse seguros à tentatione Diaboli. 3. Ut nobis exemplo sit, ostendendo quomodo tentationes Diaboli vincamus. 4. Ut nobis fiduciam det de suâ Misericordiâ, Heb. 4. 15. Non habemus Pontificem qui non possit compati.

Obj. Tentatio est opus Diaboli, at Christus venit ad opera Diaboli dissolvenda, ergo non ut ea patiatur. Respondeo, Christus opera Diaboli dissolvit ea patiendo, i. e. dissolvit non potestate sed justitiâ.

Obj. 2.

Obj. 2. Tentare est nescientis, at Diabolus novit Christum esse Filium Dei, *Luc. 4. 41.* Respondeo, Diabolus tantum de Christo novit quantum Christus voluit, *i. e.* per Mira quadam putavit eum esse Filium Dei; at ab esuritionem & infirmitates corporeas dubitavit.

SECT. IX.

De Doctrina CHRISTI

Christus docuit in Synagogis Judeorum, Luc. 4. 14.

1. **C**hristus prædicavit solis Judæis. 1. Ut ostendat per suum adventum adimpletas fuisse Promissiones Patrum, quæ quidem factæ sunt Judæis & non Gentibus, *Rom. 15. 8.* 2. Quæ à Deo sunt, ordinata sunt, debuit ergo Doctrina Christi prius patefieri Judæis (qui Deo erant propinquiore per fidem & cultum unius Dei) quàm Gentibus Idololâtris. 3. Ut Judæis præriperet materiam calumniandi. 4. Christus meruit Dominium super Gentes per Passionem, ideoque ante Passionem noluit Gentibus prædicari Doctrinam suam.

Obj. Esa. 49. 6. Dedi te in lucem Gentium. Respondeo, Et erat per Discipulos suos. Aliqui tamen Gentilium admissi sunt (ut Mulier Samaritana, &c.) ob excellentiam Devotionis & Fidei, & ne spes præcluderetur.

2. Christus in docendo non vitavit offensionem Pharisæorum, &c. Quippe 1. Qui obstinatè resistebant Evangelio. 2. Doctrina ejus erat in communem omnium salutem quæ præferenda est Paci quorumcumque sin-

ingulorum hominum. 7. Quia per hoc Doctrina eius promota fuit; Populo minus à Phariseis abducto, eum eorum vitia innotescerent.

Obj. Nos jubemur non offendere, at Christus erat nobis exemplar. Respondeo, Non debemus offendere culpam nostram; at si scandalum dicitur de Veritate, scandalum potius est sustinendum quam Veritas relinquenda.

Obj. 2. Senioreni ne increpeveris, 1 *Tim.* 5. 1. Respondeo, Si est senior ut ætate vel autoritate, sic moribus etiam. Respondeo 2. Pharisei non erant Ordines constituti à Deo, itaque nec immunes à justis correptionibus. Nec reperitur ullum Christi maledictum in Sacerdotem aut supremum aut subordinatum. Respondeo 3. In acrimonia reprehensionem Christum modeste imitari debemus, novit enim ille corda hominum, nec potuit errare, nos deceptionibus proli sumus, & sæpe vitis nostris acti invenimur in vitia aliorum.

3. Jesus predicavit publice, Jo. 18. 20. 7. 2. tenebrosa Conventicula non celebravit. *Obj.* Parabolis obscuravit Doctrinam suam vulgo. Respondeo, Quia Populus nondum erat caput nudæ Veritatis, ad quam tamen intelligendam per Parabolas parabatur.

4. Non habetur in Canonè, Christum Doctrinam suam reliquisse scriptam. 1. Ob ejus dignitatem, quem per Ministros scribere par erat. 2. Ob eminentiam Doctrinae ejus. Mundus non erat statim capax, Jo. ult. Sunt & alia multa quæ fecit Jesus, &c. Ubi Sanctus Augustinus; Non spacio locorum credendum est ea capi non posse, sed capacitate legentium comprehendi fortasse non posse. 3. Si Christus ipse quicquam in scriptis reliquisset, ad hoc solum attendissent Christiani, & in mille varietates sensuum distraxissent,

Expositiones Apostolicas minimè curantes. Imò ipsi Discipuli Christi non scripsere nisi postquam cordibus hominum Doctrinam Evangelicam longè latèque infererint; per hoc monentes Ecclesiam, ut recipientes scripta receptæ Doctrinæ perfectè conformia non exercerent ingenia sua in Doctrinas è textibus eruendo; sed Doctrinam receptam diligenter tueantur testimoniis Scripturarum.

De Miraculis CHRISTI.

Christus Doctrinam suam Miraculis probavit.

1. Christus docuit ut habens *authoritatem* (*Mat. 7. 29.*) i. e. ut Dominus Legis. Miracula etiam fecit ut Dominus Naturæ. Apostoli omnia fecere Nomine Christi, Christus omnia suo Nomine; se Deum esse & docens & probans. Ac de Miraculis quidem est fusè dictum primâ parte. Quid videtur restare est dispicere

2. Cur Christus antequam Miraculum vellet facere, fidem requisivit eorum, quorum gratiâ Miraculum faciendum esset. Respondeo, 1. Fides non exigebatur tanquam cooperatura cum Christo, aut quod esset ullo modo instrumentum, aut quancumque exerceret efficientiam in Miraculo efficiendo. Nam 1. Multa fecit Christus miracula in subiectis non capacibus Fidei, ut cum aqua fieret vinum, panes multiplicarentur, &c. 2. Christus miraculum sæpe fecit in uno homine, propter fidem alterius, ut cum sanaret servum Centurionis, &c. 3. Fides quæ possit efficientiam exercere in sanando

sanando corpore deberet esse firma & flagrans possessio animæ, at Christus accepit fidem quasi granum sinapis. Fidem ejus amplexus est, qui dixit, Tu Domine juva incredulitatem meam. Quamlibet exiguum dispositionem ad credendum Fidei nomine dignatus est.

3. Respondeo 2. Christus ut faceret miraculum requirit Fidem tantum in commendationem Personæ, i. e. ut dispositionem moralem quæ hominem redderet capacem tantæ gratiæ, *Luc. 7. 6. Mat. 16.*

4. Ut hoc clarius fiat, observa finem præcipuum miraculorum Christi fuisse, ut mundo fidem faceret de se. Et quod satis erat ad hunc finem Christus qui venit ad salutem omnium omnibus miracula ostendit, *Mat. 16. 4. Act. 14. 17.* Erat præterea finis miraculorum inferior, scilicet particularium hominum liberatio à malis temporalibus ut sanatio ægrorum, &c. Et miracula ut huic fini deservientia non fiebant ordinariè, nisi bono non immerentium (*Mat. 16. 4.*) ut patet in conversione aquæ in vinum, in multiplicatione Panum, in suscitatione Lazari, &c. Sic dicitur *Mar. 6. 5.* Non poterat ullum magnum opus ibi facere ob eorum infidelitatem, i. e. indignissimi erant pro quibus faceret, itaque noluit, nec potuit quidem per Legem à se positam de non obijciendo Gemmas Porcis.

S 2

SECT. XI.

S E C T. XI.

De Transfiguratione CHRISTI.

Jesus transfiguratus est, &c. Mat. 17. 1.

Veritas Corporis in transfiguratione perman-
sit, sed facies vestisque ecclesi splendore or-
nabantur.

2. Videtur Christus in transfiguratione ostendisse
Discipulis, qualis futurus est tempore Judicii, *Mat.*
16. 28.

3. Anima Moïsis non resumpsit Corpus suum (nam
Christus erat primitiæ Resurrectionis) sed apparuit in
aliquo corpore sicut Angeli apparent. Elias autem de-
scendit cum Corpore suo non de cælo empyreo, sed
de sede sua.

4. In transfiguratione Moïses & Elias adhibiti sunt
multis de causis. 1. Quia Populus putavit Christum
esse Eliam aut Jeremiam, &c. itaque adduxit capita
Prophetarum ut saltem hinc appareat differentia servo-
rum & Domini. 2. Legislatorem & Zelotam pro glo-
ria Dei Prophetam secum ducens damnat calumniam
Judeorum, qui in eum ut violatorem Legis & gloriæ
Dei Usurpatorem grassabantur. 3. Moïsem mortuum
& Eliam viventem secum ducens ostendit se esse Domi-
num Vitæ & Mortis, vivorumque & mortuorum Ju-
dicem. 4. Apparitione Moïsis & Eliæ excitantur Dis-
cipuli ad imitandum Moïsis mansuetudinem & zelum
Eliæ. 5. Christus per hoc ostendit se fuisse prædicatum
per Legem, quæ erat à Moïse, & per Prophetas, in-
ter quos præcipuus erat Elias.

S E C T. XII.

S E C T. XII.

DE Passione CHRISTI.

Christus passus est & crucifixus sub Pontio Pilato
Symb.

1. **P**assio Christi erat necessaria necessitate convenientiæ; 1. Ex Parte nostrâ qui per eam redimimur, *Jo. 3. 14.* 2. Ex Parte Christi, qui per humilitatem Passionis meruit gloriam exaltationis. 3. Ex Parte Dei, cujus diffinitionem circa Passionem Christi prænunciatam in Scripturis & præfiguratam in Lege, oportebat impleri, *Luc. 24. 44.*

2. Passio Christi non erat absolute necessaria ad liberationem hominum. Nam Deus Omnipotens potuit sine ulla satisfactione Peccata hominum dimittere. Quippe, cum propter ipsum sint omnia, cui injuriam fecisset? Itaque David dicit, *Pf. 53. 4.* Tibi soli Peccari, *i. e.* potes sine injustitiâ mihi dimittere. Non sic terrenus Judex, cui incumbit rationem habere & communitalis & gloriæ Dei.

Obj. Mat. 26. 39. O mi Pater, si est possibile, transcat hic calix. Respondeo, Suppositâ præordinatione divinâ, non erat possibile.

3. Non potest excogitari alia via Reparationis humanæ tam conveniens quàm per satisfactionem Christi.

1. Homo hinc cognoscit eximiam Dei *Phil. 2. 6.* 2. Christus patiendo dedit nobis exemplum humilitatis, constantiæ & cæterarum virtutum, quas ille patiens ostendit, & quæ salutis nostræ sunt necessariæ, *1. Pet. 2. 21.* 3. Christus per Passionem non solum à Peccatis nos liberavit, sed etiam gratiam & gloriam nobis me-

meruit. 4. Qui se sic liberatum cogitat, servat se magis immunem à Peccato, 1 *Cor.* 6. 20. 5. Diabolus victus per hominem humani generis dignitatem reparavit, 1 *Cor.* 15. 57.

Obj. Natura imitatur Deum, at in eà nihil fit per duo quod potest fieri per unum. Itaque Reparatio nostra quæ poterat fieri solâ Dei Voluntate, non debuit ultra adhibere Passionem Christi. Respondeo, Etiam in Naturâ sunt duo oculi ad videndum, cum tamen visio possit fieri per unum. Nec tamen est Deus coarctandus intra limites Naturæ.

4. Licet consideratâ Dei Omnipotentia plenôque jure in omnia concedatur eum potuisse hominem aliter reparare quàm per Passionem Christi, non puto tamen ullum alium modum nobis quidem cogitabilem esse, dum consideramus justitiam Dei cui satisfacere per nosmet non potuimus. Nec per satisfactionem minuitur gloria misericordiæ divinæ; quippe quæ satisfactorem exhibuit, *Rom.* 3. 24. Quin sic nos reparare abundantioris fuit misericordiæ, quàm si Peccata absque satisfactione dimisisset, *Eph.* 2. 4.

5. Christus passus est in Cruce; 1. Ut crudelis & infamis suæ mortis genere ostendat nobis in officio peragendo non esse abhorrendum nec à morte nec à genere mortis. 2. Peccatum primum erat vetita decerpitio ex arbore, argo in arbore pro eo satisfaciendum fuit. 3. Crucifixus consecravit ut effusione sanguinis terram, sic suspensione in alto aerem. 4. Per exaltationem in crucem paravit nobis ascensum in cœlum, *Jo.* 12. 32. 5. Hoc genus mortis plurimis figuris respondet. Per arcam ligneam servatus est Noah. Virgâ ligneâ divisit mare rubrum ad liberationem Israelitarum, &c.

Obj. Christus erat benedictus, at pendens in arbore erat maledictus. Respondeo, Christus erat ideo benedictus, quia se fecit maledictum pro nobis, *Galat.*

3. 13.

6. Quomodo Christus assumpserit dolorem & tristitiam, dictum est § 3. Magnitudo autem doloris ejus in Passione aspicitur; 1. in causis doloris, quæ fuere læsio corporis acerba & diuturna, tum etiam Peccata mundi pro quibus satisfecit, & quæ quasi sibi ascribit, specialiter casus eum crucifigentium, scandalizatio Discipulorum, tum etiam amissio vite corporalis. 2. Dolor Christi ingravescebat ex ejus perceptibilitate, & secundum Corpus & secundum Animam. Corpus ejus fuit formatum à Spiritu sancto, itaque temperamento optimo adeoque sensu tactus vivo. Anima etiam efficacissime percepit omnes causas doloris. 3. Dolor Christi erat purus ab omni alleviatione per considerationem mentis (quæ aliis subinde usui est) nam superior pars animæ ejus permisit cuicunque inferiorum virium agere quod sibi proprium est. 4. Passio Christi erat assumpta voluntarie pro liberatione hominum, ideoque tantus erat assumptus dolor, quantus tanto effectui proportionatus erat. Ex quibus omnibus simul sumptis videtur concludi, dolorem Christi fuisse maximum qui possit incidere in hominem, in hac quidem vita.

Obj. Amissio vite tam citò recuperandæ non erat adeo dolenda. Respondeo, Vita corporalis Christi ob Divinitatem unitam tanti erat pretii, ut eam amittere in quantum libet parvum tempus majus sit damnum, quàm si alius amitteret vitam in quantumlibet longum tempus. Nec tamen doluit Christus solum ob amissionem vite, sed etiam ob Peccata Mundi. Modus etiam amissionis vite erat plenus tormentis. Et quasunque ha-

habuit considerationes non est passus eas descendere in inferiores potentias animæ.

7. Christus est occisus à Persecutoribus suis, tamen dicitur indirectè causa suæ Mortis, quia scilicet eam non vitavit cum potuit, *Jo. 10. 18.*

8. Christus passus est ex obedientiâ, *Phil. 2. 8.* dices, *Cui mandato?* Erat Mandatum, *Jo. 10. 18.* Non quod Christus expectaverit audire & doceri, sed declarat voluntarium Processum & Patri consentaneum. Potest etiam dici, Christum patiendò obediuisse Patri, quia Legem patiendò observavit; Moralem quidem quæ fundatur in charitate, quia passus est ex amore Patris (*Jo. 10. 31.*) & Proximi, *Gal. 2. 12.* Cere- monialem etiam Legem implevit, cujus Sacrificia non erant nisi figuræ hujus veri Sacrificii. Implevit etiam Legem judicalem quæ præcipuè ordinatur ad satisfaciendum injuriæ passis, *Psal. 69. 4. i. e.* permisit se Ligno affigi pro pòmo, quod de Ligno homo rapuerat contra Mandatum Dei. Ob has completiones dicitur *Consummatum est*, *Jo. 19. 30.*

9. Pater tradidit Filium ut pateretur; 1. Præordinando Passionem ejus pro liberatione hominum, *Isa. 53. 6.* 2. Non protegendo sed exponendo eum persecutoribus, *Mat. 27. 46.* Ut quid dereliquisti me? scilicet in manibus Persecutorum. Pater autem tradidit Christum & Christus seipsum ex charitate, itaque inde glorificantur. Judas autem tradidit eum ex cupiditate, Judæi ex invidiâ, Pilatus ex timore mundano (metuens Cæsarem), itaque inde vituperantur.

10. Populus Judæorum seducti à Principibus, & Principes invidiâ occæcati non viderunt, *i. e.* noluerunt videre Messiam in Christo, *1. Cor. 2. 8. Act. 3. 17.*

11. Passio Christi nobis comparavit salutem merendo; nam gratia ei data est non solum ut homini singulari, sed etiam ut Capiti Ecclesiae, scilicet ut ab ipso redundaret ad Membra.

Obj. Passio non meretur, quia venit ab extra. Respondeo, Meretur ut voluntarie suscepta. Id tamen tenendum est, Christi Passionem vim merendi radicatus habere ex dignitate Personae, si quidem meritum ex condigno cogitas.

12. Passio Christi nos liberavit per modum satisfactionis. Nam satisfacere pro offensâ est offenso exhibere id quod æquè vel magis diligit quam odedit offensam. Sed Charitas Christi ponentis vitam majus fuit bonum in oculis Dei, quàm perversitas humani generis fuit malum.

Obj. Debet ipse satisfacere qui offendit. Respondeo, Christus & Fideles faciunt unum Corpus Mysticum, & satisfactio Capitis est satisfactio omnium Membrorum, Jo. 22.

13. Passio Christi erat sacrificium, Eph. 5. 2. Nam sacrificium est omne id quod fit in honorem Dei ad eum placandum; Passio autem Christi erat opus Deo acceptissimum.

Obj. Immolatio Carnis humanæ damnabatur. Respondeo, etiam effusio sanguinis Christi ex parte occidentium erat maleficium gravissimum, at ex parte Christi se ex charitate offerentis erat sacrificium gratissimum.

14. Passio Christi operata est salutem nostram per modum Redemptionis, 1 Pet. 1. 8, 9. Sed à quo redimimur? 1. A Diabolo qui nos inducendo in Peccatum, in servitutem jussu Dei Permissione redegit, Jo. 8. 34. 2. Redimimur à reatu poenae, quo homo obligabatur per Dei justitiam. Ad servitutem enim pertinet, quod

T

ali-

aliquis patiat quod non vult.

Obj. Si Redemptio est à Diabolo, tum pretium ei solvendum erat. Respondeo, Redemptio est à Diabolo solum tanquam Tortore.

15. Solus Christus est Redemptor noster, nam solus pretium solvit, nempe vitam suam Corporalem.

Obj. Deus redemit nos. Respondeo, Principaliter solus Deus, at Christus homo immediate. Christus homo solvit pretium, at Mandato Patris.

Obj. 2. Passiones etiam Sanctorum sunt proficiæ salutis nostræ, *Col.* 1. 24. Respondeo, Passiones Sanctorum profunt Ecclesiæ non per modum Redemptionis, sed per modum Exempli & Exhortationis, *2 Cor.* 1. 6.

16. Per Passionem Christi liberamur à Peccatis & præteritis & futuris, ut si Medicus faciat Medicinam quæ possit omnes morbos sanare.

17. Passione Christi liberamur à Potestate Diaboli, *Jo.* 12. 31. Potestas Diaboli stetit in tribus. 1. Merito nostro qui ab eo inducti sumus ad peccandum; at Passione Christi liberamur à Peccatis. 2. Potestas Diaboli pendebat à Permissione Divinâ; at per Passionem Christi Deo reconciliamur. 3. Diaboli nequissima voluntas hominem à consequutione salutis impedivit; at Christus patiendo eum subegit, in quantum Diabolus eum occidit, licet nihil in eo Morte dignum viderit, itaque justum est ut Debitores quos tenebat liberi dimittantur, nempe credentes in eum quem ille sine ullo debito occidit.

Obj. Diabolus adhuc tentat animas & vexat corpora hominum; & dicitur quod tempore Antichristi furiosissimè grassabitur. Respondeo, Deus secundum occultam rationem judiciorum suorum potest permittere ut

ut

ut Diabolus grassetur in nonnullas Personas, remedium tamen paratum est in Passione Christi, quo si quis uti negligit, is suam ipsius culpam perit.

18. Per Passionem Christi liberamur non solum à reatu sed etiam à poenâ Peccati; nam exhibitâ sufficiente satisfactione tollitur reatus Poenae.

Obj. Dammati non liberantur. Respondeo, Christus sufficientem exhibuit satisfactionem pro omnibus, eam tamen noluit applicari nisi iis qui credunt & obsequuntur Evangelio.

Obj. 2. Poenitentibus Inungitur uterius poena satisfactoria. Respondeo, Oportet nos Christi configurari, ut consequamur effectum Passionis eius. In Baptismo configuramur Passioni ejus Sacramentaliter; Rom. 6. 4. Itaque baptizatis nulla poena satisfactoria imponitur, quia sunt totaliter liberati per satisfactionem Christi. Christus autem semel tantum mortuus est, itaque lapsus post Baptismum non potest iterum configurari Morti Christi per Baptismum; sed oportet ut configuretur Christo patienti, per aliquid Poenalitatis quod in se sustineat; quæ tamen Poenalitas improprie dicitur satisfactoria; cum nullius sit virtutis nisi ex vi satisfactionis Christi, & procedat potius ut testimonium Poenitentiae quam ut satisfactio pro Peccato.

Obj. Mors est poena Peccati, at homines adhuc moriuntur. Respondeo, Mors non est poena Piis sed Porta Cæli, & relinquitur ut configuremur Christo patienti, qui per Mortem intravit in gloriam.

19. Rom. 8. 17. Reconciliamur Deo Passione Christi tum ut remissionem Peccatorum procurante, tum ut offerente sacrificium acceptissimum, cujus opus est placare Deum.

Obj. Deus dilexit nos semper, imò ex amore nostri dedit nobis Christum ut pateretur. Respondeo, Di-

lexit nos ut homines, sed non ut Peccatores, *Psal.*
7. 11.

Obj. 2. Occisores Christi erant homines; ergo Deus per Passionem ejus magis fuit provocatus quàm placatus humano generi. Respondeo, Sed & Christus homo fuit, & major erat ejus charitas quàm iniquitas occisorum.

20. Christus patiēdo aperuit nobis januam Cœli, *i. e.* sustulit prohibens introitum nempe Peccatum. Tamen non videtur hinc sequi Patres ante Christum non introiisse regnum cœlorum, nam Christus est à principio Mundi quoad virtutem Passionis. Verùm aliunde probabilissimum est Patres conservatos fuisse in medio quodam statu, valde quidem felici non tamen absolute beato, Christumque fuisse primitias ut resurrectionis, sic etiam introitus in cœlum. Non est enim servus super Dominum; & oportet ut ministret Domino prius quàm ipse discumbat.

21. Christus per Passionem meruit sibi exaltationem. Meritum importat æqualitatem justitiæ., *Rom. 4. 4.* Itaque is qui injustâ voluntate plus debito sibi arrogat, is meretur etiam de suo deturbari, sicut cùm furatur quis unam ovem, reddet quatuor. Et qui ex charitate subtrahit sibi quod debuit habere, meretur ut sibi amplius superaddatur: Sic Christus humiliatus est 1. Quoad Passionem & Mortem, cui respondet gloriosa resurrectio. 2. Humiliatus est descendendo in sepulcrum, cui respondet ascensio in cœlum, *Eph. 4. 9, 10.* 3. Humiliatus est quantum ad opprobria quæ sustinuit, cui respondet Sessio ad dextram. 4. In hoc quod traditus est humanæ potestati, cui respondet potestas judiciaria in vivos & mortuos.

S E C T. XIII.

De Morte CHRISTI.

Passus est sub Pontio Pilato , crucifixus , mortuus , &c.

1. **D**ebuit Christus mori 1. Ut luat pœnam peccati , *Gen. 2. 17. 1 Pet. 3. 18.* 2. Ad ostendendum veritatem naturæ assumptæ , nam si Mortem fugiens evolâset , phantasmati comparatus fuisset. 3. Ut moriendo nos à timore mortis liberet , *Heb. 2. 14.* 4. Ut corporaliter moriendo pœnalitati quæ est similitudo Peccati , det nobis exemplum spiritualiter moriendi peccato , *Rom. 6. 10, 11.* 5. Ut à mortuis resurgendo virtutem suam ostendat quâ mortem superavit , & spem etiam nobis det à Mortuis resurgendi , *1 Cor. 15. 12.*

Obj. Christus est fons vitæ , quomodo ergo obnoxius mortî? Respondeo , Christus est fons vitæ ut Deus , moriebatur ut homo.

Obj. 2. Christus non erat obnoxius Morbo , ergo nec Morti. Respondeo , Ergo nec Morti è Morbo , quæ est Mors necessaria. Christus autem occisus est ab extra , voluntariè.

2. In morte Christi non fuit separata Divinitas aut ab animâ aut à carne. Nam Dona Dei sunt sine pœnitentiâ. Itaque nos non amittimus gratiam Adoptionis nisi nostrâ culpâ ; multò minùs Christus in quo nullum erat peccatum , amisit gratiam Unionis personalis. Corpus ergo & anima Christi sperata substituere eâdem subsistentiâ , quâ subsistebant unita.

Obj. Corpus uniebatur Divinitati mediante animâ , ergo separatum ab animâ non erat unitum Divinitati.

Re-

Respondeo, Anima non erat medium quid ligans Divinitatem & Corpus, sed erat ratio cur Corpus sit unibile Divinitati, nempe quod sit dispositum ad animam humanam; sicut etiam in morte ex divinâ constitutione remanet quidam ordo ad resurrectionem.

Obj. Quomodo Corpus non viveret unitum Deo? Respondeo, Deus vivificat effectivè, non autem formaliter; nec enim potest esse forma Corporis.

Obj. 3. Jo. 10. 18. *Pana animam meam.* Caro non potuit aut ponere aut sumere animam; ergo verbum eam posuit, ergo sepebantur. Respondeo, Caro posuit & sumpsit, non virtute suâ sed verbi.

3. In triduo mortis Christus non fuit homo; nam non fuit animal aut vivens; nisi velis dicere quod erat homo mortuus. Et hoc quidem plus significat de Christo quàm de alio homine mortuo. Nam Corpus Christi erat simpliciter idem vivum ac mortuum, quia idem supposito; non tamen erat idem totaliter quia non erat vivens. Non sic nostra corpora quæ amissis animabus alias formas induunt, & alia constituunt supposita; itaque non sunt mortua eadem quæ viva nisi secundum materiam.

Obj. Christus erat Sacerdos in æternum, ergo in triduo; ergo erat in triduo homo. Respondeo, Character Sacerdotii erat in animâ, itaque non amittebatur in triduo.

S E C T. XIV.

De Sepulturâ CHRISTI.

Et Sepultus

1. **C**Hristus fuit sepultus; 1. In evidentiam mortis, non enim sepeliunt nisi eos de quorum morte constat, *Mar. 15. 44.* 2. Surgens è Sepulchro facit spem Resurrectionis eorum qui sunt in sepulchris, *Jo. 5. 25.* 3. In exemplum eorum qui spiritualiter moriuntur peccatis, & per Baptismum consignant hoc, Christo consepulti per immersionem, *Rom. 6. 3.*

2. Virtus divina conservavit Corpus Christi sine ullâ corruptione, *Psal. 16. 10.*

3. A vespere sepulture ad diluculum Resurrectionis erant 36 horæ, .i. e. nox tota cum die totâ & nocte totâ. *Quomodo ergo jacuit triduum in sepulchro?* Respon-
deo, Scriptura ponit totum pro parte. Primus dies censetur ab extremâ sui parte, secundus erat integer cum 24. horis nocturnis & diurnis. Nox autem sequens pertinebat ad tertiam diem.

S E C T. XV.

De Descensu CHRISTI ad Inferos.

Descendit in Infernum, &c.

1. **S**Tatuitur in Scholâ animam Christi fuisse per realem Præsentiam in inferno superiori seu limbo Patrum ; non autem nisi per effectum in inferno damnatorum , eos scilicet confutando seu potius de iis triumphando ostensione Passionis. Christum aiunt descendisse ad limbum Patrum , ut Patres ibi detentos ob peccatum Originale secum ducat in beatitudinem.

2. Hunc limbum appellant , puto respectu Cœli infernum ; respectu verò inferni erat quasi cœlum , nam nulla ibi erat pœna sensus. Patres etiam ibi magno cum gaudio fruebantur spe gloriæ (Jo. 8. 56) & multabantur solum hujus spei dilatione.

Obj. Augustin. ad Evodium , *Illis justis qui in sinu erant Abrahæ ; cum Christus in inferiora descenderet , nondum quid contulisset inveni ; à quibus enim secundum beatificam præsentiam Divinitatis nunquam video recessisse.* Respondet Aquinas , Quod erant beati spe licet non re ; itaque Christus descendens nihil iis contulit quantum ad jus gloriæ , at in gloriæ adeptione multum.

3. Calvinus , ut est ubique severus , videtur Christi animam etiam tormentis inferni subicere. Quod omni rationi adversatur ; Christus enim non potuit pati nisi pro Peccatis nostris , pro quibus moriendo abunde satisfecit.

4. Alii

4. Alii per descensum Christi ad inferos nihil intelligunt, nisi quòd communem Mortuorum conditionem subivit. Antiqui videntur Articulum intellixisse de reali Descensu animæ, quod cum priori satis convenit, scilicet ut sensus sit, Christum ut Legem Mortis prorsus observet, etiam secundum animam descendisse eò ubi animæ è cœlo detentæ servabantur. Interea certus hujus Articuli sensus intercidiſſe videtur. Nec ipse quidem Articulus adhibebatur in antiquissimis professionibus Fidei, ut luculenter ostendit Personus in Symbolum.

5. Sed quomodo dicit Dominus Latroni, *Hodie mecum eris in Paradiso*? Respondet Aquinas, Paradisum spiritualement ibi intelligi, in quo dicuntur esse qui perfruantur divinâ gloriâ. Itaque Latronis anima erat loco cum animâ Christi in inferno ut cum Christo esset, at conditione erat in Paradiso, i. e. gloriâ Dei perfruebatur. Sed satis de his divinationibus, pergamus ad id de quo undiquaque constat.

S E C T. X V I.

DE Resurrectione. CHRISTI.

Christus tertio die resurrexit secundum Scripturas.

1. **N**Ecesse fuit Christum resurgere; 1. Ex justitiâ Dei, quia se humiliavit usque ad Mortem Crucis. 2. Ad confirmationem Fidei nostræ, nisi enim sic resurrexisset, putatus fuisset Impostor. 3. Ut ex capitis nostri resurrectione nostrammet resurrectionem speremus. 4. Ad informationem vitæ Fidelium, *Rom.* 6. 4. Sicut Christus suscitatus est à Mortuis per gloriam Patris, sic nos etiam debemus ambulare in no-

vitare vitæ. 5. Ut compleat salutem nostram. Mori-
endo mala dispulit, resurgendo ad bona promo-
vet.

2. Christus non resurrexit statim, ne videretur non
verè mortuus; & quia post triduum nemo dubitat de
Morte, ideo non distulit longius resurrectionem.

3. Christus primus resurrexit à Mortuis absolutè, 1.
c. sicut nunquam denuo moriturus, 1. Cor. 15. 26. La-
zarus & alii resurrexerant ante Christum à Morte actu-
ali, sed non à potentiâ Mortis cui iterum succumben-
dum fuit.

4. Anima Christi resumpsit corpus & corpus ani-
mam, non vi naturæ creatæ sed Divinitatis unitæ. Ita-
que etiam Christus resurrexit & suâ vi & Patris, quia
eadem numero est trium Personarum potentia.

5. Corpus Christi post Resurrectionem fuit verum
& non phantasticum; alioqui enim Resurrectio non
fuisset vera.

Obj. Quomodo ergo potuit introire ad Discipulos
per ostia clausa? Respondet S. Augustinus, *Si compre-*
hendis modum, non est Miraculum. Ille quippe non iis
apertis intrare potuit, quo nascente Virginitas Matris
inviolata permanfit.

Obj. 2. Si verum fuit corpus, quomodo evanuit ab
aspectu Discipulorum? Respondeo, Visus est quando
voluit & non sæpius.

Obj. 3. Quomodo apparuit in alienâ effigie? Respon-
deo, Vultus substantiam non perdidit; nihil enim erat
à Spiritu sancto formatum in corpore Christi quod in
Resurrectione fuit emendandum. Sed acquisivit cor-
poris claritatem unde quamcumque voluit speciem im-
pressit in oculos intuentium. Modica tamen differentia
iussit ad hoc quòd aliquis videatur in alienâ effigie ap-
parere.

6. Corpus Christi post Resurrectionem erat integrum, *i. e.* constabat ex omnibus partibus quæ ad naturam Corporis ejus pertinebant. *Quid dicemus de sanguine emisso?* Totum resumpsit. Num & alios humores phlegma scilicet choleram, &c. Resumpsit omnia quæ pertinebant ad naturam, quod autem tendebat ad corruptionem Deus abstulit.

Obj. Caro & sanguis non possidebunt Regnum Dei, 1 Cor. 15. 50. Respondeo, Non quidem possidebunt quomodo sunt in nobis, *i. e.* in viâ ad corruptionem.

7. Omnino credendum puto, Corpus Christi resurrexisset gloriosum. Nam 1. Resurrectio Christi est exemplar nostræ Resurrectionis, Sancti autem resurgent gloriosi, 1 Cor. 15. 42. 2. Per humilitatem Passionis meruit gloriam Resurrectionis. 3. Si anima Christi fuerat gloriosa à conceptione (ut plerisque certum est in Scholâ) tum dispensativè tantum factum fuit, quòd gloria non statim redundaverit ab animâ in corpus, scilicet ad hoc ut pro nobis pati posset; peractâ autem Passione anima videtur in resumptum corpus statim derivasse gloriam suam. Corpus Christi post Resurrectionem fuit ejusdem naturæ sed alterius gloriæ.

8. Christus apparuit suis Discipulis sine claritate ad eorum fidem confirmandam. Eodem fine edit & bibit; non ex indigentia cibi, sed ex potestate gloriosâ quâ potuit facere ea quæ ad Naturam pertinent, licet ad nullum opus Naturæ exequendum.

9. Corpus Christi est resumptum ab animâ cum cicatricibus; 1. Propter gloriam Christi perpetuum victoriæ suæ triumphum circumferentis. 2. Ad confirmandum Discipulis Resurrectionem. 3. Per harum ostensionem Patri pro nobis supplicat. 4. Ut indicii

mortis suæ ostensis suos moneat quantâ cum misericordiâ fuerint adjuvi. 5. Ut in iudicio denunciet impiis quàm iustè damnentur. *August. l. 2. de Symb. c. 8.* Ut convincens eos veritas dicit. Ecce hominem quem crucifixistis, videtis vulnera quæ infixistis, agnoscitis latus quod pupugistis, quoniam per vos & propter vos apertum est, & tamen intrare nolulistis.

10. Resurrectio Christi non manifestabatur immediate omnibus, (nam hoc fuisset salutem iis per vim asferre) sed tantum testibus à Deo præfinitis, *i. e.* quibus Deus voluit uti ut testibus sufficientibus ad omnes in fidem attrahendos, qui quidem non contra rationem aures eorum testimonio obturaverint.

11. Christus apparuit Discipulis post Resurrectionem, quantum satis fuit ad eos certos faciendos de ejus Resurrectione; non autem cum iis continuè & familiariter conversatus est ut antè, quia vitam gloriosam assumpsit, nec communibus Mortalitatis congressibus contaminandam. Non est autem dubium, quia multo sæpius apparuerit, quàm in Scripturâ sacrâ explicatè notatum est, Jo. 20. 30.

12. Dominus apparuit duobus Discipulis in aliâ effigie, quia eorum Fides de eo cœpit tepescere, *Luc. 24.*

21. *Greg. Homil. 23. Talem se iis exhibuit in corpore qualis apud illos erat in mente. Quia enim adhuc in eorum cordibus peregrinus erat à Fide, ire se longius finxit, scilicet ac si esset peregrinus.* Cæteris autem Discipulis apparuit clarè & cum potestate.

13. Christus resurgendo applicuit nobis Merita Passionis; itaque ejus Resurrectio est causa salutis nostræ non meritoria sed efficiens. Eam autem efficit 1. In quantum omnimodâ suâ potestate jus nostrum ad Merita sua Christus asserit & tuetur. 2. In quantum Spiritum suum mittit in corda nostra, gratiamque nos

Deo

Deo gratos facientem infundit, *Rom. 4. 25.*

S E C T. XVII.

De Ascensione CHRISTI.

Ascendit in Cælum.

1. **L**ocus debet esse proportionatus locato; ergo Christo Victori Curia triumphalis cœli debita fuit.

Obj. Videtur hoc damno nostro factum. Respon-
deo, Licet humanitatem suam nobis subtraxerit Chri-
stus, tamen præsto est ejus Divinitas. Imò Ascensio
ejus nobis utilior est quàm fuisset Præsentia corporalis.
Nam 1. Dat locum Fidei quæ est de non visis ejusque
valorem auget; *Jo. 20. 29.* 2. Christus naturam huma-
nam in Cælo collocans, dat nobis spem eò pervenien-
di; *Jo. 14. 3.* 3. Erigit amorem nostrum in cœlestia,
Col. 3. 1. Mat. 6. 21.

Obj. 2. Ascendere est ad aliquid acquirendum, at
Christo nihil accrevit nec secundum animam nec secun-
dum corpus, utpote jam glorificato. Respondeo, Ni-
hil accrevit eorum quæ sunt de Essentiâ gloriæ; at ac-
crevit decentia loci quæ est quasi de bene esse gloriæ.
Et de hac acquisitione gaudium habuit Christus, non
quasi nunc incipiens gaudere, sed quia novo modo de
hoc gavissus est, scilicet ut de re impletâ. Hinc tamen
videtur sequi glorificationem Christi non fuisse prorsus
comp'etam ante Ascensionem.

2. Licet locus cœlestis statim debebatur Christo post
Resurrectionem, tamen distulit Ascensionem donec fi-
dem fecisset de Resurrectione, *Act. 1. 3.*

3. Chri-

3. Christus ascendit solum quia homo, idque virtute & sua & Patris. Aug. 22. De civit. Dei. *Erit tanta obedientia corporis gloriosi ad animam beatam, ut ubi volet Spiritus ibi protinus erit corpus.* Sicut autem corpus efficitur gloriosum participatione animae, ita participatione Dei fit anima beata. Christus ergo ascendit in caelum. 1. Virtute divinam animam beatificante. 2. Virtute animae beatæ moventis corpus prout vult. Eadem autem est virtus Patris & Filii, itaque ascendit virtute & sua & Patris.

4. Christus ascendit supra omnes caelos, Eph. 4. 10. Nam corpus ejus est maxime gloriosum, ergo oportet quod sit supra omnia corpora constitutum in alto.

Obj. Quomodo tum est visum à Paulo? 1 Cor. 15. 8. Ubi hæc visio adducitur ad confirmationem Resurrectionis, quod non præstaret, nisi verum Christi corpus ab Apostolo visum fuisset. Respondet Aquinas, Quod Christus semel ascendens in caelum, adeptus est perpetuum jus & dignitatem Mansionis celestis; quodque huic dignitati non derogat, si ex aliqua dispensatione Christus quandoque corporaliter in terram descendat, ut fecit in gratiam Pauli, & faciet in Judicio Supremo.

5. Corpus Christi est supra omnem creaturam spirituales, non ex naturam corporis, sed ex gloriam Unionis hypostaticæ, Eph. 1. 21.

6. Ascensio Christi est causa nostræ salutis, non meritoria sed efficiens; idque respectu & nostri & Christi. Respectu nostri ascensus Christi efficit salutem nostram; 1. Quia dat locum fidei spei & charitati, ut dictum est n. 1. 2. Quia Ascensio Christi augeat reverentiam ad ipsum, dum non consideramus eum ut hominem terrenum, sed ut Deum celestem, 2 Cor. 5. 16. Iterum Ascensio Christi est causa salutis nostræ ex parte

te Christi; 1. Quia Christus ascendens præparat nobis viam in cælum & mansionem ibidem, *Jo. 14. 2.* Est enim caput nostrum, & par est ut membra caput sequantur, *Jo. 14. 3.* 2. Sicut in Lege Pontifex intrabat Sanctuarium, ut assisteret Deo pro populo; ita etiam Christus intravit cælum ad interpellandum pro nobis, *Heb. 7. 25.* Ipsa enim representatio naturæ humanæ quam in cælum intulit est quædam interpellatio pro nobis, ut ex quo Deus sic exaltavit humanam naturam in Christo, etiam eorum misereatur pro quibus illa humana natura suscepta est. 3. Ut Christus in cælorum Sede ut Deus & Dominus constitutus exinde divina dona ad homines mittat, *Eph. 4. 10.* *Ut adimpleat omnia; Glossa dicit, scilicet donis.*

S. E C T. XVIII.

De Sessione CHRISTI ad Dextram.

Sedet ad dextram Dei: Symb. Ap.

1. **L**ocus dexter apud homines est potissimus, itaque dextra Dei significat gloriam seu beatitudinem. Præpositio *Ad* importat accessum, in quo designatur convenientia cum quâdam distinctione: Sedere importat quietem seu securam possessionem, regiam etiam seu judicariam potestatem, *Prov. 20. 8.*

2. Christus secundum Divinitatem sedet ad dextram Dei Patris, quia Filius eadẽ fruitor gloriæ & dominio cum Patre. Itaque *Ad* ibi designat distinctionem solum personalem. De Christo ^{Divinitate} pariter loquendum est, ob Unitatem Personæ: Sed Christus homo quoad conditionem naturæ humanæ sedet ad dextram Dei

Dei in quantum fruitur donis Paternis potioribus, scilicet præ omnibus aliis creaturis; idque immutabiliter & regaliter quod est proprium Christo, *Heb. 1. 13.*

Obj. Stephanus vidit Christum stantem ad dextram Dei, ergo non sedet. Respondeo, Utraque locutio est Metaphorica & utraque vera. Stare est pugnare vel defendere; sedere est firmiter possidere. Christus ergo quantum ad suam conditionem sedet; quantum ad conditionem suorum in hoc Mundo, stat.

3. Nos etiam erimus ad dextram Dei, *Mat. 25. 33.* Non æquales Christo in beatitudine, sed beatitudinis ejus participes.

S E C T. XIX.

De Adventu Spiritus Sancti.

Christiani credunt Spiritum sanctum (ut Christus pollicebatur) descendisse die Pentecostes post Ascensionem proximam; specie linguarum, ignitarum fissarum, & insedisse Apostolis, &c.

1. **Q**uid significet missio & motus divinæ Personæ, vide § 2. n. 8. hujus Partis. Spiritus sanctus ergo venit, i. e. emisit dona sua.

2. Apostoli Missionem suam seu auctoritatem discipulandi omnes Gentes acceperunt à Christo. A Spiritu sancto accipiunt dona eos ad muneribus à Christo concreditis defungendum habiles reddentia. Ut scias omnes qui discipulandi munus sibi arrogant sub solo prætextu instinctuum Spiritus sancti, incedere semitâ sibi propriâ, & Apostolis quibus Christus promisit adesse usque ad finem Mundi nullatenus succedere.

3. Dona

3. Dona Spiritus sancti sunt ordinaria vel extraordinaria. Dona ordinaria dicuntur ea, quæ sunt necessaria Ecclesiæ continendæ & propagandæ in omni statu usque ad secundum Adventum Christi. Per hæc Spiritus sanctus adest Ministris Ecclesiæ (etiam ubi non sint viri boni) in Prædicatione Evangelii, Administratione Sacramentorum, Exercitio Clavium, Precibus communibus & omnino omnibus Officiis ad animas in salutem ducendas necessariis. Per hæc Spiritus Sanctus adest Pius eorum corda dirigendo, consolando, &c. Et quantum ad hæc Dona Spiritus sanctus permanfit usque in Ecclesiâ & ad finem permanebit.

4. Dona quæ appellantur Extraordinaria deserviebant Ecclesiæ condendæ, Ecclesiæ verò conditæ non sunt necessaria; qualia erant, loqui linguis antea ignotis, curare Morbos, & prorsus Miracula facere. Nonnulla etiam Officia, ut Apostolorum, Evangelistarum, &c. Hujusmodi erant. *Cur non sunt jam Apostoli in Ecclesiâ?* Quia Apostoli immediate à Christo mittebantur, ut Ecclesiam ædificent; non ut alios Apostolos constituerent, non enim tantâ muniebantur auctoritate; sed ut Ordines instituant qui propriis Præcinctibus insistentes Ecclesiam ab Apostolis conditam tueantur & augeant.

5. Quantum ad Miracula, Spiritus sanctus adest Ecclesiæ, non similia Apostolicis Miraculis edendo, sed eadem infallibili traditione confirmando. Quantum etiam ad Officia extraordinaria, Spiritus sanctus adest Ecclesiæ, non eadem continuando, sed Ecclesiam per ea conditam, Ordinesque per ea constitutos conservando.

S E C T. XX.

De Potestate Judiciariâ CHRISTI.

Hic est qui constitutus est à Deo Judex Vivorum & Mortuorum, Act. 10. 42.

1. **P**rimæva authoritas judicandi est in Deo, & est communis toti Trinitati, attribuitur tamen per appropriationem Filio, quia per sapientiam formatur judicium, & Filius est sapientia Patris. Itaque dicitur, Pater non judicat quenquam, sed omne judicium dedit Filio. Nam ut Pater facit omnia per Filium ut est ars ejus æterna, sic judicat omnia per Filium ut est sapientia seu veritas ejus.

2. Authoritas judicandi communicatur etiam hominibus in ea quæ ipsis subjiciuntur, *Deut. 1. 17.* Judicium est Dei, *i. e.* à Deo vobis committitur quod judicetis.

3. Christo autem homini debetur Potestas judiciaria & propter Divinam Personam, & propter dignitatem capitis Ecclesiæ, & propter plenitudinem gratiæ habitualis, tum etiam propter meritum Passionis. *Apoc. 3. 21.* Hocque conveniebat ex Parte nostri; 1. Ut sit suavius judicium hominibus per hominem, *Heb. 4. 15.* 2. Oportebat judicandos (qui sunt boni & mali) videre suum judicem. Restabat ergo in judicio ut forma servi & bonis & malis ostenderetur, forma Dei solis bonis servaretur.

4. Christus judicat principaliter de beatitudine æternâ & æternâ miseriâ hominum; at secundariò est Judex omnium rerum humanarum, quatenus scilicet cæræ res humanæ referuntur ad beatitudinem. Cui autem

tem committitur Principale, ei committitur accessorium.

Obj. Quis me fecit Judicem? *Luc.* 12. 14. Respon-
deo, Erat Christus Rex & Judex omnium, sed Tem-
poralia noluit tractare nisi in ordine ad æterna.

5. Christus homo habet Potestatem Judiciariam su-
per Angelos; 1. Quia humanitas ejus est propior Deo
quàm sunt Angeli, atque adeo virtute ejus plenior,
Heb. 2. 12. 2. Per humilitatem Passionis humana na-
tura meruit exaltationem super Angelos, *Phil.* 2. 10.
3. Angeli operantur circa homines, & horum caput
est Christus speciali modo, *Heb.* 1. 14.

6. Subsunt autem Angeli judicio Christi; 1. Quan-
tum ad ea quæ operantur, hæc enim faciunt secundum
dispensationem Christi, *Mat.* 4. 11. *Mat.* 8. 31. 2. Quan-
tum ad præmia accidentalia bonorum Angelorum, &
Pœnas accidentales Angelorum malorum, *Luc.* 15. 10.
Mar. 1. 23. 3. Quantum ad præmium essentiale seu
beatitudinem æternam bonorum Angelorum, & Pœ-
nam essentialem seu æternam damnationem malorum;
sed hoc Judicium tulit ut Verbum Patris.

S.E.C.T. XXI.

De Resurrectione Generali.

*Christiani credunt quod hic Mundus, i. e. cursus Naturæ finem habiturus est; & quod tunc omnia corpora hominum mortuorum resuscitabuntur, & suis animabus re-
unientur.*

1. **E**tiam secundum rationem resurrectio corporis expectanda videtur. Nam homo nec in hac vitâ, nec in statu animæ separato ad perfectam beatitudinem pervenire potest, ergo nec sine resurrectione. Male autem factus fuisset homo, si nullo modo posset ad finem illum pervenire, ad quem per naturam anhelat.

2. Idem numero corpus resurget; nam resurrectio est ejus quod cecidit secunda surrectio. Nonnulli tamen dicunt idem fore corpus solum quia eidem animæ uniatur. Unde verò censenda sit identitas corporis quare in Philosophiâ.

Obj. 1 Cor. 15. 37. Non corpus quod futurum est seminas, &c. Respondeo, Similitudo non currit per omnia sed secundum aliquid. Triticum nascitur ex corpore mortuo sicut nos resurgemus; at triticum nascitur ex corpore ejusdem speciei, non ejusdem numeri sicut nos resurgemus.

3. Quicquid est de veritate corporis humani resurget; nam corpus ideo resurget, quia erat perfectum animâ rationali; ergo omnia resurgent quæ erant sic perfectæ.

Obj.

Obj. Nulli usui erunt multæ Partes, ut intestina & genitalia. Respondeo, Eorum usus erit constituere hominem integrum. Intestina etiam resurgent plena non scedis superfluitatibus, sed nobilibus humoribus. Ponitur etiam quod capilli & ungues resurgent, scilicet ad ornamentum, *Luc. 21. 18.* Sed quis nunc intelligit exornare corpus gloriosum?

Obj. 2. Costa Adæ ubi resurget? Erat enim in duobus. Respondeo, Ista costa non fuit in Adamo de perfectione individui, sed ordinata ad propagationem speciei. Itaque non resurget in Adamo sed in Evâ, sicut etiam semen non resurget in Patre, sed in Prole.

4. Videtur etiam quod omnes resurgent in eadem ætate scilicet juvenili. Nam Pueritia & Senectus defectibus laborant. At sicut Deus hominem sine defectu condidit, ita sine defectu reparabit.

5. Num omnes resurgent in eodem sexu scilicet virili? Respondeo, In primâ conditione hominum Deus fecit mulierem, ergo in Resurrectione Fœmineum sexum reparabit.

Obj. *Eph. 4. 13. Perveniemus omnes in perfectum virum, &c.* Respondeo, Hoc non dicitur propter sexum corporis, sed propter virtutem animi quæ erit communes Maribus & Fœminis.

6. Corpus hominis iusti resurget gloriosum, *1 Cor. 15. 43.* Ejus autem gloria est è redundantia ab animâ rationali gloriosâ, cui perfectè subjectum est; sicut ipsa anima est glorificata per hoc quod sit perfectè subjecta Deo. Itaque etiam corpus gloriosum dicitur spirituale, non quod mutetur in spiritum, sed quod sit spiritui perfectè subjectum. *Sed num præmia & pœnæ antecedunt Judicium?* Vide *Secl. de Judicio extrema.*

7. Hinc

7. Hinc sequitur corpus hominis iusti post resurrectionem fore incorruptibile. Nam corruptio est ejectio formæ, ergo fit per debilitationem Domini quod forma inexistens habet super materiam; ergo illa forma cui corpus est perfectè subjectum non potest ejici.

Obj. Corpus Adæ in innocentia fuit perfectè subjectum animæ, tamen devenit mortale. Respondeo, Corpus Adæ erat perfectè subjectum animæ, in quantum anima ejus erat perfectè subjecta Deo, & non ulterius. Itaque nec erat mortalis Adam antequam Peccator.

8. Hinc etiam sequitur corpora Sanctorum fore impassibilia, scilicet Passione contra naturam; nam Passio magis facta abjicit à substantiâ, ergo quod est passibile est corruptibile.

Obj. Materia corporis gloriosi erit eadem quæ nunc, ergo inerit eadem Potentia passiva. Qualitates etiam propriæ elementis ex quibus componitur homo, erunt eadem in gloriâ quæ nunc, ergo habebunt eandem Potentiam activam cum nostris quæ inducunt Passionem. Respondeo, Habebunt eandem Potentiam activam & passivam corpora gloriosa quam nunc habent, sed ligatam per perfectum dominium animæ in corpus. Aderunt etiam omnes sensus, sed non exercebuntur nisi in quantum sunt perfectivi.

9. Corpus glorificatum perfectè subijcitur animæ beatæ, non solum quia nihil in eo fit quod repugnet voluntati spiritus (nam sic se habuit in Adâ); sed est in eo aliqua perfectio effluens ab animâ perquam habile redditur ad exercitium prædictæ subjectionis; quæ quidem perfectio dicitur *dos* corporis glorificati. Hæ dotes ultra impassibilitatem numerantur tres, *Subtilitas, Agilitas & Claritas.*

10. Per subtilitatem non intelligunt in Scholâ raritatem quasi aeris, sed perfectionem quandam quæ liberat ab imperfectione crassitie quæ concipitur quasi onerosa. Nec tamen hinc habet corpus gloriosum ut non possit palpari, *Je. 20. 27.* Nec habet hinc quod penetret aliud corpus, nam sic veritas corporis tolleretur. An tamen hoc possit habere per Miraculum vide.

11. Per agilitatem corporis gloriosi intelligunt quod sit mobile & vivum, *1 Cor. 15. 43.* ut ubicunque velit anima ibi statim sit corpus. Nam anima unitur corpori non solum ut forma, sed etiam ut motor; & secundum utrumque corpus glorificatum debet ei esse perfecte subiectum. Per dotem subtilitatis corpus gloriosum subicitur animæ ut est forma; per dotem autem agilitatis perfecte subicitur ei ut est motor.

12. Non tamen hinc habet corpus gloriosum ut moveatur in instanti. Nam transeundum est medium, quod si fiat in instanti corpus erit in duobus locis simul.

Obj. Anima vult in instanti, sed ubi anima vult, ibi statim est corpus. Respondeo, Statim, *i. e.* valde exiguo tempore. Nec potest anima beata esse inordinata, aut velle ut corpus suum citius mutet locum quam natura corporis fert.

13. Corpus gloriosum habet claritatem; itaque comparatur stellæ, *Mat. 13. 43. 1 Cor. 15. 43.*

Obj. Corpus luminosum constat ex partibus perviis. Respondeo, Si est luminosum ratione Partium. At corpora gloriosa erunt luminosa non ex naturâ suarum Partium, sed ex Præmio virtutis.

14. Etiam corpora Damnatorum resurgent integra; idque suo malo: nam quod corpus est integrius eò universalior est dolor. Resurgent etiam incorruptibilia; non ex gratiâ sed ex iustitiâ, ut sint perpetua miseria
ma

materia. Sed quomodo corpus patiens non erit mortale? Respondent in Scholâ, quod motu cœli (qui est prima causa generationis & corruptionis, & sine quâ secundæ non agunt) cessante post Resurrectionem (quod fiet) nihil erit quod poterit alterare corpus à naturâ suâ. Sed potest dici, quod per Omnipotentiam Dei continebuntur à corruptione, ne à justitiâ ejus puniente elabantur.

SECT. XXII.

De Extremo Judicio.

Credunt Christiani Christum in fine Mundi esse venturum de cœlo & judicaturum omnes homines vivos & mortuos.

1. **J**UDICIUM de re mutabili ante ejus Consummationem perfectè dari non potest; itaque nec de homine quoad vixerit, potest enim fieri de malo bonus vel de bono malus, *Heb. 9. 27.*

2. Si autem de animâ judicatur statim post mortem, (ut ferè universim creditur) generale postea Judicium de quo erit? Num de solis corporibus? At Apostoli & ceteri deinceps Doctores inculcant Præmia & Pœnas supremi Judicii tanquam Christianæ spei & timoris summam. Et Paulus clamat irritari totam fidem sublatâ Resurrectione. Sublatâ autem Resurrectione animæ erunt felices, quod fere infinities plus est quàm quod adjicietur per Resurrectionem ex Unione Corporum. Respondent 2. Animas ipsas beatiores fore post Reunionem, Aug. 12. super Genes. c. 35. *Ex appetitu corporis retardatur anima, ne totâ intensiōne pergat in illud*

illud summum bonum. Verum adhuc non affert Judicium supremum, nisi exiguum additamentum ei felicitati quam anima habuit antè. In Judicio autem supremo ponitur tota nostra fortuna. Respondet 3. Albius in libello de medio animarum statu, animas Salvandorum duum esse generum; quasdam paucas esse perfectas, *i. e.* flagrantes amore Dei & Proximi, has ex corporibus exeuntes immediatè in cœlum emicare; & faciem Dei intueri. At Plebs Christianorum præfert quidem bonum incommutabile Mundo; sed non toto affectu. Non vult peccare, *Nolo*, dicit, *sed b si liceret!* Horum animas distinet ille de cœlo usque ad Diem Judicii; & illum statum Purgatorium appellat. Nam anima, inquit, quas affectiones exportat secum ex corpore easdem retinet usque ad Reunionem, quod ille satis cum subtilitate explicare nititur. Jam, inquit, in sacrâ Scripturâ proponitur consideratio supremi Judicii tanquam omnibus, quia perfecti & statim salvandi sunt valde pauci.

3. Ego aliter posse dici autumo; nempe animas salvandas, statim salvari postquam exierint ex corporibus; nostram tamen omnium æternitatem pendere ex Judicio supremo, quia particularia Judicia quæ antè subimus, sunt quasi Portiunculæ supremi Judicii, & procedunt ex virtute sententiæ tum proferendæ. Sententiam quippe quam Judex tum promulgabit de omnibus hominibus & quoad omnia, jam privatim exequitur de aliquibus quoad aliqua, *i. e.* de defunctis quoad statum animæ seperatum. Nota sunt Deo omnia ejus opera à principio Mundi, ergo jam tractat animas sicut tractandæ sunt è sententiâ Dei novissimæ; ubi earum felicitas & miseria & confirmabitur & augebitur. Precatur S. Paulus, *Ut bene sit Onesiphoro in Die illâ.* Quia scilicet jam statim quoad animam tractandus est

è sententiâ quæ dabitur de toto homine in *Die illâ*.

4. Et hæc explicatio ideo magis arridet, quòd per eam reddatur liquidum Apostoli dictum alioqui difficile, nempe quòd corpora Sanctorum resurgent gloriosa. Quid? Gloria est Præmium; quomodo ergo coætanea Resurrectioni? Num Præmium antecedit Judicium? Non, inquam; sed Judicium de Mortuo quoad animam separatam antecedit Resurrectionem, & in Resurrectione statimque post eam de toto homine perficitur. Resurgit corpus in gloriâ essentiali; quantum autem ad Pompam seu Triumphum gloriæ, huc quoque pergit per Judicium momentaneum.

5. Omnes homines apparebunt in Judicio; nam Christus passus est pro omnibus, ergo omnes eum videre debent & Retributionem ab eo accipere, *Apoc. 1. 7.*

6. Resuscitatis quædam Divina vis aderit, quâ fiet ut cuncta hujus vitæ opera in memoriam revocentur. Nam ut est Judicium humanum ad testimonium exterius, ita est Judicium Divinum ad testimonium conscientie, 1 *Sam. 16. 7.* Ergo ut homo non potest judicare de facto nisi per testimonia externa, ita nec judicabit Deus nisi secundum testimonium Conscientiæ, *Rom. 2. 15.*

Obj. Memoria Peccatorum minuet gaudium Sanctorum, & memoria nonnullorum bonorum operum minuet dolorem impiorum. Respondeo, Sancti gaudebunt magis de Peccatis remissis, & dolebunt magis impii de tot bonis perditis.

7. Resurgentium unusquisque cognoscet non solum sua opera, sed etiam aliorum omnium, ut Justitia divina omnibus sit conspicua. Cùmque Peccata Magdalene, Petri, Davidis, &c. innotescant, pari ratione & aliorum Sanctorum Peccata sciri debent, & multò magis scelera impiorum.

8. Pro-

8. Processus Judicii supremi videtur fore non vocalis sed mentalis. Nam quàm immensum tempus requiretur ad legendum librum in quo omnium hominum vitæ conscribantur? Christus tamen apparebit corporaliter, ut ostendat gloriam suam, & ut etiam Mali cum videant.

9. Tempus Judicii supremi soli Deo notum est. Quippe Mundus ut factus est, ita finietur à solo Deo, *Mar. 13. 32. 1 Thess. 5. 2. Act. 1. 7.* quæ Pater posuit in suâ potestate, *i. e.* ut finis Mundi est in solâ potestate Patris, sic tempus ejus solius Patris cognitioni reservatur.

Obj. 1 Jo. 2. 18. Est hora novissima. Ergo scimus quod finis Mundi jam instat. Respondeo, Novissima hora sive novissimum tempus est novissima ætas, *i. e.* nulla alia erit dispensatio post Christianismum, sed immediatè sequetur finis omnium rerum hujus Mundi. Hoc tamen non definit an duratio hujus horæ longa futura sit vel brevis; sicut senectus est ultima pars vitæ, tamen interdum est diuturnior cæteris omnibus partibus.

10. Judicium autoritatis soli Christo convenit. Apostoli tamen judicabunt cum Christo, *i. e.* ejus sententiæ consentient, & in honorem collocabuntur locis sublimibus ut Assessores Judici, *Mat. 19. 28.* Angeli etiam judicabunt per consensum; non tamen erunt Assessores sed Ministri, *Mat. 13. 39.* Assessores enim debent esse conformes Judici; Assessores ergo Christi debent esse homines; nam Judicium Filio committitur quatenus est Filius hominis.

11. Judicium supremum erit directè solum hominum. Nam quoad essentiam gloriæ & miseriæ Angeli sunt jam in statu immutabili. Indirectè verò etiam Angeli judicabuntur, non quoad discussionem, sed

quoad retributionem in accidentalibus ; in quantum boni Angeli gaudebunt de felicitate hominum , & mali Angeli inde angentur. In Iudicio etiam supremo videtur quòd cunctis videntibus præcipitabuntur Dæmones in Barathrum tanquam in perpetuum carcerem, ex quo egredi iis concedebatur eosque per Providentiam divinam, ad hominum vitam exercendam, *Mat. 8. 29.*

S E C T. XXIII.

De Vitâ Æternâ.

*Christiani credunt, omnibus Sanctis in Supremo Iudicio
adjudicari vitam æternam cum Christo.*

1. **Q**uod Sancti in Patriâ videbunt Deum per essentiam, palam profitetur Scriptura sacra, *1 Jo. 3. 3. 1 Cor. 13. 14. Jo. 14. 21.* Ratio etiam astipulari videtur. Nam omnes Sancti Deum appetunt videre, quod desiderium frustrari nequit, *Exod. 33. 18. Jo. 14. 18.*

Obj. Jo. 1. Nemo unquam vidit Deum ; itaque nec Angeli viderunt, ideòque nec nos videbimus, quibus non promittitur nisi æqualitas Angelorum. Respondet, Nec Angeli nec Sancti videbunt Deum visione comprehensionis.

2. Non ambigitur etiam, quin beatitudo cœlestis consistat in visione Dei per essentiam, quæ ideo etiam dicitur visio beatifica. Nam visio Dei est summa perfectio intellectus, *i. e.* supremæ facultatis humanæ, necessariò secum trahens gaudium voluntatis quæ non potest non acquiescere in summo bono. Hæc ergo visio

visio summè perficit animam rationalem, ex cujus beatitudinis redundantia corpus etiam glorificatur, & sic totus homo est beatus. Disputatur tamen an beatitudo formaliter consistat in visione an in gaudio. Sed cui bono sic disputatur, cum videns Deum eo non possit non gaudere? Formalius tamen videtur dici beatitudinem coelestem consistere in visione quàm in gaudio quod fundatur in visione. Nam inter Philosophos dissentientes de felicitate hominis, non trahebatur in litem quin is felix sit qui suâ sorte constanter contentus esset; sed disputabant de fundamento hujus acquiescentiæ. In visione ergo beatificâ Deus est summum bonum quo gaudemus, sed quo nisi viso gaudere non possemus; ut visio sit immediatior summo bono quàm gaudium. Quomodo autem Deus videatur ab animâ creatâ per essentiam est disputatio anxia, & quæ fortasse durante hujus vitæ caligiæ non dissolvetur.

3. Deus oculis corporeis videri non potest; nam sic videri est circumscribi. Nec enim potest intrare in Organum quantum nisi quod ipsum est quantum.

Obj. Job. 42. 5. Nunc oculus meus videt te. Respondeo, Oculus spiritualis, *Eph. 1. 18.*

Obj. 2. Job. 19. 26. In carne meâ videbo eum. Respondeo, *i. e.* existens in carne, non autem oculo carnali.

4. Num Sancti vident omnia in Deo? Responder Aquinas: Non vident ea quæ possunt esse sed nunquam erunt; alioqui enim comprehenderent Potentiam Dei. Imo intellectus eorum esset in intelligendo par Potentiæ divinæ in agendo. Sed nec videtur necessarium ut in Deo videant omnia quæ sunt erunt aut fuerunt; nam sic comprehenderent voluntatem Dei, quod videtur sortem fervorum excedere.

Obj.

Obj. Nescire est imperfectionis, itaque non est in animâ beatâ. Respondeo, Scire Deum est finis sciendi alia, itaque qui scit Deum est perfectus, licet alia nesciat. Aug. l. 5. Conf. c. 4. *Infelix homo qui scit illa omnia creata, te autem nescit; beatus autem qui te scit etiamsi illa omnia nesciat; qui verò te & illa novit, non propter illa beatior, sed propter te solum beatus est.*

Obj. 2. Verbum Dei est ratio & similitudo omnium, ergo omnia in eo relucet sicut in speculo. Respondeo, Speculum illud est voluntarium, & sicut ostendit se cui vult, ita ostendit in se quæ vult.

Obj. 3. Per naturam desideramus scire omnia, ergo & in gloriâ quæ non tollit naturam, id desiderabimus. Respondeo, Desiderium Sanctorum quo omnia scire desiderant, implebitur ex hoc solo quod Deum vident; sicut desiderium eorum quo omnia bona habere cupiunt, complebitur ex hoc quod Deum habent.

5. Sanctorum beatitudo augebitur post Judicium maximè ex unione cum corpore. Augebitur 1: Extensivè, tunc enim erit non solum in animâ sed etiam in corpore. 2. Ipsius animæ beatitudo augebitur extensivè, quia gaudebit non solum de bono proprio, sed etiam de bono corporis. 3. Beatitudo animæ augebitur intensivè, in quantum redditur perfectio unionis cum corpore, ad quam anima per naturam fertur, Aug. 12. super Gen. c. 35. *Ex appetitu corporis retardatur, ne totâ intensione pergat in illud summum bonum.*

Obj. Corpus gravat animam in operando. Respondeo, Corpus corruptibile, sed non glorificatum, quod omnino subditur spiritui.

6. Beatitudo est quies ad quam Sancti omnes per Motus suos tendunt; itaque dicitur Domus Dei. Diversi gradus beatitudinis dicuntur Mansiones in illâ domo. Omnes pleni erunt gloriâ, sed major erit aliquorum capacitas, aliorum minôr, sicut stella differt à stella in gloriâ.

7. Videtur quòd beati videant Damnatorum Pœnas ut sua beatitudo gratior reddatur, & de eâ uberiores gratias Deo agant. Non tamen damnatis compatiuntur, nam hoc esset in contumeliam Justitiæ Divinæ.

Obj. Deus est Misericors ergo & Sancti. Respon-
deo, Deus est Misericors quatenus subvenit illis, quos secundum ordinem justitiæ & sapientiæ suæ convenit liberari à Miseriâ; Damnatorum autem non miseretur, quia eos è sapientiâ & justitiâ suâ damnavit. Itaque licet Sancti non gaudebunt Miseriâ Damnatorum per se, quatenus est malum alterius, nam hoc est odii; tamen per accidens eâ gaudebunt, quatenus est effectus Justitiæ Divinæ.

8. In Scholâ assignantur beatis dotes, scilicet visio, dilectio, comprehensio, quæ non differunt à beatitudine nisi ratione, dotes quippe appellatæ in quantum dantur Ecclesiæ tanquam sponsæ Christi.

9. Beatitudinem essentialem seu conjunctionem cum Deo, appellant in Scholâ auream, scilicet coronam; gaudium de operibus quæ excellentis cujusdam victoriæ rationem habent, appellant aureolam, tanquam additamentum ad auream. Aurea datur ob Mandata Dei servata, aureola statuitur Præmium servatorum consiliorum, & ponitur triplex, Virginum, Martyrum & Doctorum. Martyrium tamen fatentur non esse opus Supererogationis sed Necessitatis, tum quidem cum quis deprehensus de fide suâ rationem requiritur.

SECT.

S E C T. XXIV.

De Poenâ Damnatorum.

Ite Maledicti in ignem æternum, &c. Mat. 25. 41.

1. **P**OENa Damnatorum statuitur esse ingens æterna, atque adeo sine ullo solatio.

2. Ponuntur tamen gradus in inferno, & nonnullis tolerabilius erit quàm aliis, *Mat. 10. 15.* Quod tamen quomodo fiat sine ullo solatio non intelligo. Si sunt omnes miserrimi, non est unus alio miserior. Hoc interea certum est quòd omnes damnati sunt valde miseri; alioquì enim Poena non induceret Poenitentiam; & si peccasse non olim poenitebit, tum peccare jam non est stultum.

3. Omnia videntur damnatis in malum cessura, sicut Sanctis in bonum. Itaque in Scholâ statuitur quòd torquebuntur corporaliter ab omnibus elementis, poenam tamen denominari ab igne, quia est violentissimæ activitatis. Per Vermem ferè ab omnibus intelligitur Morsus Conscientiæ, quæ est Poena spiritualis. Nec dubium est quin *tenebræ, fletus, stridor dentium*, significant mœstitiam conditionis, sicut apud nos. Cùmque hæc tropicè sumantur, quid ni & ignis?

4. Dolor animi in damnatis stare præcipuè videtur in angore de stultitiâ suâ, in odio contra Deum & invidiâ contra beatos; & in his quidem affectibus nonnulli totum esse infernum statuunt, miseriâque corporis nihil esse nisi redundantiam ex Miseriâ animæ, sicut corpus beati est beatum ex beatitudine animæ.

Obj. Cogitatio de Deo est jucunda, ergo non torquet. Respondeo, Cogitatio de Deo ut Authore omnis

nis boni est jucunda ; sed damnati non cogitant de Deo , nisi ut justo suo Judice , itaque etiam eum oderunt.

5. Mala voluntas & ejus profluvium in damnatis non videtur imputari illis in Peccatum aut ut puniendum. Nam post ultimum Judicium non est locus Meriti aut Demeriti , & c. acquirendi aut amittendi , sed omnia sunt Præmium & Pœna. Quia Damnati torquentur à perversis suis cogitationibus , ut istæ non sint puniendæ sed Pœna.

6. Damnati vellent omnes esse damnatos ; nam non possunt non malè velle.

Obj. Dives supplicavit pro fratribus suis , ne venirent in locum illum. Respondeo , In Parabolâ , similitudo non currit per omnia sed quoad aliquid. Quod retributio fiat justa pro gestis in hac vitâ ex professo ostenditur in vicibus Divitis & Lazari. Quod autem Dives ostenderit charitatem pro fratribus , ponitur secundum affectum humanum , quippe non attulens ad Propositum Christi , nisi in quantum inducat Monitionem hanc , Mosi & Prophetis jam satis per Miracula confirmatis credendum & obsequendum esse , nec de integro esse Miracula identidem expectanda.

7. Infernum ponitur à nonnullis circa centrum terræ , scilicet in loco infimo & cœlis maximè opposito. Sed de hoc nihil certi habetur. Sensu autem Theologico sanè dicitur cœlum esse ubi Deus gloriam suam impertit videndam ; Infernum ubicunque severitatem suam seu justitiam sine Misericordiâ exercet ; sicut terra quidem est Theatrum Misericordiæ & Justitiæ Divinæ.

8. Pro Peccato temporali homines justè puniuntur Pœnâ æternâ ; 1. Quia peccant contra charitatem quæ est vinculum Civitatis Dei , itaque perpetuum exilium ab eâ merentur , sicut etiam apud nos Perduellionis

damnati aut exulant aut enocantur. Et per accidens est quod horum Poena sit temporaria, nempe quia ipsi qui puniuntur sunt Mortales, aut etiam cessat esse civitas contra quam peccarunt. 2. Quia peccant contra bonum aeternum, ei bonum momentaneum praeligentes. 3. Quia peccant in suo aeterno, & propter hoc velint sine fine vivere, ut sine fine in suis iniquitatibus permaneant. 4. Quia peccant contra Deum infinitum ideo Poena eorum debet esse infinita. Nam Poena taxatur secundum dignitatem ejus contra quem peccatur, Arist. 5 *Eth.* c. 6. At Creatura non est capax Poenae infinitae in intensiōe, ergo debet esse duratione infinita. 5. Non debet Poena cessare quam diu culpa manet, sed culpa obstinatorum in hac vita manet in aeternum; nec enim est Poenitentiae locus post mortem.

Obj. Poenae inferni erunt inutiles ad correctionem aut damnatorum aut aliorum quorumcumque; ergo erunt vanae & non ponendae. Respondeo, Erunt utiles ad conservandum Dei Justitiam, quae per se est ei grata. 2. Damnatio aeterna impiorum est utilis ad correctionem eorum qui jam sunt in Ecclesia; non enim solum cum insliguntur sunt Poenae utiles ad correctionem, sed etiam cum statuuntur. Porro advertendum est, restrictiones creaturarum nullo modo Deo affigendas esse, licet earum perfectiones modo eminenti ei conveniant. Non vindicare autem seu non punire nisi bono Multati aut alterius est restrictio & non absoluta Perfectio creaturae rationalis. Itaque Poenae purè vindicativae non sunt denegandae Justitiae Dei, qui non alligatur finibus, sicut nos, sed remittenda res ad 7 *id.*

9. Num per divinam misericordiam omnis Poena etiam Daemonum finietur? Origines dicitur putasse, sed contra claram Scripturae sacrae auctoritatem, *Mat.* 25. 41. *Apoc.* 20. 10. Nonnulli dicunt, horum Poenam fore aeter-

æternam secundum Justitiam Dei, at ex ejus Misericordiâ terminum his Pœnis fortasse positum iri. Respondeo, Hujus vel minima spes non datur in Scripturâ sacrâ, itaque tu homo noli audere.

APPENDIX.

De Purgatoria & Indulgentiis.

Plerique Patrum antiquorum non admiserunt ad Visionem Dei animas ante diem Judicii, sed eas detineri putarunt in receptaculis mediis cum refrigerio & prægustatione futuri gaudii. Nam ad quid, aiunt, Judicium futurum, si hîc statim definitur de præmiis & pœnis? vide retrò n. 2.

2. Putarunt etiam in die Judicii fore examinationem per ignem. Paucos adferam, ut ab Albio citantur in libro de medio animarum statu. Origines Hom. 3. in Psal. 36. *Ut ego arbitror, omnes nos venire necesse est ad illum ignem, etiamsi Paulus sit aliquis vel Petrus, venit tamen ad illum ignem; sed illi tales audiunt: etiamsi pertranseas flamma non aduret te. Si verò aliquis mei similis peccator sit, veniet quidem ad illum ignem sicut Petrus & Paulus, sed non transibit sicut Petrus & Paulus.* Ambrosius in Commentariis Psalterii: *Ignem nos examinasti dicti David, ergo omnes igne examinabimur. Salvi erimus per fidem, sic tamen salvi quasi per ignem; & si non exuremur tamen uremur.* Tertul. 35. de Animâ: *Ille te in carcerem mandet infernum, unde non dimitteris nisi modico quoque delicto morâ Resurrectionis expenso.* Lactan. 7. Justif. c. 1. *Sed & Justos cum judicaverit Deus, etiam igne eos examinabit: tum quorum Peccata vel pondere vel numero prævaluerint,*

riat, perstringentur igni, atque amburentur; quos autem plena iustitia & maturitas virtutis incoxerit, ignem illum non sentient. Hieron: tom: 3. in Amos: Vocatus ignis ad iudicium primò devorat abyssum, i. e. omnia genera Peccatorum, ligna sanum stipulam. Augustin: in 15 Genes: Ad solis occasum, i. e. ad ipsum jam finem, significatur isto igne dies iudicii dirimens carnales per ignem servandos & in igne damnandos: Et in Psal: sextum: Talem me reddas cui jam emendato igne opus non erit. Et 20. de Civ: c. 25. Ex his quæ dicta sunt, videtur evidentius apparere in illo iudicio quasdam quorundam Purgatorias Pœnas futuras: Et lib: 21. c. 4. Non de quibusdã peraciter diceretur, quòd non iis remitteretur, neque in hoc seculo nec in futuro, nisi essent quibus etsi non in isto, tamen remitteretur in futuro.

3. Ego fateor me nunquam intellexisse hanc sententiam. Doctrina enim Catholica est; Christum patiendo satisfacisse pro Peccatis Mundi; baptizatis omnia esse remissa; Pœnitentibus omnia esse remissa; impœnitentibus certam imminere Gehennam. Sed non ulterius disputo contra tantam auctoritatem. Infelicissima autem fuit ea sententia partu suo. Nam ex hac sententiâ Patrum natum esse Purgatorium Romanum minimè dubium est, Prolem Parente multò nequiorum.

4. In Ecclesiâ enim Romanâ statuitur medium animarum receptaculum inter cœlum & gehennam. Huc detrudi aiunt animas discedentes sub Peccatis venialibus, aut etiam Pœnitentiâ non completè exactâ pro Peccatis mortalibus, ibique torqueri igne donec satis passæ fuerint pro malis in vitâ gestis; animas quidem illas esse in charitate perfectâ, omnésque sequiores affectus momento Mortis contritione deletos fuisse, eas proinde hunc ignem pati non ad sui emendationem, sed

sed merè ad satisfaciendum Justitiæ divinæ ; quòdque hîc nullatenus ad liberationem juventur suâ ipsarum charitate, sed Precibus vivorum, &c. maximè.

5. Jam quot sunt hîc Prodigia ! Deus torquet animas quas diligit & à quibus diligitur, non ad earum emendationem, sed solum quia vult ; cùmque satisfactum jam esset Justitiæ ejus per Passionem Christi. Tum : Ignis corporeus agit in substantias spirituales. Quis intelligat ? *Sed Omnipotens etiam hoc potest.* Potest certè, sed ubi dicit se id facere. Iterum : Animæ ponuntur torqueri voluptate, nimirum patiendo ea quæ sunt & necessaria & certissima media ad beatitudinem æternam ; quæ pati animabus ad cœlum anhelantibus volupe esse necesse est. Hæc etiam Pœnæ statuuntur debitæ post remissionem culpæ. Sed hæc avaritiæ proles quàm sit omni rationi infecta luculenter ostendit dictus Albius, ipse etiam in Ecclesiâ Romanâ (ut audio) Presbyter. Hunc consule sis Lector. Mihi enim incumbit in hoc opere solum, quantum potero explicare vera Christianæ Religionis dogmata, spuris non debeo immorari ulterius quàm ut ostendam quòd sint spuria. Et hoc de Purgatorio præstare facile est ex regulâ Fidei positâ 1. p. § 11. n. 6.

6. Doctrina Romana de Purgatorio non descendit per Traditionem universalem ; nam à Græcis nunquam agnita fuit, & quòd testimonium Ecclesiæ Romanæ se solo non habeat vim authoritatis universalis asensum est, 1. p. § 11. Imo, ne à Romanis quidem tempore S. Augustini agnita fuit, qui ad Dulcitium q. 1. ait: *Tale aliquid post hanc vitam fieri incredibile non est, & utrum ita sit quæri potest, & aut inveniri aut latere, nonnullos fideles per ignem quandam Purgatorium, quantò magis minusve bonæ pereuntia dilexerunt, tanto tardius cælestis fulvani.* In illa ætate adeo non fuit

definitum de Purgatorio , ut nec quæsitum fuerit. Gregorius ferè Author Purgatorii Dialogo quarto dicit , de animabus multa tunc clara fuisse quæ antea latuerant. Beda etiam ingens Purgatorii Patronus profiteatur illud innotuisse Angliæ ex Miraculo Militis per sacrificium missæ vinculis exoluti. Ex quibus satis patet Opinionem Romanam de Purgatorio venisse in Ecclesiam per superstructionem non per traditionem.

7. Vide autem quàm lata sit differentia inter Purgatorium illud Patrum & hoc Romanum. Illi putarunt animas quasdam ante Judicium , & in Judicio purgandas esse à quibusdam sequioribus affectibus quos hic non exuerunt. Hi animas omni labe puras nullo fine (honesto certè) excruciant. Illi statuerunt poenas Purgatorias solâ animæ Purgatione finiendas esse. Hi Purgatorium redimunt precibus Piorum, Missis, Peregrinationibus, Eleemosynis, Voluntariis Ecclesiæ Indulgentiis, &c. unde sædæ & Christiano nomine indignissimæ Nundinationes.

8. Proles Purgatorii Romani sunt Indulgentiæ Romanæ; de quibus pauca adnotabo. In Ecclesiæ primordiis censuræ in peccantes erant acerbæ; has ergo nonnunquam opus erat remittere aut delinire. 2 Cor. 2. 7. *Ei potius debetis remittere, ne nimio luctu absorbeat.* Et v. 11. *Ne Satanas lucrum de nobis faciat.* Ubi Apostolus duas reddit causas Indulgentiarum: 1. Quia subjectum non erat capax majoris pœnæ: 2. Ne Diabolus ex prætextu nimii rigoris, vel alio ad murmur aliquos & schisma provocet.

9. Verùm in præsentî Ecclesiâ Romanâ (ut Albius ait ab ætate post Christum 13.) Indulgentiæ sonant remissiones non censurarum sed peccatorum venialium, ne animas in Purgatorium invehant, aut saltem ne in eo detineant. Scilicet, magnum Meritorum thesaurum

rum in cœlo congestum esse ex supererogationibus San-
ctorum. Papam etiam ex plenitudine potentie sue
hæc merita dispensare, & ut sibi videtur, aliis appli-
care.

10. Sed hæc supererogationes sunt compensatæ per-
sonis supererogantibus (si qui tales fuerunt), alioqui
Deus esset hominum meritis impar; cum tamen per
Apostolum, passiones hujus temporis non sint condi-
gnæ ad futuram gloriam. Iterum omnia peccata
Mundi non excedunt Merita Christi, ergo frustra
iis adduntur Merita Sanctorum. Sed satis de ni-
hilo.

S E C T. XXV.

De Remissione Peccatorum.

DE credendis quadantenus disserui prout in Symbo-
lis habentur, de Ecclesiâ quidem & Communio-
ne Sanctorum in secundâ parte, de cæteris in hæc quartâ
parte, exceptâ solâ Remissione peccatorum.

Credo in Remissionem Peccatorum. Symb. Ap.

1. **P**eccatum est transgressio Legis, 1 Jo. 3. 4. Ita-
que trahit reatum seu obligationem ad poenam;
qui quidem reatus permanet transeunte actu, Mat. 5.
22. Mat. 3. 28, 29. Deus enim habet absolutum do-
minium in omnia, deditque legem hominibus ut sit iis
regula vitæ, cum comminatione poenæ nisi observave-
rint. Hujus ergo legis transgressores conscientis suis in
poenam obsignantur.

2. Jam

2. Jam credimus ablationem hujus reatus haberi in Ecclesiâ principaliter per Christum patiendò satisfaciendè, instrumentaliter per Baptismum, quantum ad peccatum Baptismum antecedentiâ, & per poenitentiam quantum ad peccata admissa post Baptismum. Ac de satisfactione Christi dictum est *Sec. 12. De Baptismo & Poenitentia* dicetur suis locis.

3. Articulus de remissione peccatorum ponitur loco proximo post Articulum de Ecclesiâ Catholicâ, ut intelligatur eam esse Ecclesiæ privilegium, nec alibi haberi. *Obj. Habita fuit sub lege.* Respondeo, sed non nisi in Ecclesiâ credentium Christum esse venturum.

4. *Sed num in Ecclesiâ haberi potest remissio omnium peccatorum?* Prorsus omnium; nam Agnus Dei sustulit peccata Mundi. V X X . I O . 2

Obj. Peccatum contra Spiritum sanctum est irremissibile. Respondeo, Mihi verisimillimè videntur loqui, qui statuunt hoc peccatum esse obduratam recusationem Evangelii post convictionem oblatam per Spiritum descendentem super Apostolos & Miracula per eòdem edentem. Quasi dixisset Dominus: Repugnastis Moysi & Prophetis Dei servis, repugnatis mihi ejus Filio sic loquenti & sic operanti, Est adhuc spes. Veniet autem Spiritus sanctus & opera ad mundum convincendum abundè sufficientia peraget; si huic etiam repugnabitis, non dabitur ulterior convictio, sed in perpetuam cecitatem obsignabimini. Peccatum ergo in Spiritum sanctum est aggregatum ex omnibus actibus per quos obstinati Deo illuminationem offerenti resistunt, nomenque sumit ab ultimo actu, quo claudunt oculos contra omnes confirmationes doctrinæ Christianæ præstitas ab Apostolis virtute Spiritus sancti; Unde apparet hoc peccatum esse irremissibile, non ob gravitatem penati sed ob incapacitatem penantis, qui recusat omnia media remissionis.

P A R S.

P A R S V.

*De agendis à Christiano seu de Christianâ
obedientiâ*

Obedientiæ Christianæ Considerabo principia & partes. Nam de fine ejus quæ est vitâ æternâ dictum est quartâ parte. Principium primum hujus obedientiæ Statuitur Prædestinatio; principium ejus immediatum est tum gratia tum virtutes & Theologicæ & morales.

S E C T I.

*De prædestinatione.*

Convenit inter omnes Christianos, Deum Secundum consilium voluntatis suæ nonnullos homines ab æterno immutabiliter prædestinasse ad vitam æternam.

1. **A**T in consilio hoc explicando Christiani inter se plus nimio distant. Ego de scientiâ & præscientiâ Dei, deque divina rerum in genere præfinitione dictum suppono in Metaphysicâ. Nunc paucis agam

gam de predestinatione, quæ est propriè hominum tantum; idque in ordine ad vitam æternam.

2: Atque in ipso limine occurrit famosa quorundam sententia, Deum ab æterno statuisse homines creare, eorumque hos certos beatitudini, cæteros omnes æternis cruciatibus destinasse; ac utrumque immutabiliter, utrumque sine respectu ad opera personarum sed ex merâ suâ voluntate, & in gloriam misericordiæ suæ erga beatos & justitiæ suæ erga reprobos. Sed quæ est justitia, cruciare nihil meritos? Respondent, Deum ut hoc consilium rite exequatur, statuisse quod Adamus peccaret et quod in eo omnes homines inquinarentur, quodque ipse filium suum mitteret certissimum Redemptorem horum Electorum, qui vero nihil prodesset reprobis ob peccatum Adami sine fine torquendis, nec iis proponeretur ut Redemptor nisi voce tenuis. Calv: Justit. l. 3. c. 24. Ecce vocem ad eos dirigit, sed ut magis obsurdescant; lucem accendit, sed ut reddantur cæciores; doctrinam profert, sed ut magis obstupecant; remedium adhibet, sed ne sanentur. Et piscator de predestinatione: Non vult Deus reprobos credere, licet linguâ profiteatur se velle.

3: Monstrum horrendum! At probare nituntur. Dicitur enim Rom. 9. 13. *Jacobum dilexi et Esavum odii*. Idque factum est sine respectu ad opera alterutrius. cum enim pueri nondum essent nati, nec quid fecissent boni aut mali &c. v. 11. Sic v. 16. *Non est volentis neque currentis, sed miserentis Dei*. v. 18. Dicitur Deus e merâ suâ voluntate nonnullorum misereri et alias indurare. Hujusque exemplum ponitur Pharaon v. 17. Tum ad objectionem: *Quis restitit voluntati ejus?* cur queritur? respondet Apostolus: *Quis tu es homo qui disputas cum creatore tuo?* Sumus in manu Domini ut lutum in manu figuli, ergo potest pro libitu suo alios

alios in honorem, alios in contumeliam fingere. Verùm his quid respondendum censeam, dicitur in cælesectionis 2dæ.

4: Interea mihi incredibile est, Deum ullum hominem creâsse ad hoc ut domanetur. Nam 1. Bonum est sui diffusivum, ergo infinite bonus Deus quaquaversum diffundit de suo *i. e.* de bono; at Bonum in Deo idem est quod beatum; ergo nullius miseria e Deo emanare potest sicut nec tenebræ e Sole. Itaque etiam proclamat: O Israel perditio tua est ex te; 2. Deus est verax, at Dicit. nolo mortem morientis & impij; ergo eam non vult 3. Deus precipit omnibus, promittit omnibus, comminatur omnibus, ergo nemini impossibilitatem obediendi decrevit; esset quippe Ironia Deo indignissima.

5: Nonnulli emolliêrunt hoc fatale decretum, ei præstruendo lapsum Adami; Adamum scilicet creatum fuisse justum, & relictum in manu consilij sui, potuisse stare in officio suo, potuisse deficere, ex optione suâ defecisse, seque omnemque suam progeniem defectione istâ sædâsse, et omnimodæ pænæ reatu perdidisse; ex hac massâ corruptâ Deum Elegisse nonnullos in vitam æternam, reliquos damnandos præterisse.

6: Atque hæc minùs crudeliter sonant quàm superiora; non videntur tamen satisfacere aut ~~φλαβήσας~~ Dei, qui filium pro hac massâ corruptâ dedit; aut honori Servatoris nostri secundi Adami, qui venit ad extrahendum homines e carcere, in quem a primo parente coniecti erant, et tam latè redemptor esse debuit, quàm erat primus Adam perditor. Nec congruunt ista quidem sinceritati Apostolorum, qui Christum mundi servatorem predicabant, omnes invitabant, nec ergo pauculos tantum electos putabant.

7: Hic Calvinus miratur, quòd hi sublapsarii in uno Adamo hereant, quum omne præterea humanum genus decretis subijciant irrespectivis. Ego contra miror, cum Adamum liberum statuunt, cur id reliquis hominibus denegent. Non est contumeliosum Deo quòd homo sit in manu consilii sui, nam ex constitutione Dei ita se habuit in Adamo. Quòd autem non simus in manu consilii nostri videtur valde contumeliosum Christo, quasi serpentis caput non contrivisset, nec jacturam tentatione Diaboli investam suâ passione reparasset.

8: Quin si comparare lubet hanc secundam sententiam cum priori sic se habere videntur. Supra lapsarii plebsque homines damnant ob nullum peccatum; sublapsarii tantundem hominum damnant ob unum unius Adami peccatum. Ob unum, inquam, illud peccatum omnes reprobos damnant Sublapsarii; nam si omnes morentur ante transgressionem personalem, tamen per eos nihilo minus in gehennam deturbandi essent. Imò, si impossibile est hominem Adamicum in quocunque actu non peccare (quod illi statuunt) sequitur nullum actuale peccatum ei imputari posse; nam nemo tenetur ad impossibile. Verùm hæc secunda sententia permagnos habet authores Augustinum puto &c. itaque nihil pono. Mihi etiam certum est non divagari post pelagianos, Semipelagianos, Arminianos &c. qui omnes decretis repugnant irrespectivis, quanto verò cum discrimine inter se invicem non adeo comperi, nec quidem moror, Quin statim me accingam brevi in hac causâ *Confessionis Anglicanæ* Explicationi.

9: In articulo 17. definitur, *Prædestinationem ad vitam esse æternum Dei consilium, quo decrevit eos quos ex humano genere in Christo elegit, a damnatione liberare & per Christum ad æternam salutem pervenire tanquam vasa facta in honorem; hosque omnes certissimè*

vocari, justificari, sanctificari & tandem servari. ponit 20. loco idem articulus, considerationem prædestinationis esse piis suavem (quod ego, fateor, non intelligo, quippe semper edoctus, omne solatium Christiani stare in promissis Dei apertis non in occultis decretis) impiis vero eandem esse valde periculosam & frequenter inducere aut in desperationem aut in licenciam peccandi. 3. ponit articulus, promissiones Dei a nobis accipiendas esse, prout generaliter proponuntur in sacra scriptura, eamque in actionibus vitæ sequendam esse Dei voluntatem, quam expressam habemus in verbo Dei.

10: Nihil hic de absolutâ reprobatione; at si nostrates cum Calvino censuissent, cum illo etiam fuissent loquati. Quibus cor est tam crudelia opinandi, iis nunquam deerit oris impudentia ad profitendum. Talia qui tacet, damnat. Vide collectam passionis.

11: *Sed quid est eligere in Christo?* est eligere ob merita Christi, vel est eligere credentes in Christum. Ut cunque Christus per articulum est fundamentum electionis & electio est regula prædestinationis; at Christus est post lapsum, ergo prædestinatio non erat ante lapsum.

12: Quicquid decrevit Deus ab æterno, id in tempore certò exequitur. Itaque a decreto ad executionem, & ab executione ad decretum pariter arguitur. e. g. Si Deus hunc damnat, tunc ab æterno decrevit eum damnare; & si Deus ab æterno decrevit hunc damnare, eum in tempore damnabit *Quid tum postea?* dices. Tum, inquam, si Deus damnat hunc ob peccatum, eum damnare statuit ab æterno ob peccatum; sed per ipsos Calvinistas, Deus neminem damnat nisi ob peccatum (nam ideo, ajunt, peccatum invexit ut jure posset damnare), ergo neminem damnare decrevit nisi ob peccatum; ergo nulla erat prædestinatio supra lapsum qui erat primum peccatum.

13: Iterum, decretum divinum nos latet, ejus exequutio revelatur; itaque satius erit questionem sic proponere, *Ob quid homines damnat Deus?* quàm sic; *Ob quid de crevit Deus homines damnare?* Imo prædestinatio & præscientia seu scientia Dei de futuris quatenus de futuris, videntur dici ~~adventurari~~, Res enim apud nos dicuntur futuræ, respectu rerum præsentium & præteritarum, eternitas autem Dei comprehendit omne tempus. i. e. omnia quæ sunt; erunt aut fuerunt sunt ei præsentia, Itaque reipsa, prædestinare ad media, idem est quod media exhibere, & prædestinare ad finem idem est quod ad finem perducere.

14: Demùm articulus dicit, promissa evangelica accipienda esse sicut proponuntur in scripturis sacris; unde præsumendum est evangelium esse juris communis omnibus, nam omnibus promulgatur & omnes invitat. Ecclesia autem quæ docet evangelium proponendum esse omnibus, non potest docere quòd non nisi pauci sunt ejus capaces, nam sic generalitas propositionis esset frustranea & Sarcastica.

15: Atque hinc videretur sequi, Deam concedere omnibus media necessaria ad salutem; nam prorsus reprobaret eos quibus ea non concederet; negans enim media negat finem.

Ob: Deus nonnullis præbet solùm media quæ novit non esse valitura; nam Dominus dicit: *Si opera quæ inte sunt facta, fuissent facta in Tyro & Sidone, respnissent*, Sed non dare auxilia quæ sunt valitura est nihil dare, & hoc est reprobare Resp: Deus novit ea auxilia quæ dedit Tyro & Sidoni non fuisse valitura sed & novit ea fuisse sufficientia. eorum quippe insufficientia non erat ex ipsorum imbecillitate sed ex libertate arbitrii corrupti. *Sed efficaciora media nonnullis concedere quàm quæ aliis*

concessa sunt, an non est hæc acceptio personarum? Minimè, Quòd sit bonus omnibus, est ex naturâ Dei, quòd sit amior nonnullis, quàm aliis, est ex iure voluntatis. Disponit sua ut sibi lubet.

16: post hæc videtur dicendum esse, quòd Deus concedit omnibus vires sufficientes ad non peccandum, non autem concedit omnibus media sufficientia ad vitam æternam; quippe quæ non habetur nisi per Christum qui neminem agnoscit nisi credentem; ergo quibus Deus non attulit evangelium, eos relinquit in umbrâ mortis. Loquor de dispensatione revelatâ seu de modo ordinario perveniendi ad salutem. Ex abyfso misericordiæ divinæ possumus sperare, sed nihil præsumendum est.

17: Sed posito quòd Ethnicus vivat secundum legem naturæ, is moriens non introibit in regnum cælorum, quia non credit in Christum, nec deicietur in Barathrum quia non peccavit actu, & originale ejus peccatum supponimus esse quoad reatum sublatum à Christo. *Quid fiet de animâ ejus?* In Ecclesia Romanâ reponent, eam, credo, cum infantibus; ego & tu (si placet) permittemus rem judicio Dei, qui non Exigit a nobis ut omnia sciamus.

S E C T. II.

De gratiâ & libero arbitrio.

Certum est apud Christianos gratiam Dei supernaturalem esse necessariam ad hoc, ut placeamus Deo & vitâ eternâ potiamur.

Liberum arbitrium nihil est nisi voluntas humana, cui quidem esse liberam est essenti-

essentiale. Gratia est auxilium supra naturam cælitus adveniens.

2: Gratia est Gratum faciens vel gratis data, Gratia gratum faciens est per quam homo conjungitur Deo. Gratia gratis data est donum per quod homo cooperatur alteri ut ad Deum reducatur, ipsum autem possessorem non efficit bonum. 1. Cor. 12. 7.

Unicuique datur manifestatio Spiritus in utilitatem (scilicet aliorum) &c. Utraque hæc gratia est gratis data, quia homini conceditur supra facultatem naturæ & supra meritum personæ; altera tamen sola dicitur gratis data, quia ea non habet ulterius, quod gratum faciat. De gratiis gratis datis satis pro meo proposito dictum est in 2. parte *de Ordinibus*, & in 4. parte *de adventu spiritus sancti.*

3: Per gratiam gratum facientem omnes intelligunt auxilium Dei hominibus datum ad bene operandum, ultra vires naturæ humanæ & concursum Dei generalem. Eam in scholâ ponunt qualitatem in animâ & habitum infusum, qui afficit animam ut albedo parietem. Alii rejiciunt omnes qualitates & gratiam explicant per dispositionem circumstantiarum accommodatam ad trahendum animam in bonum. Alii malunt eam appellare illuminationem. Ego hæc puto esse considerationis Scholasticorum tantum, qui id in se oneris traxerunt, ut omnia mysteria Christianismi explicent per principia philosophica, qui processus minimè erat notus antiquis Christianis, qui sibi sufficere putabant, quod res crederent sine hoc quod modos scirent. Ut tamen intelligamur loquendum est cum vulgo.

4: Effectus gratiæ numerantur quinque. Ut anima sanetur, ut bonum velit (quæ duo fortasse unum sunt), ut bonum quod vult efficaciter operetur, ut
in

in bono perseveret, ut ad gloriam perveniat. Unus horum effectuum antecedit alterum, unde divisio gratiæ in prævenientem & subsequenter. Gratiæ respectu primi effectus est præveniens, ut verò operatur secundum effectum est subsequens, scilicet respectu primi effectus. Aug. de nat. & gra: *prævenit ut sanemur, subsequitur ut sanati vegetemur; prævenit ut vocemur, subsequitur ut glorificemur.*

5: Iterum dividitur gratia in operantem & cooperatorantem. Aug. de gra: & lib: arb: c. 17. Ut velimus operatur, cum autem volumus ut perficiamus, cooperator. Dicitur operans in quantum sanat animam, cooperans in quantum est principium boni operis procedentis ex voluntate sanata. In primo ergo actu scilicet in sanatione animæ, gratia est principium activum, voluntas humana passivum. Animam autem sanatam seu volente bonum, gratia & liberum arbitrium cooperantur activè ad subsequentes effectus gratiæ; nisi enim voluntas operetur, actus non esset voluntarius aut noster. Sed quomodo cooperatur gratia cum voluntate? Sicut virtutes morales cooperantur animæ ad actus humanos ita gratia ad actus Christianos; cum hoc tamen discrimine, quod gratia sit necessaria ad operandum Christianè, virtus autem moralis sit necessaria solum ad promptè & constanter operandum humanè.

6: Gratia a Magistro Sententiarum statuitur genus trium virtutum theologicarum. Aquinas negat: eam quippe esse lumen quoddam divinum (Eph. 5. 8. *erat in tenebris nunc autem lux in Domino*) unde virtutes theologicæ derivantur; sicut etiam virtutes morales differunt à lumine naturæ à quo derivantur. Virtutes morales disponunt ad operandum secundum lumen naturæ, virtutes theologicæ secundum lumen gratiæ.

Itaque etiam *gratia* dicitur participatio divinæ naturæ. 2. Pet. 1. 4. *Ut per hoc efficiamini divinæ consortes naturæ.* Itaque etiam dicimur per gratiam regenerari in filios Dei. Atque hæc de essentiâ & partibus gratiæ. Quoniam verò in Ecclesiâ statuitur gratiam esse absolutè necessariam ad salutem, deinceps consideranda propono hæc tria: Unde sit necessitas gratiæ, ad quid sit necessaria, & quousque sit efficax.

7. Quod ad primum: Originale peccatum vulnerat animam cujusque hominis secundum naturam procedentis ex Adamo, eamque reddit imparem officio suo; itaque ut salvetur, novo auxilio cælitus sublevandus est. 2º, vita æterna est præmium supernaturalis, itaque non est acquirenda viribus naturæ etiam non vitiatæ. En duplex gratiæ necessitas. Sed ad quid, seu quatenus est necessaria?

8: Inprimis Gratia non est necessaria ad cognitionem naturalium speculativam aut etiam practicam. Prosper contra Collatorem c. 22. Si nec ad ista terrena ordinanda rationalis animi vigeret ingenium, non vitiata esset sed extincta natura.

9: Videtur etiam certum non requiri gratiam ad assentiendum veritatibus supernaturalibus Evangelii. Nam 1º, dæmones credunt sine pio affectu. 2º. Eæ veritates sufficienter ostenduntur rationi naturali ex miraculis; (nam aliter homines non rederentur in excusabiles ob rejectum evangelium) at sufficienter ostensis ratio naturalis non potest non assentiri. potest dici *gratiam cum evangelio semper offerri & recusantes evangelium resistere gratiæ oblatae, & ob hoc esse in excusabiles.* Atque hoc quidem rectè dicitur in quantum gratia sumitur pro favore divino. Difficulter autem intelligatur, quomodo quis possit resistere gratiæ habituali, cujus essentia est ut gratum fa-

faciat. Ea si non facit gratum non est gratia. Tum quid hoc est offerre gratiam habitualement, quæ est prorsus cælitus infundenda? Si infunditur, gratum facit; si non infunditur non est gratia. Deum offerre gratiam si quis acceperit sonat hoc: Si quis bonum vult, Deus facit ut bonum velit; tamen videtur necesse esse sic vulgò loqui.

10: Sed *in hoc depravato statu num potest homo viribus naturæ exercere virtutes morales?* Apostolus videtur expresse affirmare. Rom. 2. 14. *Gentes quæ non habent legem faciunt ea quæ sunt legis.* Et asserit ipsos Gentiles perconscientiam suam aut accusatum aut excusatum iri in Die iudicii. Whitakerus de peccato originali: Si per morale opus virtutes intelligis philosophicas, non negamus posse hominem sine speciali gratiâ multa fortiter & temperanter & iuste agere. Jeron: super Ezekielem: Ex eo quod Nebuchodonor mercedem accepit boni operis, intelligimus etiam Ethnicos si quid boni fecerint, non absque mercede Dei iudicio præteriri. Memineris etiam Lector boni Samaritani: Quæstio erat, quid faciam ut potiar vitâ æternâ. Respondit Dominus *Samaritanus quidam fecit sic & sic, tu fac similiter.* Incredibile autem est, quod is qui nihil boni possit præstare statueretur exemplar æternæ vitæ potiundæ. Meminerit etiam Lector Centurionum. Mat. 8. Act: 10.

11: Augustinus verò & post eum permulti in contrarium ruunt. Objicienti Fabium, Fabritium, Scipionem, Regulum respondit Augustinus: eos nullas *virtutes habuisse sed vitia vir tutibus similia; vel si virtutes fuerint, potius gratiæ Dei attribuendas esse, quàm viribus eorum.* Quid? gratia gratum faciens in infidelibus? Annon hinc sequitur fidem non esse necessari-

am ad placendum Deo? Iterum prosper decit: Omnis infidelium vita peccatum est.

12: Sed quo argumento contendunt? *Ethnici non re- tulerunt actiones ad Deum, qui est summum bonum & ultimus finis humanorum actuum; sed sine summo bono nullum est bonum; & actiones in suo genere optimæ sunt malæ si ordinantur in finem perversum.* Sed quid nō possit Infidelis dirigere actus suos in Deum ut naturaliter cognitum? Et: quicumque virtutem sequebatur, referebat actiones ad Deum virtualiter licet non formaliter. i. e. præstitit officia illa quæ suâ naturâ tendebant in Dei gloriam.

13: Ex adverso disputant Scotistæ: Dispositio ad formam potest esse sine formâ, licet non forma sine dispositione; at virtutes morales disponunt ad gratiam, ergo possunt esse sine eâ. Iterum, Adamus innocens poterat operari omne bonum morale cum Dei concursu tantum generali, nam sic operari ei nihil fuisset nisi agere secundum naturam; ergo homo depravatus potest operari aliquod bonum morale cum eodem concursu. Nam voluntas ad actiones morales ita se habet in his duobus statibus, sicut se habet homo sanus & æger ad actiones naturales. Si homo nullum opus naturale potest edere, non est æger sed mortuus; & si nullum opus morale potest edere non est homo depravatus sed ne homo quidem, quippe cui sit essentialis & intellectus qui fertur in verum, & voluntas quæ fertur in bonum. Hi tamen statuunt se minimè facere Pelagio, qui, aiunt, non solum auxilium Dei speciale denegavit actibus liberis sed etiam concursum generalem. Moderanter etiam se gerunt, fatentes hominem per naturam posse exequi officia faciliora, gravioribus verò tentationibus citò succumbere sine auxilio Dei speciali.

Ob: Rom: 14. 23. *Quod non est ex fide est peccatum.*
 Resp: i. e. si non credis sed dubitas an aliqua actio sit bona vel mala & tamen agis, tum peccas quia agis ex proposito non bono sed indifferenti ad bonum vel malum.

14: *Sed num exercitium virtutum moralium in infidelibus aliquo modo disponit ad gratiam?* Qui pro concione negaret, prorsus juberet omnes non credentes in Christum desistere à virtutibus moralibus, adeoque ab audiendo conciones &c, solisque instinctibus attendere, quod etiam apud nos faciunt *Tremescentes*. Ego rem sic expedio: 1^o, Deus in infundendo gratiam non alligatur præparationibus humanis sed spiritus fiat ubicumque vult; quod apparet in exemplo Magdalene & etiam Sancti pauli. 2^o, præparationes morales non merentur gratiam; nam quomodo is quicquam mereatur supernaturale, qui officio solum naturali, eoque valde imperfectè & cum multis admistis peccatis, defungitur? 3^{io}, Tamen secundum ordinariam Dei dispensationem virtutes morales sunt passivæ dispositiones ad gratiam. Jacksonus de fide salvificâ hoc sic explicat. Deus non fecit hominem statim ex chao, sed cælum & terram &c. & tum postea hominem in mundum ornatum induxit. Sic non infundit gratiam (nisi in valde paucis instantiis) statim in cor omnibus vitiis sædum. Sed qui animam suam per virtutes morales aliquatenus purgavit, is non est procul à regno Dei. Exemplum sit Centurio Math. 8. 5. & alter. acto: 10. 1.

15: Contra necessitatem gratiæ dixit mihi quidam; *cum natura sit æque à Deo ac est gratia, pariterque gratis data, an non est æque honorificum Deo quòd bona nostra opera ascribantur naturæ ac gratiæ?* Ego retuli: jure deprimimus naturam, non quæ est a Deo, sed quæ est à nobis pessundata. Est etiam in honorem Dei, quòd gratiæ

gratiæ potentiam evehamus, cùm sit infinitæ ejus misericordiæ quòd pro gratiâ in Adamo rejectâ, in Christo gratiam recipiamus. Dum salutem nostram gratiæ Dei ascribitur, fatemur nos justitiâ ejus damnandos fuisse. Fateor tamen hæc omnia sonare nomine gratiæ favorem divinum.

16: Restat considerandum quousque sit gratia efficax; nempe an justus per gratiam Dei possit omnia mandata servare. Ac certum videtur quòd potest servare singula; alioqui enim aliquod impossibile ei mandaretur, qui esset Sarcasmus Deo indignissimus. Imo jugum Christi adeo non est impossibile, ut sit facile. Mat. 11. 30. Itaque Jeronymus ad Damasum Ep: 22. dicit: *Execramur eorum blasphemiam, qui dicunt impossibile aliquod homini esse præceptum à Deo, & mandata Dei non à singulis sed ob omnibus in communi posse servari.*

17: Tamen si experientiam consules, vix unum reperiēs, qui non in multis officii *sui partibus labitur. Et hoc evenit quia non prorsus exterminatur concupiscentia, sed adhuc luctatur contra Spiritum caro. Concupiscentia autem etiam in scholâ agnoscitur esse fomes peccati. Altera causa hujus fragilitatis est divina gratiæ dispensatio. Sic enim Deo visum est, ut sat viritum habeamus ad preliandum fortiter, sed non ad perfectè vincendum usque ad finem. Hæc autem ostendunt difficultatem præcepti non autem impossibilitatem.

18: Jam textuum à reprobantibus adductorum brevem subjungam expositionem. Rom: 9. 13. *Esauum odi. i. e. minùs dilexi.* Sic Gen: 29. 31. *Dominus videns quòd Leah haberetur odio. i. e. minùs diligeretur per versum 30.* Sic Luc: 14. 26. *Si quis non odit patrem et matrem. i. e. non diligit minùs quàm me.* per Mat. 10. 37. Tota etiam res intelligenda est de posteris Esa-

vi quibus Deus nec tanta exhibuit bona temporalia, quanta posteris Jacobi, nec quidem ulla media ordinaria ad salutem æternam, sicut nec jam exhibet multis gentibus. Verùm totum hoc factum est in massa corrupta, atque nihil juvat reprobationem supra lapsariam, nec quidem Sublapsariam, cum Deus omnibus gentibus concedat media sufficientia ad non peccandum, nec quenquam damnet nisi ob peccatum.

19: Rom. 9. 11. *Cum pueri non essent nati, nec quidquam fecissent boni aut mali &c.* Quid tum? omnes concedunt Deum Idumæis prælegisse Israelitas non ob merita aut demerita ipsorum, sed ex beneplacito suo. Nemini mala vult Deus; bona autem, prout lubet ipsi, alia aliis distribuit. Itaque dicit: *misererebor quorum volo misereri.*

20: Dominus dicit pharaoni: Rom: 9. 17. *Hoc consilio te evexi, ut in te ostendam potentiam meam. Evexi. i. e. sustentavi ne perieris; et jam esses in gehennâ, ut meruisti. Vel etiam Deus eum fecit regem, quem vidit per sceleratam suam obstinariam esse periturum ingenti cum gloriâ divinæ omnipotentia.*

21: *Quem vult. indurat.* Rom: 9. 18. Deus quosdam indurat, non infundendo duritiem, sed eos sibi ipsis relinquendo nec trahendo per gratiam specialem. Iterum, Deus impios occasionaliter indurat, benefaciendo. Exod. 8. 14. *Cum videret pharao moram dari, induravit cor suum.* Perversitas Pharaonis erat causa indurationis, benignitas Dei occasio.

22: *Quis tu es homo qui disputas cum Deo?* Rom: 9: 20. *i. e. qui disputas de sapientia dispensationum Dei nimirum in relinquendo Judæos & accipiendo Gentiles.* Vel qui disputas de libertate Dei in donis im-
pertinendis

pertiendis, quibus vult & quomodo vult. Verùm de
aquitare actorum Dei Deus nos facit Judices] Ec. 1.
18. El. 5. 3.

23: Quis restitit voluntati ejus? Rom. 9. 19. Nemo.
Nam Deus non vult absolute ut homo bene se ge-
rat; sed ut bene se gerat aut puniatur pro male ge-
itis,

24: Jo: 6. 44. Nemo potest venire ad me, nisi pater
qui misit me trahat eum. i. e. qui legi non estis obse-
quuti, nec evangelio obsequemini. Sicut Abraham
dixit diviti: Si non habent fidem Mosis & prophe-
tis, nec resurgenti è mortuis habebunt i. e. Nec
Christo. Sic Dominus dicit de divite, quòd non potest
intrare in regnum cælorum. Per Deum tamen possi-
bile esse ut intret. i. e. mediis ordinariis perveni-
endi ad salutem dives seu fidens in divitiis non cedit;
sed prorsus opus est omnipotentia bonitatis Dei ad ta-
lem per auxilia extraordinaria trahendum.

25: Act: 13. 24. Crediderunt quotquot erant ordina-
ti ad vitam æternam i. e. quotquot erant rectè affecti &
auribus æquis evangelium capessiebant; hi e-
nim erant ~~instructi~~, seu dispositi ad vitam æternam.
Qui bene afficitur ad media, is disponitur ad
finem.

26: Postremo advertat Lector litem non esse gra-
 vem internos & Ecclesiam Romanam de predestina-
 tione, de gratia aut de libero arbitrio; sed & illi
 inter se, & nos inter nos pariter digladiari videmur.
 Vix ipse Calvinus est Jansenio ferocior fatista. Quin
 antiqui patres non melius concordarunt, de quibus
 audi Calvinum C. 2. inst: C. 2. n. 4. *Verbum hoc*
Chrysostimo est passim familiare asseramus quod est
 nostrum, reliqua Deus supplebit. *Cui consentaneum*
quod ait Hiero nymas; Nostrum esse incipere, Dei au-
 tem

tem perficere: Nostrum offerre quod possumus, illius implere quod non possumus. Porro tametsi Græci præ aliis atque inter eos singulariter Chrysostomus, in extollendâ humanæ voluntatis facultate modum exceßerint, veteres tamen omnes excepto Augustino sic in hac re ut variant aut vacillant aut perplexe loquuntur, ut certi ferè nihil ex eorum, scriptis referre liceat. Hæc Calvinus. Sapientis erit nihil valdè Opinari.

S E C T III.

De Fide.

Convenit omnibus inter se Christianis, neminem nisi credentem in Christum ab eo agnosci, credentium neminem ab eo rejici, omnes etiam credentes ad profitendum fidem suam teneri.

1. Quod una et eadem gratia de quâ modò disseruimus dirigat animam in omnibus officiis Christianis et pro diversis abstractionibus nostri intellectus induat diversa nomina fidei spei et charitatis, fortasse non incommodè dicatur. Quod autem fides spes et charitas quadantenus à se in vicem distinguantur et tractari præcisè debeant, patet per Apostolum 1 Cor. 13. 13. *Nunc remanent fides, spes, charitas, hæ tres.* Fides præcisè sumpta à multis dividitur in historicam & salvificam. Historicam definiunt assensum datum doctrinæ Christi. Per hanc quippe recognitionem Christiani inprimis fecernuntur à Judæis & Gentilibus.

2: Objectum materiale fidei Christianæ historicæ sunt veritates revelatæ à Deo per Christum. Veritas autem Dei est objectum fidei formale seu ratio credendi. Quin & Deus alio modo potest dici objectum fidei Christianæ, quia omnia à Christiano credita eum disponunt ad fruitionem Dei; sicut sanitas dicitur objectum Medicinæ, quia Medicina nihil tractat nisi in ordine ad sanitatem.

3: Est una fides Christiana, quia omnes omnis ævi Christiani idem credunt: *Sed videtur crevisse numerus articuloꝝ fidei.* Respondet Aquinas, *numerus articuloꝝ crevisse quoad explicationem, sed non quoad substantiam.* Omnia scilicet quæ jam creduntur, fuisse in fide primorum Christianoꝝ, *sed quædam explicitè jam credi quæ antea non credebantur explicitè.* Ego autumo periculose dictum: nam articulo fidem habere non prout exprimitur à Deo sed ut explicatur ab homine, est homini fidem habere non Deo. De phrasibus nonnullis quæ sunt in symbolis & non sunt in scripturis sacris sic habet: Eæ nihil addunt nisi id, quo sublato tollitur hoc quod est expresse in scripturâ sacrâ. e. g. Symbolum Nicæanum dicit Christum esse *unum* *et* *verum*, & jure, alioqui enim aut non esset verus Deus, aut essent plures Dii, cujus utriusque contrarium expresse habetur in scripturâ sacrâ, in quâ continetur fides primorum Christianoꝝ.

4: Heb. 11. *Fides est substantia rerum sperandarum, argumentum non apparentium.* Aquinas sic explicat: Substantia. i. e. inchoatio, sicut se habet fundamentum ad domum, aut principia ad demonstrationem. Erit, inquit, in hâc formâ perfecta fidei definitio: *Fides est habitus mentis, quo inchoatur in nobis vita æterna, faciens intellectum assentiri non apparentibus.* At revera fides est ipse assensus, non faciens assentiri.

5: Con-

Job. 17. 3.
Tamen
quis.

5: Confessio est actus exterior fidei historica. Est tum necessaria ad salutem, cum per ejus omissionem subtraheretur honos debitus Christo, aut etiam charitas proximis impendenda. Confessio Christi non fit solum ore sed opere etiam; dum non solum ipsum laudamus sed etiam mandatis ejus obsequimur. Imò, si quis Christianæ religionis professor studeat avaritiæ, ambitioni &c, non est dubium quin sit hypocrita, & diabolum mente, licet Christum ore colat

6: Nobilissimus gradus confessionis est martyrium; de quo sana est regula: *Non sanguis sed causa facit martyrem*. Si quis ex superbiâ aut inanis gloriæ cupiditate Christum usque ad mortem profitetur, is non est martyr Christi sed suorum vitiorum. *Sed num mori pro doctrinâ Christi abluit omnia peccata actualia.* (Unde baptismus sanguinis)? Resp: solus Christi sanguis abluit peccata nostra. Martyrium si non est necessarium, ipsum est peccatum; si est necessarium est pars officii, & si debemus pati, patiendi non meremur. Mori pro Christo adeo non tegit alia peccata, ut pro eo non mori sit peccatum. Post hæc non est dubitandum, quin scincerus martyr migret rectâ in cælum; sed ut dixi ob effusum sanguinem Christi non ob suum.

7: Adhuc de fide historica, ad salvificam pergamus: Hic inprimis quæritur, *an fides historica, Christianorum possit esse sine Charitate?* Non intelligo quâ possit. Nam Evangelium est summè bonum homini, ergo eo credito non gaudere homo non potest. Qui autem gaudet evangelio diligit ejus authorem.

Ob: *Dæmones credunt sine pio affectu, quidni & homo?* Resp: Evangelium non est bonum dæmonibus. Credunt Christum venisse Servatorem hominum at non

dæmonum; itaque eo tristantur. Sed obiter: *an non omnis intellectus delectatur in vero quod est proprium ejus objectum?* Res: omnis intellectus secundum naturam agens delectatur vero; at intellectui dæmonum est pænale versari circa bonum hominum; contremiscunt ergo non ut creaturæ rationales sed ut damnata. Fides nostra est assensus intellectus ex imperio voluntatis tendentis in bonum; fides dæmonum est assensus coactus perspicuitate argumentorum per quæ Evangelium introducebatur.

8. Fides ergo præcisè considerata, quatenus intellectus fertur in veritates Evangelicas ut veras, dicitur historica. Eadem considerata complexè cum spe & amore quatenus scilicet animus assentit iisdem veritatibus ut bonis, dicitur fides salvifica. Hanc sic explicat Jacksonus in libro Anglicè scripto *de fide salvificâ*. Verum est objectum intellectus, ergo intellectus versatur circa verum cum delectatione; at delectatio est in bono; ergo verum est bonum. Iterum ens & bonum æque latè patent & omne ens fertur in proprium bonum; ergo intellectus inclinatur in verum; at in rationalibus idem est inclinari in aliquid quod est illud appetere; sed appetitus rationalis est voluntas; ergo intellectus est voluntas. Et, ut voluntas includitur in intellectu, sic intellectus etiam in voluntate; nam voluntas non potest appetere bonum nisi ut notum.

9. Potest vero ad hæc dici, quòd anima apprehendit verum per intellectum, in eo verò delectatur per voluntatem. Et intellectus non inclinatur in verum, sed anima per voluntatem inclinatur in verum quod per intellectum apprehendit. Utcunque ratioctniis Jacksoni videtur ostendi inseparabilis quædam Complicatio intellectus & voluntatis, atque adeo veram fidem

fidem in hominibus nunquam esse informem (ut appellant) seu sine Charitate.

10: Idem Jacksonus luculenter ostendit, quòd verba significantia sensum seu intellectum in sacra scripturâ includant plerumque affectus illum sensum rite concomitantes. Sic Psal. 137. 4. *Si obliviscor tui ò Jerusalem &c. i. e. si non angor de excidio tuo.* Sic Nehem: 13. 29. *Memento earum mi deus i. e. Puni sic* Heb. 13. 3. *Mementote victorum &c. i. e. miseremini.* Psal. 1. 6. *Dominus novit viam justorum. i. e. approbat & tuebitur.* Sic Jo. 3. 15. *Quicumque credit in eum non peribit scilicet quia, qui credit obsequitur.* Sic *justificamur solâ fide*; at fide operante. Nam dicit Dominus Mat. 5. 20. *Nisi justitia vestra excesserit justitiam Scribarum & Phariseorum, non introibitis in regnum cælorum.*

11: Atque hinc facile redduntur concordēs S. Paulus & S. Jacobus. Ille dicit: *Justificamur solâ fide sine operibus legis, i. e. legis Mosaicæ.* Quippe disputabat contra Judæos superbientes de observantiis suis legalibus: S. Jacobus dicit, quod *Justificamur fide & operibus* scilicet operibus evangelicis. Non enim disputabat tum temporis contra Judæos sed contra Christianos hypocritas.

12: Nonnulli dicunt bona opera necessaria esse ad sanctificationem & salvationem non autem ad justificationem. Hos sic refutat Jacksonus: tum fides solùm eripit nos ab inferno; bona opera verò in cælum evehunt; quod est multò majus. Iterum, Si bona opera non sunt necessaria ante justificationem sed solùm post, tum supponamus hominem mori in momento justificationis: is non damnabitur, utpote justificatus; nec servabitur, quia dicit Dominus: *nisi justitia vestra excesserit &c.*

13: Sed quomodo justificat fides? num ut opus? Non nulli-

nulli dicunt quòd fides unit nos Christo, & quòd iustitia Christi imputatur omnibus sic ei unitis. Unde etiam fidem appellant manum quâ apprehendimus merita Christi; & justificari est vestimentis indui majoris fratris. Sic Owenus & alii allegorici Theologi, quibus non immorabor, ut pote prorsus debellatis ab Hotchkisso & Sherlocko libris Anglico idiomate conscriptis. Ego mihimet rem sic expedio. Cùm Christus in terris esset, fidem identidem ab iis exegit, quorum gratiâ miraculum faceret. Cur eam exegerit differui. P. 4. f. Jam reputo justificationem peccatoris esse ingens miraculum, gratis quidem a Christo editum, non tamen præberi nisi credentibus ob rationem quam adhibui de aliis miraculis. Summa est; Deus justificat peccatorem *i. e.* solvit à reatu peccatorum. Causa ejus meritoria seu inducens est passio Christi. Fides personæ est conditio seu causa sine quâ non. Inest ergo justificato iustitia inhærens, sed quæ eum non justificat à reatu peccatorum non solum ob imperfectionem, sed quia hæc iustitia est pars officii nostri, nec potest compensare pro delictis. Operando jam bene non solvimus pro malis antè gestis, quia tenemur semper bene operari.

De effectibus fidei.

14: Hi statuuntur: 1^o *Timor Dei.* Nam per fidem apprehendimus Deum ut justum judicem, unde injicitur metus pænæ. Et ubi fides est sine charitate, ut in dæmonibus semper, tum timor est servilis. Ubi verò fides operatur per charitatem, ibi est timor filialis, qui refugit separationem à Deo ut summum malum; vel quo nolumus ei nos æquare ob reverentiam. Per fidem enim existimamus de Deo, quòd sit immensum quoddam bonum, a quo separari est pessimum, & cui vel æquari est malum.

15. Secundus effectus statuitur *purificatio cordis*. Scilicet ab affectibus vitiosis et mundanis. Nam Sicut argentum non redditur impurum commixtione auri sed stanni aut plumbi; sic cor redditur impurum commixtione terrenorum et vitiorum, et purificatur per contrarium motum ad Deum, cuius motus initium est fides. Acto: 15. 9, *fide purificans corda eorum.*

16. E fide etiam historica Christianorum emanat dilectio Dei, spes etiam et fidelitas (in obsequendo scilicet omnibus ejus mandatis), et fiducia seu acquiescentia in Deo, quicquid intentent alia. Quin fides est moderatrix omnium virtutum, quatenus scilicet est oculus, quo Deum (pro hujus status modulo) videmus, et voluntatem ejus cognoscimus. Et est fides per se prima virtus, et principium totius ædificii Christiani. Per accidens autem virtutes morales sunt priores fide, in quantum scilicet remouent id quod prohibet credere. Sic humilitas amouet superbiam, fortitudo timorem.

17. Certitudo statuitur quoddam adjunctum fidei. *Utra autem est certior scientia an fides?* consideratis utriusque causis fides est certior scientia; hæc enim innititur ratiocinationi humanæ, illa veritati divinæ; at ex parte subjecti scientia est certior fide, quia intellectus hominis plenius consequitur scitum quam creditum. Ita Thomas in summâ. Ego puto certo non esse certius, ficut nec pleno plenius. Ratiocinatio etiam humana est opus Dei non minus quam fides, et ejus veracitatem non minus gerit. Quin ipsa fides divina dependet a variis ratiocinationibus humanis, ratione teneo Deum esse, esse veracem, hæc dixisse &c.

17. Licet verò fides Christiana sit per se certissima;

ma ut ostensum est primâ parte; tamen per infirmitatem humanam sæpe et in multis vacillat. Verum hanc ipsam vacillantem fidem accipit Christus & fovet, ut ostensum est 4. p. sec. Mat. 12. 20, *calamum atritum non franget.*

Obj. *Si fides est semper certa, quomodo dicitur vacillare quomodo dicitur Exigua?* Respondeo: actus fidei habet semper certitudinem annexam; sed fides non semper agit, verum actus ejus interpolantur multis aliis cogitationibus, interdum etiam fidei contrariis & ejus interitum conantibus. Ubi hi conatus sunt fortes & frequentes, fides dicitur exigua & vacillans, aliquando etiam abigitur. Itaque ingens nascitur confirmatio fidei ex ejus frequenti exercitio; quippe quod possessionem animæ quasi soli fidei vendicet, dubitationibus nullo loco relicto.

Ob: Sed obiter, *Si certo non est certius cur comparatur certus?* Resp: certior i. e. meliori jure certus. Vide sis Inquisitionem sec. 2.

Ob: *Visio est certior auditu, ergo scientia fide.* Res: Sensus videndi & audiendi sunt æquè certi; sed quo ad objecta visio est plerumque certior auditui. e. certiores plerumque sumus de visis quàm de auditis, quia plerumque audimus ab hominibus qui frequenter sunt mendaces. Quæ verò ex Deo audimus sunt omnium certissima, quia ipse est prima veritas.

19. Aliud quasi adjunctum fidei Christianæ statuitur donum intellectus Esai: 11: 12 *Requiescet super eum &c.* Est dictum de Christo, & intelligendum quadantenus de omni Christiano per derivationem à Christo. Per donum intellectus significatur lumen supernaturale homini datum ad cognoscendum ea quæ per lumen naturale cognoscere non valet. Annectunt etiam fidei donum scientiæ menti ad credenda à
non

non credendis ; & facienda à non faciendis lumen subministrans.

De Oppositis Fidei.

20: Fidei ipsi opponitur infidelitas. Ea sumpta secundum puram negationem. *i. e.* merè non habere fidem, non est peccatum, sed potius poena sequens ex peccato originali. Jo: 15. 22. *Si non venissem & loquutus fuisssem, non habuissent peccatum. i. e.* Eorum infidelitas non imputaretur iis ut peccatum. At infidelitas ut contraria fidei est gravissimum peccatum, utpote contemptus bonitatis divinæ.

21: Infidelitatis numerantur tres species: Gentilismus, Judaïsmus & Hæresis. Gentilismus est materialiter maxima infidelitas; sed formaliter in quantum infidelitas est peccatum, Judaïsmus est gravior, quia acceperunt figuram evangelii, quæ erat quasi auro-ra respectu diei evangelicæ. Gravissima ad huc est hæresis, quæ renititur fidei claræ. Hæretico tamen sæpe in animo est assentiri Christo, sed pro doctrinis Christi eligit quæ sua mens suggerit. Verùm cum diversi à diversis statuatur judices doctrinarum Christi, pene omnes Christiani à suis oppositis hæretici convitiosè appellantur.

22: Apostasia est fastigium hærese, scilicet generalis defectio à fide. De hac en doctrinam Aquinatis 22: q. 12. a. 2. *Quam citò aliquis denunciatur excommunicatus propter apostasiam à fide, ipso facto ejus subditi sunt absoluti à Dominio ejus & à juramento fidelitatis quo ei tenebantur.* Et objicienti, quòd Julianus Apostata habuerit sub se Christianos milites, respondet, *in civitate Ecclesiæ ista facta fuisse, eam quippe tum non habuisse vim terrenos principes coercendi.* Et

tam in tolerabilem doctrinam probat solâ autoritate Gregorii septimi. *Nos sanctorum prædecessorum statuta tenentes, eos qui excommunicatis fidelitate aut iuramenti sacramento sunt constricti, Apostolicâ autoritate à sacramento absolvimus, & ne sibi fidelitatem observent, omnibus modis prohibemus.* *Observa* 1. principes dominio privari non ob apostasiam solam sed ob excommunicationem quacunque de causâ. *Observa* 2. apud illos omnem hæresin esse apostasiam, nec ullum articulum credi ab eo qui unum rejecit. Verum hanc doctrinam suam esse ad extremum halitum negant Nostrates Jesuitæ, scilicet Gregorio & Aquinate mitiores.

23: Blasphemia derogat Deo, vel negando ea quæ ei conveniunt, vel attribuendo ea quæ non conveniunt. Quicquid enim non est Deus, est infinitè infra Deum. Quatenus blasphemia fit ore, opponitur confessioni fidei; sed fit etiam corde, nam damnati amant adhuc peccata sua, & anguntur de iis solum ob poenas quas peccatorum ergo patiuntur. Itaque etiam detestantur justitiam divinam. Fit autem blasphemia vel secundum solam opinionem intellectus, vel etiam adjunctâ quadam affectus detestatione.

24: Dono intellectus & dono scientiæ opponuntur cæcitas mentis & hebetudo sensus. Cæcitas mentis est privatio ejus quod est principium visionis mentalis. Hoc principium est triplex; 1. lumen naturæ, quod nunquam ollitur à mente, non nunquam tamen impeditur ab operando per impedimenta virium inferiorum quibus indiget intellectus humanus ad intelligendum, ut patet in amentibus & furiosis. 2. lumen gratiæ, & hujus amissio est poena peccati. If: 6: 10. *Excæca cor corporis hujus.* 3. aliquod intelligibile princi-

principium, per quod homo intelligit alia. Huic autem mens hominis potest intendere vel non intendere. Non intendere autem oritur vel é spontaneâ averfione Psal. 36. *Noluit intelligere* (scilicet divina) *ut bene ageret.* Vel oritur ex occupatione mentis circa alia quæ magis diligit. Utroque modo hæc cæcitas menetis est peccatum.

Ob: Jo: 9. 41. *Si cæci essetis non haberetis peccatum, &c.* Si cæci essetis ex naturali infirmitate. Hebetudo sensus est quædam debilitas mentis in considerando spiritualia.

S E C T. IV.

De Spe.

Omnes Christiani profitentur spem vitæ æternæ.

1: **P**Rincipale objectum spei Christianæ est vita æterna; quin & omnia alia bona sperant Christiani; nam *qui filium dedit, quomodo cum eo non dabit omnia?* At ista inferiora sperant secundariò & ut adjumenta ad vitam æternam procurandam.

2: Fundamentum spei Christianæ est *veracitas* Dei, qui promisit vitam æternam omnibus evangelio perseveranter obsequentibus: & ejus *benignitas* ad præbendum auxilia necessaria ad obsequendum evangelio. per fidem innotescit nobis, quod ad vitam æternam possumus pervenire; Nam dixit Christus:

venite ad me omnes qui lassí estis, &c. Innotescit etiam, quòd ad hoc paratum est nobis divinum auxilium; scribitur enim: *Ecce, sto ad portam & pulso, &c.* Rev: 3. 20. Anima ergo innitens promissis & auxilio Dei, per *spem* prægustat vitam æternam. Et per hoc patet, quomodo spes nascatur è fide.

3. Nonnulli parum esse putant sperare sibi vitam æternam, certitudinem affectant; scilicet Deum cordi inspirare: *Ego te nunquam deseram.* Rege & ecclesiâ exultantibus egi aliquot annos Hentone Divi Georgii in ædibus nobilissimi Domini Poulett, quâ familiâ non erat alia tum temporis in Angliâ terrâ Heroum feracissimâ, aut fidelior Regi, aut amicior Ecclesiæ, aut omni virtute illustrior. Erat ibi parochus *Mr. Hallet* qui stabat à partibus presbyterianis. Is tredecim deinceps habuit conciones super hoc divino (ut ille appellitabat) axiome: *Finis ultimus hominis proxime ad gloriam Dei est adipisci certitudinem futuræ beatitudinis.* Novissima concio impendebatur his duabus quæ stionibus: *An hæc certitudo sit necessaria ad salutem? &c: An hæc certitudo possit amitti?* Priori respondit ille negativè; Oblitus quòd hanc certitudinem posuerat finem totius humanæ vitæ proximum ultimo. Quid? num omnis nostra opera impendenda est dono sine quo possumus esse beati? Secundæ respondit ille affirmativè. Quid? Fuisti certus de vitâ æterna & jam non es certus? Quæ malum est hæc incerta certitudo? Meministi quo titulo certus eras, ergo & jam certus es. Si Deus dixit: *Nunquam te deseram,* Certus es de Dei favore, nisi verbis ejus potes diffidere. Summatim, si perseveranter obsequor Evangelio, certus sum de vitâ æternâ; sed spero quòd perseveranter obsequar Evangelio;

vangelio; ergo spero de vitâ æternâ. Et qui ultra hanc spem, ullam certitudinem vitæ æternæ (sine quidem particulari revelatione) sibi arrogat, is non verbo Dei sed suis furiis innititur.

4: Quod ad subjecta spei Christianæ, certum est eam non esse aut in beatis aut in damnatis, nec quidem nisi in solis fidelibus, cum fide prorsus enascatur. Quod verò sit spes post hanc vitam disputant nonnulli ex 1. Cor. 15. 19. *Si in hac vitâ tantum habemus spem, essemus omnium hominum miserrimi.* Resp: in hac vitâ tantum *i. e.* in rebus hujus vitæ tantum.

5: Spei affigunt donum timoris Dei. Objectum autem timoris est malum & id unde malum emanare potest. Deus non potest timeri ut malum ipsum, quia est ipsa bonitas. Debet autem timeri à peccatoribus, ne iis malum ex eo obveniat, quia est justus.

Ob: *Omnia opera Dei sunt bona.* Resp: Supplicium peccatoris est bonum absolute quia est justum; est malum secundum quid tantum. *i. e.* peccatori; & eatenus pœna non est à Deo qui inflixit, sed à peccatore qui meruit.

6: Timor est vel mundanus, cum metu mundi à Deo avertimur; vel servilis, cum ad Deum convertimur metu pœnæ tantum; vel filialis seu Castus, cum ad Deum convertimur metu culpæ seu offensæ; vel initialis, cum ad Deum convertimur metu & pœnæ & culpæ.

7: Timor mundanus nascitur ex amore in ordinato mundi; itaque est malus, ut à mala radice.

8: Timor servilis est malus quoad defectum charitatis; quod ad substantiam videtur esse bonus, & eatenus manere etiam, adveniente charitate. Nam est secundum-

cundum naturam quòd nosmet amemus & vitemus nocua. Et sine dubio timor fervilis disponit ad filialem.

9: Timor Domini dicitur initium sapientiæ. Psal. 111. 10. Sapientia quoad essentiam est ex articulis fidei, quoad opera initium habet ex timore Dei. Sapientiæ enim est regulare humanam vitam secundum rationes divinas, adeoque hinc initium sumit, quòd homo revereatur Deum, seque ei subjiciat, (quod est timoris filialis) sic enim consequenter in omnibus secundum Deum regulabitur. Timor etiam fervilis est initium sapientiæ, tanquam extra disponens; in quantum scilicet quis timore pœnæ discedit à peccato, & per hoc habilitatur ad effectum sapientiæ

10: Charitate crescente crescit filialis timor; crescente quippe causâ, crescit effectus. Perfectus autem amor ejicit timorem servilem, quoad servilitatem prorsus quidem. Crescente autem charitate decrescit timor fervilis quoad substantiam. *i. e.* quantò quis magis diligit Deum, tantò minùs timet pœnam; 1. quia minùs attendit ad proprium bonum; 2. quia firmiùs inhærens magis confidit de præmio.

11: Ad donum timoris attinet paupertas Spiritus, quæ est exinanitio inflati; vel etiam est abjectio temporalium; & videtur idem sonare quod abnegatio sui. Qui enim perfectè subjectus est Deo non magnificat seipsum per superbiam, nec opem expectat à divitiis, honoribus aut aliâ quacunque re sine Deo. Psal. 20. 7. *Hi in curribus, hi in equis, nos autem in nomine Domini nostri.* Non est ergo Christianus pusillanimus, sed fretus Deo parvi habet alia. Sic, cùm Christianus abnegat se, sibi maximè consulit; quippe ista relinquens ad Deum aspirat.

12. Spei opponitur desperatio, quæ nascitur é falsa opinione de Deo, quasi aut non det penitenti veniam, aut non offerat peccanti gratiam. Itaque desperans suam culpam anteponit bonitati Dei.

13. Spei etiam apponitur præsumptio, utpote ejus excessus; ut cum quis veniam expectat pro peccatis sine poenitentia, aut vitam æternam sine bonis operibus. Desperatio contemnit misericordiam Dei, & præsumptio justitiam.

S E C T. V.

De Charitate.

Præceptum charitatis apud Christianos est. Diliges Dominum Deum tuum toto corde tuo, & totâ animâ tuâ; & tota mente tuâ; & proximum sicut teipsum.

1: **D**eus est diligendus propter seipsum, cum non habeat aliunde quod sit bonus. Immenſa tamen utilitas nobis accreſcit ex hoc amore Dei. Itaque etiam ſpes. & timor ducunt ad amorem Dei diſpoſitivé. Sicut diſponimur ad amicum diligendum per beneficia accepta, ſed poſtquam amare incepimus, non propter illa beneficia amicum diligimus, ſed propter ejus virtutem. Eſt ergo Deus diligendus, & quia eſt oceanus omnis

omnis perfectionis in seipso, & quia est fons omnis perfectionis ad nos derivanda.

2: Ut fides & spes, sic etiam charitas statuitur esse habitus mentis infusus. Magister autem Sententiarum dicit charitatem esse ipsum Spiritum sanctum, qui operatur in animâ dilectionem immediatè, i. e. nullo habitu mediante. Aquinas hoc sic refutat: Habitus reddunt potentias promptas in agendo, at promptitudo maximè relucet in dilectione; ergo si ullus est habitus mentis, certè charitas est habitus. Et, Si Spiritus sanctus produceret dilectionem in animâ non concurrente activè, tum dilectio non esset voluntaria (quod est contra essentiam dilectionis), nec nostra quidem.

Ob. Deus est amor. Resp: Deus amat creaturas, & hic amor est Deus, & noster amor est participatio amoris divini.

Ob. 2: Deus est vita animæ, Deut 30: 20. *ipse est vita tua*. Sed anima vivificat corpus per seipsam, ergo & Deus vivificat animam per seipsam. Resp: Deus est vita animæ effective non formaliter.

3: Charitas est una virtus, licet feratur in Deum & proximum; quia fertur in proximum ratione Dei.

4: Fides attingit Deum, ut revelatorem articulorum; Spes ut communicaturum nobis beatitudinem suam; Charitas Deum amplectitur in totâ suâ perfectione; itaque maxima harum est charitas.

5: Charitas à Servatore statuitur summa legis; quia scilicet omnes nostræ actiones debent ordinari ad Deum ut summum bonum & finem ultimum, ac proinde procedere debent ex charitate seu amore Dei. Amor Dei super omnia subjicit omnia Deo. Atque ob hanc ordinationem actuum nostrorum ad Deum,

Deum, Charitas non malè (licèt impropriè) dicitur forma virtutum; quia scilicet perficit earum actus , eos ordinando ad Deum. Itaque etiam à Sancto Jacobo Charitas comparatur ad fidem, ut anima ad corpus. Sic etiam Charitas dicitur *radix & fundamentum*, Eph. 3. 17 quoniam ab eâ sustentantur & nutriuntur omnes aliæ virtutes ; & sine quâ nihil bene geritur. 1. Cor. 13. 1, 2, &c.

6 Charitatem posse amitti videtur ex Apoc: 2. 4. *habeo adversus te pauca, quoniam primam Charitatem reliquisti*. Charitas enim viæ non est perfecta, quia non fundatur in visione Dei secundum essentiam, sed in ænigmaticâ visione fidei, itaque nec semper acta versatur circa Deum, & tum cùm non ita versatur, potest aliquid occurrere quod invitet animum labilem ad peccandum.

Ob: *Charitas excludit omne motivum ad peccandum*. Resp. Quamdiu Charitas agit, sed non aliàs.

7: Statuitur in scholâ Charitatem amitti ob unum peccatum mortale; nam Charitas est via ad cœlum, peccatum mortale ad gehennam. Quia tamen actus peccati non directè opponitur habitui Charitatis, sed ejus actui & ratione actus habitui, itaque reputant multi, Charitatem per unum peccatum grave pessundari quidem, sed non amitti nisi paulatim & per plura peccata. Mihi incredibile est Petrum non dilexisse habitualiter Christum etiam tum cùm eum negaret. Scilicet per gravem tentationem sopitus fuit ardor Charitatis, qui tamen citò se suscitavit: Nam ut respexit Dominus, *Exivit Petrus & flevit amare*.

8: Charitas est quædam amicitia cum Deo qui communicat nobis beatitudinem suam. Jo: 15. 15.

Ec

Jam

Jam non dico vos servos, sed amicos meos. Itaque Charitas Dei causâ extenditur ad proximos etiam peccatores, etiam inimicos; in quantum scilicet sunt creaturæ rationales & capaces beatitudinis. Mat. 5: 44. *diligite inimicos vestros.* Cum angelis etiam & animabus beatis Charitatem colimus, utpote qui jam sunt ubi nos fore speramus.

9: Quatuor ponuntur specialiter diligibilia: *Deus* ut fons beatitudinis; *Nos ipsi* ut capaces beatitudinis; *Angelus & homo* ut consortes nobis in hac capacitate; tum *Corpus nostrum*, ut id in quod derivabitur beatitudo ab animâ. Diligimus quidem proximum & secundum animam & secundum corpus, sed utrumque ratione consociationis in beatitudine. Ex parte ergo proximi est una tantum ratio dilectionis, itaque nec corpus ejus ponitur ut speciale diligibile

10: Deus est diligendus magis quàm nosipsi; nam bonum quò communius eò melius; at Deus est commune bonum omnium. Non puto tamen posse animam amare Deum cum expressâ renunciatione suæmet beatitudinis; nam amor Dei est certissima causa nostræ salutis; eumque à salute nostrâ separare, est loqui contradictoria; & potest fieri ore non mente.

11: At quisque debet magis diligere seipsum. *i. e.* partem spiritualem, quàm proximum. Nam diligit seipsum ut possessurum beatitudinem, proximum ut ei consociandum in hac possessione: Sed majus est bonum habere beatitudinem quàm habere socium in beatitudine, ut unitas potior est quàm unio. Itaque etiam amor nostri est regula amoris erga proximum. *proximum sicut teipsum.* proximi tamen anima perferenda est proprio corpori; quia (inquit Aquinas) proximus

mus confociabitur in gloriâ perfectâ corpus solum in gloriâ per redundantiam. Sed revera corpus nostrum postponimus animæ proximi, quia fors corporis est momentanea, animæ æterna. Hinc ponenda est *vita pro fratribus* scilicet ubi tenemur eorum salutem consulere.

12: Num omnes proximi sunt æqualiter diligendi? Non puto; nam maledicere parentibus est gravius peccatum quàm maledicere aliis hominibus; ergo major dilectio debetur parentibus. *Quis ergo servandus est ordo?* Principium dilectionis est Deus & ipse diligens; ergo secundum majorem propinquitatem ad Deum & ad diligentem major Charitas debetur. Hæc tamen intensio est solum in actu dilectionis non in bono quod optamus; debemus enim optare omnibus summum bonum.

13: Dilectio inimici præminet dilectioni amici quoad duo. 1º. quia potest esse alia ratio præter Deum diligendi amicum; solus Deus est ratio diligendi inimicum. 2º, supposito quòd amicus non diligitur nisi propter Deum, tamen diligere inimicum probat fortiorem esse Charitatem erga Deum, quæ in remotiora tendit & difficiliora superat; sicut quòd fortior est ignis, eò remotiora comburit. Intensior tamen est dilectio amici quam inimici, sicut etiam ignis fortius agit in propinquiora.

Effectus Charitatis.

14: Principalis actus Charitatis est dilectio; quæ ultra benevolentiam importat unionem affectus, in quantum scilicet diligens æstimat dilectum ut ad se pertinentem & quasi unum sibi. Benevolentia autem est

quā volumus alicui bonum, etiam non præsuppositā dictā unionē affectus.

15: Effectus consequentes dilectionem Charitatis sunt interni vel externi: interni sunt gaudium, pax & misericordia. Gaudium Charitatis est duplex. Prius est de infinitā Dei beatitudine; ut solemus gaudere quod amici bene se habeant, etiamsi nihil inde nobis proventurum sit. Posterius gaudium est de nostrā divinæ beatitudinis fruitione. Prius nascitur ē Charitate, posterius ē Charitate & spe. Rom. 12. 12. *Spe gaudentes*. Prius non patitur admisionem luctus, quia bonum divinum est incommutabile; posterius admittit luctum de peccatis quæ impediunt.

16: Concordia est unio appetituum in diversis appetentibus; & potest esse in malis. Pax spiritualis huic addit unionem appetituum in eodem appetente. Nam appetitus sensitivus est plerumque insensu rationali, & voluntas naturalis motibus gratiæ. Gal. 5.

17 *Caro concupiscit adversus Spiritum*. Quin idem appetitus sæpe in diversa fertur, quæ tamen simul assequi non potest. Unio autem horum appetituum est pax; tum enim solum habet quis cor pacatum cum habet id quod vult.

17: Jam vide sis quomodo hæc pax nascatur ē Charitate. Caritas est amor Dei super omnia; quia nos efficit omnia Deo submittere. Ecce unio appetituum in nobismet. Iterum, Caritas est amor proximi ut nostrimet; qui nos efficit appetere bonum proximi ut nostrummet. Ecce unio appetituum nostrorum cum aliis. Dissensio tamen in opinionibus potest esse in Charitatem habentibus, ut inter Paulum & Barnabam.

18: Misericordia est dolor de miseriā alienā. Hæc quatenus est motus appetitus sensitivi est *passio*. Quando verò

verò est motus appetitus intellectivi, secundum quem alicui displicet malum alterius, atque hæc displicentia regulatur per rationem, tum misericordia non est *passio* sed *virtus*. *Misericordia autem servit rationi, quando ita præbetur misericordia, ut servetur justitia, sive cum indigenti tribuitur, sive cum ignoscitur penitenti.* Aug. de 9. civi. Dei. l. 9. c. 5.

19: Actus exteriores Charitatis ponuntur, Beneficentia, Eleemosyna & correctio fraterna. Voluntas est effectiva eorum quæ vult, si facultas adsit; itaq; quæ est benevolentia parit beneficentiam. Si quidem bonum collatum est debitum, tum beneficentia pertinet ad justitiam; quatenus est non debitum, pertinet beneficentia ad liberalitatem; quatenus est collatio boni absolute, sic pertinet ad Charitatem seu amicitiam.

20: Eleemosyna est opus quo datur aliquod indigenti propter Deum; & sic est actus Charitatis misericordiâ mediante.

Ob: 1. Cor. 13. 3. *Si distribuero in cibos pauperum omnes meas facultates, Charitatem autem non habuero, &c.* Ergo Eleemosyna potest esse sine Charitate. *Resp.* Eleemosyna materialiter, i. e. aliquid datum indigenti potest esse sine Charitate; sed formaliter dare Eleemosynam, est dare propter Deum, promptè etiam & hilariter; & sic est ex Charitate. Eleemosynæ sunt corporales vel spirituales, duobus versibus juxta posite:

Visito, poto, cibo, redimo, lego, colligo, condo:

Consule, castiga, solare, remitte, ser, ora.

21: Correctio fraterna est spiritualis quædam Eleemosyna. Ejus finis est emendatio fratris; itaque fieri debet solum in circumstantiis isti fini congruis; sicut om-

omnia præcepta affirmativa ligant semper sed non ad semper. Correctio iustitiæ pertinet ad solos præfectos. At subditi etiam ex Charitatè, possunt admonere suos prælatos; sed cum omnimodâ cautione. Hoc autem officium minimè decet hominem notæ nequitia Rom. 2. 1. *In quo alium judicas, teipsum condemnas.* Imò, si ipse tibi es malè conscius, impudentia erit velle alium corrigere Mat. 7. 5. *Primum erue trailem ex oculo tuo, & tum clare videbis festucam ex oculo fratris eximere.* Imo, quia reprehensio videtur supponere eximiam virtutem reprehensoris vide ne onerosus sis fratri, non solum ejus vitium patefaciendo, sed etiam tuammet extollendo virtutem. Correctio fraterna est officium sed & cautè & parcè exercendum. Certè quos ego unquam novi promptos Correptores (nisi ubi ex particulari munere incumberet) ferè omnes ostendebant magis calorem cerebri, quàm cordis Charitatem.

Vitia Opposita Charitati.

22 Ea sunt id. odium Dei & proximi. Deus secundum essentiam est ipsa bonitas, nec potest odio haberi. Ratione etiam quorundam effectuum, ut sunt esse, vivere, intelligere, Deus non potest haberi odio; nam isti effectus diliguntur ab omnibus. In quantum autem Deus apprehenditur ut peccatorum prohibitor et vindicator, potest ab inordinatâ voluntate odio haberi Jo. 15. 24. *Nunc & viderunt & oderunt me & patrem meum.* Odium Dei est gravissimum peccatum, nam optimo opponitur pessimum, at odium Dei opponitur ejus dilectioni. præterea, odium Dei est formalis a versio à Deo, quæ non est nisi annexa cæteris pec-

peccatis; nam fur (e.g.) optaret furari non esse offensam in Deum.

23: Quantum ad proximum, debemus eum amare secundum id quod habet à Deo, i. e. secundum naturam & gratiam. Odisse autem ea debemus quæ habet à se & à Diabolo, i. e. peccatum; nam odium est ex amore. Odium proximi secundum naturam aut gratiam est gravissimum peccatorum in proximum, quantum ad deordinationem; quantum autem ad effectum odii, quod est nocere, alia quædam peccata magis nocent, ut furtum & homicidium.

24: Gaudio Charitatis erga Deum opponitur acedia, quæ contemnens dotes possessas, eas non exercet; & videtur esse initium desperationis.

25: Gaudio Charitatis de bono Proximi opponitur invidia, quæ est tristitia de alienis bonis; quatenus scilicet alterius bonum concipitur ut proprium malum, i. e. diminutivum suæ gloriæ vel excellentiæ. Si verò alienum bonum concipitur periculosum sibi, ut cum quis tristatur de exaltatione inimici, tum hæc non est invidia sed quasi iusta tristitia.

26: Invidia statuitur vitium capitale, ejusque filia nominantur. 1o. *Sufurratio*, diminutio occulta gloriæ alienæ; 2o. *detractio*, aperta diminutio gloriæ alienæ; 3o. *exultatio* in alienis adversis; 4o. *Afflictio* in rebus alienis prosperis; 5o. *Odium*, quod nascitur è tristitia, sicut bonum delectans parit amorem.

27: Opposita paci sunt *Discordia*, *Contentio*, *Schisma*, *rixa*, *Bellum*, *Seditio*. *Discordia* est peccatum & numeratur inter opera carnis Gal. 5. 20. *Odium discordia* &c. Ea est dissensio circa bonum divinum aut circa bonum proximi. Jam vix quisquam possit velle diminutionem boni divini; sed per accidens & præter intentionem accidit discordia de hoc; nimirum cum unus putat hoc esse ad Dei gloriam, alius contra

contrā sentit. Dissensio autem sive circa bonum divinum sive humanum, interdum est culpa utriusque partis interdum unius partis tantum.

Ob. Voluntas unius non est regula voluntatis alterius, ergo discordia non est vitium. *Resp.* Voluntas unius non est de se regula voluntatis alterius; sed in quantum voluntas proximi inhaeret voluntati Dei, sit per consequens regula regulata, & ab eā discordare est discordare à voluntate Dei, quæ est regula omnium voluntatum.

Obj. 2. Excitavit S. Paulus discordiam inter Phariseos & Sadduceos. *Resp.* Eorum concordia erat mala & conspiratio in malum, itaque bene solvebatur. Nec tamen inexit discordiam S. Paulus, sed in memoriam reduxit eam quæ erat alta mente reposta.

28: Discordia autem Sancti Pauli & Barnabæ oriebatur per accidens & pertinebat ad humanam infirmitatem, & disponebatur à Deo in bonum finem. Est demum discordia communiter filia inanis gloriæ; nam ideò quis discordat ab aliis inordinate, quia inordinate præfert sua alienis; quod est superbiæ.

29: Contentio est contrarietas locutionis. Hæc acrimonia in impugnanda veritate est de se peccatum; at si adhibetur contra falsum, & convenit personis ac negotiis censetur laudabilis. Verùm sic etiam sæpe generat scandalum. 2 Tim. 2. 14. *Non contendere verbis, ad nihil enim est utile, nisi ad subversionem audientium.* contentio vitiosa est filia superbiæ sicut & discordia. De Schismate aliquatenus dictum est 24. parte.

30: De Bello solum dico illud non esse semper illicitum

citum. Dixit Militibus Johannes: *Estote contenti stipendii vestris.* Quibus autem proprium stipendium sufficere præcepit, eos militare non prohibuit. Et S. Paulus dicit quod *Magistratus est Minister Dei in iram ei qui male agit.* Sed non est magis necessarius gladius iustitiæ ad cohibendum turbatores qui sunt intus, quam est gladius bellicus ad Rempublicam tuendam ab externis hostibus. Ut autem bellum sit iustum tria requiruntur, *Authoritas indicientis, causa iusta, & recta intentio* nimirum ut promoveatur bonum vel malum vitetur.

Obj. Es. 24. Non discent bellare. Ubi loquitur de tempore Evangelii. *Resp.* Si omnes sinceris animis capefferent Evangelium, non esset locus bello; quod ut res se nunc habent est aliquando necessarium.

31. Rixa est quando ex ira privati se invicem percutiunt; ut sit quoddam privatum bellum, atque adeo semper illicitum ac procedens ex inordinatâ voluntate, cum quisque per jura quod suum est tueri possit. Qui verò solo animo repellendi injuriam illatam, cum moderatione animi se defendit, is non peccat sed agit secundum naturam, cum non detur mora in jus vocandi. Nec est hoc rixa ex ejus parte.

32. Seditio est inter partes ejusdem communitalis inter se dissidentes tumultus. Opponitur unitati & paci multitudinis, itaque semper est peccatum in excitate.

33. Beneficentiæ Charitatis opponitur *scandalum*, quod est dictum vel factum minus rectum præbens alteri occasionem ruinæ. Dicitur minus rectum, quia nihil secundum propriam rationem disponit ad spiritualem ruinam, nisi quod habet aliquem defectum rectitudinis. Perfectè rectum potius munit alios contra

casum. Hic defectus rectitudinis est interdum reipsa malum, ut *peccatum*; interdum est tantum species mali, ut discumbere in templo idoli. Hoc non est secundum se malum, quia idolum nihil est, habet tamen speciem mali, scilicet similitudinem venerationis idoli. Itaque Apostolus monet *abstinere ab omni specie mali*; 1 Thes. 5. 2. Dicitur præbens occasionem non causam, nam causa ruinae est ipsa voluntas ruentis, quæ tamen invitatur per scandalum.

34. Si quis dicto vel facto minus recto, intendit ruinam alterius, vel si non intendit, tamen dictum vel factum est de sua natura inductivum ad peccandum, tum scandalum est *activum & datum*. Si autem præter intentionem dicentis aut operantis, & præter conditionem dicti vel facti aliquis male affectus ex huiusmodi dicto aut facto inducitur ad peccandum, tum scandalum est *passivum*, *acceptum non datum*. Scandalum quod intenditur directe, opponitur correctioni fraternæ. Cum Christus dicit Petro: *Tu es mihi scandalum*; scandalum ibi sumitur large pro impedimento.

35. Charitati adnectitur donum Sapientiæ, quæ homo rectè judicat de divinis. De his rectè judicare per inquisitionem rationis est sapientiæ illius quæ est virtus intellectualis. De iis autem rectè judicare per connaturalitatem ad ea pertinet ad sapientiam quæ est donum Spiritus sancti. Sic timor Domini dicitur sapientia, *i. e.* manifestat sapientiam; per hoc enim ostenditur quòd homo habet rectum iudicium de divinis, quòd Deum timet & colit. Sapientiæ donum quod ordinatur ad aliorum salutem non est necessario in omnibus Sanctis, sed *Spiritus flat prout vult*. At sapientia quæ ad nostram salutem dirigimur, est communis omnibus Sanctis; nam Natura non de-

deficit in necessariis, multò minùs gratia.

Obj. *Num etiam infantes & amentes baptizati sapientiam?* Respondetur communiter quòd habent sapientiae habitum, sed non actum ob impedimentum corporeum. Mihi non est verisimile, quòd Deus ordine gratiae infunderet habitum, cujus actum ordine naturae impedire statuit. Saniùs puto dici eos habere sapientiam, fidem, &c. non in formali possessione, sed in acceptatione Dei propter Christum, qui passus est pro omnibus.

Jamque progrediendum esset ad considerationem Virtutum moralium, nisi quòd de iis quid dicendum putavi, dictum sit in Terriâ Parte. Itaque pergo rectâ ad Partes obedientiae Christianae.

S E C T. VI.

De Partibus Obedientiae Christianae generatim.

Omnes Christiani agnoscunt, Christum suis multa praecepisse, iisque Praeceptis Christianorum obedientiam deberi.

Nonnulli quidem Arianismi dicti videntur statuisse, Evangelium esse quandam quasi fruitionem, eique nihil subesse officii. Sed ii tam pauci fuere, tam vesani & tam apertè bellabant contra Scripturam sacram, ut eorum mentionem non fecissem, nisi numeris temporibus, cum Nostratum valde multi insanirent, hoc etiam furore nonnulli fuissent correpti. Appellabantur *Manichaei*, impium genus hominum, & à Deo inter ceteras istorum temporum pestes permisum, ut erudiamur quàm sit nulla pars Christianismi

tuta, concessâ semel licentiâ errandi. Con'ra illas belluas paucos ex infinitis Textibus adducam, Jo. 14. 15. *Si me diligitis, servate mandata mea.* 1 Jo. 5. 3. *Mandata ejus non sunt gravia.* 1 Cor. 7. 10. *Conjugibus præcipio, nec tamen ego sed Dominus.*

2. Omnis autem obedientia Christiana (certè quæ omnibus Christianis communis est) stare videtur in bonis moribus & cultu Christiano. Bonos mores appello constans exercitium virtutum. Ac de hac parte obedientiæ Christianæ actum est, quoad virtutes qui idem morales in Tertiâ Parte, quoad virtutes Theologicas in tribus superioribus Capitibus.

3. Cultus Dei in genere est prorsus moralis & est pars Justitiæ, ut demonstratum suppono in Ethicâ. Cultus verò Christianus (quantum ad id quod adfert de integro) est prorsus constitutivus & totus natus ex arbitrio Domini.

4. Cultus Christianus integrari videtur fide & ejus Professione, Precibus, Adorationibus, Laudibus, Sacramentis, Cæremoniis, Prædicatione & auditu Verbi. De Fide & ejus Professione jam modò differui, eam tamen adnumero Partibus Cultus Christiani, quia Deum maximè colimus in eum credendo, sicut maximus qui potest honor exhibetur homini qui rex eligitur, scilicet quia populus ei se credit. Pariter differere licet de Spe & Charitate,

5. Dictis Partibus addunt nonnulli tanquam secundarias, *Erogationes* nimirum *Sacrificia*, *Oblationes*, *Primitias*, *Decimas*, &c. tum etiam *Juramentum*, *adjurationem* & *Promissiones* seu *Vota*,

6. Quod ad modum, Cultus Christianus est privatus vel publicus. Cultus privatus continetur intra parietes unius pectoris aut unius camerae aut certè unius familiæ. Cultus publicus peragitur à cœtu hominum, & est

est propatulus omnibus fidelibus. Cultus publicus est majoris longè momenti quàm privatus. Nam honor est in honorante, itaque major est qui est à pluribus. Et honor quidem assurgit in nomen gloriæ, si exhibetur à valde multis & claris. Unde sequitur Magnatibus præ aliis incumbere divina frequentare, nam & splendore augent cultum, & autoritate ac exemp'o alios attrahunt. Sequitur etiam Parsimonia studentes in sumptibus ad divinum Cultum necessariis, gloriam Dei vili pendere. Et quicumque levibus aut argumentis aut excusationibus constitutos ad Deum colendum cœtus non adeunt, ii frivola ista gloriæ Dei anteponunt. Sed plenum Tractatum de Religione in genere remitto ad Ethicam, & pergo ad singulas partes Cultus Christiani.

SECT. VII.

De Precibus Christianorum.

Christiani precantur à Deo in Nomine Christi omnia quibus opus habent, cum Fide ea impetrandi; maximeque in usu habent Orationem Dominicam, quæ est: Pater noster, &c.

1. **P**ER Damascenum, Oratio est Petitio decentium à Deo. Per Aquinatem, Oratio est quædam Ordinatio rationis aliquid per Deum efficiendi quod ipsi efficere non valeamus. Nos autem sine Deo nihil possumus, ergo prorsus omnia sunt ab eo petenda. Non petimus quidem levia Oratione expressâ & particulari, sed Oratione generali prorsus omnia quæ nobis sunt profutura.

2. *Sed*

2. *Sed num Deus movetur precibus nostris?* Resp. Divina Providentia non solum disponit qui effectus fiant, sed etiam ex quibus causis & quo ordine proveniant. Itaque oramus non ut immutemus dispositionem divinam, sed ut id impetremus quod Deus disposuit per Orationes Sanctorum implendum esse.

3. Imò Voluntas Dei adeo non mutatur precibus nostris, ut perpetua nostra Petitio sit: *Fiat voluntas tua*. Et hæc Petitio præsupponitur omnibus petitionibus pro bono nostro, *i. e.* submittere nosmet Voluntati divinæ debemus, nec quicquam petere nisi eâ conditione, quod sit Voluntati divinæ consentaneum. Et hujus ratio est, quod nos plerumque fallamur in iudicio de commodis nostris ferendo, Deus autem non solum sciat quid nobis profuturum sit, sed & id omne velit quod est profuturum.

4. Itaque etiam sola illa bona à Deo determinatè petenda sunt quibus nemo malè uti potest, ut gloria & gratia; cætera sunt permittenda Deo qui solus scit an ea sint profutura necne. Temporalia quidem licet petere, non propter se tamen sed ut adminicula in viâ ad beatitudinem. Aug. Ep. 121. *Sufficiunt vitæ non indecenter vult quisquis eam vult & non amplius; quæ quidem non appetitur propter seipsam, sed propter salutem corporis & congruentem habitum personæ hominis, ut non sit inconveniens iis quibuscum vivendum est. Illa ergo cum habentur ut teneantur, cum non habentur ut habeantur orandum est.*

5. Minimè etiam abhibetur Oratio ut manifestentur desideria nostra Deo, qui omnes nostras *cogitationes cognovit longè antè*. Sed ex beneplacito suo aliqua non vult Deus dare nisi petentibus, licet multò plura largiatur non petentibus.

6. *Pro quibus orandum est ?* Pro nobis titulo *Christianitatis* & obedientiæ Christianæ ; & pro aliis titulo *Humanitatis* , *Charitatis* & *Obedientiæ*. Summatim orandum est pro omnibus pro quibus *Charitas* est habenda ; nam *Charitatis* est velle bonum alicui , at quod licet velle licet petere. Unde *Oratio* pro aliis præminere videatur *Orationi* pro nobismet ; nam pro nobismet oramus quasi ex necessitate naturæ cogentis , oramus pro aliis ex liberiore *Charitate*. Pro malis autem orandum est ut convertantur , pro bonis ut perseverent & proficiant. Ac pro bonis quidem oramus triplici ratione. 1. Quia multorum preces facilius exaudiuntur. *Rom. 15. 30. Adjuvetis me in Orationibus vestris.* 2. Ut à multis gratiæ Dei agantur ob beneficia bonis collata. 3. Ut Majores non superbiant , dum reputant se minorum suffragiis indigere. *Christianissima* autem *Oratio* est pro inimicis , utpote quæ *Charitate* enascitur non solum purâ , sed etiam tam validâ ut omnem cupiditatem , vindictæ vicerit & triumphatam ducat in sua castra , i. e. benefacit ubi natura malefacere summopere cupiit.

7. *Sed qualis fides requiritur in Orando ?* Resp. Requiritur firmus assensus toti *Evangelio* , & particulariter illis verbis Domini , *Petite & accipietis* , &c. Nisi enim credis *Evangelio* nondum Christi es , nec in ejus Nomine precaris , cujus tamen solius gratiâ à Deo bona sperare potes. Credendum etiam est quod petita accipiemus , quia nihil petere debemus nisi ad impletionem *Voluntatis Dei*. ut n. 3. & 4. Tum etiam hoc credendum est , quia Christus promisit ; & postremò , quia Deus dedit Filium pro nobis , & quomodo cum eo non dabit omnia ?

8. *Sed cur precamur ea quæ certò scimus esse eventura ; ut quod fiat Voluntas Dei , quod regnum ejus adveniat*

niat, &c? *Resp.* Deus etiam hæc à nobis peti vult, in recognitionem absoluti ejus Dominii & supremæ Bonitatis; tum etiam ut profiteamur eximiam erga Deum Charitatem; nam *idem velle atque idem nolle, eademum vera est amicitia.*

9. Oratio peccatoris procedens ex desiderio peccandi est Deo odiosa, & nunquam auditur ex misericordiâ, sed aliquando ad vindictam; dum Deus permittit peccatorem amplius ruere in peccatum. *Aug. Negat quædam propitius quæ concedit iratus.* At Orationem peccatoris quæ procedit è bono naturæ desiderio Deus audit quidem, sed ex purâ misericordiâ. *Aug. Si peccatores non exaudiret Deus, frustra Publicanus dixisset: Domine esto propitius mihi peccatori.* Deus diligit animam peccatoris, licet pravitatem ejus odio habeat.

10. *Sed num Petitiones nostræ ad solum Deum dirigendæ sunt? Resp.* Ad solum Deum absolutè, quia solus est Author omnium bonorum. Multa tamen invicem petimus Mortales sub intuitu fraternæ Charitatis aut etiam Humanitatis ergò, sed non ut ab authoribus bonorum verum ut à Ministris & Dispensatoribus Dei. Gratiam verò & gloriam à solo Deo petere licet, quia solus dare potest. In his tamen possumus precari Sanctos ut orent pro nobis. Sanctos verò mortuos nihil precari debemus, tum quia nullibi ejus habetur in Scripturâ sacrâ aut Præceptum aut Exemplum; tum etiam quia nescimus an animæ beatæ nos audiant nec ne. *Aug. de curâ pro mortuis agendâ: Nesciunt mortui etiam sancti quid agant vivi, etiam eorum filii.*

11. Respondet Aquinas: *Mortuos hæc non cognoscere de suâ naturali conditione, sed quòd pertinet ad eorum beatitudinis perfectionem, quòd in Verbo manifestetur*
iis,

illis, quicquid decet eos cognoscere. Decet autem ut cognoscant petitiones ad eos factas ore vel corde. At quæ mirum est hæc Solutio? Aug. dicit: *Nesciunt mortui etiam Sancti*, &c. Aquin. respondet: *Nesciunt quidem de naturali sua conditione*, &c. At Sancti mortui de sua naturali conditione non sunt beati; num ergo potuit Aug. dicere: Mortui etiam Sancti non sunt beati. Iterum, quis nostrum nōrit quid deceat animam beatam? Certè non est necesse ut sciat terrena, nec ex parte sui quæ satis beata est videndo Deum; nec ex parte nostri quibus abundè sufficit intercessio Christi. Sed scilicet preces ad Sanctos funduntur, ut eorum precibus & meritis orationes nostræ sortiantur effectum. Aquin. Quid? Deus se communicando Sanctis an non satisfecit eorum meritis? An Christi merita & intercessio non sufficiunt ad impetrandum nobis omnia bona? In Ecclesiâ tamen Romanâ Popellus multò sæpius appellat Beatam Virginem quàm ipsum Christum.

12. Preces ad animas beatas novò modo tuetur author Libri Anglicè conscripti, cui titulus *Fiat Lux*. Is negat beatas animas scire corda nostra, nihil etiam cogitatum fuisse ait antiquis Christianis de speculo Trinitatis; Preces autem factas voce ad Sanctos, dirigi sensu ad Deum. Sancta Maria ora pro nobis, *i. e. O Deus exaudi nos Mariæ gratiâ*. Sicut etiam in Vēteri Testamento precabantur Deum Abrahami, Isaaci, Jacobi & Davidis gratiâ.

13. Atque hæc Explicatione bene vulgo infusâ citò frigescerent preces ad Sanctos mortuos. Quotus enim quisque speraret se prius à Deo auditum iri ob merita (misera merita) fervorum quàm ob illa merita Filii sui? Simul eos jube hoc credere & prorsus dementire. Huic tamen ipsi Explicationi fere omne adhæret ve-

nenum appellandi Mortuos, dum Meritis Sanctorum innitendum esse docet, quasi Merita Christi non sufficerent.

14. *Sed quare ita cateruatim curritur ad Sanctos cœlestes? Dicam.* Popellus putat animas beatas non exuisse cum carne facilitatem humanam, & multò exorabiliore esse Majestate Divinâ. Et hanc simplicitatem alunt Magistri docentes, *Summum regem non esse statim adeundum, sed accedentes ad eum opus habere Aulicis per quos introducantur.* Cùm tamen Christus qui solus est Christianismi Doctor, dixerit. *Quicquid petieritis in meo nomine, dabitur vobis.* De intercessionibus Sanctorum ne quidem habetur.

Obj. Cùm Intercessionēs sanctorum vivorum non derogent intercessionī Christi, cur ita horremus ab intercessionē Sanctorum mortuorum? Resp. Intercessionēs vivorum pro fratribus fiunt ex Mandato Christi, & ob sola ejus Merita; & veri simillimum est animas triumphantes eodem modo, i. e. repræsentando Merita Christi intercedere apud Deum pro Militantibus; namque hoc eximiæ eorum Charitatis est. Hoc ipsum tamen ab iis petere non debemus, quia hujus *Præceptum* nec præceptum nec exemplum authenticum habemus. Ad-do: Suffragia Sanctorum vivorum petere est ipsos ad opus sanctum excitare, & quod cessurum sit, tam in ipsorum commodum quàm in nostrum. At Sancti cœlestes sunt in termino nec ulterius augeri possunt.

Obj. 2. *An non Judæi audiebantur ob Merita Patrum?* Minimè ob Merita Patrum, sed ob promissionem Dei Patribus factam; & sic tum balbutire licuit infanti Ecclesiæ. Nobis autem nihil promittitur nisi per & propter Christum, itaque solo ejus Nomine à nobis præcandum est.

15. Atque hæc de Oratione maximè ut est spiritualis & à mente perficitur; alius ejus modus est vocalis cùm desideria animi ore exprimuntur. Atque hoc modo peraguntur omnes Orationes publicæ; sed & Oratio privata & singularis potest esse vocalis. 1. Ut homo serviat Deo secundum omnia. Osee. ult. *Reddemus vitulos nostrorum labiorum.* 2. Ut mens per hoc excitetur ad Devotionem. 3. Vox excitatur ex vehementi affectione animi, Psal. 16. *Lætatum est cor meum, & exultavit lingua mea.*

16. Mens humana est in Oratione vocali ad divagationes prona; tamen si fuit primâ intentione devota, & subinde à divagando se revocat, non dubium est quin preces à bono Deo accipiantur. Alioqui enim vix quisquam hominum bene precaretur, sed etiam bonorum preces verterentur in peccatum. Hinc tamen sequitur concisas preces quas vocamus *Collectas* multò esse commodiores prolixis illis & continuis ante conciones Orationibus quas satis cum tædio nonnulli effundunt. Hæ in somnum proliciunt, illæ celeri suâ varietate revocant & excitant animum; quem etiam inflammant acuta & repetita in Litaniâ nostrâ Ministrî & populi alterna vota.

17. Licet autem sperandum sit à bono Deo misericorditer accipi preces minùs quàm par sit attentas tamen iis deest spiritualis illa refectio mentis quæ ex devotione nascitur, 1 Cor. 14. Si orem linguâ, mens mea sine fructu est.

18. Orationi autem vocali potest adhiberi triplex attentio. 1. Ad verba, ne in iis erremus. 2. Ad sensum verborum. 3. Ad Deum & ad rem quæ petitur. Hæc tertia est maximè necessaria, & potest inesse valdè idiotis. Quinimò mens aliquoties in Deum est tam intentâ ut omnium aliarum rerum obliviscatur.

19. Loquebar de eâ divagatione Mentis inter precandum quæ est per infirmitatem. In Ecclesiâ autem Romanâ cum omnes Gentes ex constituto precentur linguâ Latinâ, ferè omnes tenentur non intelligere quid dicant, quod totum aut est divagatio aut stupor. Hoc aperte contradicit Apostolo, 1 Cor. 14: & rationi infestissimum est quæ de se parens est & ductrix omnium actionum moralium, & sceta principiis revelatis Religiosarum etiam. Psittaci & Picæ loquuntur, at intelligere quid dicas est prærogativa hominis. Certè non mirarer quantaslibet savitias Dominantium in Ecclesiâ Romanâ æquanimiter ferri, cum videam eos persuasisse populo ut decedant de hoc jure naturæ humanæ. Nam si unquam, tum maximè est nobile intelligere quid dicas, cum Deum appellas.

20. Hujus tamen tyrannicæ consuetudinis non reperio aliam defensionem præter illam Cardinalis Hosii, *Quod scilicet Ignorantia sit mater devotionis*. Verùm ut consuetudo ipsa est indigna homine, sic assumptum in hoc argumento est indignissimum Religione Christianâ; quasi ea de se non esset sufficiens suis effectibus, imò opus habeat non solum artibus, sed etiam præstigiis humanis. Imò si in Religione Christianâ hoc verum est: *Ignorantia est mater Devotionis*, tum & hoc est verum: Religio Christiana quò magis scitur, eò minùs amatur. Certè Doctrina Christiana nuda est pulcherrima & cepit Mundum; postquam fucis superstructionum cooperiretur, opus erat pleraque in arcanis servare. *Sed quid? dices: num rudes ad disputandum invitas?* Minimè; neque Apostoli quidem invitârunt; ii tamen linguâ notâ omnes instituerunt. Aliud est reddere homines Doctores, aliud Stipites.

21. At, inquirunt, constat quòd multis cum furiis inceperit vulgus erudiri in Doctrinâ Christianâ, testi-
bus

bus Germaniâ, Belgio, Gallia, & nuper cum novæ
 luces accenderentur, Britannia etiam. Respondeo,
 Constare etiam quantis cum furiis suas tenebras tutata
 sit olim Gallia; primum in occisione Parisiensi, tum
 postea in fœdere Guisiano. Est etiam Hibernia exem-
 plo *An. Dom. 1941*. Scilicet, *Iliacos intra muros pec-*
catur & extra. Non tamen qui furebant Protestantes,
 ideo furebant quia edocebantur quid dicerent colentes
 Deum, sed quia à furiosis concionatoribus semper in
 nova propellebantur. Non autem est necesse ut quosli-
 bet ad concionandum admittas, si cultus Dei publicus
 peragitur lingua vernaculâ. Hoc est humanitatis illud
 torporis.

22. Tandem scientia mihi videtur feracior Zeli
 quàm ignorantia. Exemplo fuit Rex & eum sequuti
 in nupero Bello Civili Angliæ. Ti per omnia ardua
 belli cruentissimi, debellatique per omnes miseras Exi-
 lii, Egestatis, Carceris, Mortis, Religionem stabi-
 litatem tuebantur. Tamen in eâ Religione omnia om-
 nibus sunt aperta; lingua vernaculâ & legunt & audi-
 unt, & precantur. Devotio scil. quæ nascitur ex scientiâ
 est firma & permanens, quæ ignorantie innititur,
 superstruitur arenæ, & debet ludibrium Principi Re-
 formationem molienti. Sed calamum sustineo, ne me-
 reum agant ignorantie quàm damno, quasi scilicet
 ideo solum in religiosam hanc plebis ignorantiam in-
 vehar, quia bonos ejus fructus (quod fateor) igno-
 rem.

23. *Sed Oratio vocalis quousque protendenda est?*
Resp. Quamdiu deservit interioris desiderii fervori ex-
 citando. *Obj.* Mat. 6. *Orantes nolite multum loqui.*
Resp. Aliud est sermo multus, aliud diuturnus affectus.
 Ipse Dominus pernoctavit in orando.

Obj.

Obj. Cur transgredimur limites Orationis Dominicæ? *Resp.* Non tradidit Deus hanc Orationem ut quæ solâ utendum sit, sed ut quæ contineat omnia quæ precari aut desiderare debeamus, ea licet aliter proferamus aut cogitemus.

Obj. Orate continuâ. *Resp.* In ipsâ Fide, Spe, & Charitate continuato desiderio semper oramus. Aug. ad Prob. Oratio ergo in causis suis est continua, in seipsâ non potest esse, quia oportet nos alijs operibus occupari.

24. *Quid dicemus de dono precandi?* Dico, Preces piorum ut & omnia eorum sancta opera procedere à Spiritu sancto operante per Fidem, Spem, & Charitatem. *Sed quid de dono precandi quæ sit gratia gratis data subministrans flumen quoddam copiosum & diuturnum cum fervore vocaliter orandi ultra ingenium aut artem?* Dico, Tale donum esse possibile, cum Deus aperuerit ad loquelam humanam etiam os asinæ: Dico etiam totum hoc præstari posse ingenio, arte & industriâ humanâ; nam qui est extemporarius Orator (quod frequentissimum est) ad populum, potest etiam esse ad Deum. Imò doctissimus Wilkinsius nuper Episcopus Cestriæ libro olim edito, artem precandi ex tempore egregiè concinnavit; non eo ille consilio ut homines ad ejus usum excitet, sed ut populo deluso ostendat, ea naturæ viribus fieri, quæ tum temporis pro instinctibus Spiritus sancti passim & donis extraordinariis venditabantur. Certè non pauci qui ex tempore sic precari consueverunt mihi fassi sunt, se multas integras orationes antea composuisse, easque in circulo eorum populo non valdè memori exhibuisse; quin & hujus supellectilis partium ordinem subinde mutasse, nunc à confessione, aliàs à gratiarum actione, à petitione aliàs exordium sumpsisse, ita ut eorum O-
ratio

ratio semper novam induerit faciem. Et hæc erat eorum non nisi pia fraus, quia eò vesaniam ventum erat, ut populus non audiret nisi sic precantes. Id utcumque se habeat, cum certum sit preces extemporarias posse viribus naturæ præstari, non est credendum eas miraculosè fieri, nisi hoc alio Miraculo confirmetur.

25. In Orando, ratio impetrandi ex parte Dei est ejus bonitas. Dan. 9. *Propter te ipsum mi Deus inclina aurem tuam.* Et in Litaniâ: *Per crucem tuam & Passionem, &c. libera nos Domine.* Hujusmodi Oratio dicitur Obsecratio, i. e. per sacra contestatio. Ratio impetrandi ex parte petentis est gratiarum actio; nam grati ob priora beneficia disponuntur ad ulteriora recipienda. Itaque licet gratiarum actio non propriè dicatur precatio, tamen in precatione semper supponitur. Interdum petitio solum insinuat, ut Jo. 11. *Ecce quem amas infirmatur.*

26. Orationi ut communiter accipitur ferè insunt quatuor partes. 1. Ascensus rationis ad Deum. 2. Petitio. 3. Obsecratio. 4. Gratiarum actio. Exemplum sit Collecta Trinitatis. *Omnipotens & æterne Deus*, pertinet ad primam. *Qui nobis famulis tuis dedisti*, &c. pertinet ad quartam. *Obsecramus ut servies nos*, &c. pertinet ad secundam. *Qui vivis & regnas*, &c. pertinet ad tertiam.

27. His subjungam brevem rationem Orationis Dominicæ secundum Aquinatem in summâ. Oratio est interpres desiderii nostri apud Deum, ergo illa solum orando rectè petimus, quæ rectè desiderare possumus. In Oratione autem Dominicâ, & petuntur omnia quæ rectè desideramus, & eo ordine quo desideranda sunt. Primò autem rectè desideramus finem, tum ea quæ sunt ad finem. Finis autem noster est Deus, in quem affe-

affectus noster tendit dupliciter, ut in se, & ut fruendum à nobis. Desiderium gloriæ Dei absolute & in se primâ Petitione continetur. *Sanctificetur Nomen tuum.* Desiderium fruendi gloriâ Dei continetur in secundâ Petitione: *Adveniat regnum tuum*, scilicet super nos. i. e. perveniamus ad regnum tuum. Medium ad hunc finem principale est obedire Deo, quod petitur tertio loco: *Fiat voluntas tua.* Instrumentum & quasi coadjuvans nos ad hunc finem petitur quarto loco: *Panem nostrum quotidianum da nobis hodie.* Sive hoc intelligas de pane communi (quo significatur sufficientia victus) sive de pane Sacramentali, in quo etiam intelliguntur omnia alia Sacramenta, quia ut ait Augustinus ad Probam.: *Et Eucharistia est precipuum Sacramentum & panis est precipuus cibus.* Per accedens ordinamur ad fruitionem Dei per remotionem impediens. Impediunt autem primò peccatum, quod directè excludit è regno Dei. Hinc quinta petitio: *Dimitte nobis debita nostra*, &c. Secundò impedit tentatio ad peccandum, unde sexta Petitio: *Ne nos inducas in tentationem.* In quà non petimus ut non tentemur, sed ut à tentatione non vincamur, hoc enim est induci in tentationem. Tertiò impedit præsens penalitas, tollendo scilicet sufficientiam vitæ. Hinc præcamur: *Libera nos à malo.*

28. Hammondus super sextum Matthei refert hæc [verba: *Ut in cælo, ita in terrâ*] ad omnes tres præcedentes Petitiones, sic: Pater noster qui es in Throno Cæli, & ibi ab Angelis & Sanctis laudaris, & ibi regnas & perfectum obtines obsequium, fac ut nos etiam Filii & Servi tui sanctificemus nomen tuum, imperium tuum agnoscamus, & Mandatis tuis obsequamur sincere & promptè, & pro nostro Modulo sicut ut in Cælis.

29. Adverte Dominum bis suos Discipulos edocuisse hanc Orationem, & duabus diversis occasionibus. 6. Mat. Tradit eam ut exemplar & formam secundum quam ii suas Orationes debeant struere; itaque dicit: *Hoc modo precamini.* 11. Lucae dicit: *Vos cum precamini, dicite.* Quasi diceret: Non dedi vobis hanc Orationem solum ut normam cui vestrae preces affimilari debent, sed etiam volo ut eandem frequenti usu celebretis, & in precibus saltem solennibus nunquam omittatis. Et hanc Hammondi paraphrasin praxis omni ævo Ecclesiæ commendat.

30. Licet gloria Dei & eum glorificantium salus sint inseparabiles, tamen rectè monet Calvinus in tribus primis petitionibus utilitatem nostram quasi obliviscendam esse, & soli Dei gloriæ esse attendendum; quippe qui sit propter se & diligendus & colendus.

31. Absurda autem est precatio Authoris libri cui titulus: *Religio medici.* Is in fine libri dicit: *Fiat voluntas tua O Deus licet in meâ perditione.* Impossibile autem est ut pereat qui se submittit voluntati Divinæ, aut ut homo sibi malè velit, aut ut summâ miseriâ sit contentus. Ista precatio multa conjungit impossibilia, ergo fieri potest voce non animo.

S E C T. VIII.

De Adorationibus Christianorum.

Christiani adorant Deum, i. e. tam corpore quam animo eum venerantur.

1. **A**doratio est per quam aliquis suum corpus ad Deum venerandum humiliat.

Obj. Jo. 9. Veri adoratores adorabunt Patrem in Spiritu & Veritate. *Resp.* Etiam adoratio corporalis fit in spiritu; nam ex devotione mentis nascitur, & eidem devotioni excitandæ deservit: ab eâ incipit, in eâ desinit. Principale ergo in adoratione est spiritus-ualis Veneratio, humiliatio corporis est secundaria.

2. Debetur tamen hæc quoque, nec solum quia est devotionis internæ fructus, & auctrix, sed etiam quia per omnia Dei dona eum colere debemus.

3. Determinatus ad adorandum locus non requiritur essentialiter, quia Deus est ubique. Ratione tamen nosti, fieri maximè debet loco sacris destinato. Nam 1. Consecratio loci excitat ad reverentiam exhibendam. 2. Cultus augetur concursu multorum colentium. Mat. 18. Ubi congregantur duo vel tres in meo nomine, ibi ero ego in medio eorum.

4. Statuit Aquinas decentur adorari versus Orientem: 1. Quia Deus nobis indicatur motu Cœli, qui est ab Oriente. 2. Hoc est meminisse Paradisi qui erat in Oriente, & votis eò redire. 3. Christus est lux Mundi & Oriens nominatur, Zach. 6. Ab Oriente etiam expectatur venturus. Mat. 24. *Sicut fulgor exit ab Oriente & patet usque ad Occidentem, ita erit ad-*

adventus Filii hominis. Si cui autem hæc non gravia argumenta videntur, sciat nec conclusionem esse maximi momenti.

5. Adorare autem non est solum inclinare Caput & cervices, aut geniculari, aut prorsus ad terram incurvari; sed vel stare quia Deum colis est ipsum venerari. Nam sessio est ad nostrammet quietem, à qua alicui assurgere est eum quadantenus colere. Pariter differere licet de denudatione capitis, de saltatione, &c.

S E C T I O IX.

De Laudationibus Christianorum.

Christiani & corde & ore Deum laudare profitentur.

1. **L**Aus debetur excellentiæ; omnimodæ ergo laudes Deo sunt dandæ ob ejus excellentiam & in se & in operibus.

2. Ac laudandus quidem est Deus de omnibus suis operibus, quia omnia sunt bona; potissimum verò infinitam ejus bonitatem in unigenito Filio ad nos redimendos exhibendo celebramus. Præ hoc cætera Dei dona spernimus, & loco luti ac damni habemus. Quin sine hoc cætera nobis peccatoribus exitialia forent. Attamen, ut dixi, ob omnia ejus opera intra proprias rationes sumpta Deum laudamus. Imò ob illa quæ naturæ nostræ corruptæ molesta sunt. *Cui?* Ex hac fide, quòd omnia cooperantur in bonum diligentibus Deum.

3. Gratiarum actio est species laudationis ; nam est recognitio divinæ Potestatis in alia, & bonitatis erga nosmet.

4. Atque hæc quidem præcipuè animo præstantur, sed & ore laudandus est Deus ; non ut scrutator cordium cognoscat affectum nostrum, sed ut omni modo possibili eum laudemus qui omnem possibilem laudem sine fine superat, tum etiam ut pium illum affectum excitemus & in nobismet & in aliis audientibus, totumque terrarum orbem, quantum in nobis est, impleamus *gloriâ Domini*.

5. Itaque etiam Cantus & Instrumenta musica adhibentur, ut omnem in bonorum Authorem per omnia ejus dona laudemus ; tum etiam Devotionis excitandæ causâ, Aug. in 10. Confess. *Adducor cantandi consuetudinem approbare in Ecclesiâ, ut infirmior animus in affectum pietatis assurgat. Vetustatem consuetudinis (post exemplum Christi & Apostolorum) habere ex Plinio. Christiani cantant alternatim laudes Christo tanquam Deo.*

S E C T. X.

De Sacramentis in genere.

Convenit inter Christianos, Christum instituisse nonnulla Sacramenta in perpetuum usum Ecclesiæ : per Sacramentum intelligunt signum corporeum gratiæ spiritualis.

1. **S**acramenti nomine apud Romanos significabant juramentum de servandâ fide aut officio exequendo. In Ecclesiâ Sacramentum est signum ex-

externum gratiæ invisibilis, institutum à Christo in usum Ecclesiæ perpetuum. Ac in nostrate quidem Ecclesiâ, ut aliquid propriè dicatur Sacramentum, requiritur ulterius, quòd gratia significata sit necessaria ad salutem omnibus Christianis.

2. Verùm de nomine Sacramenti nihil habetur in Scripturâ sacrâ, sed ^{historiam} plerùmque reddiderunt latine *Sacramentum*; puto quia gratia spiritualis latet sub signis corporeis. Nam ^{historiam} apud Græcos *Gen-tilis* significabat partem Cultus Deorum à communi-
bus oculis velatam. Unde & ^{historiam} est initatus seu admissus ad secreta Religionum cognoscenda aut tra-
ctanda.

3. Sed nec de naturâ Sacramenti in genere quicquam docuit Christus in Evangelio. Instituit autem Baptismum, &c. quibus ob similitudinem represen-
tandi spiritualia per Corporea, commune nomen Sa-
cramenti est postea inditum. Colligimus scilicet ea in quibus Baptismus, Eucharistia & (si quæ sunt) alia Sacramenta conveniunt, & ex iis concinnamus disser-
tationem de Sacramentis in genere. Pleraque ergo quæ hîc adhibemus, rursus in singula Sacramenta tra-
ctando sunt examinanda. Itaque prælibatio hæc ge-
neralis aut non est necessaria, aut certe perbrevis esse debet.

Obj. *Generalia sunt generaliter & semel docenda.* Sic e. g. differimus de vitâ & sensu in Tractatu de Animalis in genere, ea non repetentes in Tractatibus propriis de homine & brutis; cur non item differen-
dum sit de Sacramento in genere sine hoc quòd eadem repetamus in Tractatibus de Baptismo, &c? Resp. Non est par ratio. Nam omnes species animalis ha-
bet vitam & sensum ex hoc quòd sint animalia; at Ba-
ptismus non significat aut confert gratiam, non est

aut

aut facit quicquam ex hoc quòd sit Sacramentum, sed omnia ex hoc quòd sit Baptismus. Ex sic de Eucharistia. Nam nihil novimus de Baptismo aut Eucharistia nisi ex ore Christi, qui nihil docuit de Sacramento in genere. Itaque Sacramentum non est genus ad Baptismum & Eucharistiam sed totum collectivum. Unde sequitur, si qua communia omnibus Sacramentis explicanda sunt, ea potius post quam ante singulorum explicationem notanda esse; nam & tum determinatum erit de numero eorum quæ appellari debent Sacramenta, & frustranea repetitio facile vitabitur.

4. Sequitur etiam ex dictis disputationem de numero Sacramentorum esse meram *disputat.* In Ecclesia Romanâ sunt septem Sacramenta: Baptismus, Eucharistia, Confirmatio, Pœnitentia, Ordo, Matrimonium, & Extrema Unctio. Nos duo Prima suscipimus, quinque reliquis exclusis. Certè si omne signum rei sacræ est Sacramentum, potes Sacramentorum multa millia adhibere. De Scripturâ sacrâ dictum est: *Quot verba, tot Sacramenta.* Omnia enim verba Scripturæ sacræ significant Dei aut voluntatem aut potentiam, &c. Imò omnis Creatura est signum Potentiæ & Voluntatis Dei. Verùm pauciora & adhuc pauciora comperies Sacramenta, prout hoc nomen strictius & strictius sumis. Interea nihil hoc ad Fidem Christianam. Nam Christus nihil docuit de Sacramento in genere, nec ullam ejus partitionem exhibuit. Christi ergo nihil refert, quid nuncupes *Sacramentum*, aut quot statuas esse Sacramenta. Sed ad singula.

S E G T. XI.

De Baptismo.

Christus mandavit quod omnes in ipsam credentes baptizentur in Nomine Patris, & Filii, & Spiritus sancti.

1. **N**AM cum mandaret Apostolis omnes Discipulos baptizare, omnibus Discipulis mandavit quod baptizentur.

2. Baptismi institutio videtur incepisse in Baptismo Christi, sed usus ejus non injungebatur nisi post mortem Christi. Nam per hanc determinabantur ea quibus erat Baptismus successurus; ut Circumcisio, &c. Nec quidem ante Mortem Christi promulgabatur Evangelium.

3. Baptismus Christianus est dilutio corporis exterior, facta sub hac formâ verborum: Ego te baptizo in Nomine Patris, &c. ut in Ecclesiâ Latina; vel sub hac: Baptizetur servus Christi in Nomine Patris, &c. ut in Ecclesiâ Græcâ. Et hæc posterior forma suscepta erat ad vitandum imitationem eorum qui dicebant: Ego sum Pauli, & ego Cephæ. Si autem quis ter immergat hominem in Nomine Patris, &c. sine hoc quod dicat, Ego te baptizo, vel aliquid simile, videtur non esse Baptismus; nam ablutio corporis est communis multis usibus & determinatur ad usum Sacramentalem per verba recognoscentia mandatum Christi. Christus dixit: Baptizate in Nomine Patris, &c. Ergo Minister debet dicere: Ego te baptizo in Nomine Patris, &c.

4. No-

4. Nominantur in Scholâ tria Baptismata: Baptismus aquæ, Baptismus sanguinis (quo quis patiendo conformatur Christo) & Baptismus flaminis seu Spiritus sancti, cum cor movetur ad credendum & diligendum Deum & ad poenitendum; sine hoc quod detur copia Baptismi in aquâ; cujus insigne exemplum est sur in cruce. Hæc duo posteriora dicuntur Baptismata, quia habent effectum aquæ Baptismalis, nimirum ablutionem animæ; non autem dicuntur Sacramenta, quia non sunt signa istius ablutionis.

5. Aqua est peculiare Elementum Baptismi, ex constitutione Christi. Convenientiæ ejus memorantur: 1. Quia ex humore omnia generantur, & Baptismus est regeneratio seu inceptio vitæ spiritualis. 2. Aquæ est lavare, itaque bene significat ablutionem peccatorum. 3. Aqua ratione communitatis & abundantiae convenit necessitati hujus Sacramenti. 4. In aquâ sicut in quodam sepulchro submergentibus nobis capita, vetus homo sepelitur & submersus deorsum occultatur, & deinde novus ascendit. Chrysof.

6. Gratia significata in Baptismo est conformitas interna cum Christo moriente, sepulto & resurgente. Rom. 6. 3. *Quotquot baptizati eramus, in ejus mortem baptizabamur.* Col. 2. 12: *Cum eo conscripti in Baptismo, in quo etiam cum eo consurrexisti.* Particulatim autem per immersionem, quâ imitatur mortem & sepulturam Christi, significatur mors & sepultura veteris hominis; unde dicimur mori peccato & mundo. Per emersionem, quâ imitatur resurrectionem Christi, significatur regeneratio ad justitiam. Hoc alias dicitur exuere veterem hominem & induere Christum, i. e. abrenunciare corruptioni Adamicæ, & tenebris Mosaicis, ac solius Christi mandata suscipere exequenda.

De causis efficientibus Baptismi.

7. Causa principalis seu Author Baptismi est Dominus quâ instituens ceremoniam. Mat. 28. 19. *Ite & discipulate omnes gentes, baptizantes eos, &c.* Et quâ promittens effectum nimirum vitam æternam. Mar. 16. 16. *Qui credit & baptizatur, servabitur;* tum etiam quâ sine dubio præstans quod promittit.

8. Ecce fons necessitatis Baptismi. Non est spes salutis nisi in promissis Christi; Christus non promittit salutem nisi baptizatis. Vel sic: Christus instituit Baptismum, ergo qui Baptismum recusat, contemnit Christum. Nihilominus si appetitur Baptismus, & haberi non potest, non est dubium quin votum accipiatur pro facto; cujus exemplum est sar in cruce. In eo enim casu facit peccator quod in se est, cum non desit nisi corporalis opportunità quæ non est in potestate desiderantis. Atque hinc sequitur,

de Tremantibus & si qui sunt alii qui nec re nec voto baptizantur, sed constitutionem Christi prorsus contemnunt, (nisi ex impenetrabili abyſſo divinæ misericordiæ) desperandum eſſe.

9. Miniſtri Baptiſmi erant primitus Apoſtoli & ii poſtea quibus Apoſtoli illud Miniſterium concediderunt, & ſic ſucceſſivè ad noſtra tempora. In noſtrâ Eccleſiâ non video id concedi niſi præſbytero & in ejus abſentiâ Diacono. Eccleſiâ Romana (in extremâ neceſſitate) cuivis perſonæ etiam ſceminæ, etiam non baptizato, concedit baptizare. Si tamen votum ſufficit, non videtur eſſe facti tanta neceſſitas ut ritus violentur. Utcunque ſi tales perſonæ habent jus baptizandi, id habent ex conceſſione Eccleſiæ, certè non ex neceſſitate Sacramenti. Nam hoc Sacramentum eſſe neceſſarium ad hujus ſalutem, nihil eſt niſi hunc non poſſe ſervari ſine ſuſceptione hujus Sacramenti, quod eſt prorsus negativum, nec cuiquam quicquam confert juris. Poſtremò memoriâ tenendum eſt, Baptiſmum ideo ſolum eſſe neceſſarium quia eſt mandatum, itaque nec magis eſt neceſſarium quàm Eucharistiâ, Orationem, & cætera mandata.

De Effectû Baptiſmi.

10. Inprimis Baptiſmus tollit omne peccatum tam actuale quàm originale; nam omne peccatum pertinet ad vetuſtum hominem qui in Baptiſmo moritur & ſepelitur.

Obj. Concupiſcentia & cæteræ pœnalitates hujus vitæ ori untur è peccatis & tamen manent poſt Baptiſmum. *Reſp.* 1, Manent, ut incorporati Chriſto per Baptiſmum, ei conformes ſimus in humilitate ſuâ, ſic. t

sicut aliquando erimus in gloriâ. 2, Manent, propter spirituale exercitium *viz.* ut homo pugnans victoriæ coronam accipiat. 3, Manent, ne homines ad Baptismum veniant propter impassibilitatem hujus vitæ, & non propter gloriam vitæ æternæ.

11. Secundus effectus Baptismi statuitur collatio gratiæ & virtutum. De quo (quia est communis Baptismo & Eucharistiæ) ageretur Sectione sequenti.

12. Tertius effectus Baptismi est character, id est, signaculum in animâ quod quis conscribatur in familiam Christi, & qui dat jus ad omnia munia Christianorum. Atque hic character ponitur indelebilis, Aug. *Sicut character militaris non repetitur, sed agnitus approbatur in eo cui venia datur ab Imperatore post culpam.*

De antecedentibus Baptismo.

13. Alia antecefferunt institutionem Baptismi, alia ipsum Baptismum antecedunt. Baptismum antecedit professio fidei & pœnitentiæ. Nam baptizari est actus obedientiæ Christianæ, ergo fide nascitur. Et est Baptismus renovatio vitæ, ergo supponit pœnitentiam veteris.

14. Atque hinc sequitur principalem effectum Baptismi qui est justificatio seu remissio peccatorum & collatio gratiæ, non haberi in hypocrisi aut hæresi, ubi quippe nec est fides nec pœnitentia. Ibi tamen imprimi characterem; nam Sacramentum non perficitur per justitiam recipientis sed per justitiam Dei. Sic Aquinas. Ego non intelligo our Sacramentum non perficiatur sine characterem, cum perficiatur sine pœnitentiâ aut fide; nec cur Deus justitiâ suâ oblige-

tur ullum effectum Baptismi ei concedere, qui se per hypocrisin aut hæresin Baptismi prorsus incapacem reddidit. Jure tamen dici puto characterem Christianismi imprimi in Baptismo etiam hypocritæ & hæretici. Nam character non est aliquid physicum, sed tantum nota seu tessera ut baptizatus recipiatur ut membrum Ecclesiæ. Baptismus ergo imprimere characterem in hæresi aut hypocrisi idem est ac baptizatum etiam hæreticum etiam hypocritam Christianis connumerandum esse. Ac hypocrisis quidem non impedit, quia character est nota versus Ecclesiam, Ecclesia autem non intelligit corda. Hæreticos etiam baptizatos recipit Ecclesia ut Christianos, quia suscipiendo Baptismum se Christo subjiunt. quod autem huic fundamento fœnum, lignum & stipulam superstruant, id eos malos reddit Christianos, sed Christianos relinquit.

15. Antecedunt etiam Baptismum Catechismus: Nam *quomodo credent in eum de quo non audierunt?* Rom.

10. 14.

16. In Ecclesiâ Romanâ more pervetusto antecedit Baptismum exorcismus Diaboli, ne impediatur opus Baptismi. Nam, aiunt, Diabolus est hostis humani generis, & aliquam potestatem habet in hominem ratione peccati actualis aut etiam originalis. Ejus expulsionem significat exsufflatio. Benedictio cum manus impositione præcludit ei reditum. Sal in os missus ac linitio narium ac aurium sputo significat receptionem Doctrinæ quantum ad aures, & approbationem quantum ad nares, & confessionem quantum ad os. Olei verò inunctio significat aptitudinem pugnandi contra Dæmones.

17. Statuitur exorcismus non solum significare sed etiam operari; unde etiam utuntur verbis imperativi.

vis.

vis. Aug. de Symbolo. *Parvuli exsufflantur & exorcifantur ut pellatur ab iis Diaboli potestas inimica.*

Obj. Si exorcismus significat & operatur, tum est Sacramentum. Respondent: Non operatur veniam peccatorum, sed tantum tollit impedimenta veniæ consequendæ. Itaque etiam ejusmodi ceremonia non dicuntur Sacramenta sed Sacramentalia.

18. Assumebatur exorcismus ad imitationem Christi qui Apostolis insufflavit & dixit: *Accipite spiritum sanctum*, Jo. 20. 22. Sicut enim Dominus per insufflationem significavit ingressum Spiritus sancti in Apostolos, ita Ecclesia per exsufflationem significat spiritum immundum egredientem ex infantibus. Et sicut Christus (*Mar. 1. 25.*) comminatus est ei, dicens: *Obmutescere & exi de homine*; sic exsufflans dicit: *Exi ab eo immunde spiritus*. Et adjurans dicit: *Exorciso te immunde spiritus in nomine Patris & Filii & Spiritus sancti, ut ex eas & recedas ab hoc famulo Dei*. Si objicis Dæmonem expelli per Baptismum ipsum. Respondent Expelli eum per Baptismum ab animâ; à corpore autem ne noceat, & à sensibus ne ludificet, per exorcismum.

19. Totum hoc exercitium dimisit nostras Ecclesia, his puto argumentis. Nullum ejus habetur mandatum à Domino, nulla promissio; qui ergo aliquod bonum spirituale inde sperat, is sperat salutem suam aliunde quàm à Christo, quod est à Christo deficere. Iterum, Minister adjurat Dæmonem exire. Quâ auctoritate? Si nullâ, tum fatuus est Dæmon qui obsequitur. At si obsequium est fatuum, tum mandatum est ludicrum. Tum nauseam creârunt insignificantes illæ significationes olei, sputi, &c. Nos quidem adhibemus signum crucis post Baptismum, non in defensionem baptizati à Dæmone, sed prorsus in monitionem,

nem, quòd se per Baptismum devinxerit Christo crucifixo.

20. Institutionem baptismi antecessit circumcisio, *i. e.* ut per Baptismum admittuntur in Ecclesiam Christianam, sic admittebantur in Ecclesiam Judaicam per circumcisionem.

De Subiectis Baptismi.

21. Hic præcipuè disputatur an parvuli sint baptizandi necne. Ecclesia generaliter affirmat: nam 1. Infantes Christianorum tam sunt capaces Baptismi, quàm erant circumcisionis infantes Judæorum; Baptismus enim venit in locum circumcisionis & differunt solà cœremoniâ externâ, ut dicitur Sectione sequente. 2. Cùm legamus in actis & Epistolis integras familias baptizatas fuisse, non est quòd somniemus posthabitos fuisse liberos. 3. Pueri sunt baptizandi ut abluatur peccatum originale; & ut in Religione Christianâ enutriti ei firmius adhæreant.

Obj. Baptismus non conceditur nisi credentibus & pœnitentibus. *Resp.* Parvuli habent fidem & pœnitentiam Ecclesiæ licèt non suam propriam. Hoc enim per offerentes profitentur *i. e.* per ecclesiam; nam ii duo vel tres offerunt infantem baptizandum non propriis nominibus sed nomine totius ecclesiæ. *Ab omnibus namque offerri rectè intelliguntur, quibus placet quòd offeruntur.* Aug. Nec est incongruum eos sine proprio nixu sanari a secundo Adamo, qui non peccârunt nisi in primo Adamo. *i. e.* sine concursu suo personali. Parvuli in utero matris pascuntur non suo sed materno alimento; sic etiam sine nixu suo matris Ecclesiæ lacte spirituali vescuntur.

22: Interea in Scholâ conceditur parvulis fides habitualis licet non actualis; etiam actualis dicitur concedi à Luthero. At Augustinus dicit, eos qui putant infantes credere in Christum quando baptizantur, injuriam facere humanis sensibus. videmus enim infantes partim vocis ejulatu partim motu corporis reluctari quando aquâ baptismi asperguntur, quod non facerent si crederent se per illam aquam regenerari & filios Dei fieri.

23. Non fit quidem mentio ullius infantis baptizati in Scripturâ sacrâ, sed nec fit mentio ullius fœminæ admittæ ad Eucharistiâ. Fit autem mentio integrarum familiarum baptizatarum; cur excludis infantes? an non sunt de familiâ.

24: Non fideliû tantum liberi sunt baptizandi in infantia? Calvinus admittit infantes fidelium ob promissionem Gen. 7. 7. *Ero Deus tuus & seminis tui.* Verum si hoc sumitur in sensu literali, promittitur solum terra Canaan; si sumitur in sensu mystico, significatur quidem cælum sed promittitur solis filiis spiritualibus Abrahæ. Rom. 9. 6. *Non omnes qui ex Israel sunt ii sunt Israelitæ.* Sic Calvino objicit Becanus. Verum ex textu apparet filios Abrahæ vi carnalis procreationis habuisse sanctitatem quandam fœderalem. i. e. capacitatem circumcisionis &c. Itaque etiam paritate rationis parvuli Christianorum sunt capaces baptismi, & eatenus dicuntur sancti. 1. Cor. 7. 14. Sed num ii soli sunt capaces baptismi? Resp. videtur etiam parvulos infidelium qui in manus Christianorum rite deveniunt, debere baptizari. Nam iis inest originale peccatum; en necessitas baptismi. Nec iis imputatur parentum infidelitas. En capacitas baptismi incepta: Porro, licet non sint geniturâ filii matris Ecclesiæ, tamen deve-

nire

nire in potestatem Ecclesiæ est quasi quædam adoptio. En capacitas baptismi consummata.

25. Movetur etiam lis de parvulis illegitimo toro natis. Quidam eos in Gehennam damnant. Sed quid dicent de Jephthe, qui nascebatur è foemina meretricæ & tamen salvabatur per fidem. Heb. 11. 32. Sed num tales admittendi sunt ad Baptismum in infantia? Ita. Nam nullum iis inest peccatum præter originale, quod inest etiam legitimis.

De adjunctis Baptismi.

26 Præcipue hîc differitur de tempore. Ac adulti quidem antiquitus ferè reservabantur ad stata tempora, nec peragebatur sollemniter baptismus nisi in festis paschæ & pentecostes. Idque 1, ut perfectius instruerentur. 2, ut indicia exhibeant sinceritatis, ne decipiatur ecclesia. 3, in sollemnitate ob honorem sacramenti. Hæc tamen dilatio omittabatur imminente periculo mortis, exilii militiæ &c. In actis quidem Apostolorum dicuntur baptizari statim post confessionem fidei; nam tum & fidem plerumque Comitabantur signa prodigiosa, & baptismus sæpe ornabatur donis extraordinariis; nec vacabat quidem ecclesiæ sub onere persecutionum sollemnitati officiorum attendere.

27: Baptismus verò infantum non est diu differendus ob periculum mortis, sed saltem in statis conventionibus parochialibus expediri debet. Quòd si Baptismus ob leviculas causas differatur ac mors infantis interveniat, non erit (spero) damno infanti, quippe qui ut credit fide ecclesiæ sic etiam voto ecclesiæ vovet baptismum; at certè parentibus aut iis quorum erat baptismum adhibuisse, pænale erit.

S E C T. XII.

De Eucharistia.

Christiani ex institutione Christi frequenter celebrant Eucharistiam seu Sacramentum cœnæ Domini, comedentes panem & bibentes vinum, seu corpus & sanguinem Christi.

1. **D**icitur Eucharistia, i. e. gratiarum actio lætica ob mortem Christi inibi repræsentatam. Dicitur etiam communio in quantum designat Christianorum unitatem. Dicitur etiam sacrificium, scilicet commemoratio Passionis Christi quæ est unicum nobis expiatorium sacrificium; tum etiam quia nos in hoc Sacramento laudes & gratias Deo ob Mortem Christi offerimus.

2. Ut Baptismus est spiritualis generatio, sic Eucharistia est spirituale nutrimentum. Elementa seu Materia externa Eucharistiæ sunt panis & vinum, quibus quippe se communiter reficiunt homines.

Obj. Alicubi terrarum non est vinum, alicubi non est triticum. Respondet Aquinas, Utrumque posse facile deferri quantum sufficiat ad hoc Sacramentum. *Sed quid si alicubi alterum non potest adhiberi?* Tum communicandum est voto, nec est unum sine altero consecrandum; nec enim esset Sacramentum perfectum utpote non repræsentans corpus & sanguinem Christi separatim ut in primâ institutione. Cum tamen in omni regione aut vinum & triticum habeantur aut aliqua his analogæ, cum triticum & vinum comparari non possint, quare an ex iis quæ istis sunt analogæ, hoc Sacramentum ritè conficiatur.

3. Probabile est Christum consecrâsse vinum aquâ permixtum, nam ita videntur bibisse in eâ regione. Prov. 9. 5. *Bibite vinum quod ego miscui.* Sed probabilius est eum in hunc usum sumpsisse vinum merum; non solum quia in institutione non fit mentio nisi solum vini, sed magis quia in hoc Sacramento repræsentatur sanguis Christi ut effusus. i. e. ut purus ab aquâ simul effluente quæ quidem repræsentatur in Baptismo.

Obj. Passio Christi vividius repræsentatur per agnum Paschalem quàm per panem & vinum. *Resp.* At istiusmodi carnes minùs competunt communi usui, minùs etiam significant Ecclesiasticam unitatem, per panem è multis granulis compositum.

4. Gratia significata in Eucharistiâ (quæ est quasi Materia interna hujus Sacramenti) est corpus Christi quod repræsentatur per panem, & sanguis Christi qui repræsentatur per vinum. Analogia est: animas sic pasci Christo sicut panis & vinum sustentant corpus. Itaque à pane corporeo cogitatio statim meare debet ad panem spirituales, ut in omni Sacramento à signo exteriori ad gratiam invisibilem. Sumptioni corporeæ per manum scilicet & per os respondet in animâ fides in Christum crucifixum; ulteriori Elementorum concoctioni respondet unio cum Christo per spem & charitatem. Secundo loco gratia repræsentata in Eucharistiâ est unio omnium fidelium. 1 Cor. 10. 17. *Sumus omnes unus panis & unum corpus, quia omnes participamus de uno pane.* Alimentum convertitur in corpus, ergo quibus unum est alimentum iis unum est corpus.

5. Forma seu effectio hujus Sacramenti sunt hæc verba pronunciata: *Hoc est corpus meum. Et hic est sanguis meus.* Ambros. de Sacram. *Consecratio fit ver-*
bis

bis & sermonibus Domini Jesu; per reliqua omnia quæ dicuntur laus Deo defertur, oratione petitur pro populo, pro regibus, pro cæteris. Ubi autem venit ut conficiatur venerabile Sacramentum, jam non suis sermonibus sacerdos utitur sed sermonibus Christi. Quia hoc Sacramentum est ob usum fidelium, itaque ejus consecratio non habet ultimam perfectionem ante accipite, manducate & bibite.

6. Observa autem omne recipientis exercitium corporale circa hoc Sacramentum ultra accipere, manducare & bibere esse inventionis humanæ non constitutionis Dominicæ. Accipere, manducare & bibere jubemur, non circumferre, non adorare.

7. Christus instituens est author hujus Sacramenti, dicens: *facite hoc in recordationem mei.* Solus Sacerdos seu Presbyter est Minister conficiens hoc Sacramentum; nam ei soli conceditur hoc facere. Qui enim consecrat Elementa, in personâ Christi ea consecrat; qui autem facit aliquid in personâ alterius, oportet ut authoritatem id faciendi ab eo habeat.

Obj. Chrysostomus dicit: *Omnis sanctus est sacerdos.*
Resp. Spiritualis sed non Sacramentalis. Sicut etiam offert spiritualia sacrificia, nimirum cor tribulatum, preces, laudes, &c.

8. Sacerdos quoties consecrat hoc Sacramentum, debet ipse sumere; nam devotione sumptionis debet ostendere affectum interiorem erga hoc Sacramentum, quem præ se fert consecrando. Si amat, cur non sumit? si non amat, cur consecrat?

9. Finis hujus Sacramenti est ex ore Domini perpetua nostra ejus Passionis recordatio. Hoc quippe Sacramentum repræsentat quod olim factum est, & sic nos facit moveri (inquit Aug.) *tanquam videamus in cruce pendentem Dominum.*

10. Quod ad effecta Eucharistiæ, memorantur 1, conferre gratiam; de quo pòst. 2, Roborare animam in spiritualibus. 3, Dæmones abigere, cum sit representatio Passionis Domini per quam Dæmones sunt victi. Chrys. super Joannem: Ut leones flammam spirantes, sic ab illâ mensâ discedimus terribiles effecti Diabolo.

11. Quod ad recipientes hoc Sacramentum. In primis sine dubio recepit Dominus; nam quæ ab aliis observari instituit, ipse primitus observavit, ut liquet in Baptismo & lotionem pedum. Et cum dicitur, Christus *accepit panem & calicem*, non est inte ligendum quòd solum manibus accepit sed etiam ore ut alii. Mat. 26. 29. *Non bibam de hinc de hoc fructu vitis, &c.*

12. Sine dubio Judas etiam sumpsit hoc Sacramentum; nam alioquin exasperatus occasionem peccandi sumpsisset; & Christus notando occultum peccatorem dedisset exemplum prælatis Ecclesiæ similia facienti.

13. Quivis baptizatus est capax hujus Sacramenti; nam per Baptismum incipimus vitam spiritualem, omne autem vivens exigit nutrimentum. Hinc olim aliquandiu usui erat Eucharistiam dare infantibus. Sed desuit consuetudo, &, ut videtur, non malè desuit; cum Apostolus præcipiat unicuique hoc Sacramentum sumpturo, quòd se ipsum examinet. Interea, infantes sumunt hoc Sacramento voto licèt non actu, voto, inquam, non suo sed Ecclesiæ.

14. Eucharistiæ institutionem antecessit sub lege immolatio agni paschalis. Ejus sumptionem necessariò antecedit, Baptismus; ut prius est vivere quàm ali. 2, In contritione de peccatis post Baptismum, per quæ scilicet nosmet ipsi dilutionem faciamus. 3, Charitas

ritas erga proximum, cùm in hoc Sacramento representetur (secundo quidem loco) unitas omnium Christianorum inter se. 4, Severa de his omnibus suiipſius examinatio; nam hæc sumptio ſupremum habet locum in cultu Chriſtiano; cùm huic Sacramento Chriſtus corporis ſui & ſanguinis ſui titulum conceſſerit; ad hanc ergo menſam niſi cum omnimodâ curâ & reverentiâ accedere, eſt corpus Domini deſpicere.

15. De tempore tum institutionis tum conſecrationis Eucharistiæ paucis diſpiciam. Inſtituebatur autem in ultimâ cœnâ Domini. 1, diſceſſurus ab iis in propriâ ſpecie, ſe iis reliquit in ſpecie Sacramentali. 2, Imminebat Paſſio, quam ſignificaverat futuram agnus paſchalis, quo Sacramento, hâc ultimâ celebratione finito, convenienter ſtatim inſtituebatur novum Sacramentum paſſionis ſignificativum. 3, Quæ ultimò dicuntur ab amicis recedentibus memoriæ & curæ magis commendantur; itaque ut majori cum veneratione hoc Sacramentum tractaretur, Dominus illud jam jam moriturus inſtituit.

16. Quantum ad tempus noſtræ ſumptionis cape ſenſum antiquitatis ex uno dicto Auguſtini: Serm. 18. de verbis Domini: *Si eſt panis quotidianus cur poſt annum ſumis, qui mos jam eſſe cœpit in Græcia? ſume quotidie ut quotidie proſit.* Et ſubjungit: *Sic vive ut quotidie merearis ſumere.* Videtur tamen magis honorificum eſſe huic Sacramento non quotidie ſed ſtatim temporibus publicè celebrari. A plerique novarum religionum ſectis rarò aut nunquam adhibetur. Ii toti ſunt in concionibus, in Eucharistiâ fere nulli. At Eucharistiâ tam inſtituit Chriſtus quàm prædicationem; non ergo Chriſti cauſâ Eucharistiæ contemptores in ſiſtunt prædicationi. *Cujâ vero? Suâ.* Poſſunt quippe in
ge-

genium et eruditionem prædicando ostentare; possunt iracundiam suam & livorem in proximum egerere; possunt plebeculæ ad blandiendum lucellum è loculis extrahere; possunt populum ad seditionem & rebellionem de Magistratibus mala dicendo prolicere. Sacramenta ad nihil horum valent, solum animas pascunt, itaque à lupis istis nihili habentur. Dixi de Eucharistiâ ea in quibus vix quisquam litem moverit; pergo ad ea de quibus disputatur non solum argumentis sed etiam ferro & igne. *Transubstantiationem* dico, &c.

17. In Ecclesiâ Romanâ statuitur, in hoc Sacramento substantiam panis & vini converti in substantiam corporis & sanguinis Christi. Accidentia panis & vini (quas species vocant) manere; nam horribile esset carnem & sanguinem hominis in propriâ specie edere & bibere; Christum ergo proponi manducandum & bibendum sub speciebus panis & vini. *i. e.* alimenti consueti. Hæcque accidentia sustentari à Deo sine subjecto; creaturas quippe magis dependere à causâ primâ quàm à secundâ. Christum etiam esse totum in qualibet hostiâ & totum in qualibet hostiæ divisæ parte, atque adeo mille simul in locis. Ex hostiâ etiam putrefactâ generari vermes, ex combustâ cineres, consecratione scilicet dante quantitati potestatem Materiæ. *i. e.* vim recipiendi ac sustentandi formas supervenientes. E speciebus etiam Sacramentalibus nutriri hominem, non tamen hominem illum dehinc ex accidentibus constaturum esse, sed ex iis in quæ illa accidentia convertentur. Hujusmodi millia apud Thomam in summâ subtiliter discussa comperias. Si autem stupes multitudinem Miraculorum, respondetur: *Omnipotentiam Dei sufficere omnibus.* Si instas non hîc quærendum esse quid possit Deus sed quid

quid velit, responderetur voluntatem ejus liquere ex verbis Mat. 26, 26. *Hoc est corpus meum, &c.*

18. Aliis non videtur hinc probari mutationem substantialem, sed solum panem esse signum seu representativum corporis Christi. Nam in aliis Mysteriis signum ponitur pro re significata, quid in hoc? Sic Deus dicitur apparuisse Moysi in arbore. *i. e.* flamma divinitus missa. Sic rupes illa unde effluxit aqua dicitur Christus, *i. e.* representans Christum qui est fons aquæ vivæ. Sic sacrificia legis dicuntur expiationes. *i. e.* representabant expiationem factam per Christum. Summatim, si omnis Scriptura est propriè sumenda, vicerunt anthropomorphitæ, nam multoties memorantur Dei oculi, nares, manus, &c. At si unus Textus debet exponi tropicè, potest & alius, & debet siquidem materia exigat. Dixit Filius Dei: hoc est corpus meum; sed & dixit æquè infallibilis spiritus Dei de omnibus Christianis: Nos sumus unus panis: Panis per priora non magis convertitur in corpus Christi, quam nos per posteriora convertimur in panem.

19. Et si ullibi est, certè est in hac causâ necessitas confugiendi ad tropum. Nec enim fere aliunde major vis infertur naturæ rerum. Unum Christi corpus est simul in mille locis. Accidentia panis & vini per se subsistunt aut certè sine subjecto. Quantitas induitur vim Materiæ. *i. e.* suscipit formas, nutrit edentem *i. e.* convertitur in substantiam recipientis. Tædet monstra enumerare. Interea, sensus prorsus eluduntur, iis miseris panis est adhuc panis. At, aiunt, *reluctentur sensus ac ratio, tamen fide tenendum est.* Crede ergo inquam; at eo modo quo credis purgatorium, &c. *i. e.* crede ob dicta concilii Lateranensis, non ob dicta Domini.

20. Porro, ratio Sacramenti prorsus deperditur per Transubstantiationem. Eucharistia est Sacramentum. *i. e.* signum corporis & sanguinis Christi; at si substantia panis convertitur in substantiam corporis Christi, est quidem ibi corpus Christi, sed nullum ejus signum. *i. e.* nullum ibi est Sacramentum.

21. Deinde cui bono fit hæc conversio? quem in finem? Nemo edicit nec (credo) potest edicere. Nihil expectant illi ex hoc Sacramento quod non & nos sine ullâ substantiæ mutatione expectamus. Et putandum est Christum tot incredibilia fidei nostræ proponere sine ullo commodo?

22. Sunt multa alia quæ suadeant Christum non sic intellectum fuisse ab Apostolis & Ecclesiâ antiquâ. Quæsiwere Apostoli: *quid hoc est?* Eo ad patrem. De parabolâ ferentis quæsiwere *quid hoc est?* Si putassent hæc intelligi literaliter debere, quæsiwissent, *Quomodo est corpus tuum sub pane?* An non videmus te discumbentem ad Mensam. Sed edocti erant (Jo: 6.) quòd Christus esset panis spiritualiter, atque adeo quòd hic panis sit Christus spiritualiter; itaque nihil moverunt.

23. Tum, in primordiis Ecclesiæ est altum silentium de hâc conversione. Non explicatur ab Apostolis aut aliis Doctoribus (quod ad nos quidem pervenit), non objicitur ab infidelibus, Porphyrius non est in eam invecus, Lucianus non derisit. Si Transubstantiatio fuisset antiquitus de fide Christianâ, num Berengarius fuisset primus in hac parte hæreticus? Si corporalis præsentia Christi in Eucharistia fuisset de fide tempore Caroli Magni, nam is sciscitatus fuisset de hac re opinionem Bertrami presbyteri? Aut si mos fuisset tum temporis adorandi hostiam num Bertramus

tramus respondisset Imperatori, quòd Hostia non est idem corpus Christi quod nascebatur è Virgine? *Quid ni?* Quia solùm illud corpus quod nascebatur è Virgine unitur Verbo; & illud solùm corpus quod unitur Verbo, est adorabile.

24. Imò multa reperias quæ significant patres etiam medios nihil somniasse de Transubstantiatione. pau-
cula adnotabo. Aug. Ep. 25. ad Bonifacium. *Si Sacramenta non haberent similitudinem cum rebus quarum sunt Sacramenta, non essent Sacramenta. Et ex hac similitudine sæpe sumunt nomina ipsarum rerum. Sicut ergo Sacramentum corporis Christi est quodammodo corpus Christi, & Sacramentum sanguinis Christi est sanguis Christi, sic Sacramentum fidei est fides.* Et contra Adimantum Manichæum: *Non dubitavit dicere: hoc est corpus meum, cum daret sui corporis signum.* Et super Psal. 3. Mira est Christi patientia qui Judam convivio excepit, quo Discipulis præbuit figuram corporis & sanguinis sui Et Ambr. L. de Sacram. Non iste panis est qui vadit in corpus, sed panis vitæ æternæ qui animæ nostræ substantiam fulcit.

Obj. Apud Patres sæpe fit mentio mutationis in Elementis. *Resp.* Imò mutationis in aliquid quod ante non fuit, non in aliquid quod fuit ante. Est enim mutatio à pane & vino communi usui destinatis in panem & vinum quibus pascantur animæ. Mutatio est usus non substantiæ.

Obj. 2. Ante Lutherum Ecclesia universalis tuebatur hanc realem præsentiam, tanquam de fide; ergo semper erat articulus fidei: per 2. p. sec. 9. n. 12. *Resp.* Ex 2. p. sec. 11. n. 13. Traditionem Ecclesiæ Romanæ adeo esse conturbatam ex creditâ ejusdem Ecclesiæ infallibilitate ut non habeat vim testimonii universalis nisi concors sit cum Scripturis sacris, antiquis patri-

bus, &c. *Resp.* 2, Concilium ipsum Tridentinum timidè loquitur de hac præsentia Christi, & eam verbis vix exprimi posse ait. At facile erat adhibere ad hoc exprimendum verba quibus usa est Scriptura sacra, quibus antiqui patres. Cum nescias exprimere aliquid verbis, fateris te novum quiddam cogitare. Transubstantiatio decernebatur in Concilio Lateranensi, sed quàm miserè ibi explicaretur liquet ex recantatione Berengarii. Re verà Transubstantiatio videtur gradatim introiisse in Ecclesiam. 1, Patres ad reverentiam Sacramenti augendam & ad arcendum ejus prophanationem, interdum ferè hyperbolicè de eo loquuti sunt. 2, Tum postea realis quædam præsentia Christi cogitabatur. 3, Hanc præsentiam nonnulli explicarunt per mutationem substantiæ panis & vini in substantiam corporis & sanguinis Christi. 4, Hanc mutationem substantialem Concilium Lateranense proposuit ut articulum fidei. Qui gradus liquidi erunt legenti à Scripturâ sacrâ deinceps ad Concilium Lateranense; ne gratis eos adduci putes.

25. Sunt tandem multi textus Scripturæ sacræ qui videntur non posse ferre præsentiam realem Christi in Sacramento. Mat. 26. 11. *Me non semper habetis.* Aug. *i. e.* secundum corporalem præsentiam: at secundum majestatem, secundum providentiam, secundum invisibilem gratiam impletur illud: Ecce vobiscum sum usque ad consummationem seculi. Act. 3. 31. Quem oportet cælum capere usque ad restitutionem omnium. His respondetur Christum esse jam solùm in cælo secundum præsentiam localem, esse autem sub speciebus Sacramentaliter. *i. e.* non secundum propriam speciem nec ut in loco. At Aug. in Psal. 33. ait: Si spatia locorum auferuntur à corporibus, nullibi sunt. *i. e.* nulla sunt.

26. Affinis Transubstantiationi est Consubstantiatio, proles Lutheri : Manere, aiunt, substantiam panis & vini post consecrationem, sed simul inibi esse substantiam corporis & sanguinis Christi, idque ob ubiuitatem quæ humanitati impertitur à verbo. Nam 1, duarum rerum unitarum ubi est una ibi est altera; ergo ubi est Divinitas Christi ibi est ejus humanitas, *i. e.* ubique. 2, *In ipso inhabitat omnis plenitudo Divinitatis corporaliter* : Col. 29. 3, *Omnia mihi tradita sunt à Patre*, ergo & omnipræsentia. 4, Ubi sunt duo vel tres congregati in meo nomine, ibi sum in medio eorum. Sic 28. 20. Sum vobiscum usque ad consummationem seculi.

27. Sed hoc dogma vix paucioribus Morbis laborat, quam illud de Transubstantiatione. Ego adverto hæc duo: 1, Ubiquitas tollit naturam corporis & creaturæ, & sic Christus ubiquitariorum non est verè homo. Consequentia est evidens; nam verè homo est verè creatura constans ex vero corpore & verâ animâ. Antecedens etiam liquet; nam natura corporis & omnino creaturæ est restringi sic ut hoc non sit illud; quod est illimitatum est Deus: 2, Si Christus est præsens ob ubiuitatem, tum non est magis præsens in pane consecrato quàm in non consecrato, nec veriùs diceretur de pane quàm de mensâ: *hoc est corpus meum*. Sed ad argumenta.

28. Ad 1. resp: antecedens verum est, si uniuntur adæquatè ut superficies & albedo chartæ, materia & forma solis, aquæ &c. At non est verum ubi res uniuntur inadæquatè, ut anima & caput hominis, Sol & orbis solaris, rota & radius, humanitas Christi & persona *Verbi*. Ad 2. Corporaliter. *i. e.* substantialiter & completè; nam Christus est plenè Deus, sed. non quà homo. Ad 3. Omnia sunt Christo tradita:

scilicet in personâ Verbi, non verò ut in humanitate formaliter resideant: sic enim infinitum comprehenderetur à finito. Ad 4. Est ibi per gratiam & directionem & protectionem, non autem per corporalem præsentiam.

29. E reali præsentia Christi in Eucharistia progenatum est sacrificium Missæ, quod dicunt esse propitiatorium pro vivis & mortuis, quasi scilicet Sacerdos offerret Christum Patri. Ac nos quidem sacrificium spirituale, nimirum laudum, gratiarum, &c. hic agnoscimus. Licet etiam appellare Eucharistiam sacrificium commemorativum. i. e. commemorationem sacrificii quo se semel obtulit Christus, quoque sustulit peccata mundi, quòdque unicum ab omnibus Christianis agnoscitur sacrificium propitiatorium. Aug: *Quotiescunque Pascha celebratur, nunquid toties Christus occiditur? Sed tamē anniversaria recordatio repræsentat quod olim factum est, & sic nos facit moveri, tanquam videamus in cruce pendentem Dominum.* Ambrosi: super Ep: ad Hebræos: *In Christo semel oblata est Hostia ad salutem sempiternam potens? Quid ergo nos? Nonne per singulos dies offerimus? sed ad recardationem mortis ejus.* Thomas in Summâ: *Christus dicitur immolari in Eucharistia, quia ea est imago Passionis ejus; imagines enim solemus appellare nominibus rerum, quarum sunt imagines, ut in aulæ: hic est Cicero, hic Cæsar.*

30. Et qui hoc exangue sacrificium appellant propitiatorium pro vivis & mortuis, dicent, credo, illud esse propitiatorium solum vi passionis Christi, cui proinde non derogat sed subservit: quod non vel sic concedi fas est. Fateor quidem Deo ob merita Christi placere quòd baptizamur, precamur, Eleemosynam damus, Eucharistiam celebramus, & quæcunque
ejus

ejus iussa peragimus ; unde etiam hæc appellantur sacrificia spiritualia , & sacrificio Christi subservientia. Atque fiunt commodo nostro ; *sed num & aliorum ?* In solâ precatione pro aliis placemus Deo ; nam præcepit Deus ut pro aliis precemur ; non autem ut pro aliis baptizemur , aut Eucharistiam sumamus , aut elemosynam demus. Itaque dicet : *Quis requisivit hæc à vobis ?*

31. Ex eâdem corporali præsentia nata est in Ecclesia Romanâ consuetudo præbendi laicis solum panem sine calice. Esse enim totum Christum sub specie panis ; carnem quidem vi consecrationis , sanguinem verò per concomitantiam. Christum quippe esse in hoc Sacramento pro præsentia suâ conditione. Cum ipse primùm consecraret , erat mortalis ; & tum panis vertebatur in carnem ejus mortalem. Si verò aliquis Apostolorum consecrasset in triduo mortis , tum panis verus fuisset in carnem exanguem , & vinum in sanguinem effusum. In resurrectione Christus indissolubiliter reunivit carnem & sanguinem ; exinde ergo ubicunque est caro Christi ibi est & sanguis ejus. Et sic Laici sine calice habent & carnem & sanguinem Christi.

32. Tota hæc ratiocinatio innititur Transubstantiationi , & cum eâ concidit ; & tuetur morem à formâ primæ consecrationis (quæ nobis perpetua regula esse debet) prorsus alienum. Videtur etiam is qui solum carnem habet expressè & sanguinem per concomitantiam tantum , is inquam videtur non bibere sed edere sanguinem Christi ; nam nihil facit circa panem consecratum nisi ex mandato Christi. at Christus de pane consecrato dixit solummodo : *accipite & manducate.* Certè is non bibit sanguinem Christi Sacramentaliter ; nam vinum in Sacramento repræsentat
san

sanguinem Christi ut effusum, qui sumitur in pane sanguis est concretus cum carne.

33. Ex eâdem præsentia enascitur adoratio Hostiæ. Sed si nulla est Transubstantiatio, an non hæc ^{aspici} est idololatria? Fatentur passim Romanistæ cum indignatione dubii. Nostrum quidam sic emolliunt rem. Colunt Christum quem credunt esse sub speciebus pacis & vini. Jam cultus debetur Christo, error est Hostiam cum Christo conjunxisse. Sunt ergo rei non colendi aliud pro Christo, sed opinandi Christum quoad corpus esse alibi quàm in cælo. Non enim adorant Christum quia est in Hostiâ, sed quia est Christus. Esse autem in Hostiâ est adjunctum per accidens Christo in quantum est objectum ^{aspici}. Et hæc quidem excusatio nascitur è charitate; itaque valeat quantum valere potest.

34. Tandem quia Baptismus & Eucharistia ab omnibus, eaque sola ab omnibus censentur Sacramenta à Christo instituta in perpetuum & generalem usum omnium Christianorum, itaque hîc subijciam nonnulla quæ Sacramentis communia habentur.

35. Sacramentum in genere continet omnia signa quibus Deus confirmat hominibus veritatem suæ promissionis. Sic arbor vitæ erat Sacramentum Adamo & Evæ, arcus Noæ, vellus Gideoni, retractio umbræ Ezekie, circumcisio Abrahæ & posteris ejus, purificationes sacrificia & aliæ ceremoniæ Judæis sub lege. Sacramentum novæ legis est sigillum quo nobis confirmat Deus promissa in Evangelio addens verbo signum tanquam evidentius nostræ imbecillitati; quasi diceret in Baptismo, hujus peccata tam certò remittuntur ac sordes corporeæ aquâ abluuntur; & in Eucharistiâ dicit ritè sumenti: anima tua tam certò nutritur corpore & sanguine. *i. e.* passione Christi,

Christi, ac corpus pane & vino reficitur.

Obj. Philippus dicit Eynucho: *Si credis toto corde &c.* Quid autem opus est confirmatione Baptismi toto jam corde credenti? *Resp.* Toto corde. *i. e.* sincerè licèt imbecillitate commixtâ; nam semper orandum est ut fides nostra augeatur. Psal: 119. 10. *Toto corde te quæsvi; ne finas me vagari a præceptis tuis.*

36. Utque institutio Sacramenti est sigillum affixum Verbo Dei, ita susceptio est ex parte nostrâ sigillum fidei, quam scilicet in susceptione Sacramenti profite-mur coram Deo & hominibus. Baptizatus dicit: tam credo peccata mea ob merita Christi ablata esse, quàm corpus meum hæc aquâ ablui. Et sumens Eucharistiam dicit (non verbo sed re) tam credo animam meam pasci corpore & sanguine Christi ad vitam æternam, quàm corpus meum refici pane ac vino.

37. Atque hic quidem est præcipuus usus & finis Sacramentorum. Ulteriùs deserviunt 1, Christianis coadunandis. Aug: *In nullum nomen religionis sive verum sive falsum coadunari homines possunt, nisi aliquo signaculorum seu Sacramentorum consortio colligentur.* 2, Deservit Sacramentum humanæ naturæ mulcendæ & ducendæ, quippe cui sit naturale per sensibilia & corporea ad intelligibilia & spiritualia diduci. 3, Studium humanæ actionis est plerumque circa sensibilia, ut durum sit hominem à sensibilibus prorsus abstrahere; Itaque ei proposita sunt corporalia exercitia in Sacramentis quibus salubriter exerceatur, & distineatur à superstitiosis exercitiis in cultu Dæmonum, &c. 4, Dum Christus præbet Ecclesiæ hæc sensibilia sui repræsentamina, monet non alias ejus imagines in cultu Christiano adhibendas esse.

38. Sacramenta novæ legis dicuntur conferre gratiam quam significant. Sic in Baptismo significatur pur-



gatio animæ; & baptizati purgamur. In Eucharistiâ significatur corpus & sanguinem Christi assumi ab animâ; & assumuntur. Si verò in Eucharistiâ tradi volunt verum & naturale corpus Christi, quia corpus ejus verum & naturæ significatur per panem, id nisi à Transubstantiatoribus aut Consubstantiatoribus non concedetur.

39. Cùm autem susceptio Sacramenti supponat gratiam, melius videtur dici, Sacramenta augere quàm conferre gratiam. Melius etiâ videtur dici Sacramenta esse media gratiæ à Deo impetrandæ, quàm instrumenta Dei in gratiâ conferendâ. Nec quidem potest intelligi instrumentalitas corporum in effectiōe spiritualium. Respondet Aquinas, *Quòd agunt non per formam suam sed per formam principalis agentis i. e. Dei.* Quod quid est nisi totam efficientiam Deo, Sacramentis nihil addicere? Ac Magister quidem Senten: dicit Sacramentum solum ostendere quod agit Deus: De quo pòst ubi de absolutione: Interea facile intelligitur Sacramenta esse media ad gratiam impetrandam, scilicet ex voluntariâ constitutione Dei, qui statuit gratiam exercētibz ulteriorem gratiam impertire.

40. Dices, tum Sacramenta non magis conferunt gratiam quàm preces eleemosynæ &c. *Resp.* non magis, sed majorem. Nam preces, laudes, eleemosynæ, &c. suas partes agunt Christianæ obedientiæ, at singula Sacramenta repræsentant Christum ut pro nobis passum, adeoque in iis celebrandis totum exercetur Evangelium: Hîc & laudamus & precamur, & fidem ac spem profiteamur, & charitatem exercemus: Tanto cumulo devotionum non possumus non esse gratiores Deo remuneratori. Dixit enim. *habenti dabitur.*

41. Jo: 15. dicitur, *Jam vos mundi estis propter sermonem*, super quo Augustinus: *Unde est ista tanta virtus aquæ, ut corpus tangat & cor abluat, nisi faciente verbo? non quia dicitur sed quia creditur.* Ex quo videtur sequi soli fidei deberi omnes effectus qui attribuuntur Sacramentis. *Resp:* Soli fidei debentur ut radici, est enim ea radix omnium bonorum operum. Verum per omnes Christianæ obedientiæ partes placemus Deo, eique gratiores reddimur; quod quid est nisi gratiam accipere?

42. In Scholâ dicitur, Sacramenta Veteris Legis solum significasse non autem contulisse gratiam. Nosstrates multâ cum ratione fere communiter statuunt, illorum Sacramenta idem illis præstitisse, quod nobis nostra minore tamen gradu; obscurâ scilicet cognitione non pariente fervidam devotionem. 1 Cor: 10. 3. *Edêrunt eundem cibum spiritualem, & bibêrunt eundem potum spiritualem (nam bibêrunt è rupe illâ spirituali quæ eos comitabatur, & rupes illa erat Christus).* Num quod contulit Christum Judæis erat merum inefficax signum? & Rom: 4. 12. *Circumcisio vocatur sigillum justitiæ fidei.*

Obj: Heb: 10. 1. *Per ceremonias Legis non purgantur peccata.* *Resp:* i. e. non in se, nec nisi per ordinem ad Christum. Dices: Cur igitur sunt sublata Sacramenta veteris legis? Respondet Aug: contra Faustum; *Sunt ablata, quia impleta; & alia sunt instituta virtute majora, actu faciliora, numero pauciora.*

43. Solus Deus instituit Sacramenta, nam solus potest eorum effecta præstare. Quæ autem in consecratione adhibentur ultra institutionem Domini, ea pertinent ad solennitatem, non ad necessitatem Sacramenti.

44. Per Sacramenta quæ fluxère de latere Christi pendentes in cruce dicitur esse fabricata Christi Ecclesia, per Baptismum enim regeneramur, per Eucharistiam nutrimur.

45. Ministri Ecclesiæ quanquam sint mali homines possunt conferre Sacramenta cum effectu; nam Minister est tantum instrumentum Christi in hoc negotio; ideoque non agit secundum suam formam sed secundum formam Christi. Aug: *Quid tibi fecit malus Minister, ubi bonus est Deus?* Minister tantum exhibet ceremoniam externam, effectus est Dei qui instituit, & qui neminem eo spoliabit ob vitium alterius. Ministri tamen debent esse conformes Domino, & mali peccant sacra tractando; & contra suscipientes Sacramenta, quibus fervorem devotionis suis malis exemplis minuunt; & contra Deum, quem externâ ceremoniâ colunt, sed vitæ pravitate contumeliâ afficiunt; atque adeo semet infimæ gehennæ inter hypocritas obsignant.

46. Sed num intentio Ministri requiritur ad perfectionem Sacramenti? Certum est Minister debere intendere id quod intendit Ecclesia cujus instrumentum est in hoc opere. Rem ad hunc modum explicat Thomas in Summâ: Minister Sacramenti agit in personâ totius Ecclesiæ, in verbis autem quæ profert exprimitur intentio Ecclesiæ, quæ sufficit ad perfectionem Sacramenti, licet personales Ministri cogitationes post alia divagentur. Ea quippe divagatio non magis impedit effectum Sacramenti quam alia ejus vitia. n. 45.

S E C T. XIII.

De Confirmatione.

Ecclesia omni ævo usa est Confirmatione Episcopi post Baptismum.

1: **E**A in Ecclesiâ Romanâ statuitur esse Sacramentum. Cujus materia est inunctio frontis Chrismate (quod ab Episcopo antea consecrabatur) in formam crucis. Forma est in his verbis: *Consigno te signo crucis & confirmo te Chrismate salutis, In nomine Patris, & Filii, & Spiritus sancti.* Gratia significata est robur spirituale: Melchisedes Papa ad Episcopos Hispaniæ: *Spiritus sanctus qui super aquas Baptismi salutifero descendit lapsu in fonte plenitudinem tribuit ad innocentiam, in confirmatione augmentum præstat ad gratiam; in Baptismo regeneramur ad vitam, post Baptismum confirmamur ad pugnam: in Baptismo abluimur, in Confirmatione noboramur.*

Obj: Omnium Christianorum est pugnare ergo instrui ad pugnam per Baptismum per quem facti sumus Christiani; & sic non videtur opus esse confirmatione. Respondet Thomas in Summâ: Omnium Christianorum esse pugnare adversus hostes invisibiles, concupiscentiam nempe & Diabolum: at Confirmatorum esse pugnare fortiter adversus persecutiones & alias tentationes Mundi.

Solus etiam Episcopus statuitur Minister hujus Sacramenti; nam à solis Apostolis peractum legitur in Scripturâ sacrâ; & pariter se habuit usus Ecclesiæ.

2. Nostras Ecclesia confirmationem retinet, quantum ad orationem pro gratia; idque ex jussu Domini: *Petite & accipietis*; & quantum ad impositionem manus, quia eâ ceremoniâ in hoc opere usi sunt Apostoli. Verum apud nos non insignitur Confirmatio nomine Sacramenti, sed ut supplementum Baptismi exercetur. Nam licet omnibus eam ritè suscipientibus sine dubio prosit Confirmatio (cùm Dominus dixerit: *petite & accipietis*) tum est ea maxime necessaria iis qui baptizabantur in Infantiâ, eum jam adultiores & doctiores facti in Evangelio, votum baptismale profitentur in se suscipere.

3. Confirmatio quidem Apostolorum frequenter ornabatur donis extraordinariis Spiritus sancti, quæ quidem nostras confirmationes non sequuntur. Nec tamen dubium est quin hæc quoque valeant ad augmentum gratiæ gratum facientis. Ut enim Deus non defuit Ecclesiæ per Miracula condendæ, sic non deerit Ecclesiæ per Munera ordinaria conservandæ; atque adeo non deerit Ministris suis in hac aut ulla aliâ officii sui parte.

SECT. XIV.

De Pœnitentiâ.

Christus invitât omnes peccatores ad pœnitentiâ, & omnibus pœnitentibus promittit veniam.

1. **I**N Scholâ tractatur de pœnitentiâ duplici titulo, quâ est virtus & quâ est Sacramentum. Pœnitentia quâ virtus definitur: Dolor de peccato commisso in quantum est offensa Dei, cum emendationis proposito.

2. Hic dolor est partim rationalis partim sensitivus; dolor de peccato quâ rationalis est displicentia peccati, & non potest esse nimius. Dolor hic ex quâ parte est sensitivus est tristitia quædam; quæ potest esse nimia; quippe si corpus affligitur ultra quàm benè ferre potest. Hunc dolorem nonnulli tam vehementem esse debere autumant, ut eum comparent doloribus parturientis; ut pœnitere sit lachrimari, plangere, iram legis persentiscere, animo ad portam gehennæ detrudi. Et nonnihil horum potest fortasse intercidere; verùm in Scripturâ sacrâ cùm invitamur ad pœnitentiâ, simul certi reddimur de veniâ; quod quomodo stet cum tam miseris angoribus ego non capio. Dicimus quidem in Confessione ante consecrationem Eucharistiæ: recordationem peccatorum nostrorum nobis gravem esse, eorum onus esse insupportabile. Per quod hoc volumus, peccata in se esse insupportabilia, utpote imortantia secum vindictam omnipotentis; & hoc modo eorum cogitatio peccatorem in quolibet furias valeat

leat adigere ; verum ex fide & spe in Christo hæc ipsa cum solatio cogitamus.

3. Pœnitentia statuitur actus justitiæ, quia est vindicta quædam quam de nobis sumimus & quam Deo retribuimus. Verum, ut ait Philosophus, Deo & parentibus æqua reddi non possunt. Ac homuncionis dolor est misera compensatio pro offensâ in Deum; est tamen quam accipit ob Christum qui plenè satisfecit pro peccatis Mundi. Ut ergo pœnitentia rite dicatur actus justitiæ, secum Merita Christi adferre debet, in quorum virtute & destruit peccatum & Justitiæ Divinæ satisfacit.

4. Pœnitentia non agitur de peccato originali, quippe quod non consistit in personali deordinatione voluntatis, sed in quâdam quasi habituâ deordinatione naturæ. Nullum autem peccatum actualere-mittitur absque pœnitentiâ; nam quem non penitet peccati is peccatum diligit, ac proinde Deum odit, adeoque à justo Judice puniendus est. Jure quidem, dices, at ex abyssu Misericordiæ an non potest Deus ignoscere etiam obdurato? *Resp.* Misericordia Dei est inseparabilis ab ejus justitiâ, ergo misericordiæ divinæ opus est non ignoscere impœnitenti, sed operari pœnitentiam; ad quam multa quidem omnibus exhibet argumenta, quæ si quis cuncta contemnit, nulla relinquitur spes. Nam tali parcere est justitiam negligere.

5. Actus integrantes pœnitentiam ab Aquinate numerantur hi: 1, motus fidei, in quantum credimus Deum esse & esse justum Judicem. 2, motus timoris servilis, qui retrahit à peccatis metu suppliciorum. 3, motus spei, quo quis, spe veniæ consequendæ, emendandæ vitæ propositum assumit. 4, motus charitatis in quantum peccatum jam displicet propter

propter seipsum & non solum propter supplicia. 5, motus timoris filialis, in quantum propter reverentiam Dei emendationem offerimus.

6. Pœnitentia est vel de peccatis antegressis Baptismum vel de iis quæ Baptismum sequuntur; & hæc dicitur secunda tabula post naufragium. Baptismus quippe erat prima.

7. Huius loci est paucis agere de peccato veniali & mortali. Peccatum mortale vocant in Scholâ peccatum quod aufert Charitatem; veniale quod solum tollit fervorem Charitatis. Nostrates parcè utuntur his appellationibus, quippe qui statuunt omne peccatum sine Christo esse mortale, per Christum omne peccatum esse veniale. Gradus tamen in peccatis agnoscimus, & alia gravia alia levia passim nuncupamus. Verùm levia dicuntur in comparatione ad alia graviora; nam nullum peccatum in Deum potest esse absolute & in se leve. Interea distinctio peccati mortalis & venialis non est prorsus repudianda, nam sumitur ex 1 Jo. 5. 16. *Est peccatum ad mortem.* Et *Est peccatum non ad mortem.* Non tamen hinc sequitur ullum peccatum ex genere suo esse non ad mortem, sed saltem aliqua peccata ex infirmitate aut incogitantia nasci, quæ proinde non indurant cor, sed pœnitentiæ facilem præbent aditum. Nonnulla vero peccata ex malitia orta & cum contumaciâ continuata præcludunt animum contra omnes monitiones aut rationis suæ aut alienæ, hæc sunt ad mortem, quia pœnitentiam fere non admittunt sine miraculo. Itaque peccatum quod est mortale in uno (ob malitiam contumacem cordis) potest esse veniale in alio ob excusationes infirmitatis aut incogitantia quæ secum adfert, et ob mansuetudinem spiritus quæ ducit ad pœnitentiam. Jam quòd peccata venia-

lia remitti aiant repetitione Orationis Dominicae, tunctione pectoris, asperione aquae benedictae, &c. mirum est unde id didicerint. Scriptura sacra non meminit repetitionum, tunctionum aut asperionum; unde ergo habetur, ista veniam impetrare pro levioribus peccatis? *In quantum*, inquit, *per ista exprimitur detestatio quaedam peccati*. Ego regeo, sinceram detestationem peccati esse veram poenitentiam, cui promittitur venia cujuscunque peccati sine istis observationibus.

8. Poenitentia ulterius consideratur in Ecclesiâ Romanâ ut *Sacramentum*. Hujus statuuntur tres partes integrantes, Contritio, Confessio & Satisfactio; quas ut ab illis explicantur ob oculos legentis ponam, subjuncturus ea in quibus dissentimus. *Contritio* autem definitur dolor assumptus pro peccatis in quantum sunt offensa Dei, cum proposito confitendi & satisfaciendi. Hæc oritur ex timore filiali; dolor ortus ex timore servili dicitur attritio.

9. *Confessio* (per Aug:) est quâ latens morbus spe veniæ aperitur. Ea statuitur necessaria quia Christus dedit suis potestatem remittendi aut retinendi peccata; at dedit frustra nisi possit exerceri; exerceri autem non potest nisi peccata detegantur. Et sic, confiteri Sacerdoti quid est nisi agnoscere potestatem ei à Christo concessam? Ac in Ecclesiâ quidem Romanâ hæc confessio dicitur auricularis, facta scilicet in aurem Sacerdotis; & debet esse particularis de omnibus peccatis admissis post novissimam confessionem; semperque facienda est ante receptionem Eucharistiæ, & frequenter aliàs.

10. In nostrate Ecclesiâ nemo tenetur confiteri particulariter aut seorsim, sed in publicis precibus edicimus genera peccatorum eorûmque nos fatemur

reos eorūque veniam humiliter petimus. Ac tum à Ministro solo pronuntiatur generalis promissio Dei de omnibus pœnitentibus absolvendis. Atque hæc forma videtur magis honorifica Deo quàm confessio auricularis, sicut etiam preces publicæ & laudes publicæ sunt magis honorificæ quàm privatæ. Necessitatem certè confessionis auricularis universim, quod scio, Protestantes negant; non quasi illa sit scelerata, sed puto, quia gravis sit populo, nec eventu utilis, & non mandetur à Domino. Tamen in nostrate Ecclesiâ si cui ægrotanti, aut iter periculosum suscipienti, aut quâcunque aliâ occasione videtur pectus suum Pastori aperire per aliquam confessionem privatam unius aut aliquorum peccatorum cum detestatione omnis peccati, tum Minister eum absolvit particulatim & positivè, dicens: Ego te absolvo &c. & hoc facit evidenti authoritate Christi ei per Ecclesiam commissâ. Et hujus praxin commendat S: Jacobus c. 5. 15. *Si habet peccata remittentur ei* scilicet per Presbyterum accersitum.

Obj: Si eum intus pœnitet peccati, remittitur ei à Deo, cui quid opus est addi remissionem Pastoris?

Resp: Pari ratione sic argue: Si quem pœnitet peccati remittitur ei à Deo, cui quid opus est addi Baptismum? Placuit scilicet Deo addere verbo Sacramentum, indulgens quasi ulteriorem confirmationem infirmitati nostræ. Ei etiam placuit certa obsequia à suis exigere ut professiones fidei & pœnitentiæ internæ, quæ quidem obsequia non prosunt animabus ex naturâ rei sed quia mandantur. Et qui Christi mandata non exequitur is non est intus pœnitens.

11. Ut Deus celat peccata confitentis, sic ea Minister celare debet, cum confessio exterior ad Sacer-

dotem sit signum interioris ad Deum. Ac in Ecclesiâ quidem Romanâ Sacerdos tenetur celare confessa non obstante quocunque jussu Superiorum, non enim iis subijcitur nisi ut homo, hoc autem scit non ut homo sed ut Deus. (Sunt verba Supplementi Summæ Aquinatis). Adductus etiam in testimonium potest jurare quod nescit hoc quod non scit nisi ut Deus. Confitentis tamen licentiâ potest edicere, nam jam hoc scit non solum ut Deus sed etiam ut homo. Et quod quis potest per se potest per alium: sed confitens potest ipse dicere sua peccata, ergo potest licentiam dare ut alius dicat.

12. Satisfactio est peractio istorum quæ à Confessore injunguntur. Suntque ea opera quædam pœnalia, & ponuntur tria, Eleemosyna, Oratio & Jejunium. Non enim habemus nisi tria bona; nimirum fortunæ, quibus subtrahitur per eleemosynam; corporis, quibus subtrahitur per jejunium; & animi, quibus subtrahere non oportet (cùm per ea Deum colamus), sed totaliter subijcienda sunt Deo, quod fit per Orationem. Dictæ etiam pœnalitates auferunt radices peccatorum. Eæ sunt 1 Jo: 2. 16. Concupiscentia carnis, concupiscentia oculorum & superbia vitæ. Contra primam militat jejunium; contra secundam eleemosyna; contra tertiam oratio. Hæ pœnalitates etiam aditum peccatis præripiunt; peccatum contra Deum excludit oratio, contra nosmet Jejunium, contra alios eleemosyna. Flagellationes autem & quicquid pertinet ad subigendam carnem referuntur ad Jejunium; & sic de cæteris. Flagella hujus vitæ quæ à Deo infliguntur peccatori, in quantum fiant aliquo modo ipsius *i. e.* in quantum ea fert patienter, & cum gratiis, & ad purgationem à peccato, sic pertinent ad pœnitentiam; si autem iis per
im.

impatientiam reluctatur, non pœnitentiæ sed pœnæ rationem fubeunt.

13. Ac nos quidem orationem & eleemosynam exercemus, idque ex mandato Dei. Jejunia etiam frequenter & nonnunquam alias pœnalitates subimus, 1, ut conformemur humilitati Christi; 2, ad subigendum carnem; 3, in exercitium patientiæ & aliarum virtutum; 4, in evitacionem futuri peccati; nemo enim facile recurret in id ob quod est passus. Minimè verò ad satisfaciendum Deo, cui abundè satisfecit Christus pro peccatis mundi, nec ullam aliam satisfactiunculam huic addi patimur. Adde quòd homo totum suum debet Deo, ergo per nihil suum potest satisfacere pro offensâ.

14. Jam habe cur pœnitentia insigniatur nomine Sacramenti in Ecclesiâ Romanâ, non item apud nos. Apud illos pœnitentia dicitur Sacramentum, in quantum pœnitens per ea quæ dicit & facit, significat cor suum recessisse à peccato; & in quantum Sacerdos, per ea quæ dicit, significat divinam peccatorum remissionem. Materia hujus Sacramenti remota est peccatum, materia proxima sunt dicta & facta pœnitentis; Forma est in dictis Sacerdotis [*Ego te absolvo*] nam hæc sunt perfectiva dictorum & factorum pœnitentis. Quia autem Sacerdos non nisi ministerialiter absolvit, itaque apponi debet aliquid pertinens ad primam auctoritatem Dei, viz. *In nomine Patris & Filii & Spiritus sancti*, vel, *auctoritate Dei*; vel, *in virtute passionis Christi*.

15. Apud nos autem pœnitentia ideo non vocatur Sacramentum, quia confessio particularis facta Sacerdoti non est necessaria ad salutem, nec consequenter ejus particularis absolutio. Absolutio autem generalis nihil est nisi prædicatio Evangelii; Sacra-

mentum autem non est verbum, sed additur ut sigillum verbo. Ac in totâ re si Sacramentum hîc nominari oporteat, non iam (ut advertit Calvinus) erit Sacramentum pœnitentiæ; sed confessionis & absolutionis.

16. Prædicta aliquantô clariora erunt si adhibeantur pauca de clavibus. Nam Mar. 16. 19. Dixit Dominus Petro: *Dabo tibi claves regni cœlorum*, &c. Jam per regnum cœlorum possumus intelligere vel statum beatorum vel statum Christianorum militantium. Ecclesia militans nuncupatur regnum Dei & regnum cœlorum, quia ea regitur à Christo qui est de cœlo, & in cœlo. Tum etiam quia Ecclesia militans est porticus cœli & unica via ad beatitudinem cœlestem; tum etiam ut ii qui sub Christo Ecclesiam regunt, moneantur terrena non esse Christiani juris. Jam qui est sincerum membrum Ecclesiæ militantis, is discedens ex hâc vitâ certô & rectè meat in cœlum sine ullo ulteriore adminiculo; nec enim quicquam requiritur ad vitam æternam nisi ut bonus sis Christianus in hâc vitâ. Nulla ergo est propria clavis regni cœlorum; i. e. Ecclesiæ triumphantis, sed quæ aperient tibi regnum Dei in terris, eadem claves aperient tibi ejus regnum in cœlis.

17. Clavis autem Ecclesiæ militantis est vel dispositio ob quam Ecclesia cuiquam aperitur, & hæc est fides ac pœnitentia; vel est instrumentum à Deo conditum quo Ecclesia aperitur credentibus & pœnitentibus, i. e. quo actu admittimur in communionem Sanctorum. Et hæc propriè dicitur clavis; illa a terra est dispositio tantum passiva recommendans nos ad beneficium clavium.

18. Prima igitur clavis regni cœlorum est Baptismus per quem admittimur in Ecclesiam, remissis omnibus

omnibus peccatis Baptismum antegressis. Secunda clavis est absolutio quâ peccata admitta post Baptismum remittuntur poenitenti: Per ea enim quasi abrenuntia ante Baptismo & se quantum quidem ad meritum suum ex Ecclesiâ ejecerat. Observa autem Eucharistiam non esse clavem, quia non admittit in Ecclesiam, sed admissos alit.

19. Quia peccatum è cœlo excludit, itaque utraq; clavis aperit vel claudit cœlum, remittendo vel retinendo peccata. Hæc clavium duo habet: 1, potestatem judicandi qui sunt idonei ad recipiendum Baptismum aut absolutionem, & qui non sunt; 2, potestatem illos recipiendi, & hos rejiciendi.

20. Retinere peccata videtur idem esse ac non remittere; nam nefas esset imaginari duritiem ullam positivam effluere in animas peccatrices ex institutionibus Christi.

Ob: In foro, non solum non remittuntur peccata obduratorum, sed etiam peccatores per excommunicationem alligantur pœnis quibusdam temporalibus, ergo ligare est plus quàm non solvere. *Resp:* Excommunicatio alligat peccatorem pœnis quibusdam sed non peccatis. Imò hæc pœnæ sunt prorsus correctiones, & delinquentis, & aliorum, 1 Cor: 5: 5.

21. Hæc claves sunt Christi & ab eo hominibus conceduntur. Clavis ordinis per quam remittitur peccatum committitur solis Sacerdotibus. Clavis Jurisdictionis, per quam solvitur aut ligatur, non peccatum sed poena, i. e. excommunicatio aut absolutio, potest committi aliis quàm Sacerdotibus.

22. Lombardus dicit 1: 4, *Sent: d: 18.* Sacerdotibus commissæ est potestas remittendi peccata; non ut propriâ virtute remittant, quia hoc Dei est; sed ut operationem Dei remittentis ostendant. tanquam Ministri.

nistri. Ligat, *i. e.* Ligatum ostendit. absolvit, *i. e.* absolutum ostendit. At communiter dicitur Sacramenta & significare gratiam & eam operari dispositivè quidem & instrumentaliter, *i. e.* disponunt ad gratiam. De quo suprà.

23. In Ecclesiâ antiquitus ob peccata publicè notati excluderantur interdum ab Eucharistiâ tantum, interdum ab omnibus sacris & prorsus à consortio fidelium. Precabantur quidem pro excommunicatis sed non cum iis. His antequam redintegrarentur in Ecclesiam injungebantur vigiliæ, jejunia, preces & fortassis aliæ pœnalitates quæ & ostendant pœnitentiam & ad eam disponant; in quibus omnibus satisfactione datâ, recipiebantur pœnitentes publicè in Ecclesiâ; & hæc readmissio, in majorem solennitatem facti & in honorem ordinis, ab Episcopo peragebatur. Nec aliam quàm hanc in Ecclesiâ executionem Clavium agnoscunt nonnulli. Ac isto quidem modo pœnitentia & absolutio integrant Sacramentum ritè dictum; sed quod sit necessarium solis publicè notatis, non autem omnibus Christianis.

S E C T. XV.

De Ordine Matrimonio & extremâ Unctione.

1. **D**E Ordine dictum est secundâ parte; pauca adjiciam. Ordo, per Petrum Lombardum, est signaculum quoddam Ecclesiæ quo Spiritualis potestas traditur ordinato. Intellige Potestas circa alios, nam Baptismus dat baptizato potestatem, ut ipse recipiat Eucharistiâ. Possit Ordo sine injuriâ appellari Sacramentum; non tamen duobus connumeratur, quia non

non est necessarius singulis Christianis ad salutem.

• 2. De Matrimonio dictum est in tertiâ parte ; hîc solùm adverto , Matrimonium non fuisse institutum à Christo ; sed à Deo in Paradiso institutum , atque ex naturâ humanâ , non quidem necessitate sed commoditate emanans , fuisse à Christo assumptum ad repræsentandum spiritualem unionem ipsius & Ecclesiæ ; *Eph: 5. 25.* Et ob hanc significationem est magnum Mysterium seu Sacramentum ; non tamen adnumeratur cæteris , quia non est necessarium ad salutem.

3. In Ecclesiâ Romanâ unguntur ægri ferè in articulo mortis ; scilicet ad sublationem peccatorum venialium : Nam mortalia supponuntur sublata per pœnitentiam , Hancq; extremam Unctionem esse aiunt ad pœnitentiam , ut est confirmatio ad Baptismum. Eam dicunt institutam fuisse à Domino , sed ab Apostolis promulgatam , *Jac: 5. 14.* Nostrates hunc morem non retinuêre , rati unctionem Jacobi in usu non fuisse nisi cum dono Miraculorum , quod cessavit. Utcunque non injuriâ excludimus hanc unctionem è numero Sacramentorum ; quia non est necessariâ ad salutem : cùm per ipsos ejus fautores , non profit nisi in venialibus : parans rectam & expeditam (damno Purgatorii) in cælum viam. Nec loquitur S: Jacobus de ullâ efficaciâ Unctionis , sed totam videtur tribuere orationi Sacerdotis : Quod autem dicit ; *Si habet peccata remittentur ei* ; videtur idem ac si diceret : *Si confitetur peccata Presbytero remittentur ei* ; scilicet per absolutionem non per unctionem.

S E C T. XVI.

De Ceremoniis.

1. **C**eremonia est forma externa peragendi cultum Dei. Interdum hæc forma expressè mandatur à Domino; ut in Sacramentis, & in pronuntiatione Orationis Dominicæ. Atque ea licet naturâ suâ sit ceremonia, tamen vi institutionis Dominicæ fit de substantiâ cultus. Nam substantia cultus divini reputatur id omne quod expressè mandatur à Domino. Interdum verò hæc forma exterior non expressè mandatur à Domino; sed vel est dictatum naturæ (ut elevatio manuum & oculorum in precando) vel constituitur humanitùs, & ea dicitur simpliciter ceremonia, & contradistinguitur substantiæ cultus tanquam vestis corpori.

2. Ac de ceremoniis quæ dictantur à naturâ, nihil ampliùs dicam; cum eæ non exigantur, sed cuiq; disponendæ relinquuntur. Ceremoniarum humanitùs constitutarum finis est decencia peragendi cultum Dei publicum. Itaque in iis duo sunt; 1, Decencia cultus, quæ mandatur à Domino per Apostolum, 1 Cor: 14. 40. *Peragantur omnia decenter & ordine.* Secundum in iis est prudentia hominum judicantium quæ res deceant in cultu publico & quæ dedeceant.

3. Ceremoniæ ergo statuuntur pars cultus Dei, non in quantum statuitur sic & sic decere (nam hoc est iudicium prudentiæ), sed in quantum procedunt à studio decenter ordinandi cultum Dei; nam hoc est obedire Apostolo qui jubet in nomine Domini, *Omnia fieri decenter & ordine.*

4. Jam supponendum est omnes Christianos concordēs esse in hoc quòd cultus Dei peragatur decēter; nam & Apostolus hoc expresse mandat; & qui aliter eum peragi vellet, is cultum Dei deridendum proponeret, quod de quoquam Christiano suspicari est contra charitatem. Ubi ergo contenditur de ceremoniis, ibi tota quæstio est de prudentiâ: e. g. in Eucharistiâ; *accipere, manducare & bibere*, sunt mandati Domini ex ore suo. Hæc facere *decēter*, est mandatum Domini ex ore Apostoli sui. Nonnulli autem *accipiunt, edunt & bibunt* geniculantes, alii ad Mensam discumbentes. Nulla hîc est controversia, nisi uter sit prudentior, illius moris author an hujus.

5. Qui ergo positis lege ceremoniis repugnant, non id faciunt ex tenerâ conscientiâ sed ex ingenti opinione sui Judicii, i. e. ex merâ superbiâ. Quid enim? Omnia debere decēter geri in cultu Dei convenit omnibus inter se Christianis, nihil relinquitur ambigendum, nisi quis sit Judex decoris; & unum aut alterum hoc sibi officium contra leges autoritate publicâ sancitas arrogare, quid est nisi præ superbiâ furere?

6. *Sed quæ est necessitas ullius ceremoniæ in cultu publico?* Resp. Cultus corporeus sive publicus sive privatus non potest peragi nisi sub aliquâ formâ externâ: nam corporaliter colens non potest non esse in aliquo situ & sub aliquo habitu, e. g. non potest precari nisi aut nudus aut vestitus, nisi aut stans, aut geniculans, aut sedens, aut procumbens &c. Rursus cultus corporeus est actio corporea & singularis, ergo non potest perfici nisi in circumstantiis determinatis loci temporis &c. Jam in cultu privato unicuique relinquitur hæc circumstantialia sibi determinare; so-

lummodo populus sedulo edocetur etiam in devotionibus privatis eam partium positionem maximè decere, quæ reverentiam erga Deum & significat, & excitat.

7. In cultu autem publico ceremoniæ debent esse statæ & sancitæ ad vitandum confusionem quæ decentiæ maximè repugnat, e. g. notum esse debet per canonem aut consuetudinem ubi omnibus standum est, ubi sedendum, ubi geniculandum &c. Nam quid inconcinnius multitudine eadem sacra gerentium, in quâ alii sedeant & fortasse stertant, alii stent, alii geniculentur, complures mulierculæ provolvantur pronæ in humum, & ibi obnubilatis capitibus gemant? *Hæc exigua sunt*, dices. Sunt, at non debent admitti in cultu Christiano ubi omnia sunt peragenda decenter.

8. Ceremoniæ etiam quædam ultra ordinariam decentiam admittendæ sunt in solennitatem & splendorem cultus; ut quod sacra Mensa sit in orientali tanquam supremâ & ab ostio remotissimâ parte Ecclesiæ, quod Presbyter sacra peragat togatus, & in albis &c. Nam cultus est exhibitio honoris, quæ non fit per vilia.

9. Si ceremoniæ sunt necessariae (ex n. 6.), & in cultu publico debent esse certæ & definitæ (ex n. 7.), sequitur quærendum, cuius sit ceremonias publicas Christiani cultus constituere, aut etiam abigere. Respondeo, ejus esse ceremonias condere aut abigere, cuius est substantiam cultus recipere aut exterminare; (de quo vide retro p. 2. §. 15. n. 6.) nam cui committitur principale, ei & accessorium committitur.

10. Observa postremò, quasdam actiones esse de substantiâ cultus Christiani, & tamen respectu quarundam circumstantiarum dici & esse ceremonias, e. g. assur-

assurgere; geniculari, & omnis gestus exhibens reverentiam debetur Christo, ergo mandatur generali præcepto Justitiæ; tamen geniculari in Eucharistiâ recipiendâ est ceremonia quam potes sine peccato omittere, (nisi obstat constitutio Ecclesiæ) quia præcepta affirmativa ligant semper sed non ad semper. Hinc tamen habet Lector, eos plus colere Deum qui geniculantes recipiunt Sacramentum quàm qui sedentes; eos etiam plus colere Deum qui stantes recitant Psalmos quàm qui sedentes. Nam geniculari & stare sunt actus venerationis, at sedere est respectu aliorum gestus superioritatis aut familiaritatis, nec humilibus conceditur in præsentia Magnatum nisi ratione imbecillitatis corporeæ. Ergo qui recipit Eucharistiam geniculans colit Deum & recipiendo Eucharistiam & geniculando; qui autem sedens recipit, colit Deum recipiendo sed non sedendo. Sic qui Psalmos &c. in Ecclesiâ recitat surgens & stans, colit Deum & recitando & stando; qui autem sedens eos recitat, colit Deum recitando sed non sedendo.

[S E C T : XVII.]

De prædicatione & auditu Verbi.

1. **P** Rædicatio Verbi primitus significabat promulgationem Evangelii; de quâ dictum est 2. p. Nunc ea vox trahitur ad significandum præcipue conciones quæ passim habentur in Ecclesiis. Et quòd priori sensu prædicatio Verbi fuerit pars cultus Christiani, patet ex Marc: 15. 16. *Ite in omnes terras & prædicate Evangelium omni creaturæ.* Jam Christo obsequi est eum colere.

2. Prædicatio Verbi etiam secundo sensu (si rite fit) est pars cultus Christiani. Nam ut Apostolis incubuit fundare Ecclesiam promulgando Evangelium, ita inculcando Evangelium (quod est negotium concionum) tueri & augere Ecclesiam incumbit Ministris Apostolicâ autoritate constitutis, *Tit. 2. 15. Hæc loquere & hortare.* Et *1 Tim. 4. 11. Hæc manda & doce.* Et quod dicit Timotheo & Tito id dicit omnibus Ecclesiæ Pastoribus pro singulorum gradu, *2 Tim. 2. 2. Quæ audiisti ex me ea committe fidei viris, qui aliis etiam instituendis idonei sint.*

3. Auditus Evangelii cum primûm promulgaretur non erat pars cultus Christiani; nam quomodo colebant eum in quem nondum credebant? Postquam tamen audiverant Evangelium, tum ob grandia ejus promissa vel ob miracula visa auditæ, tum inquam diligentius attendere erat agere secundum rectam rationem, quod est Deum colere cultu quidem naturali non verò Evangelico.

4. Fideles audiendo conciones Theológicas, Catechismos, Lectiones sacras, Expositiones, &c. colunt Deum cultu Christiano. Nam hæc adhibere mandatur Ministris (*n. 2.*) ergo iis attendere mandatur populo, *1 Tim. 6. 17. Præcipe divitibus hujus mundi quod non superbiant, &c.* Si Minister colit Christum hæc monendo, tum divites eum colunt accipiendo has monitiones. Quin si Minister nil ferenisi inepta balbutiat, tamen hæc ipsa patienter accipere est Christum colere; nam est præstare obsequium constitutioni Christi etiam ab ejus Ministro malè tractatæ.

5. Fratrem privatim instruere, hortari, solari, corripere, &c. sunt actus charitatis & à quolibet cui libet præstari debent prout res exigit & prudentia diri-

dirigit. At hujusmodi actus solenniter & publicè ad cœtum Christianorum adhibita, dicuntur aggregatim Concio. Conciones ergo possunt esse bonæ vel malæ sicut privatæ hortationes correptiones &c. Si in malum tendunt, i. e. si suadetur vitium, corripitur virtus &c. tum istæ conciones sunt quoad substantiam malæ. Quæ etiam sunt quoad substantiam bonæ, i. e. nihil promovent articulis fidei aut bonis moribus contrarium, possunt imprudenter applicari, ut si coram populo declamites de tyrannide multorum Principum, coram Principe de arrogantia Subditorum qui ausint conqueri etiam malè passi, si furias gehennæ ostendas jam jam irruituris per desperationem &c. & hæ sunt malæ quoad circumstantias tantum. Jam conciones quoad substantiam enascuntur è principiis concionatoris, nam ex abundantia cordis os loquitur; at concionator potest vel bonis vel malis principiis imbui, utrumque enim est humanum, nec audio quicquam de privilegio in contrarium cœlitus promisso; ergo conciones possunt esse bonæ vel malæ etiam secundum substantiam. Indidem patet conciones in se non malas, posse tamen reddi malas è circumstantiis; quippe quia concionator potest esse imprudens.

6. Hinc liquet cujus sit concionari, nempe viri boni, i. e. bonorum principiorum, & docti & prudentis. Hi concionando colunt Deum, at Deo non placet aut nequitia aut stultitia. *Sed cujus est judicare quis sit idoneus ad concionandum?* Ejus cui committitur per Canones Ecclesiæ. Offendi librum cui titulus **An Apology**, &c. scilicet pro Ministris Presbyterianis in Scotiâ qui campestria ut appellant conventicula sic defendit. 1, Ministri habent autoritatem ad concionandum à Christo, ergo eâ non possunt denudari.

denudari per homines. 2, Christus & Apostoli ejus & omnes deinceps per aliquot prima secula Doctores prædicabant Evangelium contra leges & mandata potestatum hujus mundi; ergo & nos debemus. Et qui id non faciunt, & munus sibi mandatum negligunt, & animas populi produnt.

7. His ego sic respondeo. Ad 1, Qui habet authoritatem concionandi immediatè à Christo, debet concionari invito Magistratu; nam melius est obedire Deo quàm homini. Si autem ita missi sunt hi campestris concionatores, oportet id ostendant miraculo; nam miraculum non visum non potest probari nisi per miraculum visum, 1 p: 5: 7. n: 2. Qui verò habet authoritatem à Christo per dispensationem Ecclesiæ, is non plus habet authoritatis quàm Ecclesia ei concessit. Ecclesia autem in ordinibus dandis Canones suos observare intelligitur. Et ut non potest sive Episcopus sive Presbyterium aliter quàm canonicè ordinare, ita non potest dare ordinato potestatem quidlibet agendi non canonicè.

8. Atque hinc sequitur Ecclesiam secundum Canones procedentem posse cuilibet sui membro silentium indicare aut aliter cohibere etiam usque ad degradationem. Instituit enim Christus ordines, sed eorum dispensationem in manu Ecclesiæ reliquit, ut Ecclesiæ repugnans, intelligatur repugnare Christo.

9. Ex his satisfit utrique simul argumento. Christus & Apostoli prædicabant Evangelium contra Magistratum jussa, quia à Deo immediatè mittebantur, quod etiam miraculis probabant. Doctores sequentes prædicabant contra jussa Magistratum Gentilium, quia ità iis præcipiebatur ab Ecclesiâ quæ immediatè à Deo

Deo constituta erat. Hi verò campestris prædicatores & Ecclesiæ & Magistratui civili simul resistunt. Quod Magistro stant? *Acceperunt*, dices, *jus prædicandi*. Esto, sed, acceperunt eâ lege ut illud sic & sic exercent. 2, acceperunt, sed ab Ecclesiâ quæ ut dedit ita abstulit.

10. Ad incommoda sic respondeo. 1, Si tacent munus suum negligunt. *Væ illis nisi evangelizant*. *Resp*: Eorum in hoc casu silentium non est peccatum sed poenâ. Non peccant non evangelizando, sed peccando meruerunt ut non evangelizent. 2, Si silemus, aiunt, prodimus animas populi. *Resp*: Non committuntur vobis animæ, itaque eas relinquere debetis Deo; qui sat concionatorum parabit, vobis exclusis.

11. Demum quia Conciones possunt esse malæ, i. e. tendere in perniciem audientium (eos quippe hæresi imbuendo, ad seditionem incitando &c.) Itaque nemo concionari debet sine approbatione Magistratus civilis (quæ communiter habetur in Canonibus per ipsum constitutis aut confirmatis); nam ejus curæ committitur populus, eum itaque tueri debet quantum potest ab omni malo. Vide retro p. 2. §. 15. n. 6.

12. Postremò, à nonnullis quæritur, quæ sit necessitas concionum? *Resp*: 1, Eæ non sunt absolute necessariae ad salutem cujusquam Christiani. Nam per Catechismum & Sacramenta unusquisque sufficienter instruitur ad vitam æternam; & unumquemque ratio privata & sua & amicorum hortatur, increpat, solatur &c. *Resp*: 2, Conciones reputandæ sunt necessariae in Ecclesiâ, tanquam adjumenta ad bonam vitam. Solida quippe offerunt argumenta rationi, quæ etiam in improbis vim habet. Instruunt, hortan-

tantur, increpant, solantur, cœlum & gehennam ostendunt. Humanitatem exiit qui tot adhibitis remediis non redditur sanior. Interea, nescio an forma quâ jam vestiuntur conciones antiquorum Patrum formæ (nam non parum differunt) præferenda sit.

S E C T. XVIII.

De Sacrificiis, Oblationibus, Primitiis, Decimis, &c.

1. **S**acrificium est oblatio nonnullius rei sensibilis facta Deo ad eum placandum. Est fere idem Deo quod terrenis Principibus sunt munera. Atque hoc genus cultus edoctum fuisse videtur voce naturæ humanæ. Nam 1, omnes aut quasi omnes gentes aliquilibus sacrificiis usæ sunt, idque non potest non videri humanum quod quasi omnibus hominibus commune est. 2, Cùm terrenos Principes fere ubique gentium per munera allata recognoscamus, tum id præstare Deo est maximè justum, à quo quippe dependemus de bonis & habitis & cupitis. 3, Debetur Deo interna fides & devotio seu cognitio animi, ergo & ejus significatio per exteriora debetur; tum quia connaturale est homini signis externis exprimere interna, tum quia justum est ut Dei cultum per omnia quæ sumus & habemus peragamus.

2. Aug: de civ: Dei l: 10. c: 5. Omne sacrificium visibile invisibilis sacrificii Sacramentum, i. e. sacrum signum est. Invisibile autem sacrificium est Spiritus qui per fidem & devotionem offertur Deo,
Psal: 51:

Psal: 51. *Sacrificium Deo est spiritus tribulatus*, scilicet de peccatis. Itaque omne illud quod fit ad hoc ut spiritus feratur in Deum potest dici sacrificium. Sic Heb. 13. 15. *Per eum offeramus Deo sacrificium laudis*: & 16. *Benefacere & communicare* (scilicet bona vestra) *ne obliviscamini, nam talia sacrificia perplacent Deo.*

3. Aliud autem est placere Deo, aliud eum placare quasi offensum aut iratum. Christianis unicum sacrificium placans Deum est passio Christi, quæ Deum hominibus propitium reddidit tollendo peccata mundi. Deo autem placemus omnia Christi Jussa peragenda, & qui ultra Christi Jussa alia adinvenit sacrificia ad Deum mulcendum, is ethnicè nugatur. *Quid dices de peregrinationibus religionis ergo?* Dico eas non suscipi nisi à vœsanis. Quis mandavit? quis compensabit? Si verò fiunt hypocriticè lucri causâ, tum alia res est.

4. Quod attinet ad oblationes, decimas & similes erogationes, dico eas esse partes cultus Christiani. Nam exhibentur ad sustentandum cultum aut saltem solennitatem cultus Dei; at Christus qui jussit Deum coli jussit omnia exhibere quæ sunt Dei cultui necessaria. Et testatur Apostolus 1 Cor: 9. 14. *Statuit Dominus quòd prædicatores Evangelii ex Evangelio vivant.*

Obj: Tamen hæ erogationes videntur non partes esse sed adjumenta cultus. *Resp:* 1, Quicquid fit ad adjuvandum cultum id ipsum est cultus, nam exhibet honorem Deo. 2, In cultu Dei alia sunt magis alia minùs principalia: sic devotio mentis est principalior humiliatione corporis; tamen vel humiliatio corporis est pars cultus. 3, Illæ erogationes sunt quidem adjumenta cultus publici, at sunt actus seu partes cultus privati; is qui consulit cultui pub-

lico, eo ipso colit Deum privatim seu in pectore suo.

5. Sed sustentetur prædicatio Evangelii, sustentetur cultus publicus, potest tamen quæri an debeat sustentari statis & lege positis decimis, fundis, &c. an potius ali debeat ex voluntariâ contributione populi Christiani. *Resp.* Quicquid terrenorum habet Ecclesia, illud habet ex merâ eleemosynâ populi Christiani, (leges nostrates appellant Francalmoyne); nam Christus nec sibi habuit nec Ecclesiæ reliquit quo caput reponeret. *At cur lege cogimur decimas &c. dare?* 1, Quia justum est ut suum cuique tribuatur, adeoque hoc est lege sancendum. Interea monendi estis non vos dare decimas sed proavos vestros dedisse; illorum erat pietas dare, vestra est Justitia solvere. 2, Qui lege cogitur aliquid facere, is intelligitur id facere voluntariè; quia lex est voluntas omnium.

6. *Potestas civilis num potest justè quicquam subtrahere de redditibus Ecclesiæ?* Ego nihil definio de publico; at tu private memento, Ecclesiam hæc tenere ut eleemosynam Patrum; eam ergo quantulacunque bonorum parte vi aut fraude spoliare, saltem tam esse malignum ac si mendico obolum aliunde datum tu abripias.

S E C T. XIX.

*De Juramento, Adjuratione & Promissione seu Vo-
to.*

1. **J**urare est Deum testem invocare, 2 Cor: 1. 23.
Deum testem invoco in animam meam. Ac ap-
pellatur Deus ut testis facti sed ut jurantis Judex, ut
patet ex communi formâ: *Ita me Deus adjuvet & sa-
crofanta ejus Evangelia.* Quibus verbis perpurus
perfectè abrenunciat misericordiæ divinæ. Est au-
tem Juramentum assertorium vel promissorium.

2. Juramentum oritur ex necessitate humanâ &
ex fide in Deum. Necessitas Jurandi ex parte Ju-
rantis est quòd homo pronus sit ad mentiendum,
adeoque quamplurimis vinculis ad veritatem alligan-
dus. Necessitas ex parte exigentis Juramentum as-
sertorium est quòd homo nec per se nec per alios
possit omnia scire, Deum autem nihil latet. Ne-
cessitas exigentis Juramentum promissorium est quòd
homo non semper possit hominem cogere ut pro-
missa adimpleat, itaque Deum sibi adiutorem assu-
mit.

3. Juramentum oritur ex Fide quòd Deus sciat
omnia, & quòd sit justus impiorum punitor. Hinc
Jure statuitur pars cultus divini, Es: 45. 23. *Mibi
omne flectetur genu, omnis lingua jurabit.* In Jura-
mento quippe necessario summâ cum reverentiâ re-
cognoscitur & omniscientia Dei & Justitia.

4. Non tamen ut aliæ divini cultus partes sic Juramentum etiam frequentandum est, imò non est adhibendum nisi cogente necessitate; nam ut in causâ gravi, omnia ad Deum referre, *i. e.* Jurare sit Deum honore prosequi, sic qui incerta aut levia jurat, prorsus non colit Deum sed contemnit, ejus Majestatem rebus non honore dignis admiscens.

5. Sed num Juramentum à Christo præcipitur? aut est pars cultus Christiani? *Resp:* Colimus Deum jurando, Christum jurando per Evangelium. Et hoc posterius non expressè quidem & particulariter mandat Christus, mandat autem in genere, nimirum ut colamus Filium sicut colimus Patrem, *Jo:* 5. 23. Juramentum ergo quoad rationem genericam supponitur à Christo ut pars cultus moralis, quoad rationem specificam nimirum jurandi per Christum, sic inquam Juramentum induit Christianismum. Pariter fâre de precibus, adorationibus, &c.

Obj: Christus videtur prorsus exterminâsse Juramenta, *Mat:* 5. 34. *Ego dico vobis non omnino jurare.* Respondet Thomas: Non jurare, *i. e.* non ex vestrâ voluntate, nec nisi necessitate cogente. Grotius hinc impugnari ait sola Juramenta promissoria, nec vel ea nisi quæ non sunt necessaria. Nam talia voluntaria Juramenta procedunt è malo, *i. e.* aut ex malâ opinione quòd sit pusillanimum timere peccatum, vel ex malo defectu reverentiæ erga Deum. Hammondus dicit: ex malo, *i. e.* ex illo malo seu Diabolo, cui jure attribuuntur voluntaria ista Juramenta ad quæ appetitus sensitivus nullatenus invitat. Atque hæc sufficere videntur; utcunque autoritas Sancti Pauli debet sufficere qui certè non jurâset in Epistolis, si Christus omne prorsus Juramentum prohibuisset.

6. Juratur per solum Deum tanquam testem & Judicem, sed & per creaturas in ordine ad Deum, e. g. per Evangelium quatenus est revelatio misericordiae divinae in Christo. Sic Josephus juravit per vitam Pharaonis tanquam grande Dei beneficium populo Aegyptiaco, Fortasse etiam Josephus oppignoravit Deo salutem Pharaonis, ut Apostolus dixit: Deum testem invoco in animam meam.

7. Adjurare est per quandam similitudinem Jura-
menti alium ad aliquid faciendum provocare. 1 Cor.
1. 10. *Obsecro vos fratres per nomen Domini nostri
Jesu Christi, quòd omnes dicatis idem, &c.*

8. Votum est promissio facta Deo. Vovere quidem & devovere significat consecrare aliquid Deo, sive facto sive promissione. Sic Decii Pater & Filius dicuntur se devovisse Diis manibus cum ruerent praecipites in tela hostium. Sic equum Trojanum Graeci votum pro reditu simulabant. Hic de voto agimus solum in quantum est promissio facta Deo. Ac ea videtur jure statui pars cultus divini. Nam dare Deo cum possis est eum colere (ut dictum est Sect: praecedente) ergo & promittere quòd dabis cum possis est eum colere. Haecque pars cultus videtur à naturà ipsà doceri cum & Gentiles & Judaei & Christiani multa voveant.

9. Ac Christiani quidem in Baptismo omnes generale exhibent votum de renuntiando Diabolo, &c. Quae sunt post particularia vota videntur nihil esse nisi recognitiones & repetitiones (quoad aliqua particularia) voti baptismalis. Nam in hoc promissimus omnia quae ex Dei gratia sunt in nostra potestate; recognoscentes autem quòd in eo praestando multoties defecimus, ideo pie identidem vovemus meliorem vitam, i. e. repetimus votum baptismale.

10. Non debet voveri malum quia Deo odiosum, nec indifferens quia talia contemnuntur; votum ergo est semper de aliquo quod placet Deo, è nobis autem qui per omnia servi sumus, nihil potest placere Deo nisi aliquis actus virtutis seu aliqua pars officii nostri. Officium autem nostrum dignoscitur ex mandato Dei sive per naturam sive per Evangelium. Quædam autem mandantur expressè, alia generali præcepto tanquam conducentia ad id quod mandatur expressè. Sic cultus publicus mandatur expressè, at Templà condere, adire, &c. mandari intelliguntur tanquam necessaria ad cultum publicum. Ac in utrisque his aliquando vovere licet.

11. Observa etiam quod vovemus debere esse in nostrâ potestate, alioquin aliena promittimus. Quia autem nihil est absolutè in nostrâ potestate, itaque vota fieri debent sub conditione bene placiti divini; ut solemus dicere loquentes de futuro: *Deo volente* aut *Si Deus dederit*.

11. Monet Calvinus *l. 4: Inst: c. 14*. In omni voto tria esse considerata; 1, Deum qui est absolutè Dominus, nec gaudet inventionibus nostris: 2, Nosmet ne votum potentiam superet, aut vocationi cui alligamur adversetur, aut libertatem quam Deus dedit infringat: 3, Animum seu consilium vovendi. Ac ille quidem reducit omnia consilia seu rationes bene vovendi ad quatuor capita, quorum duo respiciunt præteritum duo futurum. Primum est cum in gratitudinem ob beneficia accepta aliquid promittimus Deo. Sic Jacobus vovit decimas, *Gen: 28*. Secunda ratio vovendi est cum nosmet affligimus ob peccata admissa. Tertia ratio est cum vovemus tale vel tale peccatum non admittere ut nosmet cautiore reddamus: 4, Ut quasi calcaribus exci-

excitemur ad officium, ad quod memoria voti ferè compellit.

13. Interea votis & aliis quæ non expressè mandantur utimur non ut Deo per se placentibus, sed ut conducentibus ad ea quæ Deo placent, *i. e.* ab eo mandantur. Sic qui vovet & dat Ecclesiæ ad supportandum cultum Dei placet Deo vovendo & dando quia placet ei cultum sui supportari. At qui vovet peregrinationem ad colendum Beatam Virginem in Templo quod est Loretta non placet Deo aut vovendo aut peregrinando, quia quidem Deo non placet quòd aut imago Virginis aut ipsa Virgo religiose colatur.

14. In Ecclesiâ Romanâ insigne est votum Monachismi. Ac Calvinus quidem loco citato luculenter ostendit differentiam inter veterem & modernum Monachismum, quem vide sis. Ego omnes Protestantes omnem video rejecisse Monachismum. Nam non est pars cultus Christiani quia non institutus à Christo, nec docet experientia eum esse adjumentum cultus Dei, adeoque esse populo Christiano ut grave sic inutile onus. Imò votum illud perpetuæ castitatis & arrogantiae esse videtur & contra consilium Apostoli, *1 Cor. 7. 5.* Votum etiam paupertatis expressè contradicit Apostolo jubenti quòd nemo edat nisi qui laborat, utque omnes laboremus ad hoc ut aliis benefacere possimus. Ac quidem ut res se habuerunt ab aliquot jam centuriis annorum, ista *Ordinum* multitudo nil nisi firmavit tyrannidem Aulæ Romanæ; saltem si audire lubet Machiavelum. Is ait quòd regnum Sacerdotum à longo tempore intercidisset nisi quòd plebs ingenti opinione sanctitatis pauperum horum Fratrum contineretur.

15. Verum illi pro hoc voto paupertatis disputant ex Mat: 19. 21. *Si vis esse perfectus, vende omnia & dà egenis & sequere me.* Hinc colligunt abjectionem temporalium aut esse statum perfectionis aut saltem ad eum summopere conducere. Respondet Calvinus: Si vis esse perfectus, *i. e.* si vis haberi qualem te prædicas, *vende omnia, &c.* Hoc igitur juveni edicitur non ad reddendum eum perfectum sed ad perfectionem ejus probandam. Sed & aliter respondere possumus: *Si vis esse perfectus, vende, &c. i. e.* perfectioni legali quæ evanescit, superstrue evangelicam quæ permansura est. Veni & sequere me fontem perfectionis, quod tamen moneo te non posse præstare (ut res nunc se habent) nisi omnia temporalia abjicias; nam non est mihi quo caput reponam, itaque nec iis erit qui me sequuntur.

Obj. Dices, non incumbit omnibus Christianis abjicere temporalia, ergo hoc proponitur Juveni ut via ad perfectionem: *Resp.* Abjicere temporalia non exigebatur ab illo nisi solum, quia propter istius temporis angustias impossibile erat simul ista tenere & Christum sequi, & eadem lege idem exigitur ab omni Christiano. Quin imò suscipientes Christianismum omnes omnia hujus mundi abjicimus non quidem actu sed præparatione animi.

17. Tandem observa Col: 3. 14. Charitas appellatur *vinculum perfectionis*, etiam sine ul' à abjectione temporalium: Et 1 Cor: 13. 3. *Si omnia bona distribuero in pauperes, sine charitate nihil est:* Ecce: Charitas est summa perfectio etiam sine abjectione bonorum, ac abjectio bonorum sine charitate nihil est. Et appello sensum communem, si tractare temporalia ne ipse aliis sis onerosus, & ut quam plu-

plurimis possis prodesse non sit majoris charitatis, quàm temporalia omnia sic simul abjicere ut nec pauperibus possis prodesse, nec quidem aliis non esse onerosus.

18. Huc etiam attinet loqui de meliore (quod appellant) bono. Quædam scilicet bona mandari, & ea esse officii omnium Christianorum & necessaria ad salutem; alia non nisi suaderi, (unde dicuntur consilia) nec esse necessaria ad salutem, sed solum esse meliorem viam ad cælum, unde etiam appellantur opera supererogationis & meliora bona scilicet quàm quæ sunt vulgo Christianorum necessaria. Hinc etiam concluditur vota debere fieri de bono hoc meliori; nam vota quò sunt magis voluntaria eò sunt ditiora; at hoc melius bonum est maximè voluntarium, cum non cadat vel sub necessitate finis, quippe sine quo salvari possumus.

19. Ego verò non intelligo quid sibi velint ista opera supererogationis, nec capio quomodo possit homo ultra officium Deo placere; nam totus est à Deo, ergo Deo debet totum suum posse. Et summa legis est: *Diliges Dominum Deum tuum toto corde*, &c. Totum cor, tota vis hominis mandato exigitur, quid relinquitur consiliis?

20. Reperiuntur quidem consilia in novâ Lege, verum non de iis quæ placeant Deo, sed de iis quæ profint nobis. Sic quod dicit Dominus Juveni de *vendendo omnia*, &c. sonat ut consilium Juveni profuturum in sequendo Christum. Sic 1. Cor: 7. 6. *Hoc dico ex permissione non ex mandato*: & v: 12. *Cæteris loquor ego non Dominus*: & v: 25. *De virginibus non habeo mandatum à Domino, sed sententiam meam afferro*, &c. Nec hæc quæ ibi suadet afferuntur quasi placeant Deo, sed quæ nos in Deo placen-

do adjuvent, v: 35. *Hæc loquor commodo vestro
ut attendatis Domino sine distractione.*


Obj: Martha benefecit quantum quidem necesse
erat ad salutem; at Maria fecit melius, ergo super-
erogavit. *Resp:* Martha fecit omnia quæ interce-
dentibus Christi meritis erant necessaria ad ejus salu-
tem, i: e: pœnituit eam de ommissis; at Maria fecit
melius, i: e: minus omisit. Martha enim non ap-
plicavit sibi merita Christi per hoc quod valdè occu-
pata erat in prandio apparando, at Maria audiendo
& colendo Christum eum sibi propitium reddidit.
Sic 1 Cor: 7. 38. *Qui eam connubio jungit, bene facit,*
i: e: non peccat per v: 28. *Qui eam non jungit connu-
bio facit melius,* i: e: prudentius per v: 32, &c.

Sed anhelò ad finem hujus summæ in quâ aliqua
desunt Capita, nam nihil dixi de Angelis, de me-
rito bonorum operum, de libertate Christiana, &c.
Sed ea paucis absolvi possunt & formâ appendicis
istis affui; nisi quidem visum fuerit ea servare secun-
dæ (si Deus dederit) Editioni horum etiam quæ
posita sunt non nihil tortassis emendaturæ.

Feb: 11. 1680.



F I N I S.



ERRATA.

L Ege p: 5: l: 16. notissimum. l: 24: convincente. p: 7: l: 19: est aut. p: 10: l: 11: hunc pro huc. l: 12: iipsis. p: 20: l: ult: temporis. p: 21: l: 4: in utriusq; p: 22: l: 23: & ponetur. p: 23: l: 23: dijudic. p: 28: l: 27: frequenter. p: 43: l: 13. itaq; p: 45: l: 12: præficiens pro præsciens. p: 48: l: 25: opponitur. p: 64: l: 26: dico. l: 30: innumeros. l: 34: & pro et. p: 76: l: 22: consuitur. p: 80: l: 31: confitæ. p: 84: l: 24: arbore vitæ. p: 99: l: 28: caram. p: 108: l: 27: an pro at. p: 109: l: 9: Christiani. p: 114: l: 18: abstrusum. p: 117: l: 25: suppositum. p: 122: l: 23: Domini. p: 125: l: 2: tentationes. p: 130: l: 6: definit. p: 137: l: 9: increpaveris. l: 23: capax. p: 147: l: 12: Christo. p: 149: l: 27: separata. p: 165: l: ult: mo: p: 172: l: 6: eo usq; p: 179: l: 12: § 22: n: 2, p: 181: l: 28: ostensum. p: 183: l: 6: si quæ. 184: l: 4: peccata. p: 187: l: 5: damnetur. p: 189: l: 15: loquuti. p: 196: l: 29: vere pel: p: 201: l: 5: aut pro ut. p: 209: l: 1: faciendis distinguenda: l: penult: novitate. p: 221: l: 10: dele quæ est. p: 226: l: 3: mali. p: 240: l: 17: impedit. p: 245: l: 11: initiatus. p: 246: l: 9: determinatum. p: 250: l: 21: esse pro est. p: 25: l: 10: & c. character. p: 255: l: 14: Num pro non. p: 258: l: 13: melius etiam significatur Ecclesiastica unitas. p: 260: l: 26: hoc Sacramentum. p: 263: l: 6: quid ni in hoc. p: 270: l: 8: panis & p: 271: l: 24: deduci. p: 272: l: 15: per formam. p: 289: l: 9: mandata. l: 20: decôr: p: 297, l: 13. peragendo. p: 299: l: 8: perjurus. p: 302: l: 20: 12.

